

ಯೋಹಾನನು ಬರೆದ ಯೇಸುವಿನ ಸುವಾರ್ತೆ ಯೋಹಾನನೇ ಲೀಖ್ಯೋತೆ ಯೇಸುನಿ ಅಲ್ಲ

ಸಮಾಚಾರ್ ಮಾಲುಮ್ ಕರಾನು

ಯೋಹಾನಾನೆ ಲೀಖ್ಯೋತೆ ಸುವಾರ್ತೆನು ನವು ಒಪ್ಪಂದಮ ಯೇಸುಕ್ರಿಸ್ತನಿ ಜಿವ್ವನಿ ಬಾರೇಮ ಬೋಲಾನು ಹುಯಿರುತೆ ಚಾರ್ ಪುಸ್ತಕ್‌ಮ ಆಬಿ ಏಕ್ ಹುಯಿರುಸ್. ಆ ಚಾರ್ ಪುಸ್ತಕನ ಸುವಾರ್ತೆ ಕರಿ ಬೋಲಸ್, ಅನಿ ಮತಲಬ್ ಅಲ್ಲು ಸಮಾಚಾರ್. ಯೇಸುನಿ ಮರಣ್ಣ ಪಾಲ್ಚಳ್ ಮತ್ತಾಯ ಮಾರ್ಕ್ ಅಜ್ಜು ಲೂಕಥಿ ಲೀಖೈರುಸ್. ಯೋಹಾನಾನೆ ಲೀಖ್ಯೋತೆ ಸುವಾರ್ತೆ, ಕ್ರಿಸ್ತ ಪೈದಹುಯೊತೆ ಖ್ವಮಾರ್ 90 ವರಖ್ವೆನ ಪಾಲ್ಚಳ್ ಅಪೊಸ್ತಲ ಹುಯಿರೋತೆ ಯೋಹಾನಥಿ ಲೀಖೈರುಸ್.

ಆ ಪುಸ್ತಕ ಲೀಖೈರುತೆ ಯೋಹಾನಥೀಸ್ ಕರಿ ಬೋಲಾನ ಕೋಹೊಯ್ನಿ. ಕತೋಬಿ ಆ ಪುಸ್ತಕಾನು ಲಿಖಾವಟ್‌ನಿ ಪರಕ್ ಯೋಹಾನಾನೆ ಲೀಖ್ಯೋತೆ 1 2 3 ಚಿಟ್ಟಿನಿತರ ಹುಯಿರುಸ್. ಥೋಡು ಜ್ಞಾನು ಲೀಖಾವಟ್ ಕರಾವಾಳು, ಯೋಹಾನ ಆ ವಖ್ವತ್‌ಮ ಎಫೆಸ ಖ್ವಿಯೇರ್‌ಮ ಜಿವ್ವು ಕರುಕರ್ತೊಥೊ.

ಇನಖ್ವಾಜಿ ಭಾಖ್ವತ್ ಆ ಪುಸ್ತಕ ಎಫೆಸಮಸ್ ಲೀಖೈರುಸ್ ಕರಿ ಬೊಲ್ಟೆರ್‌ವ್ವ್. ಯೋಹಾನ ಆ ಪುಸ್ತಕ್‌ಮ ಲೀಖ್ಯೋತೆ ಶಾತ್‌ಕತೊ ಯೇಸುಕ್ರಿಸ್ತ ಜಿವಿರ್ದೊತೆ ದೇವ್‌ನೊ ಛಿಯೊ ಕರಿ ಅದ್ವಿಖ್ವಾರು ವಿಶ್ವಾಸ್ ಕರಾನ ಮದತ್ ಹುವಾಸ್ ಕರಿ ಛೋಡಿ ಬೋಲಿರಾಖ್ಯುಸ್. ಯೋಹಾನ 20:31 ಅನ ವಿಶ್ವಾಸ್ ಕರಾಥಿ ಇನ ನಾಮ್‌ಅಪ್ಪುನ ಜಾನ್ ಛಾ. ಆ ಪುಸ್ತಕ ಯೆಹೂದ್ಯರ್ ಕೊಯಿನ್ನೆ ಇವ್ವುನಾಬಿ ಲೀಖೈರುಸ್. ಯೋಹಾನಾನಿ ಸುವಾರ್ತೆ ಛೋಡಿ ಪರಕ್ ಛಾತೆ ತೀನ್ ಸುವಾರ್ತೆಥೀಬಿ ಅಲಕ್ ಹುಯಿರುಸ್, ಆ ಪುಸ್ತಕ್‌ಮ ಯೇಸುನೆ ಕರೊತೆ ಅದ್ಭುತ್

ಕಾಮ್ನ ಘಣು ದಿಮಾಕ್‌ಧಿ ಲೀಖಿರಾಖ್ಯೊಸ್. ಇನಿ ಮತ್ಲಭಾನಿ ವಾತೆನ ಜಾಖ್ತ್ ಲಿಖಿರಾಖ್ಯೊಸ್ಕೊಯ್ನಿ. ಅಜ್ಜು ಯೇಸುನು ಬ್ಯಾಪ್ತಿಸ್ಮನಾಬಿ ಜಂಗ್‌ಗಳಮ ಇನ ಹುಯುತೆ ಖ್ತಾಪ್ಪಿನಿ ಬಾರೇಮ ಲೀಖೈರುಕೊಯ್ನಿ.

ಕಾಡಿದೇಖೊ

1. ಯೋಹಾನ್ನಿ ಸುವಾರ್ತೆನಿ ಶುರುವಾತ್. 1:1-18
2. ಯೇಸುನೆ ಕರೈತೆ ಕೈಏಕ್ ಅದ್ಭುತ್ ಕಾಮ್ನಿ ಬಾರೇಮ ಲೀಖಿರಾಖ್ಯತೆ. 1:19—12:50
3. ಇನಕೇಡೆಥು ಯೇಸುನಿ ಜೀವನ್‌ಮ ಇನಿ ಮರಣ್ ಅಜ್ಜು ಮರಣ್‌ಧಿ ಜಿವಿನ್ ಉರೈತೆ ಇನಿ ಬಾರೇಮ ಲೀಖೈರುತೆ. 13:1—20:31
4. ಯೋಹಾನ್ 21 ಅಧ್ಯಾಯಮ ಯೇಸು ಮರಿನ್ ಜಿವೈಹುಯಿನ್ ಉರೈತೆ ಬಾದ್ಮ ದೆಖಾಯೊತೆ ಬಾರೇಮಾಬಿ ಅಜ್ಜು ಆ ಪುಸ್ತಕ ಲೀಖೈರುತೆ ಉದ್ದೇಶ್ ಶಾತ್‌ಕರಿ ಬೋಲಾನು ಆ ಸುವಾರ್ತೆಧಿ ಖ್ವರ್ತಿ ಹುವಾಸ್. 21:1-25

ಜಾನ್ನಿ ವಾತೆ

- 1 ಶುರುವಾತ್ ಪಹಿಲೆ ವಚನ್ ಥು; ಯೋ ವಚನ್ ದೇವ್‌ಕನ ಥು; ಯೋ ವಚನ್ ದೇವ್ ಹುಯಿರುಥು.
- 2 ಯೋ ವಚನ್ ಶುರುವಾತ್‌ಥೂಸ್ ದೇವ್‌ಕನ ಥೊ.
- 3 ಇನೇಥಿನ್ ದೇವ್ನೆ ಅಖ್ಯೊಸ್ ಬಣಾಯೊ, ಬಣಾಯೊತೆ ಯೋ ತಮಾಮ್ ರಾಘಾಮ, ಏಕ್‌ಬಿ ಯೋ ಕೊಂತೆ *ಉಬ್‌ಜ್ಯುಕೊಯ್ನಿ.
- 4 ಇನಾಮ ಜಾನ್ ಥು. ಯೋ ಜಾನ್ ಅದ್ನಿ ಖ್ವಾರಾನ ಉಜಾಳು ಹುಯಿರ್ಲ್ಲ್ಯಥು.
- 5 †ಯೋ ಉಜಾಳು ಅಂಧಾರಾಮ ಚಮ್‌ಕಾಸ್, ಅಜ್ಜು ಅಂಧಾರು ಇನ ಮಾಲುಮ್ ಕರೈಕೊಯ್ನಿ.
- 6 ದೇವ್ನೆ ಏಕ್ ಖಬರ್‌ಲ್ಯಾವಳೊ ಏಕ್ ಅದ್ನಿನ ಮೋಕ್‌ಲ್ಯೊ ‡ಇನು ನಾಮ್ ಯೋಹಾನ್.

* 1:3 1:3 ಸೃಷ್ಟಿ-ಉಬ್‌ಜ್ಯುತೆ ಅಖ್ಯು † 1:5 1:5 ಅಂಧಾರು-ಪಾಪ ‡ 1:6 1:6 ಮತ್ತಾಯ 3:1; ಮಾರ್ಕ್ 1:4; ಲೂಕ 3:1,2

7 ಯೋ ಖ್ವಾರ ಅದ್ವಿನ ಆ ಉಜ್ಜಾಳನಿ ಸಾಕ್ಷಿ ದೈವಾನ ಆಯೊ. ಶನಕತೊ ಖ್ವಾರುಭಣು ಆ ಸಂದೇಶ್ಚ ಖ್ವಮ್‌ಜಿನ್ ವಿಶ್ವಾಸ್ ಕರ್ನುಕರಿ ಆಯೊ.

8 ಯೋಹಾನ್‌ಸ್ ಯೋ ಉಜ್ಜಾಳು ಕಾಹೆ, ಪಣ್ಣಿ ಯೋ ಉಜ್ಜಾಳಾನಿ ಬಾರೇಮ ಸಾಕ್ಷಿ ದೈವಾನ ಆಯೋತೆ.

9 ಯೊ ಖ್ವಾಚು ಉಜ್ಜಾಳು ಹುಯಿರುಥು ಅಜ್ಜು ಯೊ ಜಗತ್‌ಮ ಆವಾಳು ಥು, ಯೊ ಅಖ್ವಾ ಅದ್ವಿನ ಉಜ್ಜಾಖ್ವದೇವಾಳು ಹುಯಿರ್ವ್ವು.

10 ವಚನ್ ಜಗತ್‌ಮ ಥು, ಅಜ್ಜು ದೇವ್ಚೆ ಇನೇಥಿಸ್ ಜಗತ್ತ್ ಬಣಾಯೊ, ತೋಬಿ ಜಗತ್ ಇನ ಮಾಲುಮ್ ಕರ್ಯ್ಕೊಯ್ಚಿ.

11 ಯೋ ಇನ ಶೊಂತ್ ದೇಖ್ವೊ ಆಯೊ, ತೋಬಿ ಇನು ಶೊಂತ್ ಅದ್ವಿಸ್ ಇನ ಮಳೈಲಿದುಕೊಯ್ಚಿ.

12 ಸಿಕತೋಬಿ ಕೋಣ್-ಕೋಣ್ ಇನ ಮಳೈಲಿದುಕಿ, ಕತೊ ಇನ ನಾಮ್‌ಪರ್ ವಿಶ್ವಾಸ್ ಕರ್ಯ್ಕೀ, ಇವ್ವುನ ದೇವ್ವಲಡ್ಕಾ ಹುವಾನ ಹಕ್ ದಿದೊ.

13 ಇವ್ವೆ ಲ್ಲೋಯಿನಿ ಸಂಬಂದಾಧಿ ರ್ವೊ, ಶರೀರ್‌ನಿ ಆಖ್ವೊಥೀಬಿ ರ್ವೊ, ಪರ್ವಾಣಿ ಖ್ವಿಂಗ್‌ಥಿಬಿ ರ್ವೊ ಪೈದಹುಯುತೆ ಕಾಹೆ; ದೇವ್‌ಥೀಸ್ ಪೈದಹುಯುತೆ.

14 ಯೋ ವಚನ್ ಅದ್ವಿನು ರೂಪ್‌ನ ಲೀನ್ ವಾರ್‌ಖೊಥೀಬಿ ಅಜ್ಜು ಖ್ವಾಚಥೀಬಿ ಭರ್ವೆರ್ವ್ವಾಳೊ ಹುಯಿರೊಸ್. ಅಜ್ಜು ಅಪ್ಪಾಮ ಜಿವ್ವುಕರೊ, ಅಜ್ಜು ಅಪ್ಪೆ ಇನ ಮಹಿಮೆನ ದೇಖ್ಚಿ ಯೊ ಬಾನೊ ಏಕ್‌ನೊ ಎಕ್ವಸ್ ಥಿಯ್ಯಾನು ಮಹಿಮೆ ಹುಯಿರೊಥೊ.

15 ಯೋಹಾನ್‌ನೆ ಇನಿ ಬಾರೇಮ ಸಾಕ್ಷಿ ಬೋಲ್ಚೊ ಅಜ್ಜು ಚಿಕರ್ತೊ ಹುಯಿನ್, “ಮೇ ಕಿನಿ ಬಾರೇಮ ಬೋಲಿರಾಖೊಸ್ಚಿ ಯೋಸ್ ಆ ಹುಯಿರೊಸ್.” ‘ಮಾರ ಪಾಲ್ಚೆ ಆವವಾಳೊ ಲ್ಲಾ ಕರಿ ಕಿನಿ ಬಾರೇಮ ಬೋಲ್ಚೊಥೋಕಿ ಯೊ ಮಾರೇಥಿಬಿ ಮಹಾನ್ ಹುಯಿರೊಸ್. ಶನಕತೊ ಯೊ ಮಾರ ಪೈದಾಖ್ವೊನ್ ಅಗ್ಗಳಸ್ ಯೋ ಥೊ’.

§ 1:12 1:12 ಮಳೈಲಿದುಕಿ-ಮಾನಿಲ್ವವಾನು

16 ಇನಿ ವಾರ್ಖ್ವಾನಿ ಭರ್‌ಪೂರ್‌ಥಿಸ್, ಅಪ್ಪುನಖ್ವಾರು ಆಶೀರ್ವಾದ್‌ಪರ್ ಆಶೀರ್ವಾದ್ ಮಳ್ಳು.

17 ಧರ್ಮಶಾಸ್ತ್ರ ಮೋಶೆಧಿ ದೇವೈರ್‌ಲ್ವಸ್ ಕತೋಬಿ ವಾರ್‌ಖ್ವೊಬಿ ಖ್ವಾಚ್ಚಬಿ ಕ್ರಿಸ್ತಧಿ ಆಯುತೆ.

18 ದೇವ್ವ ಕೋಣ್‌ಬಿ ಕದೇಬಿ ಕೊ ದೇಖ್ವುನಿ, ಕತೋಬಿ ಏಕ್‌ನೊ ಏಕ್ ಛಿಯೊ ಯೊ ದೇವ್ವಿಘೋಣಿ ಛಾ. ಅಜ್ಜು ಬಾನಿ ಜೋಡ್ವಾಸ್ ಛಾ ಇನೇಸ್ ಅಪ್ಪುನ ಯೊ ಕೋಣ್ ಕರಿ ವತಾಳಿರಾಖ್ವೊಸ್.

ಬ್ಯಾಪ್ತಿಸ್ತ ದೆವಾಳೊ ಯೋಹಾನ್ನಿ ಸಂದೇಶ್

(ಮತ್ತಾಯ 3:1-12; ಮಾರ್ಕ 1:1-8; ಲೂಕ 3:1-18)

19 ಯೆರೂಸಲೇಮ್‌ನು ಯೆಹೂದ್ಯರ್‌ನ ಅಧಿಕಾರಿಯೋನೆ ಯಾಜಕರ್ ಅಜ್ಜು ಲೇವಿವಾಳಾನ ಯೋಹಾನಕನ ಮೋಕ್ಲೆನ್, “ತೂ ಕೋಣ್?” ಕರಿ ಪುಲ್ಲಾವನಟೇಕೆ ಮೋಕ್‌ಲ್ಯು.

20 ತದೆ ಯೋಹಾನನೆ ದಬಾಯೊಕೊಂತೆ, “ಮೇ ಕ್ರಿಸ್ತ ಕಾಹೆ” ಕರಿ ಖ್ವಾರಾನ ಖ್ವಾಮ್ಚೆ ಬೋಲ್ಯೊ.

21 ಇಮ್‌ರ್‌ಲ್ವಯುತೊ, “ತೂ ಎಲೀಯಕಿ ಶು? ಕರಿ ಇವ್ಚೆ ಬೋಲಖ್ವತ್ತರ್,

ತದೆ ಯೋಹಾನನೆ ‘ಕಾಹೆ’ ಕರಿ ಬೋಲ್ಯೊ.

“ತೂ ಆವ್ವುಘೂತೆ ಪ್ರವಾದಿ ಕಾಹೆಕಿ ಶು?” ಕರಿ ಪಾಲ್ಟೊ ಬೋಲಖ್ವತ್ತರ್,

“ಮೆ ಕಾಹೆ” ಕರಿ ಇನೆ ಫರಿನ್ ಬೋಲ್ಯೊ.

22 ತದೆ ಇವ್ಚೆ “ಇಮ್‌ಕತೊ, ತೂ ಕೋಣ್? ಹಮೂನ ಬೋಲ್, ಹಮೂನ ಮೋಕ್‌ಲ್ಯುತೆ ಇವ್ವುನ ಹಮೆ ಜವಾಬ್ ದೇವ್ವು; ತಾರಿ ಬಾರೇಮ ತೂ ಶಾತ್ ಬೋಲಾಸ್?” ಕರಿ ಪುಲ್ಲಾಯು.

23 ಯೋಹಾನಾನೆ, ಪ್ರವಾದಿ ಹುಯಿರೋತೆ ಯೆಶಾಯನೆ ಬೋಲಾನಿತರಸ್, ‘ಪ್ರಭುನಿ ವಾಟ್ನು ಖ್ವೊದುಕರೊ ಕರಿ ಬೋಲಾನು

ಉಜ್ಜಾಡಿ ಝುಗೋಮ ಚಿಕ್ರವಾಳಾನಿ ಅವಾಜ್ ಮೇಸ್' ಕರಿ ಜುವಾಬ್‌ದಿದೊ.*

24 ಫರಿಸಾಯರ್‌ಥಿ ಮೋಕ್ಲಾಯುಹುಯು ಸಂದೇಶ್ ದೈವಾಳು ಅದ್ವಿ ಹುಯಿರುಥು.

25 ಇವ್ವೆ ಯೋಹಾನ್ನ ಬೋಲ್ಯು, “ತೂ ಕ್ರಿಸ್ತಬಿ ಕಾಹೆ ಕರಿ ಬೋಲಾನು ಉಷೇತೊ ಎಲೀಯಬಿ ಕಾಹೆ, ಪ್ರವಾದೀಬಿ ಕಾಹೆ, ಇಮ್‌ಕತೊ, ತೂ ಬ್ಯಾಪ್ತಿಸ್ಮ ಶನ ದೇಸ್?” ಕರಿ ಪುಲ್ಲಾಯು.

26 ತದೆ ಯೋಹಾನನೆ, “ಮೇ ಪಾಣಿಥಿ ಬ್ಯಾಪ್ತಿಸ್ಮ ದೈವಾಳೊ, ಕತೋಬಿ ತುಮೂನ ಮಾಲುಮ್‌ಕೊಂತೆ ಏಕ್ ಜಣೊ ತುಮಾರ ಇಚ್‌ಮ ಛಾ.

27 ಯೋಸ್ ಮಾರ ಪೀರೆ ಆವಾಳೊ ಹುಯಿರ್ರೋಸ್, ಇನಿ ಖೋಬ್‌ಡಾನಿ ಡೋರಿ ಛೋಡಾನಾಬಿ ಮೇ ಲ್ಹಾಯೇಕ್‌ಕೊಯ್ವಿ” ಕರಿ ಬೋಲ್ಯೊ.

28 ಆ ಅಖ್ವಿಸ್ ಘಟನೆ ಬೇಥಾನ್ಯಮ ಚಾಲ್ಯು. ಆ ಯೋರ್ದನ್ ನದ್ದಿನ ಪೂರಬ್ ದಿಕ್ಕಿಲ್ಲಾ ಹಿಜ್ಜಾಸ್ ಯೋಹಾನ ಬ್ಯಾಪ್ತಿಸ್ಮ ದೆವ್‌ಕರ್ತೊಫೊ.

ದೇವ್‌ನು ಮೇಂಡಾನು ಚೆಲ್ವು

29 ಇನವ್ವಾಣೆ ಯೋಹಾನನೆ ಇನಾಖನ್ನೆ ವಳ್ಳಾವ್‌ತೊಫೋತೆ ಯೇಸುನ ದೇಖಿನ್, “ದೇವ್ ಮೇಂಡಾನ ಚೆಲ್ವಾನ ದೇಖೊ, ಯೊ ಜಗತ್‌ನು ಪಾಪ್ ದೂರ್ ಕರ್ತೆ.”

30 ಅದ್ವಿಖ್ತಾರನ, ‘ಮಾರ ಪಾಲ್ಲಳ್ ಆವಾಳೊ, ಮಾರೇಥಿಬಿ ಮಹಾನ್ ಹುಯಿರ್ರೋಸ್, ಶನಕತೊ ಮೇ ಪೈದಾ ಹುವಾನ ಅಗಾಡಿಸ್ ಯೋ ಫೊ’ ಕರಿ ಮೇ ಬೋಲ್ಯೋತೆ ವಾತೆ ಅನಿಸ್ ಬಾರೇಮ ಹುಯಿರ್ರೋಸ್.

31 ಅಜ್ಜು ಯೋಹಾನನೆ ಇನಿ ಸಾಕ್ಷಿದಿದೊ, “ಯೋ ಕೋಣ್ ಕರಿ ಮನಾಬಿ ಮಾಲುಮ್ ಕೋ ಥೂನಿ, ಕತೋಬಿ ಇಸ್ರಾಯೇಲ್ ಅದ್ವಿನ ಯೋ ಕೋಣ್ ಕರಿ ಮಾಲುಮ್ ಕರಾವಾನಖ್ವಾಜಿ, ಮೇ ಪಾಣಿನು ಬ್ಯಾಪ್ತಿಸ್ಮ ದೆವಾಳೊ ಹುಯಿನ್ ಆಯೋತೆ” ಕರಿ ಬೋಲ್ಯೊ.

* 1:23 1:23 ಯೆಶಾಯ 40:3

32 ಅತ್ರೇಸ್ ಕಾಹೆತೆ ಯೋಹಾನ ಬೋಲ್ಯೋತೆ ಸಾಕ್ಷಿ ಶಾತ್‌ಕತೊ, “ದೇವ್‌ನು ಆತ್ಮ ಸೊರ್ಗಧು ಪರ್ಯಾವಾನಿಘೋಣಿ ಉತ್ರೀನ್ ಆಯೂತೆ ಅಜ್ಜು ಇನಾಪರ್ ಐನ್ ಬೆರೂತೆ ಮೇ ದೇಖ್ಲೊ”.

33 ಯೊ ಆಸ್‌ಕರಿ ಮನಾಬಿ ಮಾಲುಮ್ ಕೊಯ್ಚಿ ಕತೋಬಿ ದೇವ್ಚೆ ಮನ ಪಾಣಿಧಿ ಬ್ಯಾಪ್ತಿಸ್ಮ ದೈವಾನ ಮೋಕ್ಷಿರಾಖ್ಯೊಸ್. ಯೊ ಮನ ಪಹಿಲೇಸ್ ಬೋಲಿರಾಖ್ಯೊಸ್, ‘ತೂ ದೇವ್ನು ಆತ್ಮ ಉಪ್ಪರ್‌ಧು ಏಕ್ ಅದ್ಮಿಪರ್ ಉತ್ರೀವಾನು ದೇಖಿಶ್, ಯೋಸ್ ಪವಿತ್ರಾತ್ಮಧಿ ಬ್ಯಾಪ್ತಿಸ್ಮ ದೆವಾಳೊ ಹುಯಿರೋಸ್’

34 “ಮೇ ಇನ ದೇಖ್ಲೊ ಅಜ್ಜು ಯೋಸ್ ದೇವ್‌ನೊ ಛಿಯೊಕರಿ ಮೇ ಸಾಕ್ಷಿ ದೆವ್‌ಕರೂಸ್” ಕರಿ ಬೋಲ್ಯೊ

ಯೇಸುನೊ ಪಹಿಲೊ ಶಿಷ್ಯ

35 ಇನ ಅಗ್‌ಲ್ಯ ದನ್ನೆ ಯೋಹಾನ ಇನ ಬೇಜ್ಜಣ ಶಿಷ್ಯರ್ನ್ ಜೋಡ್ಲೆ ಭಿಯೋಡೊ.

36 ತದೆ ಹಿಜ್ಜಾ ಯೇಸು ಒಳೇಜ್ಜಾತೊಥೋತೆ ದೇಖಿನ್, “ಹಂದೇಖೊ, ಬಲಿನಖ್ವಾಜಿ ದೇವ್ಚೆ ನೇಮಕ್ ಕರೊತೆ ಮೇಂಡಾನು ಚೆಲ್ಕು!” ಕರಿ ಬೋಲ್ಯೊ

37 ಯೋ ಭೇ ಶಿಷ್ಯರ್ ಯೋಹಾನ್ನಿ ಆ ವಾತೆನ ಖ್ವಮ್‌ಜಿನ್, ಯೇಸುನ ಪೀಲೆ ಗಯ.

38 ಇವ್ಚೆ ಪೀಲೆ ವಳ್ಳವತೆ ಯೇಸುನೆ ಪಾಳ್ವೊ ಫರೀನ್ ದೇಖ್ಲೊ ತದೆ ಯೊ ಇವ್ಚುನ ಬೋಲ್ಯೊ, “ತುಮೂನ ಶಾತ್ ಹೋಣು? ತದೆ ಇವ್ಚೆ ಜವಾಬ್ ದಿದು, “ರಬ್ಬಿ ತೂ ಕಿಜ್ಣಾ ಜಿವ್ವು ಕರಸ್?” ಕರಿ ಬೋಲ್ಯೊ (ರಬ್ಬಿ ಕತೊ “ಗುರು” ಕರಿ).

39 ಯೇಸುನೆ, “ಏನ್ ದೇಖೊ” ಕರಿ ಬೋಲ್ಯೊ ತದೆ ಖ್ವಾಂಜ್‌ನಿ ಖ್ವಮಾರ್, ಚಾರ್ ಘಂಟೆ ಹುಯಿರ್ಲ್ಲ್ಯಾ. ಇನಖ್ವಾಜಿ ಇವ್ಚೆ ಇನಕೇಡೆ ಜೈನ್, ಯೋ ಥೋತೆ ಝಗೋನ ದೇಖ್ಚು ಅಜ್ಜು ಯೋ ದನ್ ಇನ ಜೋಡೆಸ್ ರ್ಹಯು.

40 ಯೋಹಾನ್ನಿ ವಾತನ ಖ್ವಮ್‌ಜಿನ್ ಯೇಸುನಿ ಪೀರೆ ವಳೇಜಾತಥಾತೆ ಯೊ ಬೇ ಶಿಷ್ಯರಾಮ ಸೀಮೋನ್ ಪೇತ್ರನೊ ಭೈ ಹುಯಿರ್ರೋತೆ ಅಂದ್ರೆಯಬಿ ಏಕ್ ಜಣೊ.

41 ಅನೆ ಪಹಿಲೆ ಇನ ಭೈ ಹುಯಿರ್ರೋತೆ ಸೀಮೋನ್‌ಕನ ಜೈನ್, “ಹಮೂನ ಮೆಸ್ಸೀಯ ಮಳಿರ್ರೋಸ್” ಕರಿ ಬೋಲ್ಯೊ (‘ಮೆಸ್ಸೀಯ’ ಕತೊ ಇಬ್ರಿಯಾಮ “ಕ್ರಿಸ್ತ” ಕರಿ)

42 ಅಜ್ಜು ಸೀಮೋನ್ನ ಯೇಸುಕನ ಬುಲೈಲಾಯೊ.

ಯೇಸುನೆ ಸೀಮೋನ್ನ ದೇಖಿನ್, “ತೊ ಯೋಹಾನನೊ ಛಿಯೊ ಹುಯಿರ್ರೋತೆ ಸೀಮೋನ್, ಕತೋಬಿ ಹಮ್ಮೆಡು ‘ಕೇಫ’ ಕರಿ ಬೋಲ್ಯೊಲಿಶ್” ಕರಿ ಬೋಲ್ಯೊ. ‘ಕೇಫ’ ಕತೊ ಪೇತ್ರ ಕರಿ. ಅನಿ ಮತ್‌ಲಬ್ ‘ಚಿಪಾಟ್’.

ಯೇಸುನೆ ಫಿಲಿಪ್ಪ ಅಜ್ಜು ನತಾನಿಯೇಲ್‌ನ ಬುಲಾಯೋತಿ

43 ಇನ ಅಗ್ಲದನ್ನೆ ಯೇಸು ಗಲಿಲಾಯನ ಜಾವ್ಣುಕರಿ ಥೋತೆ ತದೆ, ಫಿಲಿಪ್ಪನ ದೇಖಿನ್, “ಮಾರ ಜೋಡೆ ಆವ್!” ಕರಿ ಬೋಲ್ಯೊ.

44 ಅಂದ್ರೆಯ ಅಜ್ಜು ಪೇತ್ರ ಬೆತ್ಸಾಯಿದ ಖ್ವಯೇರ್‌ವಾಳ, ಫಿಲಿಪ್ಪಬಿ ಯೋಸ್ ಖ್ವಯೇರ್‌ವಾಳೊ ಹುಯಿರ್ರೋಡೊ.

45 ಫಿಲಿಪ್ಪನೆ ನತಾನಿಯೇಲ್‌ಧಿ ಮಳಿನ್, ಇನ, “ಕಿನಿ ಬಾರೇಮ ಮೋಶೆನೆ ಧರ್ಮಶಾಸ್ತ್ರ ಲೀಖ್ತೊಕಿ ಅಜ್ಜು ಪ್ರವಾದಿಖ್ತಾರು ಲೀಖ್ತೊಕಿ ಯೋ ಹಮೂನ ಮಳಿರ್ರೋಸ್. ಯೋ ಕೋಣ್‌ಕತೊ ಇನು ನಾಮ್ ಯೇಸು ಯೋಸೇಫ್‌ನೊ ಛಿಯೊ ಅಜ್ಜು ನಜರೇತ್‌ಮ ರ್ವವಾಳೊ.

46 ತದೆ ನತಾನಿಯೇಲನೆ, ‘ನಜರೇತ್‌ಡು ಶಾತ್‌ತೋಬಿ ಅಟ್ಟು ಆವ್‌ಶೆಕಿ ಶು’? ಕರಿ ಫಿಲಿಪ್ಪನ ಪುಟ್ಟಾಯೊ.

ಇನ ಫಿಲಿಪ್ಪನೆ, “ಐನ್, ದೇಕ್” ಕರಿ ಬೋಲ್ಯೊ.

47 ಯೇಸುನೆ ಇನಾಭಣಿ ವಳ್ಳಾವ್‌ಥೋತೆ ನತಾನಿಯೇಲ್‌ನ ದೇಖಿನ್, ಇನಿ ಬಾರೇಮ, “ಹಂದೇಖೊ, ಆ ಖ್ವಾಜ್ತೊ ಇಸ್ರಾಯೇಲ್‌ವಾಳೊ; ಅನಾಮ ಶನೀಶ್ ಗಲತ್ ಕೊಯ್ತು!” ಕರಿ ಬೋಲ್ಯೊ.

48 ಇನ ನತಾನಿಯೇಲನೆ ತೂ ಮನ ಕಿಮ್ ಮಾಲುಮ್ ಕರೆಯ್? ಕರಿ ಯೇಸುನ ಬೋಲಖ್ತರ್

ಇನೆ ಫಿಲಿಪ್ಪನೆ ತುನ ಬುಲಾವನ ಅಗಾಡಿಸ್ ತು ಯೋ ಅಂಜೀರ್‌ನ ಝಾಡ್ ಹೇಟ್ ಮೇ ದೇಖ್ಲೊ ಕರಿ ಬೋಲ್ಯೊ

49 ತದೆ ನತಾನಿಯೇಲನೆ ಇನ, “ಗುರು, ತೂ ದೇವ್‌ನೊ ಛಿಯೊ! ತೂಸ್ ಇಸ್ರಾಯೇಲ್‌ನೊ ರಾಜ್!” ಕರಿ ಬೋಲ್ಯೊ

50 ಯೇಸುನೆ ಇನ, ತೂ ಅಂಜೀರ್‌ನ ಝಾಡಾನ ಹೇಟ್ ಥೊ, ತದೆ ಮೆ ತುನ ದೇಖ್ಲೊ ಕರಿ ಬೋಲ್ಯೊತೆ ವಾತೆಥಿ ತೂ ನಂಬಾಸ್ತಿ ಶು? ತೂ ಇನೇಥಿಬಿ ಜಾಖ್ತ್ ಮೋಟು ಕಾಮ್‌ಖ್ವಾರು ದೇಖಿಶ್!” ಕರಿ ಬೋಲ್ಯೊ

51 ಯೇಸುನೆ ಇವ್ವುನ, “ಮೇ ತುಮೂನ ಖ್ವಾಚ ಬೋಲುಸ್ತಿ: ಸೊರ್ಗ್ ನಿಕ್‌ಳಿರ್ದೇಶೆತೆ ಅಜು ಅದ್ಮಿನೊ ಛಿಯ್ಯಾನ ಉಪರ್ ಕರಿ ದೇವ್‌ನು ದೂತರ್ ಉತ್ರಿ ಆವಾನು ಅಜು ಜಾವಾನು ತುಮೆ ದೇಕ್‌ಶು” ಕರಿ ಬೋಲ್ಯೊ

2

ಕಾನಾ ಗಾಮ್‌ನು ವ್ಯಹಾ

1 ತೀನ್ನೆ ದನ್ನ ಗಲಿಲಾಯನು ಕಾನಾಕರಿ ಗಾಮ್ ಏಕ್ ವ್ಯಹಾ ಥೂ. ಯೇಸುನಿ ಆಯ ಹಿಜ್ವಾಥಿ.

2 ಯೇಸುನ ಅಜು ಇನ ಶಿಷ್ಯರ್‌ನಾಬಿ ವ್ಯಹಾನ ಬುಲೈರಾಖ್ವುಥು.

3 ದ್ರಾಕ್ಷಿನು ರಖ್ವಾಪುರ್ರೊಕೊಂತೆ ಇನಖ್ವಾಜಿ, ಯೇಸುನಿ ಆಯಾ ಇನ ದ್ರಾಕ್ಷಿನು ರಖ್ವಾ ಕೊಯ್ತಿ” ಕರಿ ಬೋಲಿ.

4 ಯೇಸುನೆ ಇನ, “ಆಯಾ, ಮನ ಆ ಅಖ್ವು ಶನ ಬೋಲಸ್? ಮಾರಿ ವಖ್ತ್ ಬಿಜೂಬಿ ಕೋ ಐರ್ದೇನಿ” ಕರಿ ಬೋಲ್ಯೊ

5 ತದೆ ಯೇಸುನಿ ಆಯಾನೆ ಆಳ್‌ನ ಖ್ವಾರು, “ಯೋ ತುಮೂನ ಶಾತ್ ಬೋಲಸ್ತಿ, ಯೋ ಕರೊ” ಕರಿ ಬೋಲಿ.

6 ಬಂಡಾಥಿ ಬಣೈಹುಯು ಛೊ ಟೊಟ್ಟಿ ಮ್ಹೇಲಿರಾಖ್ವುಥು, ಯೆಹೂದ್ಯಾಂನಿ ಪದತ್ತಿಮ ಶುದ್ದಿ ಕರಾನಟೇಕೆ, ಅನ ರಾಕ್‌ತುಥು.

ಹರೇಕ್ ಟೊಟ್ಟಿಬಿ ಖ್ವಮಾರ್ ಚಾರಿಖ್ವಾಥಿ ಏಕ್ ಖ್ವೋ ವೀಖ್ವಾಲೀಟರ್ ಪಾಣಿಭರಾವ ಎವ್ವು ಮೋಟು ಥೂ.

7 ಯೇಸು ಯೋ ಆಳ್ ಖ್ವಾರಾನ, “ಹೈರಾತೆ ಟೊಟ್ಟಿಮ ಪಾಣಿ ಭರೊ” ಕರಿ ಬೋಲ್ಯೊ. ಇಮ್ಮಸ್ ಇವ್ಣೆ ಯೋ ಟೊಟ್ಟಿಮ ಪಾಣಿ ಬಮ್‌ಭರಲ್ಯೊ.

8 ತದೆ ಯೇಸುನೆ ಇವ್ವುನ, “ಹಮ್ಮೆ ಅನಾಮಾನು ಥೋಡು ಪಾಣಿನ ಕಾಡಿಲಿಜೈನ್, ಖಾಣು-ಪಾಣಿನಿ ಬಾರೇಮ ದೇಖಿಲೇವ್‌ಕರಾಸ್ತೆ ಮೋಟಾನ ದೆವೊ” ಕರಿ ಬೋಲ್ಯೊ. ಇವ್ಣೆ ಲೀಜೈನ್ ದಿದು,

9 ತದೆ ಇನೆ ದ್ರಾಕ್ಷಿನು ರಖ್ವ ಬಣಿರ್ಲ್ಲ್ಯಾ ಥೂತೆ ಪಾಣಿನ ಚಾಖಿ ದೇಖ್ಲೊ. ಯೋ ದ್ರಾಕ್ಷಿನು ರಖ್ವ ಕಿಜ್ಲಾಥು ಆಯು ಕರಿ ಇನ ಮಾಲುಮ್ ಕೋ ಥೂನಿ, ಕತೋಬಿ ಪಾಣಿ ಕಾಡ್ಯತೆ ಯೋ ಆಳ್ ಖ್ವಾರಾನ ಆ ಮಾಲುಮ್ ಥು. ತದೆ ಇನೆ ಯೋ ವ್ಯಹಾನೊ ವ್ಹೆತುಲ್ದಾನ ಬುಲಾಯು.

10 ಅಖ್ವುಜಣು ಅಲ್ಫು ದ್ರಾಕ್ಷಿನು ರಖ್ವನ ಪಹಿಲೆ ದೀನ್ ನಿಪಾಲ್ಲಡಿಗತೊ ತದೆ ಮಾಮುಲಿನ ರಖ್ವನ ದೇಸ್. ತೂತೊ ಅಲ್ಫು ದ್ರಾಕ್ಷಿನ ರಖ್ವನ ಹಮ್ಮೆಲಗು ದೀರಾಖ್ಯೊಸ್ ಕರಿ ಬೋಲ್ಯೊ.

11 ಯೇಸುನೆ ಆ ಪಹಿಲು ಖ್ವಣೇದ್ವ ಕಾಮ್ ಗಲಿಲಾಯನು ಕಾನಾ ಕರಿ ಗಾಮ್ತಕರಲ್ಯೊ. ಹಿಜ್ಜ ಯೇಸು ಇನ ಮಹಿಮೆನ ವತಾಳ್ಕೊ, ಅಜ್ಜು ಇನ ಶಿಷ್ಯರ್‌ನೆ ಇನಾಪರ್ ವಿಶ್ವಾಸ್ ಕರಲ್ಯೊ.

12 ಅನ ಬಾದ್‌ಮ ಯೇಸು, ಇನಿ ಆಯಾ, ಭೈಯೇ ಅಜ್ಜು ಇನ ಶಿಷ್ಯರ್‌ನಿ ಜೋಡ್ತ್ ಕಪೆರ್ನೊಮ್ ಕರಿ ಗಾಮ್‌ನ ಭೈನ್, ಥೋಡ ದನ್ ಹಿಜ್ಜಾ ಥಾ.*

ಯೇಸು ಮಂದಿರ್‌ಮ ಗಯೋತೆ
(ಮತ್ತಾಯ 21:12,13; ಮಾರ್ಕ 11:15-17; ಲೂಕ 19:45-46)

13 ಯೆಹೂದ್ಯರ್‌ನ ಪಸ್ಕ ಪೂಜಾನೊ† ದನ್ ಖನ್ನೆಬಗೂತೆ ಇನಖ್ವಾಜೆ, ಯೇಸು ಯೆರೂಸಲೇಮ್‌ನ ಉಪ್ಪರ್ ಗಯೊ.

* 2:12 2:12 ಮತ್ತಾಯ 4.13 † 2:13 2:13 ವಿಮೋಚನ ಕಾಂಡ 12.1-27

14 ಹಿಜ್ಜಾ ಮಂದಿರ್‌ಮ ಅದ್ಮಿಖ್ವಾರು ಥಾಂಡು, ಮೇಂಡು, ಅಜ್ಜು ಪರ್ರಾವ ವೆಚ್ಚುಕರ್ತುಥೂತೆ ಯೇಸುನೆ ದೇಖ್ಚೊ, ಅಜ್ಜು ಪೈಶಾ ತೋಡಾವಾನು ಧಂದೊ ಕರಾವಾಳುಬಿ ಇವ್ವಿ ಇವ್ವಿ ಮೇಜ್‌ಪರ್ ಬೇಶಿನ್, ಧಂದೊ ಕರುಕರ್ತುಥು.

15 ಇನಖ್ವಾಜೆ ಯೇಸುನೆ ಶಿಂದ್ರಾಥಿ ವಾಟಿನ್ ಏಕ್ ಕೊಲ್ಡಾನ ಬಣಾಯೊ, ಇನೇಥಿ ಯೋ ಖ್ವಾರಸ್ ಜಾನ್ವರ್‌ನ, ಥಾಂಡಾನ ಅಜ್ಜು ಮೇಂಡಾನ ಮಾರಿನ್, ಮಂದಿರ್‌ಮಾಥು ಭಾರ್ ಹಕೇಳ್ಚೊ; ಪೈಶಾ ತೋಡಾವಾಳಾನು ಮೇಜ್‌ನ ರಡ್‌ಕೈನ್, ಪೈಶ ರಂಚಿದಿದೊ.

16 ಪರ್ರಾವೊ ವೇಚ್‌ವಾಳಾನ, “ಹಜ್ಜಾಥು ಅನ ಪಳ್ಳಿ ಜಾವೊ! ಮಾರ ಬಾನಘರ್ನ್ ಬಜಾರ್‌ನಿ ಝಗೊ ಕರಾನು ಭೀರಾಖೊ!” ಕರಿ ಬೋಲ್ಚೊ.

17 ತದೆ, “ತಾರಿ ಮಂದಿರ್‌ಪರ್‌ಲಿ ಘಣಿ ಪ್ಯಾರ್, ಮಾರ ಮಹಿ ಆಗ್‌ನಿಮತ್ ಬಳಾಸ್”‡ ಕರಿ ವಚನ್‌ಮ ಲೀಖ್ಪಿರ್‌ಲ್ತೊತೆ ಯೋ ವಚನ್ ಶಿಷ್ಯರ್‌ನಿ ಯಾದ್ತಾಯು.

18 ಯೆಹೂದ್ಯರ್ ಅದಿಕಾರಿನೆ ಯೇಸುನ ಖನ್ನೆ ಐನ್ ಬೋಲ್ಚುತೂ ಹಮೂನ ಖಿವು ಅದ್ಭುತ್ ಖ್ವಣೇದ್‌ನು ಕಾಮ್ ಕರಿನ್ ವತಾಳಿಸ್ಚಿ ಅನೇಥಿ ತೂ ಶಾತ್ ಕರುಕರಾಸ್ಚಿ ಇನಿ ಹಕ್ ತುನ ಛಾ ಕರಿ ಸಾಬಿತ್ ಉಷೆ.

19 ತದೆ ಯೇಸುನೆ, “ಆ ಮಂದಿರ್‌ನ ರಡ್‌ಕೈನಾಖಿದೇವೊ, ಮೇ ತೀನ್ ದನ್ಮ ಅನ ಪಾಠ್ತು ಭಾಂದೀಶ್”§ ಕರಿ ಜವಾಬ್ ದಿದೊ.

20 ಯೆಹೂದ್ಯರ್‌ನಿ ಇನ, “ಆ ಮಂದಿರ್‌ನ ಭಾಂದಾನ ಛೊ ಉಪ್ಪರ್ ಚಾಳಿಖ್ತ್ ವರಖ್ತ್ ಹುಯು! ತೂ ಅನ ತೀನಸ್ ದನ್ಮ ಭಾಂದಾನ ಓಳೆಜಾಸ್ಚಿ ಶು?” ಕರಿ ಬೋಲ್ಚೊ.

21 ಕತೋಬಿ ಯೇಸು ಖಿವಿ ಮಂದಿರ್‌ನಿ ಬಾರೇಮ ಬೋಲುಕರ್ತೊಡೊ ಯೋ ಇನು ಶೊಂತ್ ಶರೀರ್ ಹುಯಿರುಥು.

‡ 2:17 2:17 ಕೀರ್ತನೆ 69.9 § 2:19 2:19 ಮತ್ತಾಯ 26.61; 27.40; ಮಾರ್ಕ 14.58; 15.29

22 ಯೇಸು ಮರೀನ್, ಜಿವೊಹುಯಿನ್ ಉಠಾನ ಬಾದ್‌ಮ, ಆ ವಾತೆ ಇನ ಶಿಷ್ಯರ್‌ನ ಯಾದ್ತ ಆಯು, ತದೆ ಇವ್ಣೆ ವಚನ್‌ಮ ಲೀಖೈರ್ದ್ವತೆ ಅಜು ಯೇಸುನೆ ಬೋಲ್ಯೋತೆ ವಾತೆನ ನಂಬ್ಕು.

ಅದ್ಮಿನಿ ಚಾಲ್‌ನಿ ಬಾರೇಮ ಯೇಸುನಿ ಗ್ಯಾನ್

23 ಯೇಸು ಪಸ್ತ ಪೂಜಾನಿ ವಖ್ತಮ ಯೆರೂಸಲೇಮ್ಮ ಥೊ, ತದೆ ಇನೆ ಕರೈತೆ ಅದ್ಭುತ್‌ಖ್ವಾರು ಘಣ ಅದ್ಮಿನೆ ದೇಖಿನ್, ಇನ ನಾಮ್‌ಪರ್ ವಿಶ್ವಾಸ್ ಕರೈ.

24 ಕತೋಬಿ ಯೇಸುನೆ ಖುದ್ ಇನಾಸ್ ಇವ್ಣಿ ವಿಶ್ವಾಸ್‌ಪರ್ ಮ್ಹೇಲಿದಿದೊಕೊಯ್ಚಿ, ಶನಕತೊ ಯೊ ಖ್ವಾರಸ್ಸು ಮಾಲುಮ್ ಕರಿರಾಖ್ಯೋಥೊ.

25 ಯೋ ಹರೇಕ್ ಅದ್ಮಿನ ದಿಲ್ವ ಮಾಯ್ನನ ಮಾಲುಮ್ ಕರಿರಾಖ್ಯೋಥೋತೆ ಇನಖ್ವಾಜೆ ಕೋಣ್‌ಬಿ ಖೆವ ಅದ್ಮಿನಿ ಬಾರೇಮ ಯೇಸುನ ಸಾಕ್ಷಿ ಬೋಲಿವತಾಳಾನು ಜರೂರತ್ ಕೋಥೊನಿ.

3

ಯೇಸು ಅಜು ನಿಕೊದೇಮ

1 ಏಕ್ ಜಣೊ ಯೆಹೂದ್ಯವಾಳೊ ಅದಿಕಾರಿ ಹುಯಿರೋಥೊ, ಇನು ನಾಮ್ ನಿಕೊದೇಮ ಅಜು ಯೊ ಫರಿಸಾಯರ್‌ನಿ ಝೂಂಡ್‌ವಾಳಮ ಏಕ್‌ಜಣೊ ಹುಯಿರೋಥೊ.

2 ಯೋ ಏಕ್ ರಾತೆ ಯೇಸುಕನ ಐನ್, “ರಬ್ಬಿ, ತು ದೇವ್‌ಥಿ ಆಯೋಹುಯೊ ಫಡಾವವಾಳೊ ಕರಿ ಹಮೂನ ಮಾಲುಮ್. ತು ಕರಾತೆ ಖ್ವಣೇದ್‌ನು ಕಾಮ್ ಕರಾನ, ದೇವ್ನಿ ಮದತ್ ಕೊಯ್ತೆತೆ ಕಿನೇಥೀಬಿ ಕೋ ಹುವಾನಿ” ಕರಿ ಬೋಲ್ಯೊ.

3 ಇಮ್ ಬೋಲ್ತಾನ ಯೇಸುನೆ, “ಮೇ ತುನ ಖ್ವಾಚಮಾಬಿ ಬೋಲುಸ್ಕಿ, ಕೋಣ್‌ತೋಬಿ ಏಕ್ ಜಣು ದೇವ್ನಿ ರಾಜ್ಯಮ ಪಾಳ್ತು ಪೈದಾ ನಾ ಹುಯೊತೊ, ದೇವ್‌ನು ರಾಜ್‌ನ ದೇಖಾನ ಕೋ ಹುವಾನಿ?” ಕರಿ ಬೋಲ್ಯೊ.

4 ತದೆ ನಿಕೊದೇಮನೆ ಯೇಸುನ, “ಏಕ್ ಅದ್ಮಿ ಬುಡು ಹುಯಿಜಾವಪರ್, ಪಾಟ್ರು ಪೈದಾ ಹುವಾನ ಕಿಮ್ ಉಷೆ? ಯೋ ಅದ್ಮಿ ಪಾಟ್ರು ಇನಿ ಆಯಾನ ಗರಬ್‌ಮ ಪೇಶಿನ್, ಪೈದಾ ಹುವಾನ ಕೋ ಹುವಾನಿನಿ! ಕರಿ ಬೋಲ್ಯೊ.

5 ಇಮ್ ಬೋಲ್ತಾನ ಯೇಸುನೆ, “ಮೇ ತುನ ಖ್ವಾಚಮಾಬಿ ಬೋಲುಸ್ಕಿ, ಏಕ್ ಅದ್ಮಿ ಪಾಣಿಥೀಬಿ, ಆತ್ಮಧಿ ಪೈದಾ ನಾ ಹುಯೂತೊ,* ಯೋ ದೇವ್ನಿ ರಾಜ್ಯಮ ಜಾಶೇಸ್ ಕೊಯ್ನಿ.

6 ಏಕ್ ಜಣೊ ಶರೀರ್‌ಧಿ ಪೈದಾ ಹುಯಿರೊಸ್. ಕತೋಬಿ ಆತ್ಮಿಕಧಿ ರ್ವವಾಳೊ ಯೊ ಆತ್ಮಧಿ ಪೈದಾ ಹುವವಾಳು ಹುಯಿರ್ದ್ವಸ್.

7 ತುಮೆ ನವೇಧಿ ಪೈದಾ ಹೋಣು ಕರಿ ಬೋಲ್ಯೊತೊ ಇನ ಆಶ್ಚರ್ಯ ನಾಖಾವ್ಣಿ.

8 ವಹಿರೊ ಇನ ಕಿಮ್ ಹೋಣುಕಿ ತಿಮ್ ವಾಗ್‌ತು ರ್ವೇಸ್; ಇನೊ ಅವಾಜ್ ತುನ ಖ್ವಮಜ್ ಪಡಾಸ್, ಪಣ್ಣಿ ಯೋ ಕಿಜ್ಲಾಧು ಉಳ್ಳಾವಾಸ್ ಅಜ್ಜು ಕಿಜ್ಲಾ ಉಳ್ಳುಜಾಸ್ ಕರಿ ತುನ ಮಾಲುಮ್ ಪಡಾಕೊಯ್ನಿ, ಆತ್ಮಧಿ ಪೈದಾ ಹುವವಾಳು ಖ್ವಾರೊಬಿ ಇಮ್ಮೀಸ್‌ಘೋಣಿ ಹುಯಿರ್ದ್ವಸ್” ಕರಿ ಬೋಲ್ಯೊ.

9 ನಿಕೊದೇಮನೆ, “ಆ ಕಿಮ್ ಉಶೆ?” ಕರಿ ಪುಲ್ಲಾಯೊ.

10 ಯೇಸುನೆ, “ತೂ ಇಸ್ರಾಯೇಲ್ ಅದ್ಮಿನ ಬೋಲಿ ವತಾಳವಾಳೊ ಗುರು ಹುಯಿರ್ದ್ವೇಸ್, ತೋಬಿ ತುನ ಆ ಮಾಲುಮ್ ಪಡಾಕೊಯ್ನಿಕಿಶೂ?

11 ಮೇ ತುನ ಖ್ವಾಚ ಬೋಲುಕರುಸ್: ಹಮೂನ ಮಾಲುಮ್ ಛಾತೆ ಇನಿ ಬಾರೇಮ ಹಮೆ ಬೋಲೆಸ್, ಅಜ್ಜು ಹಮೆ ದೆಖೇಸ್ತೆ ಇನಿ ಬಾರೇಮ ಸಾಕ್ಷಿ ಬೋಲೆಸ್, ಕತೋಬಿ ತುಮೆ ಹಮೆ ಬೋಲೆಸ್ತೆ ಇನ ಮಾನಕೊಯ್ನಿ.

12 ಮೆ ಜಗತ್ನಿ ವಾತ್ನಿ ಬಾರೇಮ ಬೋಲ್ಯೊತೊ ತುಮೆ ಇನ ಮಾನಕೊಯ್ನಿ, ಅಮ್ ರ್ವವಾಪರ್ ಮೆ ತುಮೂನ ಸೊರ್ಗನಿ ವಾತೆನ ಬೋಲ್ಯೊತೊ, ತುಮೆ ಕಿಮ್ ವಿಶ್ವಾಸ್ ಕರ್ತು?

* 3:5 3:5 ಪಾಣಿಥೀಬಿ, ಆತ್ಮಧೀಬಿ ಬ್ಯಾಪ್ಟಿಸ್ಕಲೇವ್ಣಕರಿ ಮತ್‌ಲಬ್.

13 “ಸೊರ್ಗದೊ ಉತ್ತಿನ್ ಆಯೋತೇಸ್ ಕತೊ, ಅದ್ಮಿನೊ ಛಿಯೋಸ್ ಪಣ್ಣಿ, ಬಿಜ್ಜು ಕೋಣ್‌ಬಿ ಸೊರ್ಗಾನ್ ಚಡೀನ್ ಕೋ ಜೈರ್ದೊನಿ”.

14 ಮೋಶೆನಿ ಉಜ್ಜಾಡಿ ಝಗೋಪರ್ ತಾಂಬಾನು ಖ್ವಾಪ್‌ನ ಊಚ್ ಖಂಬಾಪರ್ ಮ್ಹೇಲ್ಯೊತೆ† ಇಮ್ಮಸ್, ಅದ್ಮಿನೊ ಛಿಯ್ಯಾನಾಬಿ ಊಚ್ ಪಾಡ್ನ್.

15 ಅನೇಥಿ ಇನಾಪರ್ ವಿಶ್ವಾಸ್ ಕರಾವಾಳು ಹರೇಕ್‌ನ ಹಮೇಶಾನಿ ಜಿಂದಾಗಿ ಮಳ್‌ಶೆ” ಕರಿ ಬೋಲ್ಯೊ.

16 ದೇವ್ ಆ ಜಗತ್‌ನು ಅದ್ಮಿನ ಕೆತ್ರೇಸ್ತಿ ಜಾಖತ್ ಪ್ಯಾರ್ ಕರೀನ್, ಇನೊ ಏಕ್‌ನೊ-ಎಕ್ಕ್‌ಸ್ ಛಿಯ್ಯಾನ ದಿದೊ; ಇನ್ ನಂಬವಾಳು ಏಕ್‌ಬಿ ಮರ್ದುನಾತೆ ಹರೇಕ್ ಹಮೇಶಾನಿ ಜಿಂದಾಗಿ ಮಳ್‌ಣು ಕರಿ ಇನ್ ದಿದೊ.

17 ದೇವ್ ಇನ್ ಛಿಯ್ಯಾನ ಮೋಕ್‌ಲ್ಯೊತೆ ಆ ಜಗತ್ ಅದ್ಮಿನ ರಕ್ಷಣೆ ಹೋಣುಕರಿ ಮೋಕ್‌ಲ್ಯೊತೆ ಪಣ್ಣಿ, ತೀರ್ಪ್ ಕರಾನಖ್ವಾಜೆ ಕಾಹೆ.

18 ಇನ್ ನಂಬವಾಳಾನ್ ತೀರ್ಪ್ ಕೋ ಹೊಯ್ಚಿ, ಕತೋಬಿ ನಂಬಕೊಂತೆ ಇನ್ ತದೇಸ್ ತೀರ್ಪ್ ಹುಯ್ಚಿ. ಶನಕತೊ ಇನೆ ದೇವ್ ಎಕ್ಕ್‌ಸ್ ಛಿಯ್ಯಾನ ನಾಮ್ ಉಪ್ಪರ್ ಭರೋಖೊ ಕರೊಕೊಯ್ಚಿ.

19 ಯೋ ತೀರ್ಪ್ ಶಾತ್‌ಕತೊ ಉಜಾಳು ಜಗತ್‌ಮ ಆಯುತೋಬಿ ಅದ್ಮಿವೊನು ಕಾಮ್ ಖರಾಬ್‌ಧೂತೆ ಇನ್‌ಖ್ವಾಜೆ ಇವ್ಣೆ ಉಜಾಳೇಥಿಬಿ ಅಂಧಾರನ್ ಪ್ಯಾರ್ ಕರೊ.

20 ಖರಾಬ್‌ನ ಕರಾವಾಳು ಇವ್ಣು ಖರಾಬ್ ಕಾಮ್‌ಅಖ್ಚು ಭಾರ್ ಆವ್‌ತುರ್ದೊಶಿಕರಿ ಉಜಾಳಮ್ ಆವಕೊಯ್ಚಿ ಅಜ್ಜು ಉಜಾಳಾನ್ ವಹೇರ್‌ಕರಸ್.

21 ಕತೋಬಿ ಖ್ವಾಜ್‌ನ ಲೀನ್ ಚಾಲವಾಳೊ ಯೋ ದೇವ್‌ಥಿ ಚಲ್ಚಿಲ್ಯವಾಳೊ ಹುಯಿರಿನ್ ಇನ್ ಕಾಮ್ ಭಾರ್ ಲ್ಯಾವವಾಳೊ ಹುಯಿರೇಸ್.

ಯೇಸು ಅಜ್ಜು ಬ್ಯಾಪ್ಟಿಸ್ತ ದೆವಾಳೊ ಯೋಹಾನ

† 3:14 3:14 ಅರಣ್ಯಕಾಂಡ 21.9

22 ಅನ ಬಾದ್‌ಮ, ಯೇಸು ಅಜ್ಜು ಇನ ಶಿಷ್ಯರ್ ಯೂದಾಯ ತಬರ್‌ಖಾನ ಗಯ. ಹಿಜ್ಜಾ ಯೊ ಇವ್ವ ಶಿಷ್ಯರ್‌ನಿ ಜೋಡೆ ರಟ್ಟೀನ್, ಬ್ಯಾಪ್ತಿಸ್ಮ ದಿದೊ.

23 ಯೋಹಾನಾಬಿ ಸಲೀಮ್ ಗಾಮ್‌ನ ಖನ್ನೆ ಥೂತೆ ಐನೋನ್‌ಕನ ಬ್ಯಾಪ್ತಿಸ್ಮ ದೆವ್‌ಕರ್ತೊ. ಶನಕತೊ ಹಿಜ್ಜಾ ಘಣು ಪಾಣಿ ಥೂ; ಅದ್ವಿಖ್ತಾರು ಹಿಜ್ಜಾಐನ್, ಬ್ಯಾಪ್ತಿಸ್ಮ ಕರ್ತೆಲೆವ್ ಕರ್ತುಡು.

24 ತಬ್‌ಲಗು ಯೋಹಾನ ಜೇಲ್‌ಮ ಕೊಘರಾಖ್ತುಡುನಿ ಹೈರುತೆ ಯೋಹಾನ್ನ ಜೇಲ್‌ಮ ಕೋಂಡಿ ಫಾಲಾನ ಪಹಿಲೇಸ್ ಚಾಲಿರುಡು. ‡

25 ಯೋಹಾನ್ನ ಥೋಡ ಶಿಷ್ಯರ್‌ಮ ಅಜ್ಜು ಏಕ್ ಯೆಹೂದ್ಯವಾಳನಿ ಧಾರ್ಮಿಕ ಪದತ್ತಿನಿ ಘೋಣಿನಿ ಅಶ್ವಾನ್‌ಧಾನ್ನಿ ಬಾರೇಮ ಚರ್ಚೆಹುಯು.

26 ತದೆ ಇವ್ವ ಯೋಹಾನಕನ ಐನ್, “ಗುರು, ಯೋರ್ದನ್ ನದ್ದಿನ ಪಾರ್ಲಿಬಾಜು ತಾರಕನ ಥೋತೆ ಏಕ್‌ಜ್ಜಣಾನಿ ಬಾರೇಮ ತುನೆ ಸಾಕ್ಷಿ ಬೊಲ್ಯೊನಿ, ಯೋಸ್ ಹಮ್ಗೆ ಅದ್ವಿಖ್ತಾರಾನ್ ಬ್ಯಾಪ್ತಿಸ್ಮ ದೆವ್‌ಕರಾಸ್, ಅಜ್ಜು ಹರೇಕ್ ಜ್ಜಣು ಇನಾಕನ ಒಳ್ಳುಜ್ಜಾಸ್!” ಕರಿ ಬೋಲ್ಯು.

27 ಯೋಹಾನನೆ ಸೊರ್ಗಡು ತಬ್‌ಲಗು ದೇವ್ ಕೊ ದೇಯ್ತಿಕಿ ತಬ್‌ಲಗು ಖೆವಾಬಿ ಅದ್ವಿನ ಶಾತ್ವಿ ಕೊ ಮಳ್‌ಶೇನಿ.

28 ತುಮೆ ಅಖ್ವು ಸಾಕ್ಷಿಹುಯಿರಾಸ್, ಮೆ ಬೋಲ್ಯೊಥೊ, “ಮೇ ಕ್ರಿಸ್ತ ಕಾಹೆ, ಕತೋಬಿ ಇನೇಥಿ ಅಗಾಡಿ ಮನ ಮೋಕ್ಲಿರಾಖ್ತೊಸ್”.[§]

29 ವ್ಹೆತುಲ್ತಾನ ಮಳಾಸ್ತೆ ವ್ಹೆತುಲ್ಡಿಸ್, ಕತೋಬಿ ವ್ಹೆತುಲ್ತಾನೊ ದೋಸ್ ಇನ ಖನ್ನೆ ಭೀರಿನ್, ಇನಿ ಅವಾಜ್‌ನ ಖ್ವಮ್‌ಜಿನ್ ಘಣು ಖ್ವಶಿಕರಾಸ್. ಆಸ್ ಮನ ಛಾತೆ ಖ್ವಶಿ, ಯೋ ಪೂರ ಹುಯು.

30 ಯೋ ಉಪ್ಪರ್ ಪಡಾವ್ಣು ಅಜ್ಜು ಮೇ ಹೇಟೊ ಹೋಣು” ಕರಿ ಬೋಲ್ಯೊ.

ಸೊರ್ಗಡೊ ಆಯೊಹುಯೊ

‡ 3:24 3:24 ಮತ್ತಾಯ 14.32; ಮಾರ್ಕ 6.17; ಲೂಕ 3.19,20 § 3:28 3:28 ಯೋಹಾನ 1.20

31 ಕೋಣ್ ಜಮೀನ್‌ಪರ್ ಛಾಕಿ ಯೊ ಜಮೀನ್ನಿ ವಾತೆನಿ ಬಾರೇಮ ಬೋಲಸ್, ಕತೋಬಿ ಕೋಣ್ ಸೊರ್ಗಧಿ ಆವಾಳೋಕಿ ಯೋ ಖ್ಹಾರೇಧಿ ಮಹಾನ್ ಹುಯಿರ್ದೊಸ್. ಆ ಜಗತ್‌ವಾಳು ಆ ಜಗತ್ ಮಳ್ಯೊಹುಯೊ ಹುಯಿರ್ದೊಸ್.

32 ಯೋ ಶಾತ್ ದೇಖ್ಯೊಕಿ ಅಜು ಖ್ಹಮ್‌ಜೋಕಿ ಇನಿ ಬಾರೇಮ ಸಾಕ್ಷಿ ಬೋಲಾಸ್, ತೋಬಿ ಇನಿ ಸಾಕ್ಷಿನ ಕೋಣ್‌ಬಿ ಮಾನಕೊಯ್ನಿ.

33 ಕತೋಬಿ ಕೋಣ್ ಇನಿ ಸಾಕ್ಷಿನ ಮಾನಿಲೇಸ್ಕಿ, ಯೋ ಅಮ್ ಕರಾಧಿ ದೇವ್ ಖ್ಹಾಳು ಕರಿ ಸಾಬಿತ್ ಕರಸ್.

34 ಶನಕತೊ,ಕಿನದೇವ್‌ನೆ ಮೋಕ್ಲಿ ರಾಖ್ಯೊಸ್ಕಿ, ಯೋ ದೇವ್ನಿ ವಾತೇನ ಬೋಲಾಸ್. ಇನ ದೇವ್ ಆತ್ಮಧಿ ಭರ್‌ಪೂರ್ ಕರಾಸ್.

35 ಅಜು ಬಾ ಇನ ಲಾಡ್ನ ಛಿಯ್ಯಾನ ಇನಿ ಅಖ್ವಿ ಅದಿಕಾರ್‌ನ ದೀರಾಖ್ಯೊಸ್.*

36 ಇನ ಛಿಯ್ಯಾನ ನಂಬವಾಳಾನ ಹಮೇಶಾನಿ ಜಿಂದಾಗಿ ಛಾ; ಕತೋಬಿ ಛಿಯ್ಯಾನಿ ವಾತೆನ ಝಟ್ಕಾರಸ್ಕಿ ಇವ್ಣುನ ಯೋ ಜಿಂದಾಗಿ ಮಳ್‌ಶೆ ಕೊಯ್ನಿ, ಅಜು ದೇವ್‌ನೊ ಇರಾದೊ ಇವ್ಣಾಪರ್ ರೆಶ್ತಿ” ಕರಿ ಬೋಲೊ.

4

ಯೇಸು ಅಜು ಸಮಾರಿಯಾನಿ ತಯೇಡ

1 ಯೇಸು ಯೋಹಾನ್‌ಧೀಬಿ ಜಾಖ್ತ್ ಶಿಷ್ಯರ್‌ನ ಕರುಕರಸ್, ಇವ್ಣುನ ಬ್ಯಾಪ್ತಿಸ್ಮ ದೆವ್‌ಕರಾಸ್ ಕರಿ ಬೋಲಾನಿ ಖಬರ್ ಫರಿಸಾಯರ್‌ವಾಳು ಖ್ಹಮ್‌ಜ್ಯು ಆ ಯೇಸುನ ಮಾಲುಮ್ ಪಡ್ತು.

2 ಕತೋಬಿ ಖ್ಹಾಚಮ ಬ್ಯಾಪ್ತಿಸ್ಮ ದೆವ್‌ಕರ್ತೊಧೋತೆ ಯೇಸು ಕಾಹೆ, ಖಲಿ ಇನು ಶಿಷ್ಯರ್ ದೆವ್‌ಕರ್‌ತುಡೂತೆ.

* 3:35 3:35 ಮತ್ತಾಯ 11.27; ಲೂಕ 10.22

3 ಅದ್ವಿಖ್ವಾರ್ರು ಬೋಲಾನು ಯೇಸುನೆ ಖ್ವಮ್‌ಜ್ಯೊತೆ ತದೆ ಯೂದಾಯ ತಬರ್‌ಖಾನ ಮ್ಹೆಂದಿನ್, ಪಾಲ್ಟು ಗಲಿಲಾಯನ ಚಲೆಗಯೊ.

4 ಯೋ ಭಾವಾನಿ ವಖ್ವತ್‌ಮ, ಸಮಾರ್ಯ ತಬರ್‌ಖಾಪರ್ ಕರಿ ಜಾವ್ವಪಡ್ಡು.

5 ಸಮಾರ್ಯನ ಮಳ್ಕುಹುಯು ಸುಖರ್ ಕರಿ ಗಾಮ್‌ನ ಆಯೊ, ಯೋ ಗಾಮ್ ಯಾಕೋಬ್‌ನೆ ಇನೊ ಛಿಯ್ಯೊ ಯೋಸೇಫನ ದಿದೊತೆ ಝುಗೋನ ಖನ್ನೆ ಥೂ.*

6 ಯಾಕೋಬ್‌ನಿ ಬಾವ್ವಿ ಹಿಜ್ವಾ ಥಿ, ಯೇಸು ಚಾಲಿನ್ ಥಕಿರ್ರೋಡೊತೆ, ಇನಖ್ವಾಜೆ ಯೋ ಬಾವ್ವಿಕನ ಐನ್ ಬೇಶಿಗಯೊ. ತದೆ ಕಮ್‌ಶಿಕಮ್ ಥೋಪಾರ್ ಹುಯಿರ್ದು.

7 ಏಕ್ ಸಮಾರ್ಯನಿ ತಯೇಡ ಪಾಣಿ ಭರಾನಟೇಕೆ ಹಿಜ್ವಾ ಆಯಿ, ತದೆ ಯೇಸುನೆ ಇನ, “ಪಿಯ್ಯಾನ ಥೋಡು ಪಾಣಿ ಮಳ್‌ಶೆ?” ಕರಿ ಬೋಲ್ಯೊ.

8 ತದೆ ಇನ ಶಿಷ್ಯರ್ ಖಾಣಾನು ರಾಲ್ಟುಲ್ಟವಾನಟೇಕೆ ಖ್ವಯೇರ್ದು ಜೈರ್ದು.

9 ತದೆ ಯೋ ತಯೇಡಾನೆ, “ತೂ ಯೆಹೂದ್ಯರ್‌ವಾಳೊ, ಅಜ್ಜು ಮೇ ಸಮಾರ್ಯವಾಳಿ, ಅಮ್ ರ್ದವಾಪರ್ ತೂ ಮಾರಕನ ಪಿಯ್ಯಾನ ಪಾಣಿ ಮಾಂಗೇಜಾಯ್ ಶು?” ಕರಿ ಜಾವಾಬ್ ದಿದಿ.† ಯೆಹೂದ್ಯವಾಳು ಸಮಾರ್ಯವಾಳನಿ ಜೋಡ್ವಿವಿ ಸಂಬಂದ್ ರಾಕ್‌ತುಡು ಕೊಯ್ತು.

10 ಯೇಸುನೆ ಯೊ ತಯೇಡನ ಬೋಲ್ಯೊಕಿ, “ತುನ ದೇವ್ವಿ ಬಾರೇಮ ಅತ್ರಖ್ವು ಮಾಲುಮ್ ರ್ದಿಯುಹೊತ್ತೊ ಯೊ ಕೋಣ್ ಹುಯಿರೊಸ್, ದೇವ್ ಶಾತ್ ದೀರಾಖ್ಯೊಸ್ ಕರಿ, ತುನ ಮಾಲುಮ್ ರ್ದಿಯುಹೊತ್.ತಾರಕನ ಪಿಯ್ಯಾನ ಪಾಣಿ ಮಾಂಗ್ಲೊತೆ ಯೋ ಕೋಣ್ ಕರಿ ಮಾಲುಮ್ ರ್ದಿಯುಹೋತ್ತೊ, ತೂ ಇನಾಕನ

* 4:5 4:5 ಆದಿಕಾಂಡ 33.19; ಯೊಹೊಶುವ 24.32 † 4:9 4:9 ಎಪ್ರ 4:1-5; ನೆಹೆಮಿಯ 4:1-2

ಮಾಂಗಿಲಿದಿಹೊತ್, ಅಜ್ಜು ಯೋ ತುನ ಜಾನ್ವಪಾಣಿನ ದಿದೋಹೊತ್” ಕರಿ ಬೋಲ್ಯೊ.

11 ಯೋ ತಯೇಡ ಇನ, “ಪ್ರಭು, ಪಾಣಿ ಶೇಂದಾನ ತಾರಕನ ಶಾತ್ಪಿ ಕೊಯ್ವಿ, ಬಾವ್ವಿ ಘಣಿ ಗಧಾರ್ ಲ್ಹಾ, ಅಮ್ ರ್ವಾಪರ್ ಯೋ ಜಾನ್ವ ಪಾಣಿ ತು ಕಿಮ್ ದಿಶ್?”

12 ಹಮಾರೊ ಗುರು ಯಾಕೋಬಧೀಬಿ ತೂ ಮೋಟೋಕಿ ಶು? ಇನೇಸ್ ಆ ಬಾವ್ವಿನ ಹಮೂನ ದಿದೋತೆ; ಯೋಬಿ ಇನ ಲಡ್ಕಾಬಿ, ಇನೆ ಪಾಳೊತೆ ಖ್ವಾರುಸ್ ಜಾನ್ವರ್ ಆ ಬಾವ್ವಿನು ಪಾಣಿ ಪೀದು” ಕರಿ ಬೋಲಿ.

13 ಯೇಸುನೆ ಅಮ್ ಬೋಲ್ಯೊ, “ಆ ಪಾಣಿನ ಪಿಯ್ಯಾಸ್ತೆ ಹರೇಕ್ಷ ಪಾಲ್ಹು ಲೋಖ್ವೊ ಲಾಗ್‌ಶೆ,

14 ಕತೋಬಿ ಮೇ ದೆವ್‌ಸ್ತೆ ಪಾಣಿನ ಕೋಣ್ ಪಿಯ್ಯಾಸ್‌ಕಿ ಇವ್ವುನ ಕದೇಬಿ ಲೋಖ್ವೊ ಲಾಗ್‌ಶೆ ಕೊಯ್ವಿ. ಮೇ ಇನ ದೀಶ್‌ತೆ ಪಾಣಿ ಇವ್ವಾಮ ಭರೈನ್ ರ್ಪುರುಕರ್‌ಶೆ. ಯೋ ಇನ ಹಮೇಶಾನಿ ಜಿಂಧೋಗೀನ ದಿಶೆ” ಕರಿ ಬೋಲ್ಯೊ.

15 ಯೋ ತಯೇಡ ಯೇಸುನ, “ಗುರು, ಯೋ ಪಾಣಿನ ಮನ ದೇ! ತದೆ ಮನ ಕದೇಬಿ ಪಾಲ್ಹು ಲೋಖ್ವೊ ಕೋ ಲಾಗ್‌ಶೇನಿ. ಅಜ್ಜು ಪಾಣಿ ಶೇಂದಾನ ಹಜ್ಜಾ ಆವಾನಿ ಭರೂರತ್‌ಬಿ ಕೋ ರ್‌ಶೇನಿ” ಕರಿ ಬೋಲಿ.

16 ಯೇಸುನೆ ಇನ, “ಜೈನ್, ತಾರ ಬಾವ್ವಿನ ಹಜ್ಜಾ ಬುಲೈಲಿ ಆವ್” ಕರಿ ಬೋಲ್ಯೊ.

17 ಯೋ ತಯೇಡನೆ, “ಮನ ಬಾವ್ವಿ ಕೊಯ್ವಿ” ಕರಿ ಬೋಲಿ. ಯೇಸುನೆ ಇನ, “ತುನ ಬಾವ್ವಿ ಕೊಯ್ವಿ ಕರಿ ಬೋಲಿತೆ ವಾತೆ ಬರಾಬರಸ್.

18 ತುನ ಪಾಚ್ ಭಣ ಬಾವ್ವಿ ಥಾ, ಅಜ್ಜು ತೂ ಹಮ್ಮೆ ಕಿನ ಜೋಡೆ ಲ್ಹಾಕಿ ಯೋಬಿ ತಾರೊ ಬಾವ್ವಿ ಕಾಹೆ. ತುನೆ ಮನ ಖ್ವಾಚಿಸ್ ಬೋಲಿ” ಕರಿ ಬೋಲ್ಯೊ.

19 ಯೋ ತಯೇಡಾನೆ, “ಪ್ರಭು, ತೂ ಪ್ರವಾದಿ ಕರಿ ಮನ ದೆಖಾವಸ್” ಕರಿ ಬೋಲಿ.

20 ಹಮಾರು ಗುರುಖ್ವಾರು ಆ ಪಹಾಡ್‌ಪರ್ ಆರಾದನೆ ಕರ್ಯ್, ಆ ನಾಹುಯಿನ್ ಅದ್ವಿಖ್ವಾರು ಆರಾದನೆ ಕರ್ನುಧೂತೆ ಝಗೊ ಯೆರೂಸಲೇಮ್ ಕರಿ ಯೆಹೂದ್ಯರ್ ಹುಯಿರಾತೆ ತುಮೇಸ್ ಬೋಲಾಸ್.” ಕರಿ ಬೋಲಿ.

21 ಯೇಸುನೆ ಯೊ ತಯೇಡಾನ ಅಮ್ಮಮಾರಿ ವಾತ್ಸನಂಬ್, “ಏಕ್ ವಖ್ತ್ ಆವ್‌ಶೆ, ಯೋ ವಖ್ತ್‌ಮ ತುಮೆ ಬಾನ ಆರಾದನೆ ಕರಾನಖ್ವಾಜೆ ಆ ಪಹಾಡ್‌ನಾಬಿ ರ್ವೊ, ಯೆರೂಸಲೇಮ್‌ನಾಬಿ ರ್ವೊ ಕೋ ಜಾಶುನಿ.

22 ತುಮೆ ಸಮಾರಿಯವಾಳ ಕತೋಬಿ ಯೆಹೂದ್ಯರ್ ಹುಯಿರಾತೆ ಹಮೆ ಕಿನ ಆರಾದನೆ ಕರೇಸ್ ಕರಿ ತುಮುನ ಮಾಲುಮ್ ಕೊಯ್ಚಿ ಶನಕತೊ ರಕ್ಷಣೆ ಯೆಹೂದ್ಯರ್‌ಥೀಸ್ ಆವ್‌ಶೆ.

23 ಖ್ವಾಜೆ ಆರಾದನೆ ಕರಾವಾಳು ಬಾನಿ ಆರಾದನೆ ಆತ್ಮಥೀಬಿ, ಖ್ವಾಜೆಥೀಬಿ ಕರ್ಶೆ, ಯೋ ವಖ್ತ್ ಹಂಕೇಸ್ ಏಗು. ಬಾ ಇನ ಆರಾದನೆ ಕರಾವಾಳು ಅಮ್ಮುಸ್ ರ್ವೊವ್ಚಕರಿ ಆಖ್ವೆಕರಾಸ್.

24 ದೇವ್ ಆತ್ಮ ಹುಯಿರಾತೆ, ಇನ ಆರಾದನೆ ಕರಾವಾಳು ಆತ್ಮಥೀಬಿ, ಖ್ವಾಜೆಥೀಬಿ ಆರಾದನೆ ಕರಾವಾಳು ಹುಯಿರೇಣು” ಕರಿ ಬೋಲ್ಯೊ.

25 ಯೋ ತಯೇಡಾನೆ ಇನ, “ಮೆಸ್ಸೀಯ ಆವ್‌ಶೆಕರಿ ಮನ ಮಾಲುಮ್ ಯೋಸ್ ಕ್ರಿಸ್ತ, ಅಜ್ಜು ಯೋ ಆವ್‌ಶೇತೆ ತದೆ ಹಮೂನ ಹರೇಕ್ ಬಾರೇಮ ಬೋಲಿವತಾಳ್‌ಶೆ” ಕರಿ ಬೋಲಿ.

26 ತದೆ ಯೇಸುನೆ, ಇನ ಬೋಲ್ಯೊ “ತಾರಿ ಜೋಡೆ ವಾತೆ ಬೋಲುಕರುತೆ ಮೇಸ್ ಯೋ” ಕರಿ ಬೋಲ್ಯೊ.

27 ಎತ್ರಾಸ್‌ಮ ಯೇಸುನ ಶಿಷ್ಯರ್ ಪಾಲ್ತುಫರಿ ಆಯಾ, ಅಜ್ಜು ಯೇಸು ಏಕ್ ತಯೇಡಾನ ಜೋಡೆ ವಾತೆ ಬೋಲುಕರಾತೆ ದೇಖಿನ್, ಇವ್ಚೆ ಘಣು ಆಶ್ಚರ್ಯ ಕರ್ಯ್, ಕತೋಬಿ, “ತುನ ಶಾತ್ ಹೋಣು?” ಕರಿ ರ್ವೊ, “ತೂ ಇನಜೋಡೆ ಶನ ವಾತೆ ಬೋಲುಕರಾಸ್?” ಕರಿ ರ್ವೊ, ಇವ್ಚಾಮ ಏಕ್ ಜಣಾನೇಬಿ ಕೋ ಫುಲ್ಲಾಯಾನಿ.

28 ತದೆ ಯೋ ತಯೇಡ ಇನಿ ಕೇಳಿನ ಹಿಜ್ಜಾಸ್ ಮ್ಹಿಂದಿನ್, ಪಾಟ್ರು ಫರೀನ್ ಗಾಮ್‌ನ ಮಹಿ ಜೈನ್,

29 “ಮೇ ಹಂಕೆತೋಡಿ ಕರೀತೆ ಖ್ವಾರಸ್ ಬೋಲ್ಯೊತೆ ಏಕ್ ಅದ್ನಿ ಹಿಜ್ಜಾಲ್ಹಾ. ಐನ್ ದೇಖೊ, ಯೋಸ್ ಕ್ರಿಸ್ತಕಿ ಹುಯಿರೇಣು ಶುಕಿ?” ಕರಿ ಹಿಜ್ಜಾನ್ ಅದ್ನಿ ಖ್ವಾರಾನ್ ಬೋಲಿ.

30 ಇನಖ್ವಾಜೆ ಅದ್ನಿ ಖ್ವಾರು ಖ್ವಯೇರ್ನ್ ಮ್ಹಿಂದಿನ್, ಯೇಸುಕನ ಆಯು.

31 ಎತ್ರಾಸ್‌ಮ ಯೇಸುನ ಶಿಷ್ಯರ್, “ಗುರು, ಖಾಣು ಖಾ” ಕರಿ ಗಿಂಗಾಯು.

32 ಯೇಸುನೆ ಇವ್ಣುನ, “ಮಾರಕನ ಖಾವಾನ ಖಾಣು ಲ್ಹಾ, ಕತೋಬಿ ತುಮೂನ ಇನಿ ಬಾರೇಮ ಮಾಲುಮ್ ಕೊಯ್ನಿ” ಕರಿ ಬೋಲ್ಯೊ.

33 ತದೆ ಶಿಷ್ಯರ್, “ಕೋಣ್‌ತೋಬಿ ಇನ ಪಹಿಲೇಸ್ ಖಾಣು ಲೈನ್ ದಿದುಕಿ ಶುಕಿ?” ಕರಿ ಇವ್ಣ-ಇವ್ಣಾಸ್‌ಮ ಪುಲ್ಲಾವಲಗ್ಯಾ.

34 ಯೇಸು ಇವ್ಣುನ ಬೋಲ್ಯೊಕಿ ಮಾರು ಖಾಣು ಶಾತ್‌ಕತೊ ಕೋಣ್ ಮನ ಮೊಕ್‌ಲ್ಯೊಕೀ ಇವ್ಣಿ ಆಖ್ವನ್ ಪೂರ ಕರಾನುಸ್ ಹುಯಿರುಸ್. ಅಜು ಮನ ದಿದೂತೆ ಯೊ ಕಾಮ್ಮ ಪೂರ ಕರ್ನ್.

35 ‘ಖ್ವಿಗ್ಲೀನು ಹಗಾಮ್ ಆವಾನ ಬಿಜು ಚಾರ್ ಮಹಿನ ಲ್ಹಾ’ ಕರಿ ತುಮೆ ಬೋಲೋಸ್‌ನಿ. ಕತೋಬಿ ಮೇ ತುಮೂನ ಬೋಲುಸ್ಕಿ, ತುಮಾರ ಡೋಳಾನ ಪಾಡೀನ್, ಖೇತರ್ ಭಣಿ ದೇಖೊ; ಯೋ ವ್ಹಡಾವ್ಣಿನ ತೈಯಾರ್ ಲ್ಹಾ!

36 ವ್ಹಡವಾಳನ ಹಮೈಸ್ ಕೂಲಿ ಮಳ್‌ಶೆ ಅಜು ಯೋ ಹಮೇಶಾನಿ ಜಿಂದ್‌ಗೀನಖ್ವಾಜೆ ಅನಾಜ್‌ನ ಜಮ ಕರಾಸ್. ಅಮ್ ಪಿಕಾವವಾಳಾನ ಅಜು ವ್ಹಡವಾಳಾನ ಭೇನ ಎಕ್ಕದಮ್ ಖ್ವುಶಿ ಉಷೆ.

37 ‘ಪಿಕಾವವಾಳೊ ಏಕ್ ಜುಣೊ, ವ್ಹಡವಾಳೊ ಏಕ್ ಜುಣೊ’ ಕರಿ ಬೋಲಾಸ್ತೆ ಕಹಾವತ್ ಖ್ವಾಚಸ್.

38 ತುಮೆ ಮ್ಹಿನ್‌ತ್ ಕರ್ನ್ಯಾಕೊಂತೆ ಅನಾಜ್‌ನ ವ್ಹಡಾನಟೀಕೆ ಮೇ ತುಮೂನ ಮೋಕ್‌ಲ್ಯೊ; ಬಿಜಾನೆ ಮ್ಹಿನ್‌ತ್ ಕರ್ನ್ಯೊ ಇವ್ಣಿ ಮ್ಹಿನ್‌ದ್ಲಿ ತುಮೂನ ಫಾಯಿದೊ ಮಳ್ಳು” ಕರಿ ಬೋಲ್ಯೊ.

39 ‘ಮೇ ಕರೀತೆ ಖ್ಹಾರಸ್ಸು ಇನೆ ಮನ ಬೋಲ್ಯೊ’ ಕರಿ ಸಾಕ್ಷಿಬೋಲಿತೆ ಯೋ ತಯೇಡಾನಿ ವಾತೆನ ಖ್ಹಮ್‌ಜಿನ್, ಯೋ ಗಾಮ್‌ನು ಸಮಾರಿಯವಾಳಾಮ ಘಣು ಫಣು ಯೇಸುನ ನಂಬ್ಕು.”

40 ಸಮಾರಿಯವಾಳು ಯೇಸುಕನ ಐನ್, ಹಮಾರ ಜೋಡೆ ರಕ್ಲೆ ಕರಿ ಇನ ಗಿಂಗಾಯು, ಇನಖ್ಹಾಜೆ ಯೇಸು ಬೇದನ್ ಹಿಜ್ಜಾಸ್ ರಕ್ಲೆಯಿಗೊ ಥೊ.

41 ಇನೆ ಬೋಲ್ಯೋತೆ ವಾತೆನ ಖ್ಹಮ್‌ಜಿನ್ ಬಿಜೂಬಿ ಘಣು ಅದ್ವಿ ನಂಬ್ಕು.

42 ಇವ್ಣೆ ಯೊ ತಯೇಡಾನ, ಹಮೆ ಇನ ನಂಬ್ಕಾತೆ ಅಜೂಬಿ ತಾರಿ ವಾತ್ಸ ಉಪ್ಪರ್ ಕಾಹೆ. ಹಮೇಸ್ ಕಾನ್‌ಥಿ ಖ್ಹಮ್‌ಜಿನ್ ಇನ ಯೋಸ್ ಖ್ಹಾಚೇಥಿ ಜಗತ್ಸ ಬಘಾಡವಾಳೊಕರಿ ಮಾಲುಮ್ ಕರಿರಾಖ್ಯಾಸ್ ಕರಿ ಬೋಲ್ಕು.

ಯೇಸುನೆ ಅದಿಕಾರಿನ ಛಿಯ್ಯಾನ ಅಟ್ಟು ಕರಕ್ಲೊತೆ

43 ಬೇ ದನ್ ಹಿಜ್ಜ ರಕ್ಲವಾನ ಬಾದ್‌ಮ ಯೇಸು ಹಿಜ್ಜಾಥೊ ಗಲಿಲಾಯನ ಗಯೊ.

44 “ಪ್ರವಾದಿನ ಶೊಂತ್ ಗಾಮ್ ಮರ್ಯಾದಿ ಕೊಯ್ತೆ” ಕರಿ ಖ್ಹುದ್ ಯೇಸುನೇಸ್ ಬೋಲಿರಾಖ್ತೊಥೊ.‡

45 ತದೆ ಯೇಸು ಗಲಿಲಾಯ ಜಾವಾಮ, ಗಲಿಲಾಯನು ಅದ್ವಿಖ್ಹಾರು ಇನ ಸ್ವಾಗತ್ ಕರಕ್ಲು, ಶನಕತೊ ಯೊ ಯೆರೂಸಲೇಮ್ ಪೂಜಾನ ದನ್ತ ಕರಿರಾಖ್ತೊಥೊತೆ, ಇವ್ಣೆಅಖ್ವಾಸ್ ದೇಖಿರಾಖ್ತೊಥು.¶

46 ಯೇಸು ಪಾಲ್ಟೊ ಗಲಿಲಾಯನು ಕಾನಾ ಗಾಮ್‌ನ ಗಯೊ ಯೊ ಹಿಜ್ಜಾಸ್ ಇನೆ ಪಾಣಿನ ದ್ರಾಕ್ಷಿನು ರಖ್ತ್ ಬಣಾಯೊಥೊತೆ. ಹಿಜ್ಜಾ ಖ್ಹಾರ್‌ನೊ ಏಕ್ ಶೌಕಾರ್ ಅದಿಕಾರಿ ಥೊ. ಇನ ಛಿಯ್ಯಾನ ಕಪೆರ್ನೊಮ್ಮ ಜಾನ್ನ್ ಅಟ್ಟು ಕೋ ಥೂನಿ.*

‡ 4:44 4:44 ಮತ್ತಾಯ 13:57; ಮಾರ್ಕ 6:4; ಲೂಕ 4:24

§ 4:45 4:45

ಯೋಹಾನ 2:23 * 4:46 4:46 ಯೋಹಾನ 2:1-11

47 ಯೇಸು ಯೂದಾಯಧು ಗಲಿಲಾಯನ ಆಯೋತೆ ಖಬರ್ ಖ್ವಮ್‌ಜ್ಯೊ ಶನಕತೊ ಇನೊ ಛಿಯ್ಯೊ ಮರಾನಲಾಗ್ಯೊ ಥೊ, ತದೆ ಯೊ ಯೇಸುಕನ ಜೈನ್, ಇನ ಛಿಯ್ಯಾನ ಅಲ್ಫು ಕರನ್ ಕರಿ ಗಿಂಗಾಯೊ.

48 ಯೇಸುನೆ ಇನ, “ತುಮೆ ಖ್ವಣೇದ್‌ನು ಕಾಮ್ನ ಅಙ್ಗು ಅದ್ಭುತ್‌ಕಾಮ್ನ ದೇಖ್ತುನಾತೊ ನಂಬಾಸಸ್ ಕೊಯ್ತೆ” ಕರಿ ಬೋಲ್ಯೊ.

49 ಯೋ ಅದಿಕಾರಿನೆ, “ಗುರು, ಮಾರೊ ಛಿಯ್ಯೊ ಮರ್‌ವಾನ ಅಗಾಡಿ ತೂ ಮಾರ ಕೇಡೆ ಆವ್” ಕರಿ ಬೋಲಿಲಿದೊ.

50 ಯೇಸುನೆ ಇನ, “ಜಾ, ತಾರೊ ಛಿಯ್ಯೊ ಜಿವ್‌ಶೆ” ಕರಿ ಬೋಲ್ಯೊ. ಯೋ ಅದ್ಮಿಯೇಸುನೆ ಇನ ಬೋಲ್ಯೊತೆ ವಾತೆನ ನಂಬಿನ್, ಚಲೆಗಯೊ.

51 ಯೋ ಘರೆ ಭಾವಾನಿ ವಖ್ವತ್‌ಮ, ಇನೊ ಆಳ್ ಏನ್, “ತಾರೊ ಛಿಯ್ಯೊ ಜಿವ್ತೊ ಹುಯಿಗಯೊ” ಕರಿ ಬೋಲ್ಯೊ.

52 ತದೆ ಇನೆ, “ಕೆತ್ರ ಘಂಟಾನ ಮಾರ ಛಿಯ್ಯಾನ ಅಲ್ಫು ಹುಯೊತೆ?” ಕರಿ ಇನ ಪುಲ್ಲಾವಖ್ವತ್‌ರ್, ಇವ್ಚೆ “ಕಾಲೆ ಥೋಪಾರ್‌ನು ಏಕ್ ಘಂಟಾನ ಇನು ತಾವ್ ಉತ್ತಿಗು” ಕರಿ ಬೋಲ್ಯೊ.

53 “ತಾರೊ ಛಿಯ್ಯೊ ಜಿವ್‌ಶೆ” ಕರಿ ಯೇಸುನೆ ಇನ ಬೋಲ್ಯೊತೆ ವಖ್ವತ್‌ಮಾಸ್ ಅಲ್ಫುಹುಯು ಕರಿ ಬಾನೆ ಮಾಲುಮ್ ಕರಿಲಿದೊ, ಅಙ್ಗು ಯೋಬಿ, ಇನ ಘರ್‌ವಾಳು ಖ್ವಾರು ಯೇಸುನ ನಂಬ್ತು.

54 ಯೇಸು ಯೂದಾಯಧು ಗಲಿಲಾಯ ಆವಾನ ಬಾದ್‌ಮ, ಕರನ್ಯೊತೆ ಬೇನು ಅದ್ಭುತ್ ಕಾಮ್ ಆ.

5

ಪಾಣಿನ ಕೋಳಮ್‌ಕನ ಅಲ್ಫು ಕರನ್ಯೊತೆ

1 ಅನ ಬಾದ್‌ಮ, ಯೇಸು ಯೆಹೂದ್ಯರ್‌ನ ಪೂಜಾ ಥೂತೆ ಇನಖ್ವಾಜೆ, ಯೇಸು ಯೆರೂಸಲೇಮ್‌ನ ಗಯೊ.

2 ಯೆರೂಸಲೇಮ್ ಮೇಂಠಾನು ಬಾಕಲ್ಪುಖನ್ನೆ ಏಕ್ ಕೋಳಮ್ ಥು, ಇಬ್ರಿಯ ವಾತೇಮ ಇನ “ಬೇತ್‌ಥಾ” ಕರಿ ನಾಮ್, ಹಿಜ್ಜಾ ಪಾಚ್ ಲ್ಲತ್ ಥು

3 ಯೋ ಛತ್‌ಕನ ರೋಗ್‌ರಾಯೊ ರ್ವಾಳು ಘಣು ಅದ್ವಿ ಪಡ್ಕುರ್ದೆತೊಡು. ಇವ್ವಾಮ ಕಾಣು, ಲಂಗ್ತು ಅಜು ಲಕ್‌ವೊ ಮಾರ್ಯ್‌ಹುಯು ಥೂ.ಇವ್ವ ಪಾಣಿ ಕದೆ ಹಲ್‌ಶೇಸ್‌ಕರಿ ಟಿವಯ್ ರ್ದೆತುಡು.

4 ಶನಕತೊ ಹರೇಕ್ ಬಾರ್ ಥೋಡು ವಖ್ತನ ಬಾದ್‌ಮ ಪ್ರಭುನೊ ದೂತ ಉತ್ರಿ ಐನ್ ಕೋಳಮ್‌ನ ಪಾಣಿನ ಹಲಾವ್‌ತೊಡೊ ರೋಗ್‌ವಾಳು ಕೆಹೂಬಿ ಅದ್ವಿ ಪಾಣಿ ಹಲಾದಿನ್ ಪಹಿಲೆ ಜಾತುಡೂಕಿ ಯೊ ಅಲ್ಪು ಹುಯಿಜಾತುಡು.

5 ಆಟ್‌ಲುಪ್ಪರ್ ಡೋಡಿಖ್ತ್ ವರಖ್‌ಡೊ ರೋಗ್‌ಮ ಪಡ್ಕೊಡೊತೆ ಏಕ್ ಅದ್ವಿ ಹಿಜ್ಜಾಡೊ.

6 ಯೋ ಹಿಜ್ಜಾ ಪಡ್ಕೊತೆ ಯೇಸುನೆ ದೇಖ್ಚೊ ಯೋ ಘಣ ವರಖ್‌ಡು ರೋಗ್‌ಮ ಥೋತೆ ಯೇಸುನ ಮಾಲುಮ್ ಥೂ. ಇನಖ್ವಾಜೆ ಯೇಸುನೆ ಇನ, “ತುನ ಅಲ್ಪು ಹೋಣು ಕರಿ ದಿಲ್ ಛಾ ಕಿಶು?” ಕರಿ ಪುಲ್ಲಾಯೊ.

7 ಯೋ ರೋಗಿನೆ, “ಗುರು, ಪಾಣಿ ಹಲಾನಿ ವಖ್ತಮ ಕೋಳಮ್ಮ ಮನ ಉತ್ರಾವವಾಳು ಕೋಣ್‌ಬಿ ಕೊಯ್ಚು; ಮೇ ಉತರ್‌್ವ ಕರಿ ಜಾವಾನ ಪಹಿಲೆಸ್, ಮಾರೇಥಿಬಿ ಅಗಾಡಿ ಬಿಜು ಉತ್ರಿಜಾಸ್” ಕರಿ ಬೋಲ್ಚೊ.

8 ಯೇಸು ಇನ, “ಉಪ್ಪರ್ ಉಟ್, ತಾರಿ ಬಿಲ್ಲಾವ್ಣಿನ ಪಳ್ಳಿನ್, ಚಾಲ್” ಕರಿ ಬೋಲ್ಚೊ.

9 ತದ್‌ನು-ತದೇಸ್ ಯೋ ಅದ್ವಿನ ಅಲ್ಪು ಹುಯಿಗಯು; ಇನೆ ಇನಿ ಬಿಲ್ಲಾವ್ಣಿನ ಪಳ್ಳಿನ್ ಚಾಲ್ಚೊ.

ತದೆ ಸಬ್ಬತ್ ದನ್ ಹುಯಿರುಡು.*

10 ಇನಖ್ವಾಜೆ ಯೆಹೂದ್ಯರ್‌ನ ಅದಿಕಾರಿ ಯೋ ಅಲ್ಪು ಹುಯೊತೆ ಅದ್ವಿನ, “ಆಜ್ ಸಬ್ಬತ್ ದನ್, ಹುಯಿರುತೆ ಇನಾಖ್ವಾಜೆ ಬಿಲ್ಲಾವ್ಣಿನ

* 5:9 5:9 ಯೆಹೂದ್ಯರ್‌ನು ಕ್ಯಾಲೆಂಡರ್‌ಮ ಸಬ್ಬತ್ ದನ್ ಛಾ, ಇನ ಅರಾಮ್‌ನೊ ದನ್ ಕರೀಬಿ ಬೋಲಾಸ್.

ಪಾಡಾನು ಹಮಾರಿ ಖಾನುಲ್‌ನು ವಿರೋದ್ ಹುಯಿರ್ದ್ವಸ್” ಕರಿ ಬೋಲ್ಯೊ †

11 ತದೆ ಇನೆ, “ಮನ ಅಲ್ಫು ಕರ್ರೊತೆ ಇನೇಸ್, ‘ತಾರಿ ಬಿಲ್ಟಾವ್ವಿನ ಪಳ್ಳಿನ್, ಚಾಲ್’ ಕರಿ ಬೋಲ್ಯೊ” ಕರಿ ಜವಾಬ್ ದಿದೊ.

12 ಇವ್ಣೆ ಇನ, “ತಾರಿ ಬಿಲ್ಟಾವ್ವಿನ ಪಳ್ಳಿನ್, ಚಾಲ್ ಕರಿ ತುನ ಬೋಲ್ಯುತೆ ಯೋ ಅದ್ಮಿ ಕೋಣ್?” ಕರಿ ಪುಲ್ಲಾಯು.

13 ಕತೋಬಿ ಯೋ ಅಲ್ಫು ಹುಯೂತೆ ಅದ್ಮಿನ ಯೇಸು ಕೋಣ್ ಕರಿ ಮಾಲುಮ್ ಕೋ ಥೂನಿ. ಯೋ ಝಗೋಪರ್ ಅದ್ಮಿನಿ ಭೀಡ್ ಥೀತೆ ಇನಖ್ವಾಜೆ ಯೇಸು ಹಿಜ್ಜಾಥೊ ಪಿಷ್‌ಲಿ ಚಲೆಗಯೊ.

14 ಅನ ಬಾದ್‌ಮ ಯೇಸು ಯೋ ಅದ್ಮಿನ ಮಂದಿರ್‌ಮ ದೇಖಿನ್, “ದೇಕ್, ಹಮ್ಮೆ ತುನ ಅಲ್ಫು ಹುಯಿರ್ದ್ವಸ್ ಇನಖ್ವಾಜೆ ಪಾಪ್ ಕರಾನು ಮ್ಹೆಂದೆ, ಶನಕತೊ ಅನೇಥಿ ತುನ ಖೆವೂಬಿ ಜಾಖ್ತ್ ಮುಶಿಬತ್ ನಕೊ ಆವಾದೆ.ಕರಿ ಬೋಲ್ಯೊ

15 ತದೆ ಯೋ ಅದ್ಮಿ ಹಿಜ್ಜಾಥು ಜೈನ್, ಇನ ಅಲ್ಫು ಕರ್ರೊತೆ ಯೇಸುನೇಸ್ ಕರಿ ಯೆಹೂದ್ಯರ್‌ನ ಅದಿಕಾರಿನ ಬೋಲ್ಯು.

16 ಇನಾಖ್ವಾಜೆ ಯೆಹೂದ್ಯವಾಳು ಯೇಸು ಸಬ್ಬತ್ ದನ್ಮ ಕಾಮ್ ಕರ್ರೊತೆ ಇನಖ್ವಾಜೆ, ಇನ ಖ್ತಾಯು.

17 ಕತೋಬಿ ಯೇಸುನೆ ಇವ್ಣುನ, “ಮಾರೊ ಬಾ ಹಂಕಿತೋಡಿ ಕಾಮ್ ಕರುಕರಸ್, ಮೇಬಿ ಕಾಮ್ ಕರುಸ್” ಕರಿ ಬೋಲ್ಯೊ.

18 ಅತ್ರೇಸ್ ಕಾಹೆತೆ ಯೊ ಖಲಿ ಸಬ್ಬತ್ ದನ್ಮ ನಿಯಮ್ಮ ಕೋ ತೋಡ್ಯೊನಿ, ಕತೋಬಿ ಯೊ ದೇವ್ ಇನೊ ಶೊಂತ್ ಬಾಕರಿ ಬೋಲ್ಯೊ ಅಜು ಆಮ್ಮಿಫೊಣಿ ಇನುಯೋಸ್ ದೇವ್ನ ಸಮಾನ್ ಕರಿಲಿದೋಫೊ. ಆ ವಾತೇನ ಬೋಲ್ಯೊತೆ ಇನೇಥಿ, ಯೆಹೂದ್ಯರ್‌ನ್ ಅದಿಕಾರಿ ಇನ ಮಾರ್ನ್ ಮಾರ್ನ್ ಕರಿ ಖ್ತಯಾಲ್‌ಥಿ ನಿರ್ಧಾರ್ ಕರ್ಯ್.

ಛಿಯ್ಯಾನಿ ಅದಿಕಾರ್‌ನಿ ಬಾರೇಮ

† 5:10 5:10 ನೆಹೆಮಿಯ 13:19; ಯೆರೆಮೀಯ 17:21

19 ತದೆ ಯೇಸುನೆ ಇವ್ವುನ, “ಮೇ ತುಮೂನ ಖ್ವಾಚಮಾಬಿ ಬೋಲುಸ್ಕಿ, ಬಾ ಕರಾಸ್ತೆ ಇನ ದೇಖಿನ್ ಛಿಯೊ ಕರಾಸ್ ಪಣ್ಣಿ, ಇನೇಛಿ ಯೋಸ್ ಶಾತ್ರಿ ಕರಾನ ಕೋ ಹುವಾನಿ. ಬಾ ಕರಾಸ್ತೆ ಇಮ್ಮಸ್ ಛಿಯೊಬಿ ಕರಾಸ್.

20 ಶನಕತೊ, ಬಾ ಇನ ಛಿಯ್ಯಾನ ಪ್ಯಾರ್ ಕರಾಸ್ ಅಜು ಯೋ ಕರಾಸ್ತೆ ಖ್ವಾರಾನ ಇನ ಒತಾಳಸ್. ಅತ್ರೇಸ್ ಕಾಹೆತೆ ಅನೇಛಿಬಿ ಮೋಟು ಕಾಮ್‌ಖ್ವಾರು ಇನ ವತಾಳಶೆ; ಇನ ದೇಖಿನ್ ತುಮೆ ಆಶ್ಚರ್ಯ ಕರ್ತು.

21 ಬಾ ಕಿಮ್ ಮರ್ಯಾಹುಯಾನ ಉಠಾಡಿನ್ ಜಾನ್ ದೇಸ್ಕಿ, ಇಮ್ಮಸ್ ಛಿಯೊಬಿ ಇನ ಹೋಣುತೆ ಇವ್ವುನ ಜಾನ್ ದೇಸ್.

22 ಅತ್ರೇಸ್ ಕಾಹೆತೆ, ಬಾ ಕಿನಾಬಿ ತೀರ್ಪ್ ಕರ್ಶೆ ಕೊಯ್ನಿ. ತೀರ್ಪ್ ಕರಾನಿ ಭರ್‌ಪೂರ್ ಅದಿಕಾರ್‌ನ ಛಿಯ್ಯಾನ ದೀರಾಖ್ಯೊಸ್.

23 ಶನಕತೊ, ತಮಾಮ್ ಜ್ಞಣು ಬಾನ ಮರ್ಯಾದಿ ವತಾಳಸ್ತೆ ಇಮ್ಮಸ್, ಛಿಯ್ಯಾನಾಬಿ ಮರ್ಯಾದಿ ವತಾಳ್ಣು ಕರಿ ಇನೆ ಅಮ್ ಕರೊತೆ, ಕೋಣ್ ಛಿಯ್ಯಾನ ಮರ್ಯಾದಿ ದೇಯಿಕ್ಕೊಯ್ನಿಕಿ ಇವ್ಣೆ ಇನ ಮೋಕ್‌ಲ್ಯೊತೆ ಬಾನಾಬಿ ಮರ್ಯಾದಿ ಕೋ ದೇಯ್ನಿ.

24 “ಮೇ ತುಮೂನ ಖ್ವಾಚ ಬೋಲುಸ್ಕಿ, ಮಾರಿ ವಾತೇನ ಖ್ವಮ್‌ಜಿನ್, ಮನ ಮೋಕ್‌ಲ್ಯೊತೆ ಇನ ನಂಬವಾಳಾನ ಹಮೇಶಾನಿ ಜಿಂಧಾಗಿ ಮಳಿರ್ದೊಸ್. ಇನ ತೀರ್ಪ್ ಕೋ ಉಶೇನಿ; ಯೋ ಮರಣ್ಣ ಉಲಾಂಗಿನ್, ಜಾನ್‌ಮ ಪೇಶಿರ್ದೊಸ್.

25 ಮೇ ತುಮೂನ ಖ್ವಾಚ ಬೋಲುಸ್ಕಿ, ಮರಿಗಯೊತೆ ಅದ್ವಿ ದೇವ್ ಛಿಯ್ಯಾನಿ ಅವಾಜ್ ಖ್ವಮ್‌ಜಾನಿ ವಖ್ವತ್ ಆವ್‌ಶೆ. ಯೋ ವಖ್ವತ್ ಹಂಕೇಸ್ ಐರ್ದೊಸ್, ಖ್ವಮ್‌ಜಾವಾಳು ಜಿವ್‌ಶೆ.

26 ಬಾನ ಜಾನ್ ದೈವಾನಿ ಶಕತ್ ಛಾತೆ ಇಮ್ಮಸ್, ಛಿಯ್ಯಾನಾಬಿ ಜಾನ್ ದೈವಾನಿ ಶಕತ್ ದೀರಾಖ್ಯೊಸ್.‡

27 ಅಜು ಛಿಯ್ಯೊ, ಅದ್ವಿನೊ ಛಿಯ್ಯೊ ಹುಯಿರ್ದೊತೆ ಇನಖ್ವಾಜೆ ತೀರ್ಪ್ ಕರಾನಿ ಹಕ್‌ನ ಬಾನೆ ಇನ ದೀರಾಖ್ಯೊಸ್.

‡ 5:26 5:26 ಕತೊ, ಬಾಮ ಜಾನ್ ಛಾತೆ ಇಮ್ಮಸ್, ಛಿಯ್ಯಾಮಾಬಿ ಜಾನ್ ಛಾ ಕರಿ ಮತ್‌ಲಬ್.

28 ಅನಿ ಬಾರೇಮ ಆಶ್ಚರ್ಯ ನಕೊ ಕರೊ; ಏಕ್ ಹಗಾಮ್ ಆವಾಶೆ, ತದೆ ಮಖ್ವಾಣ್ಯಮ ಛಾತೆ ಅಖ್ವು ಇನಿ ಅವಾಜ್ಹೆನ ಖ್ವಮ್‌ಜಿನ್,

29 ಅಙ್ಣು ಇವ್ಣೆ ಮಖ್ವಾಣ್ಯಧು ಉರೀನ್ ಆವಾಶೆ, ಕೋಣ್ ಅಲ್ಲಾನ್ ಕರ್ರ್ಯಾಕೀ ಇವ್ಣುನ ಹಮೇಶಾನ ಜಾನ್ನಖ್ವಾಜೆ ಪಾಲ್ತುಜಿವ್ತು ಹುಯಿನ್ ಆವಾಶೆ. ಖರಾಬ್ ಕರವಾಳು ತೀರ್ಪ್‌ನಖ್ವಾಜೆ ಪಾಲ್ತುಜಿವಿನ್ ಉಟ್‌ಶೆ. §

ಯೇಸುನಿ ಬಾರೇಮ ಸಾಕ್ಷಿಖ್ವಾರು

30 “ಮಾರು ಮೇಸ್ ಶಾತ್ತ್ರಿ ಕರಾನ ಕೋ ಹುವಾನಿ; ಬಾ ಬೋಲಾತೆ ಇನ ಖ್ವಮ್‌ಜಿನ್, ಮೇ ನ್ಯಾವ್ ಫೇಡಾವುಸ್, ಅನಖ್ವಾಜೆ ಮಾರು ತೀರ್ಪ್ ಖ್ವಾಳು ಹುಯಿರುಸ್, ಅಙ್ಣು ಮಾರಿಸ್ ಮರ್ಜಿ ಚಾಲಾದೆ ಕರಿ ಆಖ್ವ್ ಕರ್ರ್ಯೊಕೊಂತೆ, ಮನ ಮೋಕ್‌ಲ್ಯೊತೆ ಇನಿ ಮರ್ಜಿಸ್ ಚಾಲ್ತು ಕರಿ ಮೇ ಆಖ್ವ್ ಕರುಸ್.

31 ಮಾರಿ ಬಾರೇಮ ಮೇಸ್ ಸಾಕ್ಷಿ ಬೋಲಿಲಿದೋತೊ ಮಾರಿ ಸಾಕ್ಷಿ ಖ್ವಾಚಿಸ್ ಕಾಹೆ.

32 ಕತೋಬಿ ಮಾರಿ ಬಾರೇಮ ಸಾಕ್ಷಿ ಬೋಲವಾಳೊ ಏಕ್ ಜಣೊ ಛಾ, ಯೋ ಮಾರಿ ಬಾರೇಮ ಬೋಲಾಸ್ತೆ ಸಾಕ್ಷಿ ಖ್ವಾಳು ಕರಿ ಮನ ಮಾಲುಮ್.

33 ತುಮೆ ಯೋಹಾನಕನ ಸಂದೇಶ್ ಪುಟ್ಟಿಲ್ಯಾವಾಳ ಅದ್ಮಿನಿ ಮೋಕ್‌ಲ್ಯಾ ಇನೆ ತುಮೂನ ಖ್ವಾಚಿನಿ ಬಾರೇಮ ಸಾಕ್ಷಿ ಬೋಲ್ಯೊ*.

34 ಮಾರಿ ಬಾರೇಮ ಅದ್ಮಿನಿ ಸಾಕ್ಷಿ ಮನ ಜರೂರತ್ ಕೊಯ್ಚಿ ತೋಬಿ ತುಮೂನ ರಕ್ಷಣೆಮಳಾದೆ ಕರಿ ಆವಾತ್ತ್ ಬೋಲ್ಯೊತೆ.

35 ಯೋಹಾನ ಬಳುಕರಸ್ತೆ ದೀವನಿಮತ್ ಥೊ, ಅಙ್ಣು ಯೊ ಉಜಾಳು ದಿದೊ. ಕತೋಬಿ ತುಮೆ ಇನ ಉಜಾಳಾಮ ಥೋಡ ದನ್ ಖ್ವಿತ್ತಿ ಕರ್ರ್ಯಾ.

§ 5:29 5:29 ದಾನಿಯೇಲ್ 12:2 * 5:33 5:33 ಯೋಹಾನ 1:19-27;

36 ಮಾರಿ ಸಾಕ್ಷಿ ಯೋಹಾನ್‌ಧೀಬಿ ಮೋಟಿ ಸಾಕ್ಷಿ ಹುಯಿರಿಶ್. ಶನಕತೊ ಬಾ ಖೆವುಕಾಮ್ ಪೂರ ಕರಾನ ಮನ ದಿದೊತೆ ಯೋ ಕಾಮ್ ಕರುಕರೂಸ್. ಕರಿಬೋಲಾನ ಆ ಕಾಮಸ್ ಸಾಕ್ಷಿ.

37 ಅತ್ರೇಸ್ ಕಾಹೆತೆ, ಮನ ಮೋಕ್‌ಲೊತೆ ಬಾಸ್, ಮಾರಿ ಬಾರೇಮ ಸಾಕ್ಷಿ ಬೋಲಿರಾಖೊಸ್. ಕತೋಬಿ ತುಮೆ ಇನಿ ಅವಾಞ್‌ನ ಕದೇಬಿ ಖ್ವಮ್‌ಜಿರಾಖೊಯ್ನಿ, ಇನಿ ರೂಪ್ ಕಿಮ್ ಛಾ ಕರಿ ಕದೇಬಿ ಕೋ ದೇಖಿರಾಖ್ಯಾನಿ.†

38 ಅಞು ಇನಿ ವಾಕ್ಯಾಬಿ ತುಮಾರಾಮ ಕೊಯ್ನಿ, ಶನಕತೊ ಬಾ ಮೋಕ್‌ಲೊತೆ ಇನ ತುಮೆ ನಂಬಾಕೊಯ್ನಿ.

39 ತುಮೆ ಕೆತ್ರುಕ್ತಿ ಧರ್ಮಶಾಸ್ತ್ರನ ಪಠೋಸ್, ಯೋ ತುಮೂನ ಹಮೇಶಾನಿ ಞಿಂದ್‌ಗಿ ದಿಶೆ ಕರಿ ತುಮೆ ಸೋಚೋಸ್, ಕತೋಬಿ ಯೋ ಖ್ವಾರು ದಪ್ತರ್ ಮಾರಿ ಬಾರೇಮಸ್ ಸಾಕ್ಷಿ ದೈವಾನು ಹುಯಿರುಸ್.

40 ತೋಬಿ ತುಮೆ ಮಾರಕನ ಐನ್ ಯೋ ಜಾನ್ನ್ ಲೀಲ್ಯಾವನ ತುಮೂನ ಮನ್‌ಕೊಯ್ನಿ.

41 “ಮನ ಅದ್ಮಿನಿ ಖ್ವರಾಞ್ಣಿ ಹೋಣು ಕೊಯ್ನಿ.

42 ಕತೋಬಿ ತುಮೆ ಕಿಮ್ಮು ಅದ್ಮಿಖ್ವಾರು ಕರಿ ಮನ ಮಾಲುಮ್, ಅಞು ತುಮಾರ ದಿಲ್ಮ ದೇವ್‌ಪರ್ ಪ್ಯಾರ್ ಕೊಯ್ನಿ ಕರೀಬಿ ಮನ ಮಾಲುಮ್.

43 ಮೇ ಮಾರ ಬಾನ ನಾಮ್‌ಥಿ; ಕತೋಬಿ ಮನ ತುಮೆ ಸ್ವೀಕಾರ್ ಕರಕೊಯ್ನಿ, ಕತೋಬಿ ಕೋಣ್‌ತೋಬಿ ಶೊಂತ್ ಅದಿಕಾರ್‌ಥಿ ಆಯೂತೆ ತುಮೆ ಇನ ಸ್ವೀಕಾರ್ ಕರಿಲೆವೊಸ್.

44 ತುಮೆ ಏಕ್‌ಥಿ ಏಕ್ ಮಾನ್-ಮರ್ರಾದಿನ ಆಖ್ಲ್ ಕರೋಸ್, ಕತೋಬಿ ಏಕ್‌ನೊ ಎಕ್ಕ್‌ಸ್ ದೇವ್‌ಥಿ ಆವಸ್ತೆ ಖ್ವರಾಞ್ಣಿನ ತುಮೆ ಹೋಣು ಕರಿ ಆಖ್ಲ್ ಕೋ ಕರೋನಿ. ಅಮ್ ರ್ವಾವಾಪರ್ ತುಮೆ ಮನ ಕಿಮ್ ನಂಬ್‌ಶು?

45 ಮಾರ ಬಾನ ಖ್ವಾಮ್ಣೆ ಭೀರಿನ್ ಮೇ, ತುಮೂನ ಅಪರಾದಿ ಕರಿ ಭೀರಾಕಿಶ್ ಕರಿ ನಕೊ ಸೋಚೊ ತುಮೆ ಭರೋಖೊ ಕರಿರಾಖ್ಯಾತೆ

† 5:37 5:37 ಮತ್ತಾಯ 3:17; ಮಾರ್ಕ 1:11; ಲೂಕ 3:22

ಮೋಶೆಸ್ ತುಮಾರಪರ್ ಅಪರಾದ್ ಲಗಾಡ್‌ಶೆ.

⁴⁶ ತುಮೆ ಖ್ವಾಚಮಾಬಿ ಮೋಶೆನಿ ವಾತೆನಪರ್ ವಿಶ್ವಾಸ್ ಕರಾನು ರಕ್ಷಿಯಿತೊ, ಮಾರಪರ್‌ಬಿ ಭರೋಖೊ ಕರ್ಯಾಹೋತ್. ಶನಕತೊ ಇನೆ ಮಾರಿ ಬಾರೇಮ ಲೀಖಿರಾಖೊಸ್.

⁴⁷ ಅಜೂಬಿ ಮೋಶೆನೆ ಲೀಖೊತೆ ವಾತೇನಸ್ ತುಮೆ ವಿಶ್ವಾಸ್ ನಾ ಕರ್ಯಾತೊ, ಮೇ ಬೋಲುಸ್ತೆ ವಾತೆನ ಕಿಮ್ ನಂಬ್ ಶು?" ಕರಿ ಬೋಲ್ಯೊ.

6

ಯೇಸುನೆ ಪಾಚ್ ಹಜಾರ್ ಅದ್ವಿನ ಖಾಣು ಖಡಾಯೋತೆ
(ಮತ್ತಾಯ 14:13-21; ಮಾರ್ಕ 6:30-44; ಲೂಕ 9:10-17)

¹ ಆನ ಬಾದ್‌ಮ ಯೇಸು ಗಲಿಲಾಯ ದರ್ಯಾನ್ನು ಪಾರ್ಲಿ ಬಾಜೂಮ ಚಲೆಗಯೊ ಇನ ತಿಬೇರಿಯಾನು ದರ್ಯಾವ್ ಕರೀಬಿ ಬೋಲಾಸ್.

² ಅದ್ವಿನಿ ಘಣಿ ಮೋಟಿ ಭೀಡ್ ಯೇಸುನ ಪೀಲೆ ಗಯು, ಶನಕತೊ ಇವ್ಚೆ ಖ್ವಾರು ಯೇಸುನೆ ರೋಗ್‌ಮ ರಕ್ಷವಾಳನ ಅಲ್ಪು ಕರ್ಯೊತೆ ಅದ್ಭುತನ ಖ್ವಾರು ದೇಖ್ತೊ.

³ ತದೆ ಯೇಸು ಪಹಾಡ್‌ಪರ್ ಚಡೀನ್, ಇನ ಶಿಷ್ಯರ್‌ನ ಜೋಡೆ ಬೇಶಿಗಯೊ.

⁴ ಯೆಹೂದ್ಯರ್‌ನ ಪಸ್ತ ಪೂಜಾನಿ ವಖ್ವತ್ ಖನ್ನೆ ಐಗೈಥಿ.

⁵ ಯೇಸುನೆ, ಇನಾಕನ ವಳ್ಳಾವ್‌ತುಡೂತೆ ಅದ್ವಿನಿ ಮೋಟಿ ಭೀಡ್‌ಣ ದೇಖೊ, ಅಜು ಫಿಲಿಪ್ಪನ, “ಆ ಅದ್ವಿ ಖ್ವಾರಾನ ಪೂರಯೆತ್ತು ರೋಟಾ ಅಪ್ಚೆ ಕಿಜ್ಲಾಧು ಲೈಯೆ?” ಕರಿ ಪುಲ್ಲಾಯೊ.

⁶ ಫಿಲಿಪ್ಪನ ಪರ್ವಾನಖ್ವಾಜಿ ಯೇಸುನೆ ಅಮ್ ಪುಲ್ಲಾಯೋತೆ; ಖ್ವಾಚಿ ಶಾತ್ ಕತೊ, ಯೋ ಶಾತ್ ಕರ್ಯಾಕರಿ ಇನ ಅಗಾಡಿಸ್ ಮಾಲುಮ್ ಥೂ.

7 ತದೆ ಫಿಲಿಪ್ಪನೆ, “ಹಜ್ಜ ಲ್ಲಾತೆ ಹರೇಕ್ ಅದ್ಮಿನ ಏಕೇಕ್ ಟುಕ್‌ಡೊ ರೋಟೊ ದೇಣುಕತೋಬಿ, ಬೇಖ್ಲೊರೂಪಾನ ಪಾವಲೆಥೇಬಿ ಜ್ಞಾಖ್ತ್ ಹೋಣು”* ಕರಿ ಬೋಲ್ಯೊ.

8 ತದೆ ಯೇಸುನೊ ಬಿಜೇಕ್ ಜಣೊ ಶಿಷ್ಯ ಹುಯಿರೊಡ್ಲೋತೆ, ಸೀಮೋನ್ ಪೇತ್ರನೊ ಭೈಅಂದ್ರೆಯನೆ,

9 ಯೇಸುನ, “ಹಜ್ಜ ಲ್ಲಾತೆ ಏಕ್ ಛೋಕ್ರಕನ ಪಾಚ್ ಘೌನ ರೋಟಾ ಅಜ್ಜು ಬೇ ಮಾಲ್ಲಾಲಾ ಲ್ಲಾ, ಕತೋಬಿ ಅತ್ರಾಖ್ತಾರ ಅದ್ಮಿನ ಯೋ ಪೂರ್‌ಶೆಕೊಯ್ಲಿ” ಕರಿ ಬೋಲ್ಯೊ.

10 ಯೇಸುನೆ ಇವ್ಣುನ, “ಅದ್ಮಿನ ಖ್ವಾರು ಬೇಖ್ಲೊ ಕರಿ ಬೋಲ್” ಕರಿ ಬೋಲ್ಯೊ. ಯೋ ಝಗೋಪರ್ ಘಣು ಘಾಖ್ತ್ ಪುಟಿರೊಡ್ಲೊ. ಅದ್ಮಿಖ್ವಾರು ಘಾಖ್ತ್‌ಪರ್ ಬೇಶಿಗಯ್. ಇವ್ಣಾಮ ಪರ್ವಾ ಅದ್ಮಿಸ್ ಕಮಾಶಿಕಮಾ ಪಾಚ್ ಹಜಾರ್‌ಜಣು ಥೊ.

11 ಯೇಸುನೆ ಯೋ ರೋಟಾನ ಪಾಡೀನ್, ದೇವ್ ಧನ್ಯವಾದ್ ಕರಿನ್, ಹಿಜ್ಜಾ ಬೆರುಥೊತೆ ಅದ್ಮಿನ ವಾಟಪಾಡಿ ದಿದೊ. ಮಾಲ್ಟಾನಾಬಿ ಇಮ್ಮಸ್ ವಾಟಪಾಡಿ ದಿದೊ, ತಮಾಮ್ ಅದ್ಮಿಇವ್ಣುನ ಕೆತ್ತು ಹೋಣುಕಿ ಎತ್ತು ಖಾದು.

12 ಇವ್ಣೆ ಖ್ವಾರು ಖೈನ್, ಪೇಟ್ ಭರೈಜ್ಜಾವಾನಿ ಬಾದ್‌ಮ ಯೇಸುನೆ ಇನ ಶಿಷ್ಯರನ್, “ಉಭಾರ್ಯತೆ ಟುಕ್ಡಾವ್‌ನ ಎಕ್ಚು ಕರೊ, ಕೆಹೂಬಿ ಖರಾಬ್ ನಾಹೋಣು” ಕರಿ ಬೋಲ್ಯೊ.

13 ತದೆ ಇವ್ಣೆ ಯೊ ಪಾಚ್ ಘೌನ ರೋಟಾನ ಟುಕ್ಡಾವ್‌ನ ಎಕ್ಚು ಕರಾಖ್ತರ್, ಭಾರ ಟೋಕ್ರಾ ಭರಾಯ್.

14 ಯೇಸುನೆ ಕರೊತೆ ಆ ಅದ್ಭುತ್ ದೇಖ್ತೊತೆ ತದೆ ಅದ್ಮಿಖ್ವಾರು ಅಮ್ ಬೋಲ್ಯು, “ಖ್ವಾಚಮಾಬಿ ಜಗತ್‌ಮ ಆವ್ಣೆತೆ ಪ್ರವಾದಿ ಆಸ್ ಹುಯಿರೊಸ್” ಕರಿ ಬೋಲ್ಯು.

15 ಅದ್ಮಿಖ್ವಾರು ಇನ ಧರೀನ್, ಜುಲಮ್‌ಥಿ ರಾಜಕರಾನ ಸೋಚುಕರಾಸ್ ಕರಿ ಯೇಸುನೆ ಮಾಲುಮ್ ಕರಿಲಿದೊ; ಇನಖ್ವಾಜಿ

* 6:7 6:7 ಕತೊ, ಛೊ ಮಹಿನಾನು ಶಂಬಳ ಕರಿ.

ಯೋ ಹಿಜ್ಜಾಥೊ ಎಕ್ಲೋಸ್ ಪಾಲ್ತು ಪಹಾಡ್‌ಪರ್ ಚಲೆಗಯೊ.

ಯೇಸುನೆ ಪಾಣಿಪರ್ ಚಾಲ್ಯೋತೆ

(ಮತ್ತಾಯ 14:22-33; ಮಾರ್ಕ 6:45-52)

16 ಖ್ವಾಂಜ್ ಹುವ್ವಾದೀನ್, ಯೇಸುನ ಶಿಷ್ಯರ್ ದರ್ರಾವ್‌ಕನ ಆಯು.

17 ಡೋಣ್ ಚಥೀನ್, ದರ್ರಾವ್‌ನಿ ಪಾರ್ಲಿ ಬಾಜೂಮ ಥೂತೆ ಕಪೆರ್ನೊಮ್ಮ ಗಯು. ತದ್ದೇಸ್ ಅಂಧಾರು ಹುಯಿಗಯುಥು, ಅಜ್ಜು ಯೇಸು ಇವ್ವಾಕನ ಬಿಜೂಬಿ ಕೋ ಐರ್ರೋಥೋನಿ.

18 ತದೆ ಘಣೊ ಮೋಟೊ ವಹಿರೊ ಜೋರೇಖ್ವು ವಾಗುಕರ್ತೊಥೋತೆ ಇನಖ್ವಾಜೆ, ದರ್ರಾವ್‌ಮ ರೋಕಾಳೊ ಜಾಖ್ತ್ ಹುವ್ವಾಲಗ್ಯೋಥೊ.

19 ಇವ್ವೆ ಡೋಣ್ಣಾ ಹುಟ್ ಫಾಲಿನ್ ಚಲಾವ್ತುಹುಯಿನ್, ತೀನ್‌ಕಿ-ಚಾರ್ ಮೈಲ್[†] ಜೈನ್ ಪೋಚಾನ ಬಾದ್‌ಮ ಯೇಸು ಪಾಣಿಪರ್ ಚಾಲ್ತೊಹುಯಿನ್ ಡೋಣ್ಣಾ ಖನ್ನೆ ವಳ್ಳಾವಾತೆ ದೇಖಿನ್, ಇವ್ವೆ ಡರಿಗಯಾ.

20 ಯೇಸುನೆ ಇವ್ವುನ, “ಡರೊ ನಕೊ, ಯೊ ಮೇಸ್”! ಕರಿ ಬೋಲ್ಯೊ.

21 ತದೆ ಇವ್ವೆ ಇನ ಡೋಣ್‌ಮ ಬುಲೈಲ್ಯವಾನ ಕರ್ರ್ಯಾ ತದ್‌ನು-ತದ್ದೇಸ್ ಇವ್ವೆ ಜಾವ್ತುಥೂತೆ ಝಗೋಕನ ಡೋಣ್ ಜೈನ್ ಪೋಚಿಗಯ್.

ಅದ್ಮಿಖ್ವಾರು ಯೇಸುನ ಥೂಂಡಿನ್ ಆಯೂತೆ

22 ಇನ ಅಗಲ್ಯದನ್ನೆ ದರ್ರಾವ್‌ನಿ ಪಾರ್ಲಿ ಬಾಜೂಮ ಥೂತೆ ಅದ್ಮಿಖ್ವಾರು ಹಿಜ್ಜಾ ಎಕ್ಲಸ್ ಡೋಣ್ ಥೀಕರಿ ಇವ್ವುನ ಮಾಲುಮ್‌ಥು. ಯೋ ಡೋಣ್‌ಮ ಖಲಿ ಶಿಷ್ಯರಸ್ ಗಯ, ಯೇಸು ಶಿಷ್ಯರನ್ನ ಜೋಡೆ ಕೋ ಗಯೋನಿ ಕರಿ ಇವ್ವುನ ಮಾಲುಮ್ ಥೂ.

[†] 6:19 6:19 ಏಕ್ ಮೈಲ್ ಕತೊ ಡೋಡ್ ಕಿಲೊ ಮೀಟರ್.

23 ಎತ್ರಾಸ್‌ಮ, ಬಿಜಿ ಡೋಣ್ ಖ್ವಾರು ತಿಬೇರಿಯಾಥು ಐನ್, ಪ್ರಭುನೆ ಧನ್ಯವಾದ್ ಕರೀನ್, ಅದ್ಮಿನ ರೋಟಿ ಖಡಾಯೋತೆ ಝಗೋಕನಾಸ್ ಆಯು.

24 ಅದ್ಮಿಖ್ವಾರು, ಯೇಸುಬಿ ಇನ ಶಿಷ್ಯರ್ ಹಿಜ್ಜಾಕೊಂತೆ ದೇಖಿನ್, ಯೋ ಡೋಣೇಮ ಚಢೀನ್, ಯೇಸುನ ಡೂಂಡ್‌ತುಹುಯಿನ್, ಕಪೆರ್ನೌಮ್‌ನ ಗಯು.

ಯೇಸುಸ್ ಜಾನ್ನೊ ರೋಟೊ

25 ದರ್ರ್ಯಾವ್‌ನಿ ಪಾರ್ಲಿ ಬಾಜೂಮ ಯೇಸು ಮಳಾದಿನ್, ಅದ್ಮಿಖ್ವಾರು ಇನ, “ಗುರು, ತೂ ಕದೆ ಹಜ್ಜಾ ಆಯೊ?” ಕರಿ ಪುಲ್ಲಾಯು.

26 ಯೇಸುನೆ ಇವ್ವುನ, “ತುಮೂನ ಖ್ವಾಚಮಾಬಿ ಬೋಲುಸ್ಕಿ, ತುಮೆ ಮನ ಡೂಂಡಾಸ್ತೆ ಮಾರು ಖ್ವಣೇದ್ ಕಾಮ್ ಖ್ವಾರು ದೇಖಿನ್ ಕಾಹೆ ಪಣ್ಣಿ, ಯೋ ರೋಟಾವ್ ಫೈನ್, ಪೇಟ್ ಭರೈಲಿದಾತೆ ಇನಖ್ವಾಜೇಸ್.

27 ಖ್ವಡಿಜಾಸ್ತೆ ಖಾಣಾನಖ್ವಾಜೆ ನಕೊ ರಾಬೊ; ತುಮೂನ ಹರ್‌ಹಮೇಶಾನಿ ಜಿಂದಾಗಿ ದೈವಾನ ಹುವಾಸ್ತೆ ಖಾಣಾನಖ್ವಾಜೆ ರಾಬೊ, ಅಮ್ಮು ಖಾಣನ ಅದ್ಮಿನೊ ಛಿಯೊ ತುಮೂನ ದಿಶೆ, ಅನಖ್ವಾಜೆಸ್ ಬಾ ಹುಯಿರ್ದೊತೆ ದೇವ್ವೆ ಇನ ನೇಮಕ್ ಕರ್ದೊ, ಶಾಸನ್ನೊ ಮುದ್ರೊ ಮಾರಿರಾಖ್ವೊಸ್” ಕರಿ ಬೋಲ್ಯೊ.

28 ತದೆ ಅದ್ಮಿಖ್ವಾರು ಯೇಸುನ, “ಹಮೆ ಕೆಹು ಕಾಮ್ ಕರ್ದು ಕರಿ ದೇವ್ ಆಖ್ವೊ ಕರಾಸ್?” ಕರಿ ಪುಲ್ಲಾಯು.

29 ಯೇಸುನೆ ಇವ್ವುನ “ದೇವ್ವೆ ಮೋಕ್‌ಲ್ಯೊತೆ, ತುಮೆ ವಿಶ್ವಾಸ್ ಕರ್ದು ಕರಿ ಬೋಲಾನುಸ್ ದೇವ್ ತುಮಾರೇಛಿ ಆಖ್ವೊ ಕರಾಸ್ತೆ ಕಾಮ್” ಕರಿ ಜವಾಬ್ ದಿದೊ.

30 ಇವ್ವೆ ಇನ, “ಇಮ್‌ಕತೊ, ತೂ ದೇವ್‌ಛಿ ಆಯೊಹುಯೊ ಕರಿ ಹಮೆ ದೇಖಿನ್, ತುನ ವಿಶ್ವಾಸ್ ಕರಾನಿಘೋಣಿ ಕೆಹು ಖ್ವಣೇದ್ ಕರಿ ವತಾಳಸ್?” ಕರಿ ಪುಲ್ಲಾಯು.

31 “ಹಮಾರ ಗುರುಗುರಬ್‌ಲ್ಯವ್‌ನೆ ಉಜ್ಜಾಡಿ ಝಗೋಮ ಮನ್ನಾ ಖಾದು, ಸೊರ್ಗಾಥು ಇವ್ವುನ ಖಾವಾನಖ್ವಾಜೆ ಇನೆ ರೋಟೊ ದಿದೊ ಕರಿ ಧರ್ಮಶಾಸ್ತ್ರಮ ಲೀಖ್ತೆರ್ದೊಸ್‌ನಿ” ಕರಿ ಬೋಲ್ಯು.†

32 ತದೆ ಯೇಸುನೆ ಇವ್ವುನ, “ತುಮೂನ ಖ್ವಾಚಮಾಬಿ ಬೋಲುಸ್ಕಿ, ಸೊರ್ಗಾಮ ತುಮೂನ ರೋಟೊ ದಿದೋತೆ ಮೋಶೆನೆ ಕಾಹೆ ಪಣ್ಣಿ ಮಾರೊ ಬಾ ಸೊರ್ಗಾಥು ಖ್ವಾಚೊ ರೋಟಾನ ದಿಶೆ.

33 ದೇವ್ ದೇಸ್ತೆ ಯೋ ರೋಟೊ, ಸೊರ್ಗಾಥು ಉತ್ರಿ ಐರ್ದ್ವು, ಅಜ್ಜು ಜಗತ್ವ ಜಾನ್ ದೇಸ್.

34 ತದೆ ಅದ್ವಿಖ್ವಾರು, “ಅಲಾ, ಗುರು, ಯೋ ರೋಟಾನ ಹಮೂನ ಹಮೇಶ ದೇ” ಕರಿ ಇನ ಬೋಲ್ಯು.

35 ಯೇಸುನೆ ಇವ್ವುನ, “ಮೇಸ್ ಜಾನ್ನೊ ರೋಟೊ, ಮಾರಕನ ಆವಾಳಾನ ಕದೇಬಿ ಭುಕ್ ಕೋ ಲಾಗ್‌ಶೇನಿ. ಮಾರಾಮ ವಿಶ್ವಾಸ್ ಕರಾವಾಳನ ಕದೇಬಿ ಲೋಖ್‌ಕೋ ಲಾಗ್‌ಶೇನಿ.

36 ಕತೋಬಿ ತುಮೆ ಮನ ದೇಖ್ವಾತೋಬಿ, ವಿಶ್ವಾಸ್ ಕರ್ತಾಕೊಂತೆ ಲ್ಲಾ ಕರಿ ಮೇ ಅಗಾಡಿಸ್ ಬೋಲ್ಯೊನಿ.

37 ಬಾ ಮನ ದೇಸ್ತೆ ಇವ್ವೆ ಖ್ವಾರು ಮಾರಕನ ಆವಾಶೆ, ಅಜ್ಜು ಮಾರಕನ ಆವಾಳಾನ ಪಾಲ್ತುಮೇ ಧಕೇಲಿಶ್ ಕೊಯ್ನಿ.

38 ಮೇ ಸೊರ್ಗಾಥು ಉತ್ರಿ ಆಯೋತೆ ಮಾರಿ ಮರ್ಜಿ ಕರಾನ ಕಾಹೆ, ಪಣ್ಣಿ ಮನ ಮೋಕ್‌ಲ್ಯೊತೆ ಇನಿ ಮರ್ಜಿಸ್ ಪೂರಕರಾನ.

39 ದೇವ್ ಮನ ದಿದೋತೆ ಅದ್ವಿಮ ಏಕ್‌ನಾಬಿ ಮೇ ಗುಮೈನಾಲೇವ್ಣತೆ, ಅಂತಿಮ್ ದನ್ಮ ಮೇ ಇವ್ವ ಖ್ವಾರಾನ ಪಾಲ್ತು ಜಿವ್ತು ಉತಾಡ್ತು ಕರಿ ಬೋಲಾನುಸ್ ದೇವ್ ಮರ್ಜಿ.

40 ಇನಾಟೀಕೆ ಛಿಯ್ಯಾನ ದೇಖಿನ್, ಇನಾಮ ವಿಶ್ವಾಸ್ ಕರಾವಾಳ ಹರೇಕ್ವ ಹರಹಮೇಶಾನಿ ಜಿಂದೊಗಿ ಮಳ್‌ಣು ಕರಿ ಬೋಲಾನು ಬಾನಿ ಮರ್ಜಿ ಹುಯಿರ್ದ್ವಾಸ್, ಅಜ್ಜು ಖ್ವರ್ತಿನ ದನ್ಮ ಮೇ ಇವ್ವುನ ಪಾಲ್ತು ಜಿವ್ತು ಉತಾಡಿಶ್” ಕರಿ ಬೋಲ್ಯೊ.

† 6:31 6:31 ವಿಮೋಚನ ಕಾಂಡ 16:4,15; ನೆಹೆಮಿಯ 9:15

41 ಯೇಸುನೆ, “ಸೋರ್ಗಾಧು ಉತ್ರಿನ್ ಆಯೋತೆ ರೋಟೊ ಮೇಸ್” ಕರಿ ಬೋಲ್ಯೋತೆ ಇನಖ್ವಾಜೆ, ಯೆಹೂದ್ಯವಾಳು ಇನಿ ಬಾರೇಮ ಮಶ್ಲಾ ಮಾರ್ಲ್ಯಾ.

42 ಅಜ್ಜು, “ಆ ಯೋಸೇಫ್‌ನೊ ಛಿಯೊಯೇಸು ಕಾಹೆಕಿ ಶು? ಅನ ಆಯಾ-ಬಾ ಅಪ್ಪುನ ಮಾಲುಮ್‌ನಿ? ಹಮ್ಚೆ ಆ, ಪರ್‌ಲೋಕ್‌ಧು ಉತ್ರಿನ್ ಆಯೊ ಕರಿ ಬೋಲಾಸ್ತೆ ಕಿಮ್?” ಕರಿ ಬೋಲ್ಯಾ.

43 ತದೆ ಯೇಸುನೆ ಇವ್ಣುನ, “ತುಮಾರ ತುಮಾರಮ ಭಣ್‌ಕಾನು ಭೀರಾಖೊ.”

44 ಮನ ಮೋಕ್‌ಲ್ಯೊತೆ ಬಾ ಮಾರಕನ ಅದ್ವಿನ ಮೋಕ್ಲಾಸ್; ಅಜ್ಜು ಮೇ ಇವ್ಣುನ ಖರ್ತಿನ ದನ್ತ ಜಿವ್ತು ಉರಾಡಿಶ್, ಬಾನೆ ಮೋಕ್‌ಲ್ಯೊಕೊಂತೆ ಕೋಣ್‌ಬಿ ಮಾರಕನ ಆವಾನ ಕೋ ಹುವಾನಿ.

45 ಪ್ರವಾದಿಖ್ವಾರು ಲೀಖಿರಾಖ್ಯಾಸ್, ಅಜ್ಜು ಇವ್ಣೆಖ್ವಾರು ದೇವ್‌ಧಿ ಶಿಕಿಹುಯು ಹುಯಿರ್ಟಿಶೆ, ಕೋಣ್ ಬಾಧಿ ಖ್ವಮ್‌ಜಿನ್ ಶಿಕಾಸ್ಕಿ ಯೊ ಮಾರಕನ ಆವಸ್.

46 ಅನಿ ಮತ್‌ಲಬ್, ಕೋಣ್ ತೋಬಿ ಬಾನ ದೇಖಿರಾಖ್ಯಾಸ್ ಕರಿ ಕಾಹೆ, ದೇವ್‌ಕಂಥೊ ಆಯೋತೆ ಎಕ್ಕ್‌ಸ್ ಜ್ಞಾಣಾನೆ ಬಾನ ದೇಖಿರಾಖ್ಯಾಸ್.

47 ಮೇ ತುಮೂನ ಖ್ವಾಚಮಾಬಿ ಬೋಲುಸ್ಕಿ, ಕೋಣ್ ವಿಶ್ವಾಸ್ ಕರಾಸ್ಕಿ, ಇವ್ಣುನ ಹರ್‌ಹಮೇಶಾನಿ ಜಿಂಧ್‌ಗಿ ಮಳಿರ್ಟಿಶೆ.

48 ಮೇಸ್ ಜಾನ್ನೊ ರೋಟೊ.

49 ತುಮಾರ ಗುರುಗುರಬ್‌ಲ್ಯ ಉಜ್ವಾಡಿ ಝಗೋಮ ಮನ್ನಾ ಖಾದು, ಅಜ್ಜು ಇವ್ಣೆಮರಿಗಯು.

50 ಸೋರ್ಗಾಧು ಉತ್ರಿನ್ ಆಯೋತೆ ರೋಟೊ ಕೋಣ್ ಕೋಣ್‌ಖಾಸ್ಕಿ, ಇವ್ಣೆ ಮರ್‌ಶೆ ಕೊಯ್ಚಿ.

51 ಕತೋಬಿ ಸೋರ್ಗಾಧು ಉತ್ರಿ ಆಯೋತೆ ರೋಟೊ ಕೋಣ್ ಖಾಸ್ಕಿ ಯೊ ಮರಕೊಯ್ಚಿ. ಹರ್‌ಹಮೇಶ ಜಿವ್ತು ರ್ಟಿಶೆ; ಅಜ್ಜು ಮೇ ದೆವ್‌ಸ್ಕೆ ರೋಟೊ ಮಾರಿ ಬೋಟಿಸ್, ಆ ಜಗತ್ ಜಿವಾದೆ ಕರಿ ಮೇ ಅನ ದೀಶ್‌ತೆ” ಕರಿ ಬೋಲ್ಯೊ.

52 ತದೆ ಯೆಹೂದ್ಯವಾಳು, “ಆ ಅದ್ಮಿ ಇನಿ ಬೋಟಿನ ಅಪ್ಪುನ ಕಿಮ್ ಖವಾನ ದಿಶೆ?” ಕರಿ ಇವ್ವ-ಇವ್ವ ಮಹಿಸ್ ಅಬ್ಬಾಜ್ಜಿ ವಾತೆ ಕರಾಲಗ್ಗು.

53 ಯೇಸುನೆ ಇವ್ವುನ, “ಮೇ ತುಮೂನ ಖ್ವಾಚಮಾಬಿ ಬೋಲುಸ್ಕಿ, ತುಮೆ ಅದ್ಮಿನೊ ಛಿಯ್ಯಾನು ಬೋಟಿನ ನಾ ಖಾದಾತೊ, ಅಜ್ಜು ಇನು ಲ್ಹೋಯಿನ ನಾ ಪೀದಾತೊ ತುಮಾರ ಮಹಿ ಜಾನ್ ಕೊ ರ್ಲೆಶೇನಿ.

54 ಕೋಣ್ ಮಾರಿ ಬೋಟಿನ ಖಾಸ್ಕಿ, ಮಾರು ಲ್ಹೋಯಿನ ಪಿಯ್ಯಾಸ್ಕಿ ಇವ್ವುನ ಹರ್ಹಮೇಶಾನಿ ಛಿಂದ್‌ಗಿ ಛಾ, ಅಜ್ಜು ಮೇ ಇನ ಖ್ವರ್ತಿನ ದನ್ಮ ಜಿವ್ವು ಉಠಾಡಿಶ್.

55 ಮಾರಿ ಬೋಟಿ ಖ್ವಾಚ ಖಾಣು ಅಜ್ಜು ಮಾರು ಲ್ಹೋಯಿ ಖ್ವಾಚ ಪಾನ್ಹ ಹುಯಿರಲ್ಹ್.

56 ಮಾರಿ ಬೋಟಿನ ಖೈನ್, ಮಾರೂ ಲ್ಹೋಯಿನ ಪಿಯ್ಯಾವಾಳು ಯೊ ಮಾರಾಮ ರ್ಲೆಶ್, ಅಜ್ಜು ಮೇ ಇವ್ವಾಮ ಜಿವಿರಲ್ಹೆಶ್.

57 ಜಿವ್ವೊ ಹುಯಿರಲ್ಹೆತೆ ಬಾನೆ ಮನ ಮೋಕ್ಲಿರಾಖ್ಯೊಸ್, ಅಜ್ಜು ಮೇ ಇನೇಛಿಸ್ ಜಿವ್‌ಶ್. ಇನಖ್ವಾಜಿ ಕೋಣ್ ಮನ ಖಾಸ್ಕಿ ಯೋ ಮಾರೇಛಿ ಜಿವ್‌ಶೆ.

58 ಹೈರುತೆ ಸೊರ್ಗಾಛು ಉತ್ರಿ ಆಯೋತೆ ರೋಟೊ ಆಸ್. ತುಮಾರ ಗುರುಗುರಬ್‌ಲ್ಯ ಮನ್ನಾ ಖಾದು ಅಜ್ಜು ಮರಿಗಯು. ಕತೋಬಿ ಕೋಣ್ ಆ ರೋಟಾನ ಖಾಸ್ಕಿ ಯೋ ಕದೇಬಿ ಜಿವ್ವೊ ರ್ಲೆಶೆ.”

59 ಯೇಸುನೆ ಕಪೆರ್ನೊಮ್‌ನು ಸಭೆ ಭರಾವನು ಮಂದಿರೊಮ ಆ ಖ್ವಾರು ಬೋಲಿವತಾಳ್ವೊ.

ಹರ್ಹಮೇಶಾನಿ ಛಿಂದ್‌ಗೀನಿ ವಾತೆ

60 ಅನ ಖ್ವಮ್‌ಜಿನ್, ಇನ ಶಿಷ್ಯರ್‌ಮ ಘಣು ಜ್ಞಣು, “ಆ ಜ್ಞಾಖ್ವತ್ ಕರಣ್ಣಿವಾತ್ ಅನ ಕೋಣ್ ಖ್ವಮಜ್‌ಶೆ” ಕರಿ ಬೋಲ್ಯು.

61 ಇನ ಶಿಷ್ಯರ್ ಅನಿ ಬಾರೇಮ ಮಶ್ಲಾ ಮಾರುಕರಸ್ ಕರಿ ಯೇಸುನೆ ಮಾಲುಮ್ ಕರಿಲೀನ್, “ಆ ವಾತೇಛಿ ತುಮಾರ ದಿಲ್ವ ಟೋಚಾಯಕಿ ಶು?

62 ಏಕ್ ಬಾರ್ ತುಮೆ, ಅದ್ಮಿನೊ ಛಿಯ್ಯಾನ ಪಹಿಲೆ ಕಿಜ್ಜಾಧೋಕಿ ಹಿಜ್ಜ ಭಾಶೇತೆ ಇನ ದೇಖ್ಯಾತೊ ತುಮೆ ಶಾತ್ ಕರ್ ಶು?

63 ಜಾನ್ ದೇಸ್ತೆ ದೇವ್‌ನು ಆತ್ಮ ಹುಯಿರುಸ್ ಅದ್ಮಿನು ಹಿಮ್ಮಡ್ಲಿ ಫಾಯಿದೊ ಕೊಯ್ತು; ಮೇ ತುಮೂನ ಖಿವು ವಾತ್ ಬೋಲ್ಯೋಕಿ ಯೊ ದೇವ್‌ನೊ ಆತ್ಮ ಹುಯಿರ್ದೊಸ್. ಅಜ್ಜು ಯೋ ಜಾನ್ಸ್ ದೇಸ್.

64 ತೋಬಿ ತುಮಾರಾಮ ಥೋಡು ಭಣು ನಂಬಾಕೊಯ್ತೆ” ಕರಿ ಬೋಲ್ಯೊ ಕೋಣ್ ಇನ ನಂಬುಕರಾಕೊಯ್ತೆ ಅಜ್ಜು ಕೋಣ್ ಇನ ಥೋಕೇಥಿ ಧರಿದಿಶೇತೆ ಕರಿ ಬೋಲಾನು ಪಹಿಲೇಥುಸ್ ಯೇಸುನ ಮಾಲುಮ್ ಥೂ.

65 ಅಜ್ಜು ಯೇಸುನೆ ಬೋಲ್ಯೊ ಹುಯಿನ್, “ಬಾನಿ ಮರ್ಜಿಕ್‌ಕೊಂತೆ ಕೋಣ್‌ಬಿ ಮಾರಕನ ಆವಾನ ಕೋ ಹುವಾನಿ ಕರಿ ಮೇ ತುಮೂನ ಬೋಲ್ಯೊತೆ ಅನಾಖ್ವಾಜೆ” ಕರಿ ಬೋಲ್ಯೊ.

66 ತಪ್‌ಥು ಇನ ಶಿಷ್ಯರಾಮ ಕೈಏಕ್ ಭಣು ಇನ ಮ್ಹಂದಿನ್ ಚಲಿಗಯು ಅಜ್ಜು ಯೇಸುನಿ ಜೋಡ್ತೆ ಆವವಾಳು ಘಣುಭಣು ಇನ ಮ್ಹಂದಿನ್ ಪಾಲ್ತು ಚಲಿಗಯು.

67 ತದೆ ಯೇಸುನೆ ಇನ ಭಾರ ಶಿಷ್ಯರನ, “ತುಮೇಬಿ ಚಲಜಾವ್ಣು ಕರಿ ಛಾಕಿ ಶು?” ಕರಿ ಪುಲ್ಲಾಯೊ.

68 ಸೀಮೋನ್ ಪೇತ್ರನೆ ಯೇಸುನ, “ಪ್ರಭು, ತುನ ಮ್ಹಂದಿನ್ ಹಮೆ ಕಿಜ್ಜಾ ಜಯ್ತೆ? ತಾರಕನ ಹರ್‌ಹಮೇಶಾನಿ ಜಿಂದ್‌ಗಿ ದೈವಾನಿ ವಾತೆ ಛಾ.

69 ಹಮೆ ತಾರಾಮ ವಿಶ್ವಾಸ್ ಕರಿಯೇಸ್, ಅಜ್ಜು ತೂ ದೇವ್‌ಥಿ ಆಯೋತೆ ಪರಿಶುದ್ ಅದ್ಮಿ” ಕರಿ ಬೋಲ್ಯೊ.

70 ತದೆ ಯೇಸುನೆ, “ತುಮುನ ಭಾರ ಜ್ಞಾನ ಮೇ ಚೂಣಿನ್ ಕಾಡ್ಲೊಕೊಯ್ತೆಕಿ ಶು? ರ್ಡಿಯುತೋಬಿ ತುಮಾರಾಮ ಏಕ್ ಜ್ಞೊ ಶೈತಾನ್ ಹುಯಿರ್ದೊಸ್” ಕರಿ ಜವಾಬ್ ದಿದೊ.

71 ಯೇಸುನೆ ಸೀಮೋನ್ ಇಸ್ಕರಿಯೋತನೊ ಛಿಯ್ಲೊ ಹುಯಿರೋತೆ ಯೂದನಿ ಬಾರೇಮ ಆ ವಾತೆ ಬೋಲ್ಯೊತೆ. ಯೂದ ಭಾರ ಜ್ಞ ಶಿಷ್ಯರಾಮ ಏಕ್‌ಜ್ಞೊ ಹುಯಿರೋಥೊ, ಯೇಸುನ ದೋಕೇಥಿ ಧರಿದೆವಾಳೊ ಯೋಸ್.

7

ಯೇಸುಬಿ ಇನ ಭೈಯೇ

1 ಆ ಖ್ವಾರು ಹುವಾನ ಬಾದ್‌ಮ, ಯೇಸು ಗಲಿಲಾಯಮ ಫರುಕರ್ತೊಥೊ; ಯೆಹೂದ್ಯವಾಳು ಇನ ಮಾರಿನಾಖಾನ ಟಿವವ್‌ಕರ್ತೊಥು ಇನಖ್ವಾಜೆ, ಯೂದಾಯಮ ಫರಾನ ಇನ ಮನ್ ಕೋ ಥೂನಿ.

2 ಯೆಹೂದ್ಯರ್‌ನ ಡೆರಾನ ಘರ್ನಿಪೂಜಾನ್ ವಖ್ವತ್ ಖನ್ನೆ ಏಗಿಥಿ.*

3 ಇನಖ್ವಾಜೆ ಯೇಸುನ ಭೈಯೇ ಇನ, “ತೂ ಕರಾನು ಕಾಮ್‌ಖ್ವಾರು ತಾರು ಶಿಷ್ಯರ್‌ಬಿ ದೇಖಾನ ಖ್ವಾಜೆ, ಗಲಿಲಾಯ ಮ್ಹೇಲಿನ್ ಯೂದಾಯಾನ ಜಾ.ಕರಿ ಬೋಲಾಖ್ವತರ್

4 ವಿವು ಏಕ್‌ಜಣೊ ಅದ್ಮಿಮ ವತಾಳಿಲೇವ್ಣು ಕರಿ ಇಷ್ಟ ಪಡಸ್‌ಕಿ ಯೋ ಇನಕಾಮ್‌ನ ಲಪಾಡಿನ್ ಕರಾಕೊಯ್ನಿ. ಶನಕತೊ ತೂ ಅದ್ಭುತ್ ಕಾಮ್ ಕರಾಸ್, ಇನಖ್ವಾಜೆ, ಆ ಜಗತ್ತ್ ಖ್ವಾಮ್ಣೆ ತಾರುತೂಸ್ ವತಾಳಿಲೆ” ಕರಿ ಬೋಲ್ಯು.

5 ಯೇಸುನ ಭೈಯೇಬಿ ಇನ ನಂಬ್‌ತುಥು ಕೊಯ್ನಿ.

6 ಯೇಸುನೆ ಇವ್ಣುನ, “ಮಾರಿ ವಖ್ವತ್ ಬಿಜೂಬಿ ಕೋ ಆಯಿನಿ. ಕತೋಬಿ ತುಮಾರಿ ವಖ್ವತ್ ಕದೇಬಿ ತೈಯಾರ್ ರಕ್ಲೆಸ್.

7 ಆ ಜಗತ್ ತುಮೂನ ವಹೇರ್ ಕರಾನ ಕೊ ಹೊಯ್ನಿ, ಕತೋಬಿ ಮೇ ಇನಿ ಕಾಮ್ ಅಖ್ವಾನ ಖರಾಬ್ ಕರಿ ಸಾಕ್ಷಿಬೋಲುಸ್ತೆ ಇನಖ್ವಾಜೆ ಯೋ ಮನ ವಹೇರ್ ಕರಾಸ್.

8 ತುಮೇಸ್ ಪೂಜಾನ್ ಜಾವೊ. ಮನ ಬಿಜೂಬಿ ಬರಾಬರ್‌ನಿ ವಖ್ವತ್ ಕೋಆಯಿನೆ ಇನಖ್ವಾಜೆ, ಮೇ ಆ ಪೂಜಾನ್ ಆವ್‌ಕೊಯ್ನಿ” ಕರಿ ಬೋಲ್ಯೊ.

9 ಆ ಬೋಲಾನ ಬಾದ್‌ಮ, ಯೋ ಗಲಿಲಾಯಮಸ್ ರಹಿಗೊ.

10 ಇನ ಭೈಯೇ ಜಾವಾನ ಬಾದ್‌ಮ, ಯೇಸುಬಿ ಪೂಜಾನ್, ಅದ್ಮಿನ್ ದೆಖಾವ್ಣುನಾತೆ ತಿಮ್, ಲಪೀನ್ ಗಯೊ.

* 7:2 7:2 ಯಾಜಕ ಕಾಂಡ 23:34; ಧರ್ಮಪದೇಶ ಕಾಂಡ 16:13

11 ಪೂಜಾಮ ಯೆಹೂದ್ಯರನ ಅಧಿಕಾರಿ, “ಯೇಸು ಕಿಚ್ಚಾ ಛಾ?” ಕರಿ ಪುಟ್ಟಾವ್ತುಹುಯಿನ್, ಇನ ಡೂಂಡುಕರ್ತುಫು.

12 ಅಜು ಅದ್ಮಿನಿ ಝೂಂಡೇಮ ಯೇಸುನಿ ಬಾರೇಮ ಮಹಿ-ಮಹಿಸ್ ಗುಣ್‌ಗುಣೈನ್ ಬೋಲುಕರ್ತುಫು. ಥೋಡು ಭಣು, “ಯೋ ಅಲ್ಲೊ” ಕರಿ ಬೋಲ್ಯು. ಅಜು ಥೋಡು ಭಣು, “ಕೊಯ್ನಿ ಯೋ ಅದ್ಮಿನ ಮಂಕ್ ಕರುಕರಸ್” ಕರಿ ಬೋಲ್ಯು.

13 ಕತೋಬಿ ಕೋಣ್‌ಬಿ ಇನಿ ಬಾರೇಮ ಭಾಲ್‌ಥಿ ವಾತೆ ಕೋ ಬೋಲ್ಯುನಿ. ಶನಕತೊ ಯೆಹೂದ್ಯರನ ಅಧಿಕಾರಿಧಿ ಡರುಕರ್ತುಫು.

14 ಪೂಜಾ ಖನ್ನೆ-ಖನ್ನೆ ಆಧು ಖತಮ್ ಹುವಾನ ಬಾದ್‌ಮ, ಯೇಸು ಮಂದಿರ್‌ಮ ಜೈನ್ ವಚನ್ ಬೋಲಿ ದೆವಾಲಗ್ಗೊ.

15 ತದೆ ಯೆಹೂದ್ಯರನ್ನ ಅಧಿಕಾರಿಖ್ವಾರು, “ಪಢ್ಯೋ-ಲೀಖ್ಯೊಕೊಂತೆ ಅನ, ಅತ್ತುಖ್ವಾರು ಮಾಲುಮ್‌ಛಾತೆ ಕಿಮ್?” ಕರಿ ಬೋಲಿನ್ ಆಶ್ಚರ್ಯ ಕರ್ಯ್.

16 ಯೇಸುನೆ, “ಮೇ ಶಿಕಾಡುಸ್ತೆ ಮಾರಿ ವಚನ್ ಕಾಹೆ ಪಣ್ಣಿ, ಮನ ಮೋಕ್‌ಲೊತೆ ದೇವ್ನಿ ವಚನ್ ಹುಯಿರ್ಯ್.

17 ದೇವ್ನಿ ಮರ್ಜಿನಿಫೋಣಿ ಚಾಲಾನ ಕಿನ ಮನ್ ಛಾಕಿ ಇವ್ವುನ ಆ ವಚನ್ ದೇವ್‌ಥಿ ಆಯುಕಿ, ನತರ್ ಮೇಸ್ ಬಣೈನ್ ಬೋಲುಕರುಸ್ಕಿ ಕರಿ ಬೋಲಾನು ಮಾಲುಮ್ ಪಡಾಸ್.

18 ಕೋಣ್ ಇನುಯೋಸ್ ವಾತೆಬೋಲಿಲೇಸ್ತಿ ಇನಿ ಶೊಂತ್ ಇಜ್ಜತ್‌ನ ಡೂಂಡಸ್. ಇನುಯೋಸ್ ಖ್ವಾಚ್‌ನ ಲೀಲಾವನ ಕೋಶಿಶ್ ಕರಾಸ್, ಕತೋಬಿ ಕೋಣ್‌ಇನ ಮೋಕ್‌ಲೊತೆ ಇನಿ ಇಜ್ಜತ್‌ನ ಡೂಂಡಾವಾಳೊ ಅದ್ಮಿಸ್ ಖ್ವಾಚೊ; ಇನಾಮ ಶನೀಶ್ ಗಲತ್ ಕೊ ರಡ್ಡೆಯ್ನಿ.

19 ಮೋಶಿನೆ ತುಮೂನ ಧರ್ಮಶಾಸ್ತ್ರ ದಿದೊ ಕೊಯ್ನಿಕಿಶು? ಕತೋಬಿ ತುಮಾರಮ ಕೋಣ್‌ಬಿ ಯೊ ಹುಕುಮ್ ಪಾಡಿನ್ ಚಾಲಕೊಯ್ನಿ. ತುಮೆ ಶನ ಮನ ಮರ್‌ನಾಕ್ಳು ಕರಿ ಕೋಶಿಶ್ ಕರಾಸ್?” ಕರಿ ಬೋಲ್ಯೊ.

20 ತದೆ ಯೋ ಅದ್ವಿಖ್ಹಾರು, “ತುನ ಭೂತ್ ಧರಿರಾಖ್ಯುಸ್ ತುನ ಮರ್ನಾಕ್ಲು ಕರಿ ಕೋಣ್ ಥೂಂಡ್‌ಚೆ?” ಕರಿ ಬೋಲ್ಯು.

21 ಯೇಸುನೆ ಇವ್ವುನ, “ಮೇ ಏಕ್ ಅದ್ಬುತ್ ಕಾಮ್ ಕರ್ಯ್ಚೊ ಇನ ದೇಖಿನ್ ತುಮೆಖ್ಹಾರು ಆಶ್ಚರ್ಯ ಹುಯಾಥ.

22 ಮೋಶೆನೆ ತುಮೂನ ಖ್ವತ್ ಕರಾವ್ಣು ಕರಿ ಹುಕುಮ್ ದಿದೋಥೊ, ಕತೋಬಿ ಯೋ ಮೋಶೆಥಿ ಆಯೂತೆ ಕಾಹೆ, ಇನೇಥಿಬಿ ಅಗಾಡಿ ಥೂತೆ ತುಮಾರ ಗುರುಖ್ಹಾರಾಥೀಸ್ ಯೋ ಆಯೂತೆ. ಅಜು ತುಮೆ ಸಬ್ಬತ್ ದನ್‌ಮಾಬಿ ಲಡ್ಕಾವ್ಣು ಖ್ವತ್ ಶನಕರೋಸ್.†

23 ಮೋಶೆನು ಧರ್ಮಶಾಸ್ತ್ರ ತೋಡ್ನುನಾ ಕರಿ ಏಕ್‌ಜಣೊ ಸಬ್ಬತ್‌ನ ದನ್ಮ ಖ್ವತ್ ಕರ್ಯೆಲ್ಯವಾನು ರೆಡ್ಡಿಯುತೊ, ಮೇ ಸಬ್ಬತ್ ದನ್ಮ ಏಕ್ ಅದ್ವಿನ ಗುಣ್ ಕರೀನ್‌ಅಲ್ಪು ಕರ್ತಾನ, ಮಾರಪರ್ ಶನ ಇರಾದೊ ಕರೋಸ್?‡

24 ಡೋಳಾಮ ದೆಖಾವಸ್ಚೆ ಇನಾಪರ್ ತೀರ್ಪ್ ನಕೊ ಕರೊ; ಖ್ವಾಚು ಶಾತ್ರಿ ಇನಾಪರ್ ತೀರ್ಪ್ ಕರೊ.

ಯೇಸುಸ್ ಆ ಕ್ರಿಸ್ತಕಿ ಶು?

25 ಯೆರೂಸಲೇಮ್‌ನು ಥೋಡುಜಣು ಅಮ್ ಬೋಲ್ಯು, “ಯೊ ಅದಿಕಾರಿಖ್ಹಾರು ಇವ್ಣೆ ಮಾರಿನಾಕ್ಲು ಕರಿ ಛಾತೆ ಆಸ್ ಕಾಹೆಕಿಶು?

26 ಕತೋಬಿ ದೇಖೊ, ಆ ಹೈರೋತೆ ಖ್ವಾರಾನ ಇಜ್‌ಮಾಸ್ ವಾತ್‌ಬೋಲ್‌ತೊ ಛಾಲ್ಯೊಫಂಡಾಸ್ ತೋಬಿ ಯೊ ಅದ್ವಿ ಇನ ಶಾತ್ರಿ ಕರುಕರಕೊಯ್ಚಿ. ಅಮ್ಮಸ್ ಕಾಹೆಕಿಶು? ಅಮ್ಮಿ ಪರಕ್ಮ ಯೆಹೂದ್ಯರಾ ಅದಿಕಾರಿಖ್ಹಾರು ಆಸ್ ಖ್ವಾಚಮಾಬಿ ಕ್ರಿಸ್ತಸ್ ಕರಿ ಮಾಲುಮ್ ಕರಿಲಿದು.

27 ಕತೋಬಿ ಆ ಅದ್ವಿ ಕಿಜ್ವಾಡ್ತು ಆಯೊಹುಯೊಕರಿ ಹಮೂನ ಮಾಲುಮ್, ಕ್ರಿಸ್ತ ಆವಾನಿ ವಖ್ವತ್‌ಮ ಯೋ ಕಿಜ್ವಾಡ್ತೊ ಆಯೊಹುಯೊ ಕರಿ ಏಕ್‌ನಾಬಿ ಮಾಲುಮ್ ಕೋ ಪಡ್‌ಶೇನಿ” ಕರಿ ವಾತೆ ಬೋಲಿಲೆವ್‌ಕರ್ತುಡ್ತು.

28 ಯೇಸು ಮಂದಿರ್‌ಮ ಬೋಲಿ ದೇವ್ ಕರ್ತೊಥೊ. ತದೆ ಯೊ ಊಚಿ ಆವಾಜ್‌ಥಿ ಬೋಲ್ಯೊ, “ಯೊ ಕಿಜ್ವಾಡ್ತೊ ಆಯೊಕರಿ ತುಮೂನ

† 7:22 7:22 ಯಾಜಕ ಕಾಂಡ 12:3; ಅದಿಕಾಂಡ 17:10 ‡ 7:23 7:23 ಯೋಹಾನ 5.9

ಮಾಲುಮಾಕಿಶು, ಮಾರಿಶೊಂತ್ ಅದಿಕಾರ್ಥಿ ಕೊ ಆಯೋನಿ ಮನ ಮೋಕ್ಲಿರಾಖೊತೆ ಖ್ವಾಚ ಏಕ್‌ಜಣಾನ ಖ್ವಣೇದ್ ಕೊ ಧರಾನಿ.”

29 ಕತೊ ಮನ ಯೋ ಮಾಲುಮ್, ಶನಕತೊ ಮೇ ಇನಾಕಂಥು ಆಯೊ ಅಜು ಇನೇಸ್ ಮನ ಮೋಕ್ಲಿರಾಖೊಸ್” ಕರಿ ಬೋಲ್ಯೊ.

30 ತದೆ ಇವ್ಚೆ ಇನ ಧರ್‌ನು ಕರಿ ಕರ್ಲ್ಯಾ ಕತೋಬಿ ಯೋ ವಖ್ವತ್ ಬಿಜೂಬಿ ಕೋಆಯಿಂಥಿತೆ ಇನಖ್ವಾಜೆ, ಕೋಣ್‌ಬಿ ಇನಾಪರ್ ಹಾತ್ ಕೋ ನಾಖ್ಲುನಿ.

31 ಕತೋಬಿ ಝೂಂಡ್‌ಮ ಥೂತೆ ಘಣು ಅದ್ಮಿ ಇನಾಪರ್ ವಿಶ್ವಾಸ್ ಕರ್ಲ್ಯಾ ಅಜು, “ಕ್ರಿಸ್ತ ಆಯೋತೊ ತದೆ, ಅನೆ, ಕರ್ಲ್ಯೊತೆ ಅದ್ಭುತ್ ಕಾಮ್‌ಥೀಬಿ ಆಜೂಬಿ ಜಾಖ್ವತ್ ಕಾಮ್ ಕರಾಸ್ಕಿಶುಕೀನಿ?” ಕರಿ ಬೋಲ್ಯೊ.

ಯೇಸುನ ಧರಾನ ಕಾವ್ಲಿ ಕರಾವಾಳ ಸೇವಕ್‌ನ ಮೋಕ್‌ಲ್ಯಾತೆ

32 ಯೊ ಅದ್ಮಿನು ಝೂಂಡ್ ಯೇಸುನಿ ಬಾರೇಮ ಮಹಿ-ಮಹಿಸ್ ಬೋಲಾತೆ ವಾತೇನ ಫರಿಸಾಯರ್‌ವಾಳು ಅಜು ಮಹಾಯಾಜಕ್‌ರ್ ಖ್ವಮ್‌ಜ್ಜು, ಅಜು ಯೇಸುನ ಧರಾನಖ್ವಾಜೆ ಮಂದಿರ್‌ನು ಕಾವ್ಲಿ ಕರಾವಾಳನ ಮೋಕ್‌ಲ್ಯಾ.

33 ತದೆ ಯೇಸು ಇವ್ಚುನ, “ಬಿಜು ಥೋಡ ದನ್ ಮೇ ತುಮಾರ ಜೋಡೆ ರ್ಹೀಶ್, ಇನ ಬಾದ್‌ಮ ಮನ ಮೋಕ್‌ಲ್ಯೊತೆ ಇನಾಕನ ಮೇ ಚಲ್ಯೊಜ್ಯೆಶ್.

34 ತುಮೆ ಮನ ಥೂಂಡ್‌ಶು, ಕತೋಬಿ ಮೇ ತುಮೂನ ಕೋ ಮಳಿಶಾನಿ, ಶನಕತೊ ಮೇ ಥೂತೆ ಹಿಜ್ಜಾ ತುಮೂನ ಕೋ ಆವಾನ ಉಶೇನಿ” ಕರಿ ಬೋಲ್ಯೊ.

35 ತದೆ ಯೆಹೂದ್ಯರ್‌ನ್ ಅದಿಕಾರಿಖ್ವಾರು ಇವ್ಚ ಇವ್ಚಮಾಸ್ ವಾತೆ ಕರಿಲಿದು, “ಅಪ್ಪುನ ಮಳ್ಳುನಾತೆ ಆ ಕಿಜ್ಜಾ ಜಾವ್ಣುಕರಿ ಛಾ? ಯೊ ಕಿಜ್ಜಾತೋಬಿ ಜಾವ್ಣುಕಿಶುಕಿ? ಕಿಜ್ಜ ಮಾರು ಅದ್ಮಿ ಗ್ರೀಕ್ ಖ್ವಯೇರ್‌ಮ ಜಿವ್ಣು ಕರುಕರಸ್, ಹೈರುತೆ ಗ್ರೀಕ್‌ವಳಾನ ಶಿಕಾಡ್‌ದಿಶೆಕಿ ಶು?

36 ತುಮೆ ಮನ ಡೂಂಡ್‌ಶು, ಕತೋಬಿ ಮೇ ತುಮೂನ ಕೋ ಮಳಿಶಾನಿ, ಶನಕತೊ ಮೇ ಲ್ಲೂತೆ ಹಿಜ್ಜಾ ತುಮೂನ ಕೋ ಆವಾನ ಉಶೇನಿ” ಕರಿ ಇನೆ ಬೋಲ್ಯೋತೆ ವಾತೆನಿ ಮತ್‌ಲಬ್ ಶಾತ್?” ಕರಿ ಇವ್ವ-ಇವ್ವ ಮಹಿಸ್ ಬೋಲಿಲಿದು.

ಜಾನ್ನ ದೈವಾನು ಪಾಣಿನು ರ್ಫೀಲ್

37 ಪೂಜಾನೊ ಖರ್ತಿನೊ ಅಜ್ಜು ಮುಖ್ಯದನ್ ಹುಯಿರ್ರೊತೆ ತದೆ ಯೇಸು ಭೀರಿನ್ ಊಚಿ ಅವಾಜ್‌ಧಿ ಬೋಲಾನು ಶುರುಕರ್ರೊ, “ಕಿನ ಲೋಖ್‌ಲಾಗಸ್ತಿ, ಯೊ ಅವಾದೆ ಅಜ್ಜು ಪಿಯ್ಯಾದೆ.†

38 ಧರ್ಮಶಾಸ್ತ್ರಮ ಬೋಲ್ಪಿರ್ರೊತೆ ಇಮ್ಮಸ್, ‘ಕೋಣ್ ಮಾರಪರ್ ವಿಶ್ವಾಸ್ ಕರಾಸ್ತಿ ಇನ ಮಹಿಥು ಜಾನ್ನಪಾಣಿನು ರ್ಫೀಲ್ ಇನಾಮ ವ್ಹವ್‌ಶೆ” ಕರಿ ಚಿಕ್ರಿನ್ ಬೋಲ್ಯೊ.*

39 ಕತೋಬಿ ಯೇಸುನೆ ಇನ ನಂಬಾವಾಳು ಲೀಲಿಶೇತೆ ಪವಿತ್ರಾತ್ಮ ವರಾನಿ ಬಾರೇಮ ಬೋಲ್ಯೊ ಯೇಸು ಬೀಜೂಬಿ ಮಹಿಮೆನ ಲೀರಾಖ್ಯೊಥೊ ಕೊಯ್ನಿ ಶನಕತೊ ಪವಿತ್ರಾತ್ಮ ವರ ಅಜ್ಜೂಬಿ ದೆವೈರ್ರೊಡ್ ಕೊಯ್ನಿ.†

ಅದ್ವಿವೋಮ ಬೇ ಭಾಗ್

40 ಅನ ಖ್ವಮ್‌ಜಿನ್, ಭೀಡ್‌ಮ ಧೂತೆ ಥೋಡು ಅದ್ವಿ “ಖ್ವಾಚ್‌ಮಾಬಿ ಆ ಅದ್ವಿಪ್ರವಾದಿ ಹುಯಿರ್ರೊಡ್‌ಸ್” ಕರಿ ಬೋಲ್ಯು.

41 ಬಿಜ್ಜು ಥೋಡು ಭಣು, “ಆಸ್ ಕ್ರಿಸ್ತ” ಕರಿ ಬೋಲ್ಯು.

ಕತೋಬಿ ಅಜ್ಜು ಥೋಡ ಅದ್ವಿನೆ, “ಕ್ರಿಸ್ತ ಗಲಿಲಾಯಥೊ ಕೋ ಆವ್‌ಶೇನಿ!”

42 ದಾವೀದ್‌ನ ಖಾನ್‌ದಾನ್‌ಥೀಬಿ ಅಜ್ಜು ದಾವೀದ್ ಥೋತೆ ಬೇತ್ಲೆಹೇಮ್ ಕರಿಬೋಲಾನು ಗಾಮ್‌ಥೂಬಿ ಕ್ರಿಸ್ತ ಆವ್‌ಶೆಕರಿ ಧರ್ಮಶಾಸ್ತ್ರಮ ಬೊಲಾವಸ್‌ನಿ” ಕರಿ ಬೋಲ್ಯು.‡

§ 7:37 7:37 ಯಾಜಕ ಕಾಂಡ 23:36 * 7:38 7:38 ಯೆಹೆಜ್ಕೆಲ್ 47:1; ಜಕರೀಯ

14:8 † 7:39 7:39 ಕತೊ, ಯೇಸು ಬಿಜ್ಜೂಬಿ ಮರೀನ್, ಜಿವೈ ಹುಯಿನ್ ಕೋ ಉರಿರ್ರೊಡ್‌ಲೋನಿತೆ ಇನಖ್ವಾಜಿ ಕರಿ ಮತ್‌ಲಬ್ ‡ 7:42 7:42 2ನು ಸಮುವೇಲ 7:12 ಮೀಕ 5:2

43 ಅಮ್ ಯೇಸುನಿ ಬಾರೇಮ ಅದ್ಮಿಮ ಭಾಗ್ ಪಡಿಗಯು.

44 ಇವ್ವಾಮ ಥೋಡು ಜಞು ಯೇಸುನ ಧರ್‌ನು ಕರಿ ಥೂ, ಕತೋಬಿ ಏಕ್ ಜಞುಬಿ ಇನಾಪರ್ ಹಾತ್ ಕೋ ನಾಮ್ಮುನಿ.

ಯೆಹುದ್ಯರ್‌ನ ಘಲ್ಡಾವ್‌ನಿ ಅವಿಶ್ವಾಸ್

45 ಮಂದಿರ್‌ನು ಕಾವ್ಲಿ ಕರಾವಾಳು ಪಾಟ್ರುಫರಿ ಆವಾದಿನ್, ಮಹಾಯಾಜಕರ್ ಅಜ್ಜು ಫರಿಸಾಯರ್‌ವಾಳು ಇವ್ವುನ, “ತುಮೆ ಶನ ಇನ ಧರ್‌ಲಿ ಕೋ ಆಯಾನೀತೆ?” ಕರಿ ಪುಲ್ಲಾಯು.

46 ತದೆ ಕಾವ್ಲಿ ಕರಾವಾಳು, “ಕೋಣ್‌ಬಿ ಹಂಕೆತೋಡಿ ಆ ಅದ್ಮಿನಿಘೋಣಿ ವಾತೆ ಕೋ ಬೋಲ್ಕುನಿ” ಕರಿ ಜವಾಬ್ ದಿದು.

47 ಅನ ಖ್ವಮ್‌ಜಿನ್ ಫರಿಸಾಯರ್‌ವಾಳು, “ಇಮ್‌ಕತೊ, ಇನೆ ತುಮೂನಾಬಿ ರಗೈನಾಖ್ಯೊಕಿ ಶು?” ಕರಿ ಪುಲ್ಲಾಯು

48 ಯೆಹುದ್ಯರ್‌ನ ಅದಿಕಾರಿರ್‌ವೊ, ಫರಿಸಾಯರ್‌ಮ ರ್‌ವೊ ಕೋಣ್‌ತೋಬಿ ಇನಾಪರ್ ವಿಶ್ವಾಸ್ ಕರಿರಾಮ್ಮುಸ್ಕಿ ಶು?

49 ಧರ್ಮಶಾಸ್ತ್ರ ಮಾಲುಮ್‌ಕೊಂತೆ ಆ ಝೂಂಡ್‌ವಾಳು ಶಾಪಲ್ಯವಾಳು ಹುಯಿರುಸ್. ಕರಿ ಬೋಲ್ಕೊ.

50 ಯೋ ಪಹಿಲೆ ಯೇಸುಕನ ಆಯೊಥೋತೆ ನಿಕೊದೇಮ ಇವ್ವಾಮ ಏಕ್ ಜಞೊ ಹುಯಿರ್ದೊಥೊ. ಯೇಸುನ ಮಳಾನ ಗಯೋಥೋತೆ ಆಸ್. §

51 ಇನೆ ಇವ್ವುನ, “ಮಾರಿ ಧರ್ಮಶಾಸ್ತ್ರನಿ ಪರಕ್ತುಕೋಣ್ ಶಾತ್ರಿ ಖ್ವಮ್‌ಜ್ಯುಕೊಂತೆ ಅಜ್ಜು ಯೊ ಶಾತ್ ಕರವಾಳೊಕರಿ ಮಾಲುಮ್ ಕರಕೊಂತೆ ಇನಿ ಬಾರೇಮ ತೀರ್ಪ್ ಬೋಲಾನ ಕೊಹುವಾನಿ.ಕರಿ ಬೋಲ್ಕು.

52 ಇನ ಇವ್ವೆ, “ತೂಬಿ ಗಲಿಲಾಯವಾಳೊಕಿ ಶು? ಧರ್ಮಶಾಸ್ತ್ರನ ಅಲ್ಫಿನಿತರ ಪಥೀನ್ ಶಿಕಿಲೆ. ಗಲಿಲಾಯಥು ಖೆವೊ ಪ್ರವಾದೀಬಿ ಆವ್‌ಶೆ ಕೊಯ್ಕಿ ಕರಿ ತದೆ ತುನ ಮಾಲುಮ್ ಪಡ್‌ಶೆ” ಕರಿ ಬೋಲ್ಕು.

53 ಇನಪಾರ್ ಅಮ್ಮುಜಞು ಇವ್ವ-ಇವ್ವ ಶೊಂತ್ ಘರೆ ಚಲಿಗಯು.

8

ವ್ಯಬಿಚಾರ್‌ಮ ಖ್ವಪ್‌ಡೀತೆ ತಯೇಡಾನಿ ಬಾರೇಮ

¹ ಕತೋಬಿ ಯೇಸು ಆಲಿವ್ ಪಹಡ್‌ನ ಗಯೊ.

² ಯೋ ಪಾಲ್ಟೊಫರಿ ಮಂದಿರ್‌ನ ಆಯೊ. ತದೆ ತಮಾಮ್ ಅದ್ಮಿ ಐನ್, ಇನ ಅಶ್‌ಪಿಶ್ ಭರಾಯು, ಅಜ್ಜು ಯೇಸು ಬೇಶಿನ್, ಇವ್ವುನ್ ಬೋಲಿ ವತಾಳಲಗ್ಯೊ.

³ ಮೋಶೆನಿ ವಚನ್ ಶಿಕಾಡವಾಳು ಅಜ್ಜು ಫರಿಸಾಯರ್‌ವಾಳು ವ್ಯಬಿಚಾರ್‌ಮ ಖ್ವಪ್‌ಡೀತೆ ಏಕ್ ತಯೇಡಾನ ಇನಾಕನ ಲೈನ್, ಖ್ವಾರಾನ ಖ್ವಾಮ್ಪೆ ಭೀರಾಮ್ಯು.

⁴ ಅಜ್ಜು, “ಗುರು, ಆ ತಯೇಡ ವ್ಯಬಿಚಾರ್ ಕರಾನಿ ವಖ್ವತ್‌ಮಾಸ್ ಖ್ವಪ್‌ಡಿಗ್ಯೆ.

⁵ ಅಮ್ಮಿ ತಯೇಡಾವ್‌ನ ಬಂಡೊ ಫೇಕಿನ್ ಮಾರ್ನ್ ಕರಿ ಮೋಶೆನೆ ಧರ್ಮಶಾಸ್ತ್ರಮ ಹಮೂನ ಹುಕುಮ್ ದೀರಾಖ್ಯೊಸ್. ಕತೋಬಿ ಅನಿ ಬಾರೇಮ ತೂ ಶಾತ್ ಬೋಲಾಸ್?” ಕರಿ ಇನ ಪುಲ್ಲಾಯು.*

⁶ ಯೇಸುನಿ ವಾತೇಮ ಶಾತ್‌ತೋಬಿ ಗಲತ್ ಮಳ್ಳುತೊ, ಅಪ್ಪೆ ಇನ ಖ್ವಪ್‌ಡಾಯೆಜಾಯಿ ಕರಿ ಇವ್ವೆ ಯೇಸುನ ಸವಾಲ್‌ಕರ್ಯ್? ಕತೋಬಿ ಯೇಸು ಮುಡ್‌ಕ್ಯು ಝುಕ್ಯೆನ್, ಇನಿ ಅಂಗ್‌ಳೀಥಿ ಜುಮೀನ್‌ಪರ್ ಲೀಖಾಲಗ್ಯೊ.

⁷ ಇವ್ವೆ ಲಗತ್ತರ್ ಇನ ಪುಲ್ಲಾವ್ ಕರ್ತುಧೂತೆ ಇನಖ್ವಾಜೆ, ಯೇಸುನೆ ಮುಡ್‌ಕ್ಯು ಪಾಡೀನ್, ಇವ್ವಾಮ ಏಕ್, “ತುಮಾರಮ ಕೋಣ್ ಪಾಪ್ ಕರಿರಾಖ್ಯುಕೊಯ್ನಿಕ್, ಇವ್ವೆ ಪಹಿಲೆ ಇನಾಪರ್ ಬಂಡೊ ಫೇಕಾದೆ” ಕರಿ ಬೋಲ್ಯೊ.

⁸ ಅನಕೇಡೆಥು ಅಜ್ಜುಪಾಲ್ಟು ಮುಡ್‌ಕ್ಯು ಝುಕ್ಯೆನ್ ಜುಮೀನ್‌ಪರ್ ಲೀಖಾಲಗ್ಯೊ.

* 8:5 8:5 ಯಾಜಕ ಕಾಂಡ 20:10; ಧರ್ಮೋಪದೇಶ ಕಾಂಡ 22:22-24

9 ಆ ವಾತೇನ ಖ್ವಮ್‌ಜಿನ್, ಪಹಿಲೆ ಶಾಣು ಅಙ್ಲು ಬಿಙ್ಲುಖ್ವಾರು ಏಕೆಕೇಸ್ ನಿಕ್ಕಿನ್ ಚಲಿಗಯು. ಯೇಸು ಎಕ್ಕ್ಯಸ್ ಜುಣೊ ರಹಿಗೊ ಅಙ್ಲು ಯೋ ತಯೇಡ ಇನಖ್ವಾಮ್ಜೆ ಭೇಡಿ.

10 ಯೇಸು ಉರಿ ಭೇರಿನ್, ಯೋ ತಯೇಡಾನ ದೇಖಿನ್, “ಅಲಿ ಬಾಯಿ, ಇವ್ಜೆ ಖ್ವಾರು ಕ್ಯಾ? ತಾರಪರ್ ಗಲತ್ ಲಗಾಡನಖ್ವಾಜೆ ಕೋಣ್‌ಬಿ ಕೋ ಬಚ್ಚುನಿಕಿ ಶು? ಕರಿ ಬೋಲ್ಯೊ.

11 ಯೋ ತಯೇಡಾನೆ, “ಕೋಣ್‌ಬಿ ಕೋ ಬಚ್ಚುನಿಲಾ ಪ್ರಭು! ಕರಿ ಬೋಲಿ.

ತದೆ ಯೇಸುನೆ ಇನ, “ಇಮ್‌ಕತೊ, ಮೇಬಿ ತಾರಪರ್ ಗಲತ್ ಕೋ ಲಗಾಡುನಿ. ಹಮ್ಮೆ ತೂ ಙ್ಲಾ, ಅಙ್ಲುಪಾಲ್ತು ಪಾಪ್ ನಕೊ ಕರೀಶ್” ಕರಿ ಬೋಲ್ಯೊ.

ಯೇಸು ಜಗತ್‌ನು ಉಙ್ಲಾಳು

12 ಅನ ಬಾದ್‌ಮ ಯೇಸು ಪಾಲ್ಟೊ ಅದ್ವಿಖ್ವಾರನ ವಾತೆ ಬೋಲ್ತೊಹುಯಿನ್, “ಮೇಸ್ ಜಗತ್ತ್ ಉಙ್ಲಾಳು ಹುಯಿರ್ದೋಸ್, ಮಾರಪೀಲೆ ಆವಾಳು ಅಂಧಾರಮ ಫಾಲ್‌ಶೆಸ್ ಕೊಯ್ನಿ ಅಙ್ಲು ಯೊ ಜಾನ್ನು ಉಙ್ಲಾಳು ಲೀರ್ದಾವಳೊ ಹುಯಿರೋಸ್” ಕರಿ ಬೋಲ್ಯೊ.†

13 ಫರಿಸಾಯರ್‌ವಾಳು ಯೇಸುನ, “ತಾರಿ ಬಾರೇಮ ತೂಸ್ ಸಾಕ್ಷಿ ಬೋಲಿಲೆಸ್; ತಾರಿ ಸಾಕ್ಷಿ ಖ್ವಾಙ್ಲು ಕಾಹೆ” ಕರಿ ಬೋಲ್ಯೊ.‡

14 ತದೆ ಯೇಸುನೆ ಫವಾಬ್ ದಿದೊ, “ಮೇಸ್ ಮಾರಿ ಬಾರೇಮ ಸಾಕ್ಷಿ ಬೋಲಿಲಿದೊತೊ ಯೋ ಖ್ವಾಙ್ಲು ಹುಯಿರುಸ್. ಶನಕತೊ ಮೇ ಕಿಜ್ವಾಫೊ ಆಯೊ ಅಙ್ಲು ಕಿಜ್ವಾಙ್ಜೆಶ್ ಕರಿ ಬೋಲಾನು ಮನ ಮಾಲುಮ್. ಕತೋಬಿ ತುಮುನ ಮೇ ಕಿಜ್ವಾಫೊ ಆಯೊ ಕಿಜ್ವಾಙ್ಜೆಶ್ ಕರಿ ಮಾಲುಮ್ ಕೊಯ್ನಿ.

15 ತುಮೆ ಅದ್ವಿತೀರ್ಪ್ ಕರಾನಿತರ ಕರೋಸ್; ಕತೋಬಿ ಮೇ ಕಿನಾಬಿ ತೀರ್ಪ್ ಕೋ ಕರೊನಿ.

† 8:12 8:12 ಮತ್ತಾಯ 5:14; ಯೋಹಾನ 9:5 ‡ 8:13 8:13 ಯೋಹಾನ 5:31

16 ಕತೋಬಿ ಮೇ ತೀರ್ಪ್ ಕರೈತೋಬಿ ಬರಾಬರಸ್ ರೈಸ್, ಶನಕತೊ ಮೇ ಎಕ್ಕಸ್ ಜಣೊ ಕಾಹೆ; ಮನ ಮೋಕ್ಲೊತೆ ಬಾಬಿ ಮಾರ ಜೋಡೆ ರೈಸ್.

17 ಬೇ ಜಣು ಬೋಲಾಸ್ತೆ ಸಾಕ್ಷಿ ಖಾಚಿಕರಿ ತುಮಾರಿ ಧರ್ಮಶಾಸ್ತ್ರಮಾಸ್ ಬೋಲಾಸ್ತೆ.

18 ಮಾರಿ ಬಾರೇಮ ಮೇ ಸಾಕ್ಷಿ ಬೋಲಾಸ್ತೆ, ಮೆ ಎಕ್ಕಣೊ, ಅತ್ರೇಸ್ ಕಾಹೆತೆ ಮನ ಮೋಕ್ಲೊತೆ ಬಾಬಿ ಬಿಜೇಕ್ ಸಾಕ್ಷಿ ಹುಯಿರೊಸ್” ಕರಿ ಬೋಲ್ಯೊ.

19 ತದೆ ಇವ್ಣೆ “ತಾರೊ ಬಾ ಕಿಞ್ಲಾ ಲ್ಹಾ?” ಕರಿ ಪುಲ್ಲಾಯು. ಯೇಸುನೆ,

“ತುಮೂನ ಮೇ ರೈವೊ, ಮಾರೊ ಬಾ ರೈವೊ ಮಾಲುಮ್ ಕೊಯ್ತೆ. ತುಮೆ ಮನ ಮಾಲುಮ್ ಕರೈಹೋತ್ತೊ, ಮಾರ ಬಾನಾಬಿ ಮಾಲುಮ್ ಕರಿಲಿದಾಹೋತ್” ಕರಿ ಜವಾಬ್ ದಿದೊ.

20 ಯೇಸುನೆ ಮಂದಿರಮ ಅದ್ಮಿ ಕಾಣ್ಕೇನಿ ಹುಂಡಿನಿ ಝಗೋಕನ ಭೀರಿನ್ ಶಿಕಾಡುಕರಾನಿ ವಖ್ವತ್‌ಮ ಆ ವಾತ್ಸ ಬೋಲ್ಯೊ. ಇನಖ್ವಾಜೆ ಕೋಣೆಬಿ ಇನ ಕೋ ಧರೈನಿ. ಶನಕತೊ ಇನಿ ವಖ್ವತ್ ಬಿಞ್ಲಾಬಿ ಕೋ ಐರೈದೀನಿ,

ಮೇ ಜಯಿಸ್ತೆ ಹಿಞ್ಲಾ ತುಮೆ ಜಾವಾನ ಕೊ ಹುವಾನಿ

21 ಯೇಸುನೆ ಪಾಲ್ತು ಇವ್ಣುನ, “ಮೇ ಒಳೆಜವುಸ್ ತುಮೆ ಮನ ಥೂಂಡ್‌ಶು, ಅಜ್ಜು ತುಮಾರ ಪಾಪ್‌ಮ ತುಮೆ ಮರ್‌ಶು. ಮೇ ಜವುಸ್ತೆ ಹಿಞ್ಲಾ ತುಮೆ ಕೋ ಆವಾನ ಉಶೇನಿ” ಕರಿ ಬೋಲ್ಯೊ.

22 ಆ ಯೆಹೂದ್ಯರಾನ್, “ಮೇ ಜವುಸ್ತೆ ಹಿಞ್ಲಾ ತುಮೆ ಆವಾನ ಕೋ ಉಶೇನಿ ಕರಿ ಬೋಲುಕರಾಸ್ ಕಿಶು? ಆ ಇನು ಯೋಸ್ ಮರಿಞ್ಲಾವ್ಣು ಕರಿ ಲ್ಹಾಕಿ ಶುಕಿ?” ಕರಿ ಬೋಲಿಲ್ಯವಾನಿತರ ಹುಯಿರೂಢು.

23 ಯೇಸುನೆ, “ತುಮೆ ಹೇಟ್‌ಲ್ಯಾವಾಳ ಹುಯಿರ್ದಾಸ್, ಮೆ ಉಪ್ಪರ್‌ವಾಳೊ ಹುಯಿರೊಸ್ ತುಮೆ ಆ ಜಗತ್‌ವಾಳ, ಕತೋಬಿ ಮೇ ಆ ಜಗತ್‌ವಾಳೊ ಕಾಹೆ.

24 ಇನಖ್ವಾಜೇಸ್ ತುಮೆ ತುಮಾರ ಪಾಪ್‌ಮಾಸ್ ಮರ್‌ಶು ಕರಿ ಮೇ ಬೋಲ್ಯೋತೆ. ಮೇ ಕೋಣ್ ಕರಿ ತುಮೆ ವಿಶ್ವಾಸ್ ನಾ ಕರ್ಯಾತೊ ತುಮಾರ ಪಾಪ್‌ಮ ತುಮೇಸ್ ಮರ್‌ಶು” ಕರಿ ಬೋಲ್ಯೊ.

25 ತದೆ ಇವ್ಣೆ ಇನ, “ತೂ ಕೋಣ್?” ಕರಿ ಪುಲ್ಲಾಯು. ಯೇಸುನೆ, “ಮೇ ಕೋಣ್ ಕರಿ ಪಹಿಲೇಥೋಸ್ ತುಮೂನ ಬೋಲ್ಯೊ ಆಯೊತೇಸ್ ಮೆ.

26 ತುಮಾರಿ ತೀರ್ಪ್‌ನಿ ಬಾರೇಮ ವಾತೆ ಬೋಲಾನು ಮಾರಕನ ಘಣು ಛಾ. ಕತೋಬಿ ಮನ ಮೋಕ್‌ಲ್ಯೊತೆ ಯೋ ಖ್ವಾಜೊ ಹುಯಿರ್ದೊಸ್ ಅಜು ಇನೇಥಿ ಮೇ ಶಾತ್ ಖ್ವಮ್‌ಜ್ಯೊಕಿ ಇನಾಸ್ ಆ ಜಗತ್ತ್ ಮೇ ಬೋಲುಸ್” ಕರಿ ಬೋಲ್ಯೊ.

27 ಯೇಸು ಬಾನಿ ಬಾರೇಮ ವಾತೆ ಬೋಲುಕರಾಸ್ ಕರಿ ಬೋಲಾನು ಇವ್ಣುನ ಮಾಲುಮ್ ಕೋ ಪಡ್ತುನಿ.

28 ಕತೋಬಿ ಇನೆ ಇವ್ಣುನ, “ತುಮೆ ಅದ್ವಿನ ಛಿಯ್ಯಾನ ಉಪ್ಪರ್ ಪಾಡ್‌ಶುಕಿ, ತದೆ ‘ಮೇಸ್ ಯೋ’ ಕರಿ,ತುಮುನ ಮಾಲುಮ್ ಪಡ್‌ಶೆ. ಮೆ ಕರುಸ್ತೆ ಮಾರಿ ಶೊಂತ್ ಆಖ್‌ಥಿ ಕಾಹೆ ಪಣ್ಣಿ, ಮಾರೊ ಬಾ ಬೋಲಾತೆ ಇಮ್‌ಸ್ ಶಿಕಾಡುಕರೂಸ್.

29 “ಮನ ಮೋಕ್‌ಲ್ಯೊತೆ ಯೋ ಮಾರ ಜೋಡೆ ಛಾ; ಮನ ಎಕ್ಲೋಸ್ ಕೋ ಮ್ಹೇಲ್ಯೊನಿ, ಇನಖ್ವಾಜೇಥಿ ಮೆ ಕೆದೇಬಿ ಇನ ಇಷ್ಟುನಿತರಾಸ್ ಕರುಸ್ತೆ” ಕರಿ ಬೋಲ್ಯೊ.

30 ಯೇಸು ಆ ವಾತೆ ಖ್ವಾರು ಬೋಲಾನಿ ವಖ್ತಮ ಘಣು ಅದ್ವಿ ಇನಾಪರ್ ವಿಶ್ವಾಸ್ ಕರ್ಯ್.

ಖ್ವಾಜು ತುಮೂನ ಛೋಡಾವಾಶೆ

31 ತದೆ ಯೇಸುನೆ ಇನಾಪರ್ ವಿಶ್ವಾಸ್ ಕರ್ಯೊತೊ ಯೆಹೂದ್ಯರಾನ, “ತುಮೆ ಮಾರಿ ವಾತೇನಿತರ ಛಾಲ್ಯಾತೊ,ತುಮೆ ಖ್ವಾಜಮಾಬಿ ಮಾರ ಶಿಷ್ಯ ಹುಯಿರ್ದೆಶು.

32 ತುಮೆ ಖ್ವಾಚನ ಮಾಲುಮ್ ಕರಿಲಿಶು, ಅಜ್ಜು ಯೋ ಖ್ವಾಚು ತುಮೂನ ಛೋಡಾವ್‌ಶೆ” ಕರಿ ಬೋಲ್ಯೊ.

33 ಇನ ಇವ್ಣೆ “ಹಮೆ ಅಬ್ರಹಾಮ್‌ನಿ ಖಾಂದಾನ್‌ವಾಳ, ಹಮೆ ಕದೇಬಿ ಕಿನಾಬಿ ಗುಲಾಮ್ ಕೋಹೂಯಾನಿ. ಅಮ್ ರ್ಹವಾಪರ್, ‘ತುಮೆ ಛುಟ್‌ಶು’ ಕರಿ ತೂ ಬೋಲಾಸ್ತೆ ಕಿಮ್?” ಕರಿ ಜವಾಬ್ ದಿದು.*

34 ಯೇಸುನೆ ಇವ್ಣುನ, “ತುಮೂನ ಖ್ವಾಚಮಾಬಿ ಬೋಲುಸ್ಕಿ: ಪಾಪ್ ಕರಾವಾಳು ಖ್ವಾರ್ಡು ಪಾಪ್ ಗುಲಾಮ್ ಹುಯಿರ್ಲ್ಯಾಸ್.

35 ಗುಲಾಮ್ ಘರ್‌ಮ ಹಮೇಶಾನಖ್ವಾಜೆ ಕೋ ರಿಶೇನಿ, ಕತೋಬಿ ಛಿಯೊ ಘರ್‌ಮ ಹಮೇಶಾನಖ್ವಾಜೆ ರ್ಹೇಸ್.

36 ಇನಖ್ವಾಜೆ ಛಿಯೊ ತುಮೂನ ಛೋಡಾಯೋತೊ, ತುಮೆ ಖ್ವಾಚಮಾಬಿ ಛುಟ್‌ಶು.

37 ತುಮೆ ಅಬ್ರಹಾಮ್‌ನಿ ಪಿಳ್ಳಿವಾಳ ಕರಿ ಮನ ಮಾಲುಮ್. ತೋಬಿ ತುಮೆ ಮನ ಮರ್‌ನಾಕ್ಚು ಕರಿ ಕೋಶಿಶ್ ಕರೋಸ್, ಶನಕತೊ ಮಾರಿ ವಾತೇನ ತುಮೆ ಮಾನ ಕೊಯ್ನಿ.

38 ಮಾರ ಬಾನೆ ಮನ ವತಾಳ್ಕೊತೆ ಇನಿ ಬಾರೇಮ ಮೇ ಬೋಲುಸ್, ಕತೋಬಿ ತುಮಾರ ಬಾನೆ ಶಾತ್ ಖ್ವಮ್‌ಜಾಡ್ಯೊಕಿ ಯೋ ತುಮೆ ಕರೋಸ್” ಕರಿ ಬೋಲ್ಯೊ.

39 ಇವ್ಣೆ ಇನ, “ಹಮಾರೊ ಬಾ ಅಬ್ರಹಾಮ್” ಕರಿ ಜವಾಬ್ ದಿದು.

ಯೇಸುನೆ ಇವ್ಣುನ, “ತುಮೆ ಅಬ್ರಹಾಮ್‌ನ ಲಡ್ಕಾ ಹುಯಿರ್ಲ್ಹಾಹೋತ್ತೊ, ಅಬ್ರಹಾಮ್‌ನೆ ಕರ್ಯೊತೆ ಇಮ್ಮಸ್ ಕರ್ಯಾಹೋತ್.

40 ಮೇ ದೇವ್‌ಥಿ ಖ್ವಮ್‌ಜೋತೆ ಖ್ವಾಚಿನ ತುಮುನ ಬೋಲಿವತಾಳ್ಕೊತೆ ಏಕ್ಲಣೊ ಮೆ ಹುಯಿರೊಸ್, ತೋಬಿ ತುಮೆ ಮನ ಮರ್‌ನಾಕ್ಚು ಕರಿ ದೇಖೊಸ್. ಅಬ್ರಹಾಮ್‌ನೆ ಅಮ್ ಶಾತ್ ಕೋ ಕರ್ಯೊನಿ!

* 8:33 8:33 ಮತ್ತಾಯ 3:9; ಲೂಕ 3:8

41 ತುಮೆ ತುಮಾರ ಬಾನ ಕಾಮ್ನ ಅಖ್ಪು ಕರುಕರಸ್ ಕರಿಬೋಲ್ಯೊ, ತದೆ ಇವ್ವೆ ಹಮೆ ಪಾಪೇಲ ಕಾಮ್‌ಥಿ ಪೈದಕೊಹುಯಾನಿ.

ಹಮೂನ ಎಕ್ಕ್‌ಸ್ ಭಣೊ ಬಾ, ಯೋ ದೇವಸ್ ಕರಿ ಬೋಲ್ಯೊ.

42 ಯೇಸುನೆ ಯೆಹೂದ್ಯರೊನ, “ಖ್ವಾಚಮಾಬಿ ದೇವಸ್ ತುಮಾರೊ ಬಾ ಹುಯಿರೊಹೋತ್ತೊ, ತುಮೆ ಮನ ಪ್ಯಾರ್ ಕರೊಹೋತ್, ಶನಕತೊ ಮೇ ದೇವ್‌ಕಂಥೊ ಆಯೊ ಅಜು ಹಮ್ಗೆ ಹಜ್ಜಾ ಟ್ಲು. ಮೇ ಆಯೋತಿ ಮಾರಿ ಶೊಂತ್ ಅದಿಕಾರ್‌ಪರ್ ಕಾಹೆ, ಪಣ್ಣಿ ದೇವ್‌ನೇಸ್ ಮನ ಮೋಕ್‌ಲೊ.

43 ತುಮೆ ಮಾರಿ ವಾತೇನ ಶನ ಖ್ವಮ್‌ಜಾ ಕೊಯ್ನಿ? ಶನಕತೊ ತುಮೆ ಮಾರಿ ವಾತೇನ ಕಾನ್ ಕೋ ದೇವ್‌ಕರಾನಿತಿ ಇನಖ್ವಾಜೇಸ್.

44 ಶೈತಾನಸ್ ತುಮಾರೊ ಬಾ, ಇನ ತುಮೆ ಛಿಯ್ಯಾ ಹುಯಿರಾಸ್, ಇನೀನಿಫೋಣಿ ಖರಾಬ್ ಆಖ್ವೊನ ಕರಾನ ದೇಖೊಸ್. ಯೋ ಶುರುವಾತ್‌ಥೋಸ್ ಖೂನಿಹುಯಿರೊಹೋತ್ತ್‌† ಅಜು ಖ್ವಾಚಾಮ ಟಿಕೊಕೊಯ್ನಿ. ಶನಕತೊ ಇನಾಮ ರತ್ತಿಬಿ ಖ್ವಾಚಿ ಕೊಯ್ನಿ, ಯೋ ಝೂಟಿ ಬೋಲಾನಿ ವಖ್ವತ್‌ಮ ಆದತ್‌ನಿಫೋಣಿ ಬೋಲಾಸ್, ಶನಕತೊ ಯೋ ಝೂಟಿಸ್ ಬೋಲವಾಳೊ ಅಜು ಹರ್ ಥರಾನು ಝೂಟಿನ ಬಾ ಹುಯಿರೊಹೋತ್.

45 ಮೇ ಖ್ವಾಚಿ ಬೋಲುಸ್ತೆ ಇನಖ್ವಾಜೆ ತುಮೆ ವಿಶ್ವಾಸ್ ಕರಾಕೊಯ್ನಿ.

46 ಮಾರಾಮ ಪಾಪ್ ವತಾಳವಾಳೊ ತುಮಾರಮ ಕೋಣ್‌ತೋಬಿ ಲ್ಹಾ? ಮೇ ಖ್ವಾಚಿ ಬೋಲ್ಯೊತೋಬಿ, ತುಮೆ ಮನ ಶನ ವಿಶ್ವಾಸ್ ಕರಾಕೊಯ್ನಿ?

47 ಖಿವು ಏಕ್‌ಜಣು ದೇವ್‌ಥಿ ಪೈದಾಹುಯುಕಿ ದೇವ್ನಿ ವಾತೆನ ಖ್ವಮ್‌ಜಾಸ್, ತುಮೆ ದೇವ್‌ಸಂಬಂದ್ ನಾರ್‌ದ್ಲಯಾತೊ, ಇನಖ್ವಾಜೆ ಇನ ಖ್ವಮ್‌ಜಾಕೊಯ್ನಿ” ಕರಿ ಬೋಲ್ಯೊ.

ಯೇಸು ಅಜು ಅಬ್ರಹಾಮ್

† 8:44 8:44 ನಾಶ ನಗ್‌ಮೇಟ್ ಕರಾವಾಳೊ.

48 ತದೆ ಯೆಹೂದ್ಯರಾನೆ ಯೇಸುನ ಬೋಲ್ಕುಹಮೆ ಬೋಲಾನು ಬರಾಬರ್ ಕಾಹೆಕಿ ಶು? “ತೂ ಸಮಾರಿಯಾವಾಳೊ ಅಜ್ಜು ತಾರಾಮ ಭೂತ್ ಲ್ಲಾ” ಕರಿ ಬೋಲ್ಕು.

49 ಯೇಸುನೆ, “ಮಾರಾಮ ಭೂತ್ ಕೊಯ್ಚಿ ಮೇ ಮಾರ ಬಾನ ಮರ್ಯಾದಿ ದೆವ್‌ಸ್, ಕತೋಬಿ ತುಮೆ ಮನ ಮರ್ಯಾದಿ ಕೋ ದೇಯ್ಚಿ.

50 ಮನ ಮರ್ಯಾದಿ ಮಳಾದೆ ಕರಿ ಮೇ ಆಖ್ತ್ ಕೋ ಕರೂನಿ, ಕತೋಬಿ ಮನ ಮರ್ಯಾದಿ ಮಳಾಣು ಕರಿ ಆಖ್ತ್ ಕರಾವಾಳೊ ಏಕ್ ಜಣೊ ಲ್ಲಾ, ಯೋ ಮಾರಭಣಿಥೊ ನ್ಯಾವ್ ಘೇಡಾವಾಳೊ.

51 ಮೇ ತುಮೂನ ಖ್ವಾಚಸ್ ಬೋಲುಸ್, ಮೆ ಶಿಕಾಡನು ಖ್ವಮ್‌ಜಿನ್ ಇನೀನಿಘೋಣಿ ಫಾಲವಾಳು ಕದೇಬಿ ಮರ್‌ಶೆ ಕೊಯ್ಚಿ” ಕರಿ ಬೋಲ್ಯೊ.

52 ಇನ ಯೆಹೂದ್ಯವಾಳನೆ, “ತುನ ಭೂತ್ ಧರಿರಾಖ್ಯುಸ್ ಕರಿ ಹಮ್ಮೆ ಹಮೂನ ಮಾಲುಮ್ ಪಡ್ಕು! ಅಬ್ರಹಾಮ್ ಮರಿಗಯೊ, ಅಜ್ಜು ಪ್ರವಾದಿ ಖ್ವಾರುಬಿ ಮರಿಗಯು, ತೋಬಿ ತೂ ಬೋಲಿಸ್ಚಿ, ಮೆ ಶಿಕಾಡನಿಘೋಣಿ ಫಾಲವಾಳು ಕದೇಬಿ ಮರ್‌ಶೆಕೊಯ್ಚಿ ಕರಿ.

53 ಹಮಾರೊ ಮೋಟೊ ಹುಯಿರಕ್ಲೊತೆ ಅಬ್ರಹಾಮ್‌ಥೀಬಿ ತೂ ಮೋಟೋಕಿ ಶು? ಅಬ್ರಹಾಮ್‌ಬಿ, ಪ್ರವಾದಿ ಖ್ವಾರುಬಿ ಮರಿಗಯು. ಅಮ್ ರಕ್ವಾಪರ್, ತಾರು ತೂ ಕೋಣ್ ಕರಿ ಸೋಚಾಸ್?” ಕರಿ ಪುಲ್ಲಾಯು.

54 ತದೆ ಯೇಸುನೆ, “ಮಾರು ಮೇಸ್ ಖ್ವರೈಲಿದೋತೊ, ಯೋ ಮರ್ಯಾದಿನ ಶನೀಶ್ ಬೆಲೆಕೊಯ್ಚಿ. ಮನ ಮರ್ಯಾದಿ ದ್ಯವಾಳೊ ಮಾರೊ ಬಾ, ತುಮೆ ಇನ ಹಮಾರೊ ದೇವ್ ಕರಿ ಬೋಲೋಸ್.

55 ತೋಬಿ ತುಮೆ ಇನ ಪರ್ಖಿರಾಖ್ಯಕೊಯ್ಚಿ ಕತೋಬಿ ಮನ ಯೋ ಮಾಲುಮ್. ಯೋ ಮನ ಮಾಲುಮ್‌ಕೊಯ್ಚಿ ಕರಿ ಮೇ ಬೋಲ್ಯೊತೊ, ಮೇಬಿ ತುಮಾರಿನಿತರ ಝೂಟೊ ಹುಯಿಜ್ಜೆಶ್. ಕತೋಬಿ ಮನ ಯೋ ಮಾಲುಮ್, ಅಜ್ಜು ಮೇ ಇನಿ ವಾತೆನಿಘೋಣಿ ಫಾಲುಸ್.

56 ತುಮಾರೊ ಬಾ ಹುಯಿರಕ್ಲೊತೆ ಅಬ್ರಹಾಮ್‌ನೆ ಮೇ ಆಯಿಶ್‌ತೆ ದನ್ನ ದೇಖಿಶ್ ಕರಿ ಘಾಣು ಶಂತೋಖ್ತ್ ಕರಕ್ಲೊ ಅಜ್ಜು ಇನೆ ಯೋ ದನ್ನ ದೇಖಿನ್ ಖ್ವುಶಿ ಕರಕ್ಲೊ” ಕರಿ ಬೋಲ್ಯೊ.

57 ಇನ ಯೆಹೂದ್ಯರಾನೆ, “ತುನ ಬಿಜೂಬಿ ಅಡೈವಿಖ್ತ್ ವರಖ್ತ್ ಕೋ ಹುಯಿರಾನಿ, ತುನೆ ಅಬ್ರಹಾಮ್‌ನ ದೇಖಿರಾಖ್ಯೊಸ್ಕಿ ಶು?” ಕರಿ ಯೇಸುನ ಬೋಲ್ಯು.

58 ಯೇಸುನೆ, “ಮೇ ಖ್ವಾಚ ಬೋಲುಸ್ಕಿ, ಅಬ್ರಹಾಮ್ ಪೈದಾ ಹುವಾನ ಅಗಾಡಿಸ್, ಮೇ ಥೊ!” ಕರಿ ಬೋಲ್ಯೊ.

59 ಆ ವಾತೆನ ಖ್ವಮ್‌ಜಿನ್, ಇವ್ಣೆ ಇನ ಮಾರಾನಖ್ವಾಜೆ ಬಂಡಾ ಪಾಡಿಲಿದು, ಕತೋಬಿ ಯೇಸು ಓರೆಹೋತೊಹುಯಿನ್, ಮಂದಿರ್‌ನ ಮಹಿಕರಿ ಚಲೆಗಯೊ.

9

ಯೇಸುನೆ ಪೈದಾಖ್ತ್ಲೊ ಕಾಣು ಥೂತೆ ಅದ್ವಿನ ಅಲ್ಫು ಕರಯ್ತೆ

1 ಯೇಸು ಚಾಲ್ತೊ ಜಾವಾನಿ ವಖ್ತ್‌ಮ, ಪೈದಾಖ್ತ್ಲೊ ಕಾಣು ಥೂತೆ ಏಕ್ ಅದ್ವಿನ ದೇಖ್ಯೊ.

2 ಯೇಸುನ ಶಿಷ್ಯರಾನೆ ಇನ, “ಗುರು, ಆ ಅದ್ವಿ ಕಾಣುಹುಯಿನ್, ಪೈದಾ ಹುಯೂತೆ ಕಿನ ಪಾಪ್‌ಥಿ? ಅನು ಪಾಪ್‌ಥೀಕಿ? ಅನ ಆಯ-ಬಾನ ಪಾಪ್‌ಥಿ?” ಕರಿ ಪುಲ್ಲಾಯ.

3 ಯೇಸುನೆ, “ಅನೇಬಿ ಪಾಪ್ ಕೋ ಕರಯ್ತೊನಿ, ಅನ ಆಯಾ-ಬಾನ ಪಾಪ್‌ಟೀಕೆ ಕಾಹೆ. ದೇವ್‌ನು ಕಾಮ್ ಅನಾಮ ಹುವಾನಟೀಕೆಸ್ ಅನ ಅಮ್ ಹುಯೂತೆ.

4 ಮನ ಮೋಕ್‌ಲ್ಯೊತೆ ಇನು ಕಾಮ್ ಅಪ್ಪೆ ದನ್ನಿ ವಖ್ತ್‌ಮಾಸ್ ಕರಯ್ತೆ, ರಾತ್ ಆವ್‌ಶೆ ತದೆ ಕಿನೇಥೀಬಿ ಕಾಮ್ ಕರಾನ ಕೋ ಉಶೇನಿ.

5 ಮೇ ಆ ಜಗತ್‌ಮ ರ್ವಾವಾನಿ ವಖ್ತ್‌ಮ, ಮೇಸ್ ಆ ಜಗತ್ತ್ ಉಜಾಳು ಹುಯಿರಯ್ತೊಸ್” ಕರಿ ಬೋಲ್ಯೊ.*

6 ಅನ ಬೋಲಾನ ಬಾದ್‌ಮ, ಯೇಸುನೆ ಜಮೀನ್‌ಪರ್ ಥೂಕಿನ್, ಇನೇಥಿ ಚಿಕ್ಕಡ್ ಬಣ್ಣಿನ್, ಯೋ ಅದ್ವಿನ ಡೋಳಾನ ಲಗಾಡ್ಯೊ.

7 ಅಜ್ಜು ಯೋ ಅದ್ವಿನ ಬೋಲ್ಯೊಕಿ, “ಜೈನ್, ಸಿಲೋವ ಕೋಳಮ್ಮ ಥೊಯಿಲೆ” ಸಿಲೋವ ಕತೊ, ‘ಮೋಕ್‌ಲ್ಯೊಹುಯೊ’ ಕರಿ ಮತ್‌ಲಬ್.

* 9:5 9:5 ಮತ್ತಾಯ 5:14; ಯೋಹಾನ 8:12

ಇಮ್ಮಸ್ ಯೋ ಅದ್ಮಿನೆ ಜೈನ್, ಧೊಯಿಲಿನ್ ಪಾಟ್ಲೊಫರಾನಿ ವಖ್ತ್, ಅಜ್ಜು ಇನ ಡೋಳಾ ದೆಖಾವಲಗ್ಯ್

8 ತದೆ ಇನ ಅಜ್ಜು-ಬಾಜುವಾಳು ಅಜ್ಜು ಯೋ ಅಗಾಡಿ ಧರಮ್ ಮಾಂಗುಕರ್ತೊಫೋತೆ ಇನ ದೇಖುಹುಯು ಅದ್ಮಿಖಾರ್ರು, “ಬೇಶಿನ್, ಧರಮ್ ಮಾಂಗ್ತೊಫೋತೆ ಆಸ್ ಕಾಹೆಕಿ ಶು?” ಕರಿ ಪುಲ್ಲಾಯು.

9 ಥೋಡು ಜಣು, “ಆಸ್ ಯೋ” ಕರಿ ಬೋಲ್ಯು, ಕತೋಬಿ ಬಿಜ್ಜು ಥೋಡು ಜಣು, “ಆ ಯೋ ಕಾಹೆ, ಇನೀನಿತರಸ್ ದೆಖಾವಸ್” ಕರಿ ಬೋಲ್ಯು.

ತದೆ ಯೋ ಅದ್ಮಿನೇಸ್, “ಮೇಸ್ ಯೋ” ಕರಿ ಬೋಲ್ಯೊ.

10 ತದೆ ಇವ್ಣೆ ಇನ, “ತುನ ಡೋಳಾ ಕಿಮ್ ಆಯಾ?” ಕರಿ ಇನ ಪುಲ್ಲಾಯು.

11 ಯೋ ಅದ್ಮಿನೆ, “ಯೇಸು ಕರಿ ಏಕ್ ಭಣೊ ಛಾನಿ, ಇನೆ ಚಿಕ್ಕಡ್ ಕರೀನ್, ಮಾರ ಡೋಳಾನ ಲಗಾಡೀನ್, ಸಿಲೋವ ತಲಾವ್ತ ಜೈನ್, ಧೊಯಿಲೆ ಕರಿ ಬೋಲ್ಯೊ. ಇಮ್ಮಸ್ ಮೇ ಜೈನ್ ಧೊಯಿಲಿದೊ, ತದೆ ಮನ ಡೋಳಾ ದೆಖಾವಲಗ್ಯ್” ಕರಿ ಬೋಲ್ಯೊ.

12 ಯೊ ಅದ್ಮಿಖಾರ್ರು ಇನ, “ಯೋ ಕಿಜ್ಗಾ ಛಾ?” ಕರಿ ಪುಲ್ಲಾಯು. ಯೋ ಅದ್ಮಿನೆ, “ಮನ ಮಾಲುಮ್ ಕೊಯ್ತೆ” ಕರಿ ಜವಾಬ್ ದಿದೊ.

ಪರಿಸಾಯರ್‌ನೆ ಅಟ್ಲು ಹುಯೊತೆ ಅದ್ಮಿನ ಪುಲ್ಲಾಯೊತೆ

13 ತದೆ ಅದ್ಮಿಖಾರ್ರು ಅಗಾಡಿ ಕಾಣು ಹುಯಿರ್ದೊಡೊತೆ ಯೋ ಅದ್ಮಿನ ಫರಿಸಾಯರ್‌ಕನ ಬುಲೈಲಿ ಗಯು.

14 ಯೇಸುನೆ ಚಿಕ್ಕಡ್ ಕರೀನ್, ಇನ ಡೋಳಾನ ಅಟ್ಲು ಕರೈತ್ಯೆತೆ ದನ್ ಸಬ್ತ್ ದನ್ ಹುಯಿರ್ದೊಡು.

15 ತದೆ ಫರಿಸಾಯರ್‌ನೆ ಪಾಟ್ಲು ಯೋ ಅದ್ಮಿನ, “ತುನ ಡೋಳಾ ಕಿಮ್ ದೆಖಾಯ್?” ಕರಿ ಪುಲ್ಲಾಯು. ಇನೆ ಇವ್ಣುನ್, “ಇನೆ ಚಿಕ್ಕಡ್‌ನ ಮಾರ ಡೋಳಾಪರ್ ಲಗಾಡ್ಲೊ, ಅಜ್ಜು ಮೇ ಧೊಯಿಲಿದೊ, ಹಮ್ಮೆ ಮನ ದೆಖವ್‌ಕರಾಸ್” ಕರಿ ಜವಾಬ್ ದಿದೊ.

16 ಫರಿಸಾಯರ್ಮ ಥೋಡಾನೆ, “ಆ ಅದ್ಮಿ ದೇವ್‌ಥಿ ಆಯೊಹುಯೊ ಕಾಹೆ, ಶನಕತೊ ಅನೆ ಸಬ್ಬತ್‌ದನ್ನು ಪಾಲನ್ ಕೊ ಕರಾನಿ” ಕರಿ ಬೋಲ್ಯು.

ಬಿಜು ಥೋಡಾನೆ, “ಖಿವು ಪಾಪಿ ಅಮ್ಮಿ ಅದ್ಭುತ್ ಕಾಮ್‌ಖಾರು ಕರಾಸ್?” ಕರಿ ಬೋಲ್ಯು. ಅಮ್ ಇವ್ಣ-ಇವ್ಣಾಸ್‌ಮ ಬೇ ಭಾಗ್ ಹುಯಿಗಯು.

17 ಡೋಳ ದೆಖಾವಲಗ್ಕುತೆ ಯೊ ಅದ್ಮಿನ ಫರಿಸಾಯರನೆ ಬಿಜೇಕ್‌ಹಲ್ಲ ಪುಲ್ಲಾಯು. ತದೆ ಯೋ ಅದ್ಮಿನೆ,

“ಯೋ ಏಕ್ ಪ್ರವಾದಿ” ಕರಿ ಬೋಲ್ಯು.

18 ತೋಬಿ ಯೋ ಯೆಹೂದ್ಯವಾಳು, ಯೋ ಅದ್ಮಿನ ಆಯ-ಬಾನ ಬುಲಾಯು.ತಬ್‌ಲಗು ಕಾಣು ಥೂ ಕರಿ ಬೋಲಾನಿ ವಾತೇನ ಕೋ ನಂಬ್ಕುನಿ,

19 ಇವ್ಣೆ ಇನ ಆಯ-ಬಾನ, “ಆ ತುಮಾರೊ ಛಿಯ್ಯೋಕಿ ಶು? ಆ ಪೈದಾಖ್‌ಡ್‌ಹೋಸ್ ಕಾಣೊ ಕರಿ ತುಮೆ ಬೋಲಾಸ್ತೆ; ಇಮ್‌ಕತೊ, ಹಮ್ಮೆ ಅನ ಡೋಳಾ ಕಿಮ್ ದೆಖವ್‌ಕರಾಸ್ತೆ?” ಕರಿ ಪುಲ್ಲಾಯು.

20 ಇನ ಆಯ-ಬಾನೆ, “ಆ ಹಮಾರೊ ಛಿಯ್ಯೋ ಕರಿ ಹಮೂನ ಮಾಲುಮ್ ಅಜು ಆ ಪೈದಾಖ್‌ಡ್‌ಹೋಸ್ ಕಾಣೊ ಕರೀಬಿ ಹಮೂನ ಮಾಲುಮ್.

21 ಕತೋಬಿ ಹಮ್ಮೆ ಅನ ಡೋಳಾ ಕಿಮ್ ದೆಖವ್‌ಕರಾಸ್ ಕರಿ ರ್‌ವೊ, ಅನ ಅಲ್ಫು ಕರ್ಯ್ತೆ ಕಿನೆ ಕರಿ ರ್‌ವೊ ಹಮೂನ ಮಾಲುಮ್ ಕೊಯ್ತು. ಅನಾಸ್ ಪುಲ್ಲಾವೊ, ಆ ಜಾನ್‌ಜಮಾನ್ನಿ ಆಸ್ ಇನಿ ಬಾರೇಮ ಬೋಲ್‌ಶೆ” ಕರಿ ಜವಾಬ್ ದಿದು.

22 ಇನ ಆಯ-ಬಾನೆ ಯೆಹೂದ್ಯರನ ಅದಿಕಾರಿ ಡರಿನ್, ಅಮ್ಮಿ ವಾತೇನ ಬೋಲ್ಯುತೆ, ಶನಕತೊ ಯೇಸುನ ಕ್ರಿಸ್ತ ಕರಿ ಕೋಣ್ ವಿಶ್ವಾಸ್ ಕರಾಸ್ತಿ, ಇವ್ಣುನ ಯೆಹೂದ್ಯರನ್ನ ಸಬಾ ಮಂದಿರ್‌ಮಾಥು ಭಾರ್ ನಾಕ್‌ಶು ಕರಿ ಇವ್ಣೆ ಬೋಲಿರಾಖ್ಕುಥು.

23 ಇನಖ್ವಾಜೇಸ್ ಇನ ಆಯ-ಬಾನೆ, “ಯೋ ಜಾನ್‌ಜಮಾನ್ ಹುಯಿರ್ದೋಸ್‌ನಿ, ಇನಾಸ್ ಪುಲ್ಲಾವೊ” ಕರಿ ಬೋಲ್ಯುತೆ.

24 ತದೆ ಯೆಹೂದ್ಯರ್‌ನ ಅದಿಕಾರಿ ಪಾಲ್ತು ಭೇನೆಹಲ್ಲ, ಅಗಾಡಿ ಕಾಣೊ ಹುಯಿರ್ದೊಡೊತೆ ಯೋ ಅದ್ವಿನ ಬುಲೈನ್, “ತೂ ಖ್ವಾಚಿ ಬೋಲಿನ್ ದೇವ್ ಮರ್ಯಾದಿದೆ, ತುನ ಅಲ್ಫು ಕರೈತೆ ಯೋ ಅದ್ವಿ ಪಾಪಿಕರಿ ಹಮೂನ ಮಾಲುಮ್” ಕರಿಬೋಲ್ಯು.

25 ತದೆ ಯೋ ಅದ್ವಿನೆ, “ಯೋ ಅದ್ವಿ ಪಾಪಿಕಿ, ಕೊಯ್ತಿಕಿ ಮನ ಮಾಲುಮ್‌ಕೊಯ್ತು, ಕತೋಬಿ ಮೇ ಕಾಣೊ ಧೊ, ಹಮ್ ಮನ ದೆಖವ್‌ಕರಾಸ್ ಕರಿ ಬೋಲಾನು ಮನ ಮಾಲುಮ್” ಕರಿ ಬೋಲ್ಯೊ.

26 ತದೆ ಯೆಹೂದ್ಯರ್‌ನೆ ಇನ, “ಇನೆ ತುನ ಶಾತ್ ಕರೈತ್? ಇನೆ ತಾರ ಡೋಳಾನ ಕಿಮ್ ಅಲ್ಫು ಕರೈತ್?” ಕರಿ ಪುಲ್ಲಾಯು.

27 ಯೋ ಅದ್ವಿನೆ, “ಮೇ ತುಮೂನ ಅಗಾಡಿಸ್ ಬೋಲ್ಯೊನಿ, ತುಮೆ ಖ್ವಮ್‌ಜ್ಯಾಕೊಯ್ತು, ಬಿಜು ಪಾಲ್ತು ಶನ ಖ್ವಮ್‌ಜ್‌ಣು ಕರಿ ಲ್ಹಾತೆ? ತುಮೇಬಿ ಇನ ಶಿಷ್ಯರ್ ಹೋಣು ಕರಿ ಲ್ಹಾಕಿ ಶು? ಕರಿ ಜವಾಬ್ ದಿದೊ.

28 ತದೆ ಇವ್ಲೆಯೋ ಅದ್ವಿನ ಖ್ವರಮ್ ಕಾಡಿನ್, “ತೂ ಯೋ ಅದ್ವಿನೊ ಶಿಷ್ಯ; ಕತೋಬಿ ಹಮೆ ಮೋಶೆನ ಪೀರೆ ಜಾವವಾಳ ಹುಯಿರ್ದ್ವಾಸ್.

29 ಮೋಶೆನ ಜೋಡೆ ದೇವ್ ವಾತೆ ಬೋಲ್ಯೊ ಕರಿ ಹಮೂನ ಮಾಲುಮ್; ಕತೋಬಿ ಆ ಅದ್ವಿ ಕಿಜ್ಜಾನೊ ಕರೀಬಿ ಹಮೂನ ಮಾಲುಮ್ ಕೊಯ್ತು!” ಕರಿ ಬೋಲ್ಯೊ.

30 ತದೆ ಯೋ ಅದ್ವಿನೆ, “ಇನೆ ಮನ ಡೋಳಾ ದಿದೊತೋಬಿ, ಯೋ ಕಿಜ್ಜಾನೊ ಕರಿ ತುಮೂನ ಬಿಜ್ಜೂಬಿ ಮಾಲುಮ್‌ಕೊಂತೆ ಆಶ್ಚರ್ಯ ಕಾಹೆಕಿ ಶು?

31 ಹಮೂನ ಮಾಲುಮ್ ಪಾಪಿನು ಪ್ರಾರ್ಥನೇನ ದೇವ್ ಖ್ವಮ್‌ಜ್ಯಾಕೊಯ್ತು, ಕತೋಬಿ ಕೋಣ್ ದೇವ್ ಮರ್ಜಿನಿಘೋಣಿ ಭಾಲಾಸ್ಕಿ ಇನಿ ಪ್ರಾರ್ಥನೆ ಖ್ವಮ್‌ಜ್ಯಾಸ್ ಕರಿ.

32 ಪೈದಾಖ್ವೊಡೊಸ್ ಕಾಣು ಹುಯಿರ್ದೊಡೆ ಏಕ್ ಅದ್ವಿನ ಕೋಣ್‌ತೋಬಿ ಅಲ್ಫು ಕರೈತೆ ಬಾರೇಮ ಜಗತ್ ಶುರುವಾತ್‌ಥು ಏಕ್‌ನೇಬಿ ಖ್ವಮ್‌ಜಿರಾಖ್ತು ಕೊಯ್ತು.

33 ಆ ಅದ್ವಿ ದೇವ್‌ಥಿ ಆಯೊಹುಯೊ ನಾ ರ್ವಯೊಹೋತ್ತೊ, ಅನೇಥಿ ಶಾತ್ರಿ ಕರಾನ ಕೋ ಹುಯು ಹೋತ್‌ನಿ” ಕರಿ ಬೋಲ್ಯೊ.

34 ಆ ವಾತೆನ ಖ್ವಮ್‌ಜಿನ್ ಇವ್ಣೆ, “ತೂ ಖಲಿ ಪಾಪ್‌ಮ ಪೈದಾ ಹುಯೊತೆ, ಹಮೂನ ಬೋಲಿವತಳಾಸ್ತಿ ಶು?” ಕರಿಬೋಲಿನ್, ಸಬೇನು ಮಂದಿರ್‌ಮಾಥು ಇನ ಧಕೇಲಿ ಭಾರ್ ಕಾಡಿನಾಮ್ಮ.

ಆತ್ಮಮ ಕಾಣು

35 ಯೋ ಅದ್ವಿನ ಭಾರ್‌ನಾಮ್ಮಕರಿ ಯೇಸುನೆ ಖ್ವಮ್‌ಜಿನ್, ಇನ ಮಳಿನ್, “ತೂ ಅದ್ವಿನೊ ಛಿಯ್ಯಾನ ನಂಬಾಸ್ತಿ ಶು? ಕರಿಪುಲ್ಲಾಯೊ.

36 ತದೆ ಇನೆ, ಪ್ರಭು ಯೋ ಅದ್ವಿನೊ ಛಿಯ್ಯೊ ಕೋಣ್? ತೂ ಕಿನ ನಂಬ್‌ಣುಕರಿ ಬೋಲಸ್ತಿ, ಮನ ಬೋಲ್, ಮೇ ಇನ ನಂಬುಸ್” ಕರಿ ಬೋಲ್ಯೊ.

37 ಯೇಸುನೆ ಇನ, “ತೂ ಇನ ಅಗಾಡಿಸ್ ದೇಖಿರಾಕ್ಯೊಸ್, ತಾರ ಜೋಡೆ ವಾತೆ ಬೋಲುಕರಾತೆ ಮೇಸ್ ಯೋ” ಕರಿ ಬೋಲ್ಯೊ.

38 ಯೋ ಅದ್ವಿನೆ, “ಒಹೊ ನಂಬುಸ್‌ಲಾ ಗುರು!” ಕರಿಬೋಲಿನ್, ಯೇಸುನ ಖ್ವಾಮ್ಣೆ ಡುಕ್‌ಣ್ಣಟೀಕಿನ್ ಖ್ವಲಾಮ್ ಕರಯ್ಯೊ ಅಡ್‌ಪಡ್ಯೊ.

39 ಯೇಸುನೆ ಬೋಲ್ಯೊ, “ಮೇ ನ್ಯಾಯತೀರ್ಪ್‌ನ ಖ್ವಾಜೆ ಆ ಜಗತ್‌ಮ ಐರಯ್ಯೆಸ್ತೆ, ಇನಖ್ವಾಜೆ ಡೋಳಾಕೊಂತೆ ಇವ್ಣೆದೇಕ್‌ಶೆ, ಅಜ್ಜು ಕಿನ ಡೋಳಾ ಳಾಕಿ ಇವ್ಣೆ ಕಾಣು ಉಶೆ” ಕರಿಬೋಲ್ಯೊ.

40 ಯೇಸುನ ಜೋಡ್ಡ ಥಾತೆ ಥೋಡ ಫರಿಸಾಯರಾನೆ ಅನ ಖ್ವಮ್‌ಜಿನ್ ಬೋಲ್ಯು, “ಹಮೇಬಿ ಕಾಣಕರಿ ಬೋಲುಕರಾಸ್ತಿ ಶು?” ಕರಿ ಯೇಸುನ ಪುಲ್ಲಾಯು.

41 ಯೇಸುನೆ ಇವ್ಣುನ, “ತುಮೆ ಕಾಣ ಹುಯಿರಾಹೋತ್ತೊ, ತುಮೂನ ಪಾಪ್ ಕೋ ರ್ವಯುಹೋತ್ತಿ; ಕತೋಬಿ ಹಮೂನ ಡೋಳಾ ದೆಖವ್‌ಕರಾಸ್ ಕರಿ ಬೋಲೋಸ್‌ನಿ, ಇನಖ್ವಾಜೆ ತುಮೆ ಪಾಪಿ ಹುಯಿರಾಸ್” ಕರಿ ಜವಾಬ್ ದಿದೊ.

10

ಕುರುಬನಿ ಖೇಣಿ

1 ಯೇಸುನೆ, “ಮೇ ತುಮೂನ ಖ್ವಾಚ ಬೋಲುಸ್, ಮೇಂಡಾನು ಕೋತಾನ ಬಾಕಲ್‌ನಿವಾಟಿ ಮೈಂದಿನ್, ಬಿಜಿ ಬಾಭುಧು ಚ್ಚಡೀನ್, ಮಹಿ ಜ್ಜಾವಾಳೊ ಚೋರ್ ಅಜ್ಜು ಲೂಟಿಲಿಜ್ಜಾವವಾಳೊ ಹುಯಿರಸ್ತೊಸ್.

2 ಕೋಣ್ ಬಾಕಲ್‌ವಾಟಿ ಜ್ಜಾವಾಳೊಕಿ ಯೊ ಮೇಂಡಾನ ಚರಾವವಾಳೊ ಹುಯಿರಸ್ತೊಸ್.

3 ನಾಮ್ ಧರೀನ್ ಚೆಕ್‌ರ್ಯತೊ ಮೇಂಡ ಇನಿ ಅವಾಜ್‌ನ ಕಾನ್‌ದೇಸ್. ವಖ್ವತಿ ಕರಾವಾಳೊ ಯೋ ಮೇಂಡಾನ ಚಲ್ಮೆಲಿನ್ ಜಾಸ್.

4 ತದೆ ಯೋ ಕುರುಬ ಮೇಂಡಾನ ಖ್ವಾರು ಭಾರ್ ಮ್ಹೇಲಾನಜ್ಜಾಸ್ತಿ ತದೆ, ಮೇಂಡ ಇನಪೀರೆ ಜಾಸ್.

5 ಮೇಂಡಖ್ವಾರು ಇವ್ವುನ ಮಾಲುಮ್ ಕೊಂತೆ ಅಲ್ವಾವ್ ಅದ್ವಿನ ಪೀರೆ ಕೋಜಾಯ್ತಿ ಪಣ್ಣಿ ಇಮ್ಮ ಅದ್ವಿಕಂಡು ಮಿಲೈ ಚಲ್ವುಜಾಸ್, ಶನಕತೊ ಇವ್ವುನ ಯೋ ಅದ್ವಿನು ಗಳು ಮಾಲುಮ್‌ಕೊಯ್ತಿ” ಕರಿ ಬೋಲ್ಯೊ.

6 ಆ ಮತ್ಲಬ್‌ನಿ ಖೇಣಿನ ಯೇಸುನೆ ಇವ್ವುನ ಬೋಲ್ಯೊ ಕತೋಬಿ ಇವ್ವೆ ಇನಿ ವಾತೆನಿ ಮತ್ಲಬ್‌ನ ಮಾಲುಮ್ ಕರ್ಯ್ಕೊಯ್ತಿ.

ಯೇಸುಸ್ ಅಫ್ಲೊ ಕುರುಬ

7 ಇನಖ್ವಾಜಿ ಯೇಸುನೆ ಪಾಫೊ ಬೋಲ್ಯೊ, “ಮೇ ತುಮೂನ ಖ್ವಾಚ ಬೋಲುಸ್, ಮೇಸ್ ಮೇಂಡಾನ ಖ್ವಾರು ದರತ್ವಾಜ್ಜು ಹುಯಿರಸ್ತೊಸ್.

8 ಮೇ ಆವಾನ ಅಗಾಡಿ ಆಯೂತೆ ಖ್ವಾರುಸ್ ಚೋರ್ ಅಜ್ಜು ಲೂಟಿವಾಳು ಹುಯಿರಸ್ತೊಸ್, ಕತೋಬಿ ಮೇಂಡು ಖ್ವಾರು ಇವ್ವುನ ಕಾನ್ ಕೋ ದಿದೂನಿ.

9 ಮೇಸ್ ಯೋ ದರತ್ವಾಜ್ಜು, ಮಾರವಾಟಿ ಕೋಣ್-ಕೋಣ್ ಮಹಿ ಜ್ಜಾಸ್ತಿ ಇವ್ವೆ ಬಚಿಜಾಶೆ ಅಜ್ಜು ಇವ್ವೆ ಮಹಿ ಜಾಯೆಜಾಯ್, ಭಾರ್‌ಬಿ ಆಯೆಜಾಯ್, ಇವ್ವುನ ಚರಣ್ಣು ಘಾಖ್ವೊ ಮಳ್‌ಶೆ.

10 ಬೋರ್ ಬೋರಿ ಕರಾನಖ್ವಾಜೆ, ಮರ್ನಾಖಾನಖ್ವಾಜೆ ಅಙ್ಕು ಬರ್ಬಾತ್ ಕರಾನಖ್ವಾಜೆ ಆವಸ್ ಪಣ್ಣಿ, ಬಿಙ್ಕು ಶನಖ್ವಾಜೆಬಿ ಕಾಹೆ. ಕತೋಬಿ ಮೇತೊ ಇವ್ಣುನ, ಖಲಿ ಜಾನ್ ಕಾಹೆ ಜಿವ್ಣು ದೇವ್ಣುಕರಿ ಐರ್ಟೋಸ್ ಯೊ ಜಾಖ್ವತ್ ಭರ್ಪೂರ್ ಜಿವ್ಣು ದೇವ್ಣುಕರಿ ಆಯೊ.

11 ಮೇಸ್ ಅಫ್ಲೊ ಕುರುಬ; ಅಫ್ಲೊ ಕುರುಬ ಇನ ಮೇಂಡ್ ಖ್ವಾರಾನಖ್ವಾಜೆ ಇನು ಜಾನ್ವಾಸ್ ದೇಸ್.

12 ಕತೋಬಿ ಕೂಲಿಆಳ್ ಬೋಲಾಸ್ತೆ ಭರಾವವಾಳೊಬಿ ಕಾಹೆ, ಮೇಂಡ್ ಖ್ವಾರಾನ ಯಜಮಾನ್ಬಿ ಕಾಹೆ, ಮೇಂಡ್ ಶೊಂತ್ಬಿ ಕಾಹೆ ಇನಖ್ವಾಜೆ ಜರಕ್ ಆವಾನು ದೇಕ್ತಾಸ್ನ, ಮೇಂಡ್ ಖ್ವಾರಾನ ಮ್ಹೇಲಿನ್, ಮಿಲೈಚ್ಲೊಜಾಸ್. ತದೆ ಜರಕ್ ಮೇಂಡ್ಪರ್ ಪಡೀನ್, ಝೂಂಡ್ನ ಛಿದ್‌ರೈನಾಖಸ್.

13 ಯೋ ಕೂಲಿಆಳ್ ಮಿಲೈನ್, ಚಲ್ಕುಜಾಸ್ ಶನಕತೊ ಯೋ ಖಲಿಏಕ್ ಕೂಲಿ ಆಳ್ ಹುಯಿರ್ಟೊಸ್, ಇನಖ್ವಾಜೇಸ್ ಮೇಂಡ್ ಖ್ವಾರಾನಿ ಬಾರೇಮ ಇನ ಫಿಕರ್ ಕೋ ರ್ಟೀಯ್ನಿ.

14-15 ಮೇಸ್ ಅಫ್ಲೊಕುರುಬ ಹುಯಿರೊಸ್; ಬಾನೆ ಮನ ಅಙ್ಕು ಮೇ ಬಾನ ಮಾಲುಮ್ ಕರಿರಾಖ್ಯೊತೆ ಇಮ್ತ್ಸ್, ಮೇ ಮಾರ ಮೇಂಡ್‌ವ್ಣ್ ಮಾಲುಮ್ ಕರಿರಾಖ್ಯೊಸ್. ಅಙ್ಕು ಯೊ ಮೇಂಡ್‌ವ್ಣ್ ಮನ ಮಾಲುಮ್ ಕರಿರಾಖ್ಯೊಸ್. ಅಙ್ಕು ಮೇ ಮಾರ ಮೇಂಡ್‌ವ್ಣ್‌ಖ್ವಾಜೆ ಜಾನ್ ದೈವಾನ ತಯಾರ್ ಹುಯಿರಿಶ್.

16 ಅತ್ರೇಸ್ ಕಾಹೆತೆ, ಆ ಮಂಧಾಮ ಮಳ್ಕುಕೊಂತೆ ಬಿಙ್ಕು ಖ್ವಾರು ಮೇಂಡ್‌ಬಿ ಮನ ಛಾ, ಇನಾಬಿ ಮೇ ಲೀನಸ್ ಆವ್ಣ್ಣಿ ಇವ್ಣೆ ಮಾರಿ ಅವಾಜ್‌ನ ಖ್ವಮ್‌ಜಾಸ್; ತದೆ ಎಕ್ಕ್ಸ್ ಝೂಂಡ್ ಉಶೆ ಅಙ್ಕು ಎಕ್ಕ್ಸ್ ಜಣೊ ಕುರುಬ ರ್ಟಿಶೆ.

17 “ಮಾರೊ ಬಾ ಮನ ಪ್ಯಾರ್ ಕರಾಸ್ ಶನಕತೊ ಮೇ ಮಾರ ಜಾನ್ನ್ ಪಾಱ್ಣು ಮಳ್‌ಶೆ ಕರಿ ಇನ ದೆವ್ಣುಸ್.

18 ಮಾರ ಜಾನ್ನ್ ಕೋಣ್‌ಬಿ ಮಾರೇಥಿ ಕಾಡಾನ ಕೋ ಹುವಾನಿ. ಮೇ ಮಾರಿ ಖ್ವದ್‌ನಿ ಮರ್ಜಿಥಿ ಮಾರ ಜಾನ್ನ್ ದೆವ್ಣುಸ್ ಮಾರ ಜಾನ್ನ್ ದೈವಾನ

ಅಜ್ಜು ಪಾಲ್ಟು ಇನ ಲೀಲ್ಯಾವನ ಮನ ಹಕ್ ಲ್ಲಾ. ಆ ಹುಕುಮ್ ಮನ ಮಾರ ಬಾಧಿ ಮಳಿರ್ದೀಸ್” ಕರಿ ಬೋಲ್ಯೊ.

19 ಯೇಸುನಿ ಆ ವಾತೇಧಿ ಯೆಹೂದ್ಯರಾಮ ಬಿಜು ಪಾಲ್ಟು ಭಾಗ್ ಪಡಿಗಯು.

20 ಇವ್ವಾಮ ಘಣು ಜಣು, “ಅನಾಮ ಭೂತ್ ಲ್ಲಾ, ಅನ ದಿವಾನು ಲಾಗಿರ್ದೊಸ್, ತುಮೆ ಶನ ಇನಿ ವಾತೇನ ಖ್ವಮ್‌ಜೋಸ್ತೆ?” ಕರಿ ಬೋಲ್ಯೊ.

21 ಬಿಜು ಥೋಡು ಜಣು, “ಭೂತ್ ಧರಿರಾಖ್ಯತೆ ಅದ್ಮಿ ಅಮ್ಮಿ ವಾತೆ ಕೋ ಬೋಲಾನಿ! ಕಿಮ್ ಭೂತ್ ಕಾಣಾನ ಡೋಳಾ ದೆಖಾವಾನಿ ಘೋಣಿ ಕರ್‌ಶೇಕಿ ಶು?” ಕರಿ ಬೋಲ್ಯೊ.

ಯೆಹೂದ್ಯವಾಳು ಯೇಸುನ ದ್ವಿತ್ವಾರ್ಯತೆ

22 ತದೆ ಯೆರೂಸಲೇಮ್ ಮಂದಿರ್‌ನು ಉಜಾಖ್ವೆನಿ ಪೂಜಾ ಚಾಲುಕರ್ತುಫ, ತದೆ ರಣ್ಣಾದನ್ ಹುಯಿರ್ದಾಥ.

23 ಯೇಸು ಮಂದಿರ್‌ನ ಮಹಿ ಸೊಲೊಮೋನ್ನು ಮಂಡಪ್‌ಕನ ಚಾಲ್ಯೊಫಂಡ್‌ತೋಥೊ.

24 ತದೆ ಯೆಹೂದ್ಯವಾಳು ಇನ ಅಶ್‌ಪಿಶ್ ಏನ್, ಭರಾಯು ಅಜ್ಜು, “ಬಿಜು ಕೆತ್ರ ದನ್ ಹಮಾರೆಧಿ ಖ್ವಾಚನ ಮುಶ್ಕಿಲ್‌ಮ ರಾಖಿರಾಖಸ್? ತೂ ಕ್ರಿಸ್ತ ಉಶೇತೊ, ಹಮೂನ ನೇರ್‌ವಳಿಧಿ ಬೋಲ್” ಕರಿ ಬೋಲ್ಯೊ.

25 ಯೇಸುನೆ, “ಮೇ ಆಗಾಡಿಸ್ ತುಮೂನ ಬೋಲ್ಯೊ, ಕತೋಬಿ ತುಮೆ ಮನ ವಿಶ್ವಾಸ್ ಕೋ ಕರ್ಯಾನಿ, ಮಾರ ಬಾನ ನಾಮ್‌ಪರ್ ಮೇ ಕರುಸ್ತೆ ಅದ್ಭುತ್ ಕಾಮಸ್ ಮನ ಸಾಕ್ಷಿ ಹುಯಿರ್ದೊಸ್.

26 ಕತೋಬಿ ಮನ ವಿಶ್ವಾಸ್‌ಕರಾಕೊಂತೆ ಇನಖ್ವಾಜೆ, ತುಮೆ ಮಾರ ಮೇಂಡ ಕೋ ಹುಯಿರಾನಿ

27 ಮಾರ ಮೇಂಡ ಮಾರಿ ಅವಾಜ್‌ನ ಖ್ವಮ್‌ಜಾಸ್; ಮನ ಇವ್ಣೆ ಮಾಲುಮ್ ಅಜ್ಜು ಇವ್ಣೆ ಮಾರ ಪೀಲೆ ಆವಸ್.

28 ಮಾರ ಮೇಂಢಖ್ವಾರಾನ ಮೇ ಹರ್‌ಹಮೇಶಾನಿ ಜಿಂದ್‌ಗಿ ದೀಶ್, ಅಜು ಇವ್ಣೆ ಕದೇಬಿ ಮರ್‌ಶೆ ಕೊಯ್ನಿ. ಕೋಣ್‌ಬಿ ಇವ್ಣುನ ಮಾರ ಹಾತ್‌ಮಾಥು ಛಿನಾವಾನ ಕೋ ಉಶೇನಿ.

29 ಆ ಅಖ್ವಾನ ಮನ ದಿದೋತೆ ಮಾರ ಬಾ ಖ್ವಾರೇಢಿ ಮೋಟೊ, ಅಜು ಬಾನ ಹಾತ್‌ಮಾಥು ಕೋಣ್‌ಬಿ ಇವ್ಣುನ ಛಿನಾವಾನ ಕೋ ಹುವಾನಿ.

30 ಬಾಬಿ, ಮೇ ಎಕ್‌ಕ್‌ಸ್ ಹುಯಿರ್ಟ್ವಾಸ್” ಕರಿ ಬೋಲ್ಯೊ.

31 ಪಾಳ್ತು ಯೆಹೂದ್ಯರ್ ಯೇಸುನ ಮಾರ್ನ್ ಕರಿ ಬಂಡಾ ಚೂಣಿಲಿದು.

32 ತದೆ ಯೇಸುನೆ ಇವ್ಣುನ, “ಬಾನೆ ದಿದೋತೆ ಕೈಯೆಕ್ಚಿ ಅಲ್ಫು ಕಾಮ್ ಮೇ ತುಮಾರ ಖ್ವಾಮ್ಣೆ ಕರಿವತಾಳ್ಚೊ; ಯೋ ಖ್ವಾರ್ಡು ಕಾಮ್‌ಥು ಕೆಹು ಕಾಮ್‌ಟೀಕೆ ಮಾರಪರ್ ತುಮೆ ಬಂಡಾ ಫೇಕ್‌ಣು ಕರಿ ಛಾ?” ಕರಿ ಪುಲ್ಲಾಯೊ.

33 ಯೆಹೂದ್ಯರ್‌ನೆ, “ಹಮೆ ತಾರಪರ್ ಬಂಡಾ ಫೇಕಾನ ಆಯಾತೆ ಅಲ್ಫು ಕಾಮ್‌ಕರಿ ಕಾಹೆ, ತುನೆ ದೇವ್ ಛಿಂಗಾಯೋತೆ ಇನಖ್ವಾಜೆ, ತೂ ಖಲಿ ಏಕ್ ಅದ್ಮಿ ಹುಯಿರ್ಟ್ವಾಸ್, ಅಜು ತಾರು ತೂಸ್ ದೇವ್ ಕರಿಲ್ಯವಾನ ದೇಖಾಸ್ತೆ ಇನಖ್ವಾಜೇಸ್ ಬಂಡಾ ಫೇಕಾನ ಆಯಾತೆ!” ಕರಿ ಜವಾಬ್ ದಿದು.*

34 ತದೆ ಯೇಸುನೆ, “ತುಮೆ ದೇವ್‌ಖ್ವಾರ್ಡು ಹುಯಿರ್ಟ್ವಾಸ್” ಕರಿ ದೇವ್ ಬೋಲ್ಯೊತೆ ತುಮಾರಿ ಧರ್ಮಶಾಸ್ತ್ರಮ ಲೀಖ್ಪಿರ್ಟ್ವಾಸ್ ಕೊಯ್ನಿಶು?”† ಕರಿ ಜವಾಬ್ ದಿದೊ.

35 ಧರ್ಮಶಾಸ್ತ್ರ ಕದೇಬಿ ಝೂಟಿ ಕೋ ಹುವಾನಿ; ದೇವ್‌ವಚನ್ನ್ ಲೀರಾಖವಾಳನ ದೇವ್‌ಖ್ವಾರ್ಡುಕರಿ ಯೋ ಬೋಲಾನು ರ್ಡ್ಡಯುತೊ

36 ಬಾನೇಸ್ ಇನು ಶೊಂತ್‌ಛಿಯೊನ ಚೂಣಿಲೀನ್, ಜಗತ್‌ಮ ಬೋಲಿ ಮೋಕ್‌ಲೈರ್ಟ್ವೊತೆ ಇನ ತುಮೆ ‘ಮೇ ದೇವ್‌ನೊ ಛಿಯೊ ಹುಯಿರ್ಟ್ವಾಸ್ ಕರಿ ಬೋಲ್ತಾನ, ‘ತೂ ದೇವ್ ದೂಷಣೆ ಕರಾಸ್’ ಕರಿ ಬೋಲಸ್ತೆ ಶನ?

* 10:33 10:33 ಯಾಜಕ ಕಾಂಡ 24:16 † 10:34 10:34 ಕೀರ್ತನೆ 82:6

37 ಮೇ ಮಾರೊ ಬಾ ಬೋಲಾತೆ ಕಾಮ್ ನಾ ಕರೈಯಿ ಉಶೇತೊ, ಮಾರಿ ಪಾತೇನ ನಕೊ ನಂಬೊ.

38 ಕತೋಬಿ “ಮೇ ಅಮ್ ಕರೈಯಿ ಇನಖ್ವಾಜೆ ಮನ ತುಮೆ ವಿಶ್ವಾಸ್ ಕೊ ಕರಾನಿ, ಆ ಕಾಮ್ ದೇಖಿನ್ ತೋಬಿ ನಂಬೊ. ತದೆ ಮಾರ ಮಹಿ ಬಾ ಲ್ಹಾ ಕರೀಬಿ, ಅಜು ಬಾನ ಮಹಿ ಮೇ ಲ್ಹೂ ಕರೀಬಿ ತುಮೆ ಮಾಲುಮ್ ಕರಿಲಿಶು” ಕರಿ ಬೋಲೈಯಿ.

39 ಇವ್ಣೆ ಬಿಜು ಪಾಲ್ಹು ಯೇಸುನ ಧರ್ಮನು ಕರಿ ಕರೈಯಿ ಕತೋಬಿ ಯೋ ಇವ್ಣೇಥಿ ಲ್ಹುಕಿನ್ ನಿಕ್ಕಿಗಯೊ.

40 ಅನ ಬಾದ್‌ಮ ಯೇಸು ಯೊರ್ದನ್ ನದ್ದಿನು ಪಾರ್ಲಿ ಬಾಜೂಮ ಯೋಹಾನ ಅಗಾಡಿ ಬ್ಯಾಪ್ತಿಸ್ತ ದೆವಾಡು ಕರ್ತೊಥೋತೆ, ಯೋ ಝಗೋಕನ ಪಾಲ್ಹು ಜೈನ್, ಹಿಜ್ಜಾಸ್ ಥೊ.‡

41 ಕೈಯೆಕ್ಕಿ ಅದ್ಮಿಖ್ವಾರು ಇನಾಕನ ಐನ್, “ಯೋಹಾನನೆ ಕದೇಬಿ ಏಕ್ ಖ್ವಣೇದ್‌ಬಿ ಕರೈಯಿ ಕೊಯ್ತಿ ಕತೋಬಿ ಆ ಅದ್ಮಿನಿ ಬಾರೇಮ ಯೋಹಾನನೆ ಬೋಲೈಯೆತೆ ಹರೇಕ್ ವಾತೇಬಿ ಖ್ವಾಚಿಸ್” ಕರಿ ವಾತೆ ಬೋಲ್ಯು.

42 ಅಜು ಯೊ ಝಗೊ ಕೈಯೆಕ್ಕಿ ಅದ್ಮಿಯೇಸುಪರ್ ವಿಶ್ವಾಸ್ ಕರೈಯಿ.

11

ಲಾಙರೊನಿ ಮರಣ್

1 ಬೇಥಾನ್ಯಮ ಲಾಙರ್ ಕರಿ ಏಕ್ ಜಣೊ ಥೊ, ಇನ ಜಾನ್ ಅಲ್ಫು ಕೋ ಥೂನಿ. ಮರಿಯ ಅಜು ಇನಿ ಭೇನ್ ಮಾರ್ಥ ಆಸ್ ಗಾಮ್ ರೈತಿಥಿ.

2 ಆ ಮರಿಯ ಕೋಣ್‌ಕತೊ, ಯೇಸು ಪ್ರಭು ಗೋಡಾನ ವಾನುತೇಲೊನ ಲಗಾಡಿನ್, ಇನ ಕೇಖ್‌ಥಿ ಗೋಡ ನೂಠಿತೆ ಆಸ್. ಜಾನ್ ಅಲ್ಫು ಕೋಹುವಾಂತೆ ಲಾಙರ್ ಅನೋಸ್ ಬೈ.*

‡ 10:40 10:40 ಯೋಹಾನ 1:28 * 11:2 11:2 ಯೋಹಾನ 12:3

3 ಇನಖ್ವಾಜೆ, ಇನಿ ಭೇನೇನೆ, “ಪ್ರಭು, ತಾರೊ ಪ್ಯಾರ್‌ನೊ ದೋಸ್ತಿನ ಜಾನ್ನ ಅಲ್ಪು ಕೊಯ್ನಿ” ಕರಿ ಬೋಲಾನಿ ಖಬರ್‌ನ ಯೇಸುಕನ ಮೋಳ್ತಿಯೆ.

4 ಯೇಸುನೆ ಅನ ಖ್ವಮ್‌ಜಿನ್ ಬೋಲ್ಯೊ, “ಲಾಙ್‌ರನ್ ರೋಗ್ ಐರೊಸ್ತೆ ಮರಣ್ಣಖ್ವಾಜೆ ಕಾಹೆ, ಅನೇಥಿ ದೇವ್ ಅಜು ದೇವ್‌ನೊ ಥಿಯ್ಯಾನ ಮಹಿಮೆ ಮಳಾದೆ ಕರಿ ಆ ಐರೊಸ್ತೆ” ಕರಿ ಬೋಲ್ಯೊ.

5 ಯೇಸುನ ಮಾರ್ಥಪರ್, ಇನಿ ಭೇನ್‌ಪರ್ ಅಜು ಲಾಙ್‌ರಪರ್ ಪ್ಯಾರ್ ಥೂ.†

6 ತೋಬಿ ಲಾಙ್‌ರನ್ ಜಾನ್ನ ಅಲ್ಪು ಕೊಯ್ನಿ ಕರಿ ಖಬರ್‌ನ ಖ್ವಮ್‌ಜಿನ್‌ಬಿ, ಯೋ ಥೋತೆ ಹಿಙ್ಲಾಸ್ ಬಿಜೂಬಿ ಬೇ ದನ್ ರೆಡ್ತಿಯೊ.

7 ಅನ ಬಾದ್‌ಮ ಯೇಸುನೆ ಇನ ಶಿಷ್ಯರನ್, “ಅಪ್ಪೆ ಯೂದಾಯಾನ ಪಾಲ್ತು ಫರಿ ಜಯ್ತೆ” ಕರಿ ಬೋಲ್ಯೊ.

8 ತದೆ ಶಿಷ್ಯರನೆ, “ಗುರು, ಥೋಡ ದನ್ನ ಅಗಾಡಿಸ್ ಯೆಹೂದ್ಯರ್ ತುನ ಬಂಡಾ ಫೇಕಿನ್ ಮಾರ್ನ್ ಕರಿ ಆಯುಧು. ಹಮ್ಮೆ ತೂ ಪಾಲ್ತು ಹಿಙ್ಲಾಙ್ಲಾಸ್ತಿ ಶು?” ಕರಿ ಬೋಲ್ಯೊ.

9 ಯೇಸುನೆ, “ದನ್ನು ಭಾರ ಘಂಟಾ ಲ್ಹಾ, ಕಾಹೆಕಿ ಶು? ದನ್ನಿ ವಖ್ತಮ್ ಚಾಲವಾಳು ರೋಕರ್‌ಖೈನ್ ರಡ್ಕೊಯ್ನಿ, ಶನಕತೊ ಆ ಜಗತ್‌ನು ಉಙಾಳು ಇವ್ವುನ ದೆಖಾವಸ್.

10 ಕತೋಬಿ ರಾತ್ನಿ ವಖ್ತಮ್ ಚಾಲವಾಳು ರೋಕರ್ ಖಾಸ್, ಶನಕತೊ ತದೆ ಕೆಹು ಉಙಾಳುಬಿ ಕೋ ರೆಡ್ತಿಯೆತೆ ಇನಖ್ವಾಜೆ” ಕರಿ ಬೋಲ್ಯೊ.

11 ಯೇಸುನೆ ಆ ವಾತೇನ ಬೋಲಿನ್, “ಅಪ್ಪೊ ದೋಸ್ತಿ ಲಾಙ್‌ರ ಖ್ವತೋಸ್, ಇನ ಉರಾಡಾನಟೇಕೆ ಮೇ ಹಿಙ್ಲಾ ವಳ್ಳೊಙ್ಲವುಸ್” ಕರಿ ಇವ್ವುನ ಬೋಲ್ಯೊ.

† 11:5 11:5 ಆ ದೇವ್ ಪ್ಯಾರ್ ಬಾರೇಮ ಬೋಲುಕರಾಸ್ತೆ. ಅನ ಅಗಾಪೆ ಪ್ಯಾರ್ ಕರಿ ಬೋಲಾಸ್.

12 ಶಿಷ್ಯರಾನೆ, “ಪ್ರಭು, ಯೋ ಖುತೊ ಉಶೇತೊ, ಇನ ಅಱ್ಫುಲುಶೆ” ಕರಿ ಜವಾಬ್ ದಿದು.

13 ಯೇಸುನೆ ಲಾಙ್ಗರ್ ಮರಿಗಯೋತೆ ಬಾರೇಮ ಬೋಲ್ಯೋತೆ, ಕತೋಬಿ ಶಿಷ್ಯರಾನೆ ಲಾಙ್ಗರ್ ಖುಯಿನ್ ಅರಾಮ್ ಕರುಕರಸ್ ಕರಿ ಇನೆ ಬೋಲ್ಯೋತೆ ವಾತೆನಿ ಮತ್‌ಲಬ್ ಕರಿ ಸೋಚ್ಚು.

14 ಇನಖ್ವಾಜೆ ಯೇಸುನೆ ನೇರ್‌ವಳಿಧಿ ಇವ್ವುನ, “ಲಾಙ್ಗರ್ ಮರಿಗಯೊ” ಕರಿ.

15 ಮೇ ಹಿಜ್ವಾ ಕೋ ಥೋನಿತೆ ಇನಖ್ವಾಜೆ, ತುಮಾರಿ ಬಾರೇಮ ಮೇ ಖುಶಿ ಕರುಸ್, ಶನಕತೊ ಅನೇಧಿ ತುಮೆ ಮಾರಪರ್ ವಿಶ್ವಾಸ್ ಕರ್ತು. ಆವೊ ಇನಾಕನ ಜಯ್ತಿ” ಕರಿ ಬೋಲ್ಯೊ.

16 ತದೆ ದಿದುಮ ಕರಿ ನಾಮ್ನೊ ತೋಮನೆ ಇನ ಜೋಡ್ನ್ ಖ್ವಾರ್ ಶಿಷ್ಯರಾನ, “ಅಪ್ಪೇಬಿ ಪ್ರಭುನ ಕೇಡೆಸ್ ಜೈನ್, ಮರ್ದನಿತರ ಹುಯ್ತಿ” ಕರಿ ಬೋಲ್ಯೊ.

ಯೇಸು ಪಾಱೊ ಜಿವೊತೆ ಅಜು ಇನು ಜಿವ್ವು

17 ಯೇಸು ಬೇಥಾನ್ಯಮ ಆವಾದಿನ್, ಲಾಙ್ಗರ್‌ನ ಮಖ್ವಾಣ್ಯನಿ ಘವಿಮ ಮ್ಹೇಲಿನ್ ಚಾರ್ ದನ್ ಹುಯಿಗಾ ಕರಿ ಇನ ಮಾಲುಮ್ ಪಡ್ಚು.

18 ಬೇಥಾನ್ಯ ಯೆರೂಸಲೇಮ್‌ಥು ಖ್ವಮಾರ್ ಬೇ ಮೈಲ್‌ಧಿ ಕಮ್ಮಸ್ ದೂರ್ ಥೊ.

19 ಇನಖ್ವಾಜೆ ಇವ್ಣೊ ಭೈ ಮರಿಗಯೋತೆ ಬಾರೇಮ ಭಾಲಿ ದೈವಾನ.ಯೆಹೂದ್ಯರ್ಮ ಘಣು ಭಣು ಮಾರ್ಥ ಅಜು ಮರಿಯಕನ ಐರ್ದ್ವು.

20 ಯೇಸು ವಳ್ಳಾವಸ್ ಕರಿ ಮಾರ್ಥನೆ ಖ್ವಮ್‌ಜಿನ್, ಇನ ಮಳಾನಖ್ವಾಜೆ ಗೈ ಕತೋಬಿ ಮರಿಯ ಘರ್‌ಮಾಸ್ ಥೀ.

21 ಮಾರ್ಥನೆ ಯೇಸುನ, “ಪ್ರಭು, ತೂ ಹಜ್ಜ ರದ್ದಯೊಹೋತ್ತೊ, ಮಾರೊ ಭೈ ಮರ್ದೊಹೋತ್ ಕೊಯ್ತಿ.

22 ಕತೋಬಿ ಹಮ್ಮೇಬಿ, ತೂ ದೇವ್‌ಕನ ಶಾತ್ ಮಾಂಗ್ಲೊತೋಬಿ, ದೇವ್ ತುನ ದಿಶೆ ಕರಿ ಮನ ಮಾಲುಮ್” ಕರಿ ಬೋಲಿ.

23 ಯೇಸುನೆ ಇನ, “ತಾರೊ ಭೈಜಿವೊಹುಯಿನ್ ಉರಿಆವಾಶೆ” ಕರಿ ಬೋಲ್ಯೊ.

24 ತದೆ ಮಾರ್ಥನೆ, “ಅಂತಿಮ್ ದನ್ತಯೋ ಪಾಲ್ಹುಜಿವೊಹುಯಿನ್ ಉರಿ ಆವಾಶೆಕರಿ ಮನ ಮಾಲುಮ್” ಕರಿ ಫರೈನ್ ಬೋಲಿ.

25 ಯೇಸುನೆ ಇನ, “ಮೇಸ್ ಪಾಲ್ಹುಜಿವೊ ಹುಯಿರ್ದವಾಳೋಬಿ, ಜಾನ್‌ಬಿ ಹುಯಿರ್ದೋಸ್. ಮನ ನಂಬವಾಳೊ ಮರಿಗಯೊತೋಬಿ ಜಿವಾಶೆ;

26 ಅಜ್ಜು ಬಚಿರ್ದವಾಳೊ ಹರೇಕ್‌ಜಣೊ, ಮನ ನಂಬ್ಯೊತೊ ಯೊ ಕದೇಬಿ ಮರಾಶೆಕೊಯ್ನಿ” ಕರಿ ಬೋಲ್ಯೊ.

27 ತದೆ ಇನೆ, “ಓಹೋಲಾ, ಪ್ರಭು! ಆ ಜಗತ್ತ್ ಆವ್ಣತೆ ದೇವ್‌ನೊ ಛಿಯೊ ಹುಯಿರ್ದೊತೆ ತ್ರಿಸ್ತ ತೂಸ್ ಕರಿ ಮೇ ನಂಬಿರಾಖಿಸ್” ಕರಿ ಬೋಲಿ.

ಯೇಸು ರೋಯೊತೆ

28 ಆ ಬೋಲಾನ ಬಾದ್‌ಮ ಮಾರ್ಥನೆ ಜೈನ್, ಇನಿ ಭೇನ್ ಮರಿಯನ ಕಿನಾಬಿ ಮಾಲುಮ್‌ಕೊಂತೆ ಇಮ್, “ಗುರು ಹಜ್ಜಾಲ್ಲಾ, ತುನ ಬುಲಾವ್ ಕರಾಸ್” ಕರಿ ಬೋಲಿ.

29 ಅನ ಖ್ವಮಜ್ಞಾತಾಸ್‌ನ ಮರಿಯ ಫಟ್‌ಕರಿ ಉರೀನ್, ಒಗ್ಗಿಸ್‌ಮ ಯೇಸುಕನ ಚಲಿಗೈ.

30 ಯೇಸು ಬಿಜೂಬಿ ಗಾಮ್‌ನ ಮಹಿ ಕೋ ಆಯೊಥೋನಿ, ಮಾರ್ಥನೆ ಇನ ಮಳಿತೆ ಝಗೋಕನಾಸ್ ಥೊ.

31 ಮರಿಯನ ಜೋಡೆ ಘರಮ ರ್ವೀನ್, ಇನ ಭಾಲಿ ದೆವ್‌ಕರ್‌ತುಥೂತೆ ಯೆಹೂದ್ಯರ್, ಯೋ ಫಟ್ ಕರಿ ಉರೀನ್ ಭಾರ್ ವಳಿಜಾಯಿತೆ ದೇಖಿನ್, ಆ ರೊವಾನಖ್ವಾಜೆ ಘವಿಕನ ವಳಿಜಾಸ್ಕಿ ಶುಕಿ? ಕರಿ ಸೋಚಿನ್, ಇನ ಪೀರೆ ಗಯು.

32 ಮರಿಯ ಯೇಸು ಥೋತೆ ಹಿಜ್ಜಾ ಐನ್, ಇನ ದೇಕ್ತಾಸ್‌ನ, ಇನ ಗೋಡಾಪರ್ ಪಡೀನ್ “ಪ್ರಭು, ತೂ ಹಜ್ಜಾ ರ್ವಯೊಹೋತ್ತೊ ಮಾರೊ ಭೈಮರ್ದೊಹೋತ್ ಕೊಯ್ನಿ” ಕರಿ ಬೋಲಿ.

33 ಮರಿಯಬಿ ಇನಜೋಡೆ ಆಯುಧೂತೆ ಯೆಹೂದ್ಯರ್‌ಖ್ವಾರು ರೊವ್‌ಕರಾತೆ ಯೇಸುನೆ ದೇಖಿನ್, ಇನ ಆತ್ಮಮ ಪಶತ್ಯೆನ್ ಘಣು ದುಖ್‌ಹುಯು.

34 ಯೇಸುನೆ, “ತುಮೆ ಇನ ಕಿಜ್ಲಾ ಮ್ಹೇಲಿರಾಖ್ವಾ?” ಕರಿ ಪುಲ್ಲಾಯೊ. ತದೆ ಇವ್ಚೆ “ಐನ್, ದೇಕ್‌ಲಾ ಪ್ರಭು” ಕರಿ ಬೋಲ್ಯು.

35 ಯೇಸು ರೋಯೊ.

36 ಇನ ಯೆಹೂದ್ಯರ್‌ನೆ, “ದೇಖೊ! ಆ ಇನಾಪರ್ ಕೆತ್ರೆ ಪ್ಯಾರ್ ರಾಖಿರಾಖ್ವೊಸ್”! ಕರಿ ಬೋಲ್ಯು.

37 ಕತೋಬಿ ಇವ್ಣಾಮ ಥೋಡು ಭಣು, “ಅನೆ ಯೋ ಕಾಣಾನ ದೆಖಾವಾನಿ ಘೋಣಿ ಕರ್ರೊನಿ? ಲಾಜರ್‌ನಾಬಿ ಮರಣ್‌ಥು ಬಚಾಡೇಜಾಯ್‌ಥೂನಿ?” ಕರಿ ಬೋಲ್ಯು.

ಲಾಜರ್‌ನ ಪಾಲ್ತು ಜಾನ್ ಆಯೂತೆ

38 ಯೇಸು ಪಾಲ್ತೊ ಇನ ದಿಲ್ಮ ಘಣು ದುಖ್ ಕರ್ತೊಹುಯಿನ್, ಮಖ್ವಾಣ್ಯನಿ ಘವಿಕನ ಗಯೊ, ಯೋ ಘವಿನ ಬಂಡಾನಿ ಚಿಪಾಟ್‌ಥಿ ಮೂಚಿರಾಖ್ವುಧು.

39 “ಯೋ ಬಂಡಾನ ಕಾಡೊ” ಕರಿ ಯೇಸುನೆ ಹುಕುಮ್ ದಿದೊ.

ಮರ್ರಾಹುಯಾನಿ ಭೇನ್ ಮಾರ್ಥನೆ, “ಪ್ರಭು, ಯೋ ಮರಿನ್ ಚಾರ್ ದನ್ ಹುಯಿಗಾ! ಹಿಜ್ಲಾಘಣಿ ವಾಖ್ವೊಲುಶೆ” ಕರಿ ಬೋಲಿ.

40 ಯೇಸುನೆ ಇನ, “ಮೇ ತುನ ಬೋಲ್ಯೊ ಕೊಯ್ತಿಕಿಶು ತೂ ನಂಬಿತೊ, ದೇವ್ನಿ ಮಹಿಮೆನ ದೇಖಿಶ್” ಕರಿಬೋಲ್ಯೊ.

41 ಇವ್ಚೆಬಂಡಾನ ಕಾಡಿನಾಖ್ವು. ತದೆ ಯೇಸುನೆ ಡೋಳಾ ಪಾಡೀನ್, ಉಪ್ಪರ್ ದೇಖಿನ್, “ಬಾ, ತೂ ಮಾರಿ ಪ್ರಾರ್ಥನೇನ ಖ್ವಮ್‌ಜ್ಯಾತೆ ಇನಖ್ವಾಜೆ ತುನ ಧನ್ಯವಾದ್.

42 ತೂ ಕದೇಬಿ ಮಾರಿ ಪ್ರಾರ್ಥನೆ ಖ್ವಮ್‌ಜಾಸ್ ಕರಿ ಮನ ಮಾಲುಮ್, ತೋಬಿ ತುನೇಸ್ ಮನ ಬೋಲಿಮೋಕ್‌ಲ್ಯೊ ಕರಿ ಬೋಲಾನು, ಅಶ್‌ಪೀಶ್ ಭಿಯುತೆ ಅದ್ಮಿಖ್ವಾರು ವಿಶ್ವಾಸ್ ಕರಾದೆ ಕರಿ, ಮೇ ಆ ವಾತೇನ ಬೋಲ್ಯೊ” ಕರಿ ಬೋಲ್ಯೊ.

43 ಆ ಬೋಲಾನ ಬಾದ್‌ಮ, ಯೇಸುನೆ ಜೋರೆಧಿ ಚಿಕ್ರಿನ್, “ಲಾಞರ್, ಭಾರ್ ಉರೀನ್ ಆವ್!” ಕರಿ ಬೋಲ್ಯೊ.

44 ತದೆ ಮರಿಗಯೊಹುಯೊ ಉರೀನ್ ಫಾದರ್ ಆಯೊ, ಇನ ಹಾತ್-ಗೋಡ, ಮ್ಹೋಡು ಮರ್ಯಮುದಾನ್ ಲುಂಗ್ಗಾಧಿ ಲಪೆಟ್ಕಿರ್ದೊಡ್ಲ. ಯೇಸುನೆ ಇವ್ವುನ, “ಇನ ಛೋಡೊ, ಯೋ ಜಾವಾದೆ” ಕರಿ ಬೋಲ್ಯೊ.

ಯೇಸುನಿ ವಿರೋದ್ ಮಶ್ತತ್ ಭಂದಾಯುತೆ

(ಮತ್ತಾಯ 26:1-5; ಮಾರ್ಕ 14:1-2; ಲೂಕ 22:1-2)

45 ಮರಿಯನ ಮಳಾನ ಆಯುಥೂತೆ ಯೆಹೂದ್ಯರ್, ಯೇಸುನೆ ಕರಯ್ತೆ ಆ ಕಾಮ್ ದೇಖಿನ್, ಇವ್ವಾಮ ಕೈಏಕ್ ಜಣು ಇನಾಪರ್ ವಿಶ್ವಾಸ್ ಕರಯ್.

46 ಕತೋಬಿ ಇವ್ವಾಮ ಥೋಡಾನೆ ಫರಿಸಾಯರ್‌ಕನ ಜೈನ್, ಯೇಸುನೆ ಕರಯ್ತೆ ಇನಿ ಬಾರೇಮ ಇವ್ವುನ ಬೋಲ್ಯು.

47 ತದೆ ಮಹಾಯಾಜಕರ್ ಅಜು ಫರಿಸಾಯರ್‌ನೆ ಶಾಣಾವನಿ ಸಭೆ ಎಕ್ಕು ಕರೀನ್, “ಆ ಅದ್ಮಿ ಘಣು ಅದ್ಭುತ್ ಕಾಮ್ ಕರಾಸ್ವಿ ಅಪ್ಪೆ ಶಾತ್ ಕರಿಯೆ?

48 ಅಪ್ಪೆ ಅನ ಅಮ್ತಸ್ ಮ್ಹಂದಿದಾತೊ, ಹರೇಕ್ ಅದ್ಮಿ ಅನ ನಂಬಿಜಾಶೆ. ತದೆ ರೋಮ್‌ವಾಳು ಐನ್, ಅಪ್ಪಿ ಮಂದಿರ್‌ನ ಅಜು ಅಪ್ಪ ದೇಖ್ವೆನ್ ಬರ್ಬಾತ್ ಕರಿನಾಕ್‌ಶೆ!” ಕರಿ ಬೋಲ್ಯು.

49 ಇವ್ವಾಮ ಕಾಯಫ ಕರಿ ಏಕ್ ಜಣೊ ಥೊ. ಯೋ ವರ್‌ಖ್ತಿಯೋ ಮಹಾಯಾಜಕ್ ಹುಯಿರ್ದೊಡೊ, ಇನೆ ಇವ್ವುನ, “ತುಮುನ ಶಾತ್ಪಿ ಮಾಲುಮ್ ಕೊಯ್ತಿ!

50 ಹಿಡಿ ದೇಖ್ವೆನ್ ಬರ್ಬಾತ್ ಹುವಾಥೀಬಿ, ಏಕ್ ಅದ್ಮಿ ತಮಾಮ್ ಅದ್ಮಿನಖ್ವಾಜೆ ಮರ್‌ವಾನುಸ್ ಅಲ್ಪು ಕರಿ ತುಮೆ ಶನ ಮಾಲುಮ್ ಕರಿಲೆವ್‌ಕರಾಕೊಂತೆ” ಕರಿ ಬೋಲ್ಯೊ.

51 ಆ ವಾತೆ ಕಾಯಫಾನಿ ಶೊಂತ್ ಸೋಚ್ ಕೋ ಹುಯಿರ್ದೊಡೊ. ಯೋ ವರಖ್ವಾಮ ಯೋ ಗಲ್‌ಥೊಯಾಜಕ್ ಹುಯಿರ್ದೊಡೊತೆ

ಇನಖ್ವಾಜೆ, ಯೇಸು ಯೆಹುದ್ಯರ್ ಅದ್ವಿವೊನಖ್ವಾಜೆ ಮರ್ಶೆ ಕರಿ ಪ್ರವಾದನೆ ಬೋಲೊತೆ.

52 ಖಲಿ ಯೆಹುದ್ಯರ್‌ನಖ್ವಾಜೆ ಕಾಹೆ, ಪಣ್ಣಿ ಛಿದ್‌ರೈಗಯುತೆ ದೇವ್‌ನು ಅದ್ವಿಖ್ವಾರಾನ್ ಎಕ್ವು ಕರಾನ್‌ಖ್ವಾಜೆ ಯೇಸು ಮರವಾಳೊ ಥೊ.

53 ಯೋ ದನ್‌ಥು ಯೇಸುನ ಮಾರ್ನ್ ಕರಿ ಇವ್ಣೆ ಸೋಚಾಲಗ್ಕುಯೋ ಅಖ್ಪು ಪ್ರವಾದನೆ ಹುಯಿರಲ್ಲ್ಯಾ.

54 ಅನಖ್ವಾಜೆ ಯೇಸು ಯೆಹುದ್ಯರ್‌ನ ದೆಖಾನಿಫೋಣಿ ಫರಾನು ಮ್ಹೆಂದಿನ್, ಉಜ್ವಾಡಿ ಝಗೋನ ಖನ್ನೆ ಥೂತೆ, ಎಫ್ರಾಯಿಮ್ ಕರಿ ಖ್ವಿಯೇರ್‌ಮ ಜೈನ್ ಶಿಷ್ಯರ್‌ನ ಜೋಡ್ ರಹಿಗೊ.

55 ಯೆಹುದ್ಯರ್‌ನ ಪಸ್ಕ ಪೂಜಾನಿ ವಖ್ವತ್ ಖನ್ನೆ ಐಗೈಥಿ, ಇನಖ್ವಾಜೆ ಅದ್ವಿಖ್ವಾರು ಉಫ್ಲಿಬಾಝು ಚಲಿಗಯುಥು. ಪೂಜಾಥಿ ಪಹಿಲೆ ಇವ್ಣುನ ಶುದ್ಧಿಕರಣ್ ಕರಿಲೇವ್ಣು ಕರಿ ಗಾಮ್‌ಥು ಯೆರೂಸಲೇಮ್ ಆಯು.

56 ಇವ್ಣೆ ಯೇಸುನ ಥೂಂಡ್‌ತುಹುಯಿನ್ ದೇವ್ನಿಮಂದಿರ್‌ಮ ಭೀರಿನ್, “ತುಮೂನ ಕಿಮ್ ಸೊಚಾವಸ್ ಯೋ ಪೂಜಾನ ಆವ್‌ಶೆಸ್ ಕೊಯ್ತಿಕಿ ಶು?” ಕರಿ ಏಕ್‌ಥಿ-ಏಕ್ ಬೋಲಿಲಿದು.

57 ಮಹಾಯಾಜಕರ್ ಅಜ್ಜು ಫರಿಸಾಯರ್ ಯೇಸು ಕಿಜ್ಲಾ ಲ್ಲಾ ಕರಿ ಕಿನಾಬಿ ಮಾಲುಮ್ ಪಡ್ತುತೊ, ಹಮೂನ ಬೋಲ್‌ನು ಕರಿ ಹುಕುಮ್ ದಿದು. ಶನಕತೊ ಇವ್ಣೆ ಇನ ಧರ್‌ನು ಕರಿ ಥೂ.

12

ಬೇಥಾನ್ಯಮ ಯೇಸುನ ಅಬಿಷೇಕ್ ಹುಯೂತೆ

(ಮತ್ತಾಯ 26:6-13; ಮಾರ್ಕ 14:3-9)

1 ಪಸ್ಕ ಪೂಜಾನ ಲ್ಲೊ ದನ್ನ ಪಾಲ್ಲಳ್ ಯೇಸು ಬೇಥಾನ್ಯ ಗಾಮ್‌ನ ಗಯೊ, ಯೇಸುನೆ ಮರ್ಯಾಹುಯಾಮಾಥು ಜಿವ್ತೊ ಉತಾಡ್ಯೊತೆ ಲಾಜರಾಬಿ ಹಿಜ್ವಾಸ್ ರ್ಹೊತೊಥೊ.

2 ಯೇಸುನಖ್ವಾಜೆ ಹಿಜ್ಜಾ ಖಾಣು ತೈಯಾರ್ ಕರಿರಾಖ್ತು, ಮಾರ್ಥ ಖಾಣು ನಾಖಿನ್ ದೇವ್‌ಕರ್ತೀಧಿ, ಯೇಸುನ ಜೋಡೆ ಖಾಣನ ಬೆರುಥೂತೆ ಇವ್ವಾಮ ಲಾಙ್ಗರ್‌ಬಿ ಏಕ್ ಜಣೊ.

3 ತದೆ ಮರಿಯನೆ, ಘಣ ಮೋಲ್ತು ಜಟಮಂಸಿ ವಾನು ತೇಲ್ನ ಲೈನ್, ಯೇಸುನ ಗೋಡಾಪರ್ ರಂಚಿನ್, ಇನ ಮುಡ್‌ಕ್ಯಾನ್ ಕೇಖ್ವೊಧಿ ಯೇಸುನ ಗೋಡ ನೂಛಿ. ಯೋ ತೇಲ್ನಿ ಮಿತ್ರಿ ವಾಖ್ವೊ ಹಿಡಿ ಘರ್ ಅಖ್ವುನ್ ಮಹಿಕವ್‌ಕರ್ತು.

4 ಇನ ಶಿಷ್ಯರಾಮ ಏಕ್ ಜಣೊ ಹುಯಿರ್ಟೊತೆ, ಕತೊ (ಇನ ಧೋಕೇಧಿ ಧರಿದ್ಯವಾಳೊ ಇಸ್ಕರಿಯೋತ ಯೂದಾನೆ),

5 “ಆ ತೇಲ್ನ ತೀನ್‌ಖೊರೂಪಾನು ಪಾವ್ಲನ ವೇಚಿನ್, ಗರೀಬ್‌ನ ಶನ ಕೋದಿದಿನಿ?” ಕರಿ ಬೋಲ್ಯೊ.

6 ಗೋರ್-ಗರೀಬ್‌ನಿ ಬಾರೇಮ ಫಿಕರ್ ಕರೀನ್, ಆ ವಾತೇನ ಬೋಲ್ಯೊತೆ ಕಾಹೆ, ಪಣ್ಣಿ ಯೋ ಚೋರ್ ಹುಯಿರ್ಟೊಧೋತೆ ಇನಖ್ವಾಜೇಸ್ ಅಮ್ ಬೋಲ್ಯೊತೆ. ಅಜ್ಜು ಪೈಶಾನಿ ಚಂಚಿ ಇನ ಹಾತ್‌ಮ ರಟ್ಟೆತುಡು, ಯೋ ಚಂಚಿಮ ನಾಖಸ್ತೆ ಪೈಶಾನ ಯೋ ಕಾಡಿಲೇತೋಡೊ.

7 ಕತೋಬಿ ಯೇಸುನೆ ಇನ, “ಅನ ಮ್ಹೇಲೊ! ಮನ ಮಖ್ವಾಣ್ಣನ ದನ್ನುಕಾಮ್ ಹಮ್ವೇಸ್ ಕರಿಲಿದಿ.

8 ಗರೀಬ್ ಖ್ವಾರು ಹಮೇಶ ತುಮಾರ ಜೋಡೆ ರಟ್ಟೆಶೆ, ಕತೋಬಿ ಮೇ ಹಮೇಶ ತುಮಾರ ಜೋಡೆ ಕೋ ರಟ್ಟೆಶಾನಿ” ಕರಿ ಬೋಲ್ಯೊ.

ಲಾಙ್ಗರ್‌ನಿ ವಿರೋದ್ ಮಶ್ತ್ ಭಂದಾಯುತೆ

9 ಯೆಹೂದ್ಯರ್ ಅದ್ಮಿನಿ ಮೋಟಿ ಭೀಡ್, ಯೇಸು ಬೆಥಾನ್ಯಾಮ ಛಾ ಕರಿ ಮಾಲುಮ್ ಕರಿಲೀನ್, ಖಲಿ ಇನ ದೇಖಾನಖ್ವಾಜೆ ಕಾಹೆತೆ, ಇನೆ ಮರ್ತ್ಯಾಹುಯಮಾಡು ಜಿವ್ತು ಉರಾಡ್ವೊತೆ ಲಾಙ್ಗರ್‌ನಾಬಿ ದೇಕ್ಪು ಕರಿ ಹಿಜ್ಜಾಗಯು.

10 ಕತೋಬಿ ಮಹಾಯಾಜಕರ್ ಲಾಙ್ಗರ್‌ನಾಬಿ ಮರೈನಾಕ್ಪು ಕರಿ ಸೋಚ್ತು.

11 ಶನಕತೊ ಲಾಜರನಟೀಕೆ ಘಣು ಅದ್ನಿ ಯೆಹೂದ್ಯರ್ ಖ್ಹಾರು ಇವ್ವುನ ಮ್ಹೆಂದಿನ್, ಯೇಸುನ ವಿಶ್ವಾಸ್ ಕರ್ಯ್.

ಯೇಸು ರಾಜಾನಿಘೋಣಿ ಯೆರೂಸಲೇಮ್ ಗಯೇತೆ
(ಮತ್ತಾಯ 21:1-11; ಮಾರ್ಕ 11:1-11; ಲೂಕ 19:28-40)

12 ತಿನವ್ಹಣೆ, ಪಸ್ತ ಪೂಜಾನ ಆಯುಧೂತೆ ಅದ್ನಿ ಭೀಡನೆ, ಯೇಸು ಯೆರೂಸಲೇಮ್ ವಳ್ಳಾವಸ್ ಕರಿ ಖ್ವಮ್ಜ್ಯು.

13 ತದೆ ಇವ್ಣೆ ಖಜೂರ್ದಾಳಿಯೇನ ಪಳ್ಳಿನ್, ಯೇಸುನ ಮಳಾನ ಗಯು, ಅಜು ಚಿಕ್ರಿನ್ ಬೋಲ್ಯುಕಿ, “ಹೊಸನ್ನ! ಪ್ರಭುನ ನಾಮ್‌ಪರ್ ಆವಾಳ ರಾಜಾನ ದೇವ್ ಆಶೀರ್ವಾದ್ ಕರಾದೆ! ಇಸ್ರಾಯೇಲನ್ ರಾಜಾನ ದೇವ್ ಆಶೀರ್ವಾದ್ ಕರಾದೆ!”

14 ಯೇಸುನೆ ಏಕ್ ಗಧೇಡಾನ ದೇಖಿನ್, ಇನಾಪರ್ ಬೇಶಿಗಯೊ.

15 “ಚೀಯೋನ್ ನಂಗ್ರಿ ಡರ್‌ನಕೊ!

ಹಂದೇಕ್, ತಾರೊ ರಾಜ,

ಗಧೇಡಾನ ಚೆಲ್ವಪರ್ ಬೇಶಿನ್ ವಳ್ಳಾವಸ್ತೆ” ಕರಿ ಧರ್ಮಶಾಸ್ತ್ರಮ ಛಾತೆ ವಾತೆ ಅಮ್ ಚಾಲಿಗಿ.*

16 ಯೇಸುನ ಶಿಷ್ಯರ್‌ನ ಯೋ ವಖ್ವತ್‌ಮ ಆ ಮಾಲುಮ್ ಕೋ ಪಡ್ತುನಿ; ಕತೋಬಿ ಯೇಸು ಮಹಿಮೆನು ಪದವಿಮ ಆವಾನ ಬಾದ್‌ಮ, ಆ ಇನಿ ಬಾರೇಮಸ್ ಲೀಖ್ತಿರ್ದೊಸ್ತೆ ಕರಿ, ಅಜು ಅಪ್ಣೆ ಆ ಖ್ಹಾರಾನ ಯೇಸುನಖ್ವಜೆ ಕರ್ಯ್ ಕರಿ ಇವ್ವಯಾದ್ತಾಯು.

17 ಅತ್ರೇಸ್ ಕಾಹೆತೆ ಲಾಜರನ ಘವಿನ ಮಹಿಧು ಚಿಕ್ರಿನ್, ಜಿವ್ವು ಉರಾಡ್ತೊತೆ ವಖ್ವತ್‌ಮ, ಇನಜೋಡೆ ಧೂತೆ ಇವ್ಣೆ ದೇಖ್ತೊತೆ ಅದ್ನಿಖ್ಹಾರು ಅನಿ ಬಾರೇಮ ಸಾಕ್ಷಿ ಬೋಲುಕರ್ತೂಧು.

18 ಯೇಸುನೆ ಆ ಅದ್ಭುತ್ ಕಾಮ್ ಕರ್ಯ್ ಕರಿ ಖ್ವಮ್ಜ್ಯುತೆ ಇನಖ್ವಜೆ ಅದ್ನಿನ್ ಝೂಂಡ್ ಇನ ಮಳಾನ ಜೈರ್ದೊಡ್ತು.

* 12:15 12:15 ಜಕರೀಯ 9:9

19 ತದೆ ಫರಿಸಾಯರ್‌ವಾಳು ಏಕ್‌ಥಿ-ಏಕ್, “ಹಂದೇಖೊ, ಅಪ್ಪೊ ಹಾತ್ ಶಾಶ್ವಿ ಕರಾನ ಕೋ ಹೂಕರಾನಿ! ಆ ಜಗತ್‌ನು ಖ್ವಾರು ಅದ್ವಿ ಇನ ಪೀರೆ ಒಳ್ಳುಜ್ಜಾಸ್!” ಕರಿ ಬೋಲಿಲಿದು.

ಗ್ರೀಕ್‌ವಾಳು ಥೋಡುಜ್ಜಣು ಯೇಸುನ ಡೂಂಡ್ಕುತೆ

20 ಪಸ್ಕಪೂಜ್ಜಾನ ಆರಾದನೆ ಕರ್ನುಕರಿ ಯೆರೂಸಲೇಮ್‌ಥು ಆಯುಥೂತೆ ಇಸ್ರಾಯೇಲ್‌ವಾಳಮ ಥೋಡು ಜ್ಜಣು ಗ್ರೀಕ್‌ವಾಳುಬಿ ಥೂ.

21 ಇವ್ವಾಮ ಯೊ ಗ್ರೀಕ್‌ವಾಳು ಗಲಿಲಾಯಮ ಛಾತೆ ಬೆತ್ಸಾಯಿದ ಗಾಮ್‌ನೊ ಫಿಲಿಪ್ಪಕನ ಜೈನ್, “ಮಾಲಿಕ್, ಹಮೆ ಯೇಸುನ ದೇಕ್ಕು” ಕರಿ ಇನ ಗಿಂಗಾಯು.

22 ಫಿಲಿಪ್ಪನೆ ಜೈನ್, ಅಂದ್ರೆಯನ ಆ ಬಾರೇಮ ಬೋಲ್ಯೊ ತದೆ ಫಿಲಿಪ್ಪ ಅಜ್ಜು ಅಂದ್ರೆಯ ಭೇಜ್ಜಣನೆ ಯೇಸುನ ಬೋಲ್ಯ.

23 ಯೇಸುನೆ ಇವ್ವುನ ಜುವಾಬ್ ದಿದೊ, “ಅದ್ವಿನ ಥಿಯ್ಯಾನಿ ಮಹಿಮೆ ಮಳಾನಿ ವಖ್ವತ್ ಐಗೈ.

24 ಮೇ ತುಮೂನ ಖ್ವಾಚ ಬೋಲು ಕರುಸ್; ಕಬ್ಲಗು ಘವ್‌ನೊ ದಾಣೊ ಜಮೀನ್‌ಮ ಪಡೀನ್, ಮರಕೊಯ್ತಿಕಿ, ತಬ್‌ಲಗು ಎಕ್ಕ್ಯಸ್ ರೆಶ್ಶೆ; ಕದೆ ಮರಸ್ತಿ ತದೆ, ಘಣು ದಾಣಾನ ದಿಶೆ.

25 ಇನೊ ಶೊಂತ್ ಜಾನ್ನ ಪ್ಯಾರ್ ಕರಾವಾಳು ಇನ ಗುಮ್ಮೆಲಿಶೆ, ಆ ಜಗತ್‌ಮ ಕೋಣ್ ಇನ ಶೊಂತ್ ಜಾನ್ನ ಕಾಡಿಲ್ಕವಾನಬಿ ಪೀರೆ ಕೋ ಹಟಾನಿಕಿ, ಯೊ ಹರ್‌ಹಮೇಶಾನ ಖ್ವಾಜೆ ಇನ ಬಚ್ಚಾಡಿಲಿಶೆ.

26 ಕೋಣ್ ಮಾರಿ ಸೇವೆ ಕರ್ನುಕರಿ ಛಾಕಿ ಮಾರ ಪೀರೆ ಆವ್ವುಸ್ ಆವ್ವು ತದೆ ಮೇ ಕಿಜ್ಜಾ ರೆಶ್ಶೆಶ್‌ಕಿ ಹಿಜ್ಜಾಸ್ ಮಾರೊ ಸೇವಕ್‌ಬಿ ರೆಶ್ಶೆ. ಕೋಣ್ ಮಾರಿ ಸೇವೆ ಕರಾಸ್ಕಿ, ಇವ್ವುನ ಮಾರೊ ಬಾ ಸನ್ಮಾನ್ ಕರ್ಶೆ.

ಯೇಸುನೆ ಇನಿ ಮರಣ್ಣಿ ಬಾರೇಮ ಬೋಲ್ಯೊತೆ

27 “ಹಮ್ಮೆ ಮಾರೊ ಜಾನ್ ಘಬ್ರಾವ್ ಕರಾಸ್ ಅಜ್ಜು ಮೇ ಶಾತ್ ಬೋಲು? ಅಮ್ ಬೋಲುಕಿಶು ‘ಬಾ, ಆ ಖ್ವಿತ್ತಾಪ್ಪಿನಿ ವಖ್ವತ್‌ಮಾಥು ಮನ ಬಚ್ಚಾವ್‌ಕರಿ? ಕತೋಬಿ ಅನಖ್ವಾಜೆಸ್ ಮೇ ಆಯೋತೆ.

28 ಬಾ, ತಾರು ನಾಮ್ ಮಹಿಮ ಕರಿಲೆ!” ಕರಿ ಬೋಲ್ಯೊ.

ತದೆ ಸೊರ್ಗಮಾಥು ಆವಾಜ್‌ಆಯು, “ಮಾರು ನಾಮ್ ಮಹಿಮೆ ಕರಿಲೆದೊ, ಮೇ ಅಜ್ಜು ಪಾಲ್ಟೊ ಅನಿ ಮಹಿಮೆ ಕರೀಶ್” ಕರಿ ಬೋಲ್ಯೊ.

29 ಹಿಜ್ಜಾ ಭೀಯುಥೂತೆ ಝೂಂಡ್‌ಖ್ವಾರು ಆ ಅವಾಜ್‌ನ ಖ್ವಮ್‌ಜಿನ್, “ಗಲ್ವಾರ್ಲ್ಯ” ಕರಿ ಬೋಲ್ಯೊ ಅಜ್ಜು ಥೋಡಾನೆ, “ದೇವ್‌ನೊ ದೂತಾನೆ ಯೇಸುನ ಜೋಡೆ ವಾತೆ ಬೋಲ್ಯೊ” ಕರಿ ಬೋಲ್ಯೊ.

30 ಕತೋಬಿ ಯೇಸುನೆ ಇವ್ಣುನ, “ಆ ಅವಾಜ್ ಹುಯೂತೆ ಮಾರ ಅಲ್ಟಾನಖ್ವಾಜೆ ಕಾಹೆ, ಪಣ್ಣೆ ತುಮಾರ ಅಲ್ಟಾನ ಖ್ವಾಜೆಸ್.

31 ಆ ಜಗತ್ತ್ ತೀರ್ಪ್ ಹುವಾನಿ ಘಡಿ ಆಸ್; ಯೊ ಆ ಜಗತ್ತ್ ರಾಜ್‌ಭಾರ್ ಚಲಾಯೊತೆ ಆ ಅದಿಪತಿನ ಭಾರ್ ಧಕೇಲ್‌ಶೆ.

32 ಮೇ ಜುಮೀನ್‌ಪರ್ಥೊ ಉಪ್ಪರ್ ಪಡ್ವೆಜ್ಜಿಶ್‌ತೆ ತದೆ ಹರೇಕ್ ಮಾರಕನ ಖೇಚಿಲೀಶ್” ಕರಿ ಬೋಲ್ಯೊ.

33 ಯೋ ಮರಾನಿ ತರೀಖಾನ ಯೇಸುನೆ ಆ ವಾತೇಥಿ ವತಾಳಿಲೆದೊ.

34 ತದೆ ಅದ್ಮಿನಿ ಭೀಡ್‌ನೆ, “ಕ್ರಿಸ್ತ ಹರ್‌ಹಮೇಶ ಜಿವ್ವೊ ರೆಜ್ಜೆ” ಕರಿ ಧರ್ಮಶಾಸ್ತ್ರಮ ಬೋಲಾಸ್ಸಿ?† ಇಮ್‌ಕತೊ, ‘ಅದ್ಮಿನೊ ಥಿಯ್ಯೊ ಉಪ್ಪರ್ ಪಡ್ವೆಜ್ಜಾಶೆ’ ಕರಿ ತೂ ಬೋಲಾಸ್ತೆ ಕಿಮ್? ಯೋ ಅದ್ಮಿನೊ ಥಿಯ್ಯೊ ಕೋಣ್?” ಕರಿ ಪುಲ್ಲಾಯು.

35 ತದೆ ಯೇಸುನೆ ಇವ್ಣುನ ಬೋಲ್ಯೊ, “ಬಿಜ್ಜು ಥೋಡ ದನ್ನಸ್ ಉಜಾಳು ತುಮಾರಾಮ ರೆಜ್ಜೆ, ಅಂಧಾರು ತುಮಾರಪರ್ ಡಪಾವನ ಅಗಾಡಿಸ್ ಉಜಾಳು ರೆಜ್ಜಾನಿವಖ್‌ತೆಸ್ ಚಾಲೊ. ಅಂಧಾರಾಮ ಚಾಲವಾಳಾನ ಯೋ ಕಿಜ್ಜಾವಳ್ಳೊಜ್ಜಾಸ್ ಕರಿ ಮಾಲುಮ್ ಕೋಪಡಾನಿ.

36 ತುಮಾರಕನ ಉಜಾಳು ರೆಜ್ಜಾನಿ ವಖ್ತ್‌ಮಾಸ್ ಉಜಾಳಾನ ನಂಬೊ, ನಂಬ್ಯಾತೊ, ತದೆ ತುಮೆ ಉಜಾಳವಾಳ ಹುಯಿರ್ದೇಶು” ಕರಿ ಬೋಲ್ಯೊ.

† 12:34 12:34 ಕೀರ್ತನೆ 110:4; ಯೆಶಾಯ 9:7; ಯೆಹೆಜ್ಕೆಲ್ 37:25; ದಾನಿಯೇಲ್ 7:14

ಯೆಹೂದ್ಯರನಿ ಅವಿಶ್ವಾಸ್

ಆ ಬೋಲಾನ ಬಾದಾಮ, ಯೇಸುನೆ ಇವ್ವ ಖ್ವಾಮೇಥೊ ಓಲೆಚಲೆಗಯೊ.

37 ಯೇಸುನೆ ಇವ್ವ ಖ್ವಾಮ್ವೆಸ್ ಆ ಖ್ವಾರು ಅದ್ಭುತ್‌ಕಾಮ್ ಕರೈತೋಬಿ, ಇವ್ವೆ ಇನಾಪರ್ ವಿಶ್ವಾಸ್ ಕೋ ಕರೈನಿ

38 ಅನೇಥಿ ಪ್ರವಾದಿ ಯೆಶಾಯನೆ ಬೋಲೈತೆ ವಾತೆ ಖ್ವಾಚಿ ಹುಯಿಗು: ಯೋ ಶಾತ್‌ಕತೊ,

“ಪ್ರಭು, ಹಮೆ ಬೋಲೈತೆ ಖಬರ್‌ನ ಕೋಣ್ ವಿಶ್ವಾಸ್ ಕರೈ?

ಪ್ರಭುನಿ ಭುಜ್ಞನಿ ತಾಖತ್ ಕಿನ ದೆಖಾಯು?”‡ ಕರಿ ಬೋಲಾನುಸ್.

39 ಇವ್ವೆ ನಂಬುಕೊಂತೆ ಇನಖ್ವಾಜೆ ಯೆಶಾಯನೆ ಬಿಜೇಕ್ ವಾತೆ ಬೋಲಿರಾಖ್ಯೊಸ್, ಯೋ ಶಾತ್‌ಕತೊ,

40 ‘ದೇವ್ವೆ ಇವ್ವ ಡೋಳಾನ ಕಾಣು ಕರಿರಾಖ್ಯೊಸ್,

ಅಜು ಇವ್ವ ದಿಲ್ವ ಕರಣ್ ಕರಿರಾಖ್ಯೊಸ್,

ಶನಕತೊ, ಇವ್ವೊ ಡೋಳೊ ದೇಕ್ಟು ನಾ

ಅಜು ಇವ್ವೊ ದಿಲ್ ಪರಖ್‌ಣು ನಾ’ ಕರಿ

ಅಜು ಇವ್ವೆ ಇನಾಭಣಿ ಫರೀನ್,

ಇನಖ್ವಾಜೆ ಅಟ್ವು ನಾ ಹೋಣು ಕರಿ” ಬೋಲೈರೈತ್ತೆ.

41 ಯೆಶಾಯನೆ ಯೇಸುನಿ ಮಹಿಮೆನ ದೇಖೈತೆ ಇನಖ್ವಾಜೇಸ್ ಇನಿ ಬಾರೇಮ ಆ ವಾತೇನ ಬೋಲೈತೆ.

42 ತದೇಬಿ ಘಣು ಯೆಹೂದ್ಯರನು ಅದಿಕಾರಿನೆ ಯೇಸುಪರ್ ವಿಶ್ವಾಸ್ ಕರೈ, ಕತೋಬಿ ಸಭೆ ಭರಾವನು ಮಂದಿರಮಾಥು ಭಾರ್ ನಾಖಿದಿಶೆ ಕರಿ ಫರಿಸಾಯರ್‌ನ ಡರ್‌ಥಿ, ಅದ್ವಿನ ಖ್ವಾಮೆ ಬೋಲಿಲಿದುಕೊಯ್ತಿ.

43 ಶನಕತೊ ಇವ್ವೆ ದೇವ್‌ಥಿ ಆವಸ್ತೆ ಖ್ವಿರಾಪ್ಪಿಥೀಬಿ, ಅದ್ವಿಥಿ ಆವಸ್ತೆ ಮರ್ಯಾದಿಪರಸ್ ಇವ್ವುನ ಘಣು ಪ್ಯಾರ್ ಥೂ.

‡ 12:38 12:38 ಯೆಶಾಯ 53:1

ಯೇಸುನಿ ವಾತೇಪರ್ ತೀರ್ಪ್

44 ಯೇಸುನೆ ಜೋರೇಮ್ಮು ಚಿಕ್ರಿನ್, “ಮಾರಪರ್ ವಿಶ್ವಾಸ್ ಕರಾವಾಳೊ ಖಲಿ ಮಾರಪರಾಸ್ ಕಾಹೆ, ಕತೋಬಿ ಮನ ಮೋಕ್ಲೊತೆ ಇನಾಪರಬಿ ವಿಶ್ವಾಸ್ ಕರಾವಾಳೊ ಹುಯಿರ್ರೋಸ್.

45 ಕೋಣ್ ಮನ ದೇಖವಾಳೊಕಿ, ಮನ ಮೋಕ್ಲೊತೆ ಇನಾಬಿ ದೇಖವಾಳೊ ಹುಯಿರ್ರೋಸ್.

46 ಮೇ ಉಙ್ಗಾಳು ಹುಯಿನ್ ಆ ಜಗತ್‌ಮ ಐರ್ರೋಸ್ತೆ, ಮನ ನಂಬವಾಳು ಏಕ್‌ಬಿ ಅಂಧಾರಾಮ ನಾ ರ್ವೆವ್ವುಕರಿಸ್.

47 ಕೋಣ್‌ತೋಬಿ ಮಾರಿ ವಾತೆಅಖ್ವಾನ ಖ್ವಮ್‌ಜಿನ್‌ಬಿ, ಇನಲೀನ್ ಚಾಲ್ಯನಾತೊ, ಇನ ಮೇ ತೀರ್ಪ್ ಕರುಕೊಯ್ನಿ. ಜಗತ್ತ್ ತೀರ್ಪ್ ಕರಾನಖ್ವಾಜೆ ಮೇ ಆಯೊ ಕೊಯ್ನಿ, ಪಣ್ಣಿ ಆ ಜಗತ್ತ್ ಬಚಾಡಾನಖ್ವಾಜೆ ಆಯೊತೆ.

48 ಕೋಣ್ ಮನ ರಿಫ್ತಾರಿನ್, ಮಾರಿ ವಾತೇನ ಮಾನಕೊಂತೆ ಇವ್ವುನ ತೀರ್ಪ್ ಕರಾವಾಳು ಏಕ್ ಛಾ. ಯೋ ಕೆಹುಕತೊ ಮೇ ಬೋಲ್ಯೊತೆ ಯೋ ವಾತೇಸ್, ಖ್ವರ್ತಿನ ದನ್ಮ ಇವ್ವುನ ತೀರ್ಪ್ ಕರ್ಶೆ.

49 ಆ ಖ್ವಾಚು, ಶನಕತೊ ಮಾರಿ ಅದಿಕಾರ್‌ಥಿ ಮೇಸ್ ವಾತೆ ಕೋ ಬೋಲ್ಯೊನಿ ಮನ ಮೋಕ್ಲೊತೆ ಬಾನೇಸ್, ಮೇ ಶಾತ್ ಬೋಲೆನು ಅಙ್ಗು ಖಿವಿವಾತೆ ಬೋಲಿ ವತಾಳ್ಳು ಕರಿ ಮನ ಹುಕುಮ್ ದೀರಾಖೊಸ್.

50 ಬಾನಿ ಹುಕುಮ್ ಹರ್‌ಹಮೇಶಾನಿ ಜಿಂದ್‌ಗಿ ದೇಸ್ ಕರಿ ಮನ ಮಾಲುಮ್. ಇನಖ್ವಾಜೆ ಬಾನೆ ಮನ ಬೋಲಿದಿದೋತೆ ಇನಾಸ್ ಮೇ ಬೋಲುಸ್” ಕರಿ ಬೋಲ್ಯೊ.

13

ಯೇಸುನೆ ಇನ ಶಿಷ್ಯರ್‌ನ ಗೋಡ ಧೋಯೋತೆ

1 ಪಸ್ಸ ಪುಞಾನ ಅಗಾಡಿ ಯೇಸು ಆ ಜಗತ್ತ್ ಮ್ಹೇಲಿನ್, ಬಾಕನ ಜಾವಾನಿ ವಖ್ವತ್ ಐಗೈ ಕರಿ ಮಾಲುಮ್ ಕರೀನ್, ಆ ಜಗತ್‌ಮ ಛಾತೆ ಇನು ಕರಿ ಧೂತೆ ಯೋ ಖ್ವರಾನ ಹಮೇಶ ಪ್ಯಾರ್ ಕರ್ರೊ ಅಙ್ಗು ಖರ್ತಿಲಗೂಬಿ ಪ್ಯಾರ್ ಕರ್ತೊಸ್ ಆಯೊ.

2 ಯೇಸು ಅಜ್ಜು ಇನ ಶಿಷ್ಯರ್ ಖಾಣನ ಬೆಠಾಥ. ಯೇಸುನ ದೋಕೇಥಿ ಧರಿದೇಣು ಕರಿ ಬೋಲಾನಿ ಸೋಚ್ಚ, ಸೀಮೋನನೊ ಛಿಯೊ ಇಸ್ಕರಿಯೋತ ಯೂದಾನ ಮನ್ಮ ಶೈತಾನ್ನೆ ಅಗಾಡಿಸ್ ಘಾಲಿದೋಥೊ.

3 ಬಾನೆ ಖಾರ್ಬಿಸ್ ಅದಿಕಾರ್ನ ಇನ ಹಾತ್‌ಮ ದೀರಾಖ್ಯೊಸ್ ಕರಿ ಯೇಸುನ ಮಾಲುಮ್ ಥೂ; ಅತ್ರೇಸ್ ಕಾಹೆತೆ ಯೇಸುನ ದೇವ್‌ಕಂಥೊ ಐರ್ಟ್ವೊಸ್ ಅಜ್ಜು ಪಾಟ್ಲೊ ದೇವ್‌ಕನ ವಳ್ಳೊಬ್ಬವುಸ್ ಕರೀಬಿ ಮಾಲುಮ್ ಥೂ.

4 ತದೆ ಯೇಸುನೆ ಖಾಣನ ಮ್ಹೆಂದಿನ್, ಉಪ್ಪರ್ ಉಠೀನ್, ಇನು ಉಪ್ಪರ್‌ಲ್ಯು ಝಗ್ಗಾನ ಕಾಡಿನಾಖಿನ್, ಪಿಫೋಡಿನ ಪಾಡೀನ್, ಕಂಬರ್‌ನ ಭಾಂದಿಲಿದೊ.

5 ಅಜ್ಜು ಏಕ್ ಕಟೋರಾಮ ಪಾಣಿ ಭರಿನ್, ಶಿಷ್ಯರ್‌ನ ಗೋಡ ಧೋವಾಲಗ್ಯೊ ಅಜ್ಜು ಇನೆ ಕಂಬರ್‌ನ ಭಾಂದಿರಾಖ್ಯೊಥೋತೆ ಪಿಫೋಡಿಥಿ ನುಲ್ಲಾಲಗ್ಯೊ.

6 ಯೊ ಸೀಮೋನ್ ಪೇತ್ರಕನ ಆವಾದಿನ್, ಇನೆ, “ಪ್ರಭು, ತೂ ಮಾರ ಗೋಡ ಧೋವಾಸ್ತಿಶು?” ಕರಿ ಬೋಲ್ಯೊ.

7 ಯೇಸುನೆ ಇನ, “ಮೇ ಶಾತ್ ಕರುಕರುಸ್ತೆ ಕರಿ ಹಮ್ಮೆ ತುನ ಮಾಲುಮ್ ಕೋ ಪಡ್‌ಶೇನಿ, ಕತೋಬಿ ಬಾದ್‌ಮ ತುನ ಮಾಲುಮ್ ಪಡ್‌ಶೆ” ಕರಿ ಬೋಲ್ಯೊ.

8 ತದೆ ಪೇತ್ರನೆ, “ತೂ ಮಾರ ಗೋಡಾನ ಕದೇಸ್ ನಾ ಧೋವ್‌ಣು!” ಕರಿ ಬೋಲ್ಯೊ. ಯೇಸುನೆ ಇನ, “ಮೇ ತಾರ ಗೋಡ ನಾ ಧೋಯೋತೊ, ತೂ ಮಾರೊ ಶಿಷ್ಯ ಹುಯಿರ್ದವಾನ ಕೋ ಹುವಾನಿ” ಕರಿ ಬೋಲ್ಯೊ.

9 ತದೆ ಸೀಮೋನ್ ಪೇತ್ರನೆ, “ಪ್ರಭು, ಖಲಿ ಮಾರ ಗೋಡಾಸ್ ಕಾಹೆತೆ, ಮಾರ ಹಾತ್‌ನಾಬಿ, ಮುಡ್‌ಕ್ಯನಾಬಿ ಧೋವ್!” ಕರಿ ಬೋಲ್ಯೊ.

10 ಯೇಸುನೆ ಇನ, “ಪಾಣಿ ನ್ಹೊಯಿರಾಖವಾಳನು ಆಂಗ್‌ತನ್ ಅಖ್ವುಸ್ ಪಾಕ್ ರ್ವೇಸ್*, ಖಲಿ ಗೋಡ ಧೋಯೋತೊ ಬಶ್. ತುಮೆ

* 13:10 13:10 ಮನ್ಮ ಶುದ್ ರ್ವೇವ್ವಕರಿ ಮತಲಬ್

ಖ್ವಾರು ಪಾಕ್ ಹುಯಿರ್ದಾಸ್, ಕತೋಬಿ ತುಮಾರಾಮ ಹರೇಕ್ ಜಣೊ ಪಾಕ್ ಕಾಹೆ” ಕರಿ ಬೋಲ್ಯೊ.

11 ಯೇಸುನ ಇನ ಧೋಕೇಡಿ ಧರಿ ದಿಶೇತೆ ಕೋಣ್ ಕರಿ ಮಾಲುಮ್ ಥೂತೆ ಇನಖ್ವಾಜೆ, ಇನೆ, “ತುಮಾರಾಮ ಹರೇಕ್ ಜಣು ಪಾಕ್ ಕಾಹೆ” ಕರಿ ಬೋಲ್ಯೊತೆ.

12 ಯೇಸುನೆ ಇವ್ಣ ಗೋಡ ಧೋವಾನ ಬಾದ್‌ಮ, ಇನು ಉಪ್ಪರ್‌ಲ್ಯು ಝಗ್ಗಾನ ಪೇರ್ದಿಲೀನ್, ಪಾಠು ಹಿಜ್ಜಾಬೇಶಿನ್ ಇನೆ ಬೋಲ್ಯೊಕಿ, “ಮೇ ತುಮೂನ ಕರ್ರೊತೆ ಶಾತ್ ಕರಿ ತುಮೂನ ಮಾಲುಮ್ ಪಡ್ಕುಕಿಶು?” ಕರಿ ಪುಠಾಯೊ.

13 “ತುಮೆ ಮನ ಗುರು, ಪ್ರಭು ಕರಿ ಬುಲಾವಸ್, ತುಮೆ ಇಮ್ ಬುಲಾವಸ್ತೆ ಬರಾಬರಸ್, ಶನಕತೊ ಮೇ ಇಮ್‌ನೋಸ್.

14 ತುಮಾರೊ ಪ್ರಭು ಅಜು ಗುರು ಹುಯಿರ್ದೊತೆ ಮೇ, ತುಮಾರ ಗೋಡಾನ ಧೋಯೋತೆ ಇಮ್‌ಸ್, ತುಮೇಬಿ ಬಿಜೇಕ್‌ನ ಗೋಡ ಧೋವ್‌ಣು.

15 ಮೇ ತುಮೂನ ಕರ್ರೊತೆ ಇಮ್‌ಸ್ ತುಮೇಬಿ ಕರ್ರ್, ಕರಿ ಮೇ ತುಮೂನ ಖ್ವಿಂಜ್‌ಕಾರ್ ವತಾಳಿರಾಖ್ಯೊಸ್.

16 ಮೇ ತುಮೂನ ಖ್ವಾಚ ಬೋಲುಕರುಸ್, ಆಳ್ ಯಜಮಾನ್‌ಥಿ ಮೋಟೊ ಕಾಹೆ, ಅಜು ಖಬರ್‌ದ್ಯವಾಳೊ ಇನ ಮೋಕ್‌ಲ್ಯೊತೆ ಇನೇಡಿ ಮೋಟೊ ಕಾಹೆ.

17 ತುಮೆ ಅನ ಮಾಲುಮ್ ಕರಿಲೀನ್, ಅನೀನಿಫೋಣಿ ಚಾಲಿಲಿದಾತೊ ತುಮೆ ಧನ್ಯರ್ ಹುಯಿರ್ದಾಸ್!

18 “ಮೇ ತುಮಾರ ಖ್ವಾರಾನಿ ಬಾರೇಮ ಕೋ ಬೋಲುಕರುನಿ: ಮೇ ಚೂಣಿರಾಖ್ಯೊಸ್ತೆ ಇವ್ಣಿ ಬಾರೇಮ ಮನ ಮಾಲುಮ್, ಕತೋಬಿ ‘ಮಾರ ಬೋಡೆ ಖಾಣು ಖಾವಳೋಸ್ ಮನ ಧೋಕ ದಿದೊ’ ಕರಿ ಧರ್ಮಶಾಸ್ತ್ರಮ ಛಾತೆ ವಾತೆ ಚಾಲ್ತು.

19 ಯೋ ಚಾಲಾನಿ ವಖ್ವತ್‌ಮ, ಮೇಸ್ ಕ್ರಿಸ್ತ ಕರಿ ತುಮೆ ನಂಬಾನಖ್ವಾಜೆ, ಯೋ ಚಾಲಾನ ಬೋಲುಕರುಸ್.

20 ತುಮೂನ ಖ್ವಾಚ ಬೋಲುಸ್, ಮೇ ಮೋಕ್ಲುಸ್ತೆ ಇವ್ಣುನ

ಬುಲೈಲ್ಯವಾಳು, ಮನಾಬಿ ಬುಲೈಲ್ಯವಾಳು ಹುಯಿರಲ್ಲ್ವಸ್. ಅಙ್ಲು ಮನ ಬುಲೈಲ್ಯವಾಳು ಮನ ಮೋಕ್‌ಲ್ಯೊತೆ ಇನಾಸ್ ಬುಲೈಲ್ಯವಾಳು” ಹುಯಿರಲ್ಲ್ವಸ್.

ಯೇಸುನೆ ಇನ ಧೋಕೊ ದಿಶೇತೆ ಬಾರೇಮ ಬೋಲ್ಯೋತೆ
(ಮತ್ತಾಯ 26:20-25; ಮಾರ್ಕ್ 14:17-21; ಲೂಕ 22:21-23)

21 ಯೇಸು ಆ ಬೋಲಾನ ಬಾದ್‌ಮ, ಯೇಸುನ ಆತ್ಮಮ ಘಣು ದುಖ್ ಹುಯು, ಅಙ್ಲು ಇನೆ, “ಮೇ ತುಮೂನ ಖ್ವಾಚ ಬೋಲುಸ್, ತುಮಾರಾಮ ಏಕ್ ಇಣೊ ಮನ ಧೋಕೇಥಿ ಧರಿದಿಶೆ” ಕರಿ ಸಾಕ್ಷಿ ಬೋಲ್ಯೊ.

22 ತದೆ ಇನ ಶಿಷ್ಯರಾನೆ ಏಕ್‌ನ ಭಣಿ ಏಕ್ ದೇಖಿನ್, ಆ ಕಿನಿ ಬಾರೇಮ ಬೋಲುಕರಾಸ್ತೆ ಕರಿ ಗುಮಾನಿಕರಲ್ಯ.

23 ಶಿಷ್ಯರಾಮ ಯೇಸುನೊ ಪ್ಯಾರಾನೊ ಶಿಷ್ಯ ಏಕ್ ಥೊ, ಯೊ ಇನ ಚಿಕ್ಯೆನ್ ಬೆರೋಥೊ.

24 ತದೆ ಸೀಮೋನ್ ಪೇತ್ರನೆ ಯೊ ಶಿಷ್ಯನ, “ಯೊ ಕಿನಿ ಬಾರೇಮ ಬೋಲುಕರಾಸ್ತೆ ಕರಿ ಇನ ಪುಲ್ಲಾವ್” ಕರಿ ಇಷಾಕೊ ಕರಲ್ಯೊ.

25 ಇನಖ್ವಾಜೆ ಯೊ ಶಿಷ್ಯನೆ ಯೇಸು ಭಣಿ ಝುಕಿನ್, “ಪ್ರಭು, ಯೊ ಕೋಣ್?” ಕರಿ ಪುಲ್ಲಾಯೊ.

26 ಯೇಸುನೆ, “ಮೇ ಆ ರೋಟಾನ ಚೋಪ್‌ಡಿನ್, ಕಿನ ದೆವ್‌ಸ್ಕಿ, ಯೋಸ್ ಯೊ ಅದ್ವಿ” ಕರಿ ಬೋಲಿನ್, ರೋಟಾನ ಟುಕ್ಕಾನ ಪಾಡೀನ್, ಕಟೋರಿಮ ಚೋಪ್‌ಡಿನ್, ಸೀಮೋನ್ ಇಸ್ಕರಿಯೋತನೊ ಥಿಯ್ಯೊ ಯೂದಾನ ದಿದೊ.

27 ಯೂದಾನೆ ಯೊ ರೋಟಾನ ಲೇತಾಸ್‌ನ, ಶೈತಾನ್ ಇನಾಮಹಿ ಪೇಶಿಗಯೊ. ತದೆ ಯೇಸುನೆ ಇನ, “ತೂ ಕರಾನ ವಳ್ಳೊಙ್ಲಾಸ್ತೆ ಕಾಮ್ನ ಒಗ್ಗಿಸ್‌ಮ ಕರ್!” ಕರಿ ಬೋಲ್ಯೊ.

28 ಕತೋಬಿ ಯೇಸುನೆ ಇನ ಅಮ್ ಶನಖ್ವಾಜೆ ಬೋಲ್ಯೊ ಕರಿ ಬೋಲಾನು ಖಾಣನ ಬೆರುಥೂತೆ ಇವ್ವಾಮ ಕಿನಾಬಿ ಮಾಲುಮ್ ಕೋ ಹುಯೂನಿ.

29 ಇವ್ವಾಮ ಥೋಡಾನೆ, ಯೂದಾನ ಹಾತ್‌ಮ ಪೈಶಾನಿ ಚಂಚಿಥೀತೆ ಇನಖ್ವಾಜೆ ಯೇಸು ಇನ ಪೂಜಾನ ಅಪ್ಪುನ ಹೋಣುತೆ ಅಖ್ಪು ಲೀಲೆವೊ ಕರೀಕಿ, ನತರ್‌ಕಿ ಗರೀಬ್‌ನ ಶಾತ್‌ತೋಬಿ ದೇ ಕರಿ ಶುಕಿ, ಯೇಸುನೆ ಬೋಲ್ಯೊ ಕರಿ ಲ್ಹಾಯು.

30 ಯೂದಾನೆ ಯೋ ರೋಟಾನ ಲೀನ್, ತದ್‌ನು-ತದ್ದೇಸ್ ಭಾರ್ ಚಲೆಗಯೊ. ತದೆ ರಾತ್ ಹುಯಿರ್ದೇಥಿ.

ನವಿ ಹುಕುಮ್

31 ಯೂದ ಜ್ಞಾವಾನ ಬಾದ್‌ಮ, ಯೇಸುನೆ, “ಹಮ್ಮೆ ಅದ್ಮಿನೊ ಛಿಯ್ಯಾನ ಮಹಿಮೆ ಹುಯು; ಅಜ್ಜು ಇನೇಥಿ ದೇವ್ವ ಮಹಿಮೆ ಪ್ರಕಟ್ ಹುಯು.

32 ಏಕ್ ವಖ್ತ್, ಅದ್ಮಿನೊ ಛಿಯ್ಯಾಥಿ ದೇವ್ವ ಮಹಿಮೆ ಹುಯು ಉಶೇತೊ, ಖ್ವುಡ್ ದೇವ್‌ಥೀಸ್ ಅದ್ಮಿನೊ ಛಿಯ್ಯಾನಾಬಿ ಮಹಿಮೆ ಉಶೆ, ಅಜ್ಜು ಇನ ಒಗ್ಗಿಸ್ ಮಹಿಮೆ ಕರ್ತೆ.

33 ಮಾರ ಲಡ್ಕಾ, ಬಿಜ್ಜು ಥೋಡಿ ವಖ್ತ್ ಮೇ ತುಮಾರ ಜೋಡೆ ರಕ್ಷಿಶ್. “ಮನ ಥೂಂಡ್‌ಶು, ಕತೋಬಿ ಯೆಹೂದ್ಯರ್‌ನ ಬೋಲ್ಯೊತೆ ಇಮ್ಮಸ್, ಮೇ ಜ್ಞವುಸ್ತೆ ಹಿಜ್ಜಾ ತುಮೆ ಕೋ ಆವಾನ ಉಶೇನಿ” ಕರಿ ಮೇ ಹಮ್ಮೆ ತುಮೂನಾಬಿ ಬೋಲುಸ್.†

34 ಹಮ್ಮೆ ಮೇ ತುಮೂನ ಏಕ್ ನವಿ ಹುಕುಮ್ ದೆವುಸ್ ತುಮೆ ಏಕ್‌ಥಿ-ಏಕ್ ಲಾಡ್ ಕರೊ. ಮೇ ತುಮೂನ ಲಾಡ್ ಕರ್ದೊತೆ ತಿಮ್ಮಸ್, ತುಮೇಬಿ ಏಕ್‌ಥಿ-ಏಕ್ ಲಾಡ್ ಕರ್ನುಸ್‌ಕರ್ದು.

35 ತುಮೆ ಏಕ್‌ಥಿ-ಏಕ್ ಪ್ಯಾರ್ ಕರ್ದೊತೊ, ತದೆ ತುಮೆ ಹರೇಕ್ ಜ್ಞಣ ಮಾರ ಶಿಷ್ಯರ್ ಕರಿ ಮಾಲುಮ್ ಉಷೆ” ಕರಿ ಬೋಲ್ಯೊ.

† 13:33 13:33 ಮೇ ಭೂಲೋಕಮ ಕೊ ರಕ್ಷಿಶ್‌ನಿ

ಪೇತ್ರ ಧೋಕೊ ದಿಶೇತೆ ಬಾರೇಮ ಯೇಸುನೆ ಪಹಿಲೇಸ್ ಬೋಲ್ಯೊತೆ

(ಮತ್ತಾಯ 26:31-35; ಮಾರ್ಕ 14:27-31; ಲೂಕ 22:31-34)

³⁶ ಸೀಮೋನ್ ಪೇತ್ರನೆ ಯೇಸುನ, “ಪ್ರಭು, ತೂ ಕಿಜ್ಜಾ ವಳ್ಳೊಜ್ಜಾಸ್?” ಕರಿ ಪುಲ್ಲಾಯೊ.

ತದೆ ಯೇಸುನೆ, “ಮೇ ವಳ್ಳೊಜ್ಜವುಸ್ತೆ ಹಿಜ್ಜಾತೂ ಹಮ್ಮೆ ಆವಾನ ಕೋ ಉಶೇನಿ, ಕತೋಬಿ ಬಾದಾಮ ತೂ ಮಾರ ಪೀರೆ ಐಶ್” ಕರಿ ಬೋಲ್ಯೊ.

³⁷ ಪೇತ್ರನೆ ಯೇಸುನ, “ಪ್ರಭು, ಮೇ ಶನ ಹಮ್ಮೆ ತಾರ ಪೀರೆ ಆವಾನ ಕೋ ಉಶೇನಿ? ಮೇ ತಾರಖ್ವಾಜೆ ಜಾನ್ ದೆವಾನಾಬಿ ತಯಾರ್ ಛು!” ಕರಿ ಬೋಲ್ಯೊ.

³⁸ ಯೇಸುನೆ ಇನ ಪುಲ್ಲಾಯೊ, “ತೂ ಖ್ವಾಚಮಾಬಿ ಮಾರಖ್ವಾಜೆ ಜಾನ್ ದ್ಯವಾನ ತಯಾರ್ ಛಾಕಿ ಶು? ಮೇ ತುನ ಖ್ವಾಚ ಬೋಲುಸ್, ಮುರ್ಗೊ ಬಾಂಗ್ ದ್ಯವಾನ ಅಗಾಡಿ, ತೂ ಮಾರಿ ಬಾರೇಮ ‘ಯೋ ಮನ ಮಾಲುಮ್ ಕೊಯ್ತಿ’ ಕರಿ ತೀನ್ಹಲ್ಲ ಬೋಲಿಶ್” ಕರಿ ಬೋಲ್ಯೊ.

14

ಯೇಸುಸ್ ಬಾಕನ ಜಾವಾನೊ ಮಾರಗ್

¹ ಯೇಸುನೆ ಇವ್ವುನ, “ತುಮಾರೊ ದಿಲ್ ಕಲಾಪ್ಪಿ ನಕೊ ಹುವಾದೆ, ದೇವ್‌ಪರ್ ವಿಶ್ವಾಸ್ ಕರೊ ಅಜ್ಜು ಮಾರಪರ್‌ಬಿ ವಿಶ್ವಾಸ್ ಕರೊ.

² ಮಾರ ಬಾನ ಘರಮ ಘಣ ಕೋಣ ಛಾ, ಇಮ್ ನಾ ರ್ಡ್ಡಯುಹೋತ್ತೊ, ತುಮಾರಖ್ವಾಜೆ ಝಗೊ ತಯಾರ್ ಕರಾನಟೇಕೆ ವಳ್ಳೊಜ್ಜವುಸ್‌ನಿ.

³ ಮೇ ಜೈನ್, ತುಮಾರಖ್ವಾಜೆ ಝಗೊ ತಯಾರ್ ಕರಾನ ಬಾದಾಮ, ಪಾಛೊಅಯಿನ್, ತುಮೂನ ಮಾರ ಜೋಡೆ ಬುಲೈಲಿ ಜೈಶ್. ಅಮ್ಮಸ್ ಮೇ ಛೂತೆ ಝಗೋಮಾಸ್ ತುಮೇಬಿ ರ್ಡ್ಡಶು.*

* 14:3 14:3 ಸೊರ್ಗಾಮ ಮಾರಿ ಜೋಡೆ ರ್ಡ್ಡಶು ಕರಿ

4 ಮೇ ವಳ್ಳೊಜ್ಜವುಸ್ತೆ ಝಗೋನು ಮಾರಗ್ ತುಮೂನ ಮಾಲುಮ್ ಛಾ” ಕರಿ ಬೋಲ್ಯೊ.

5 ತೋಮನೆ ಯೇಸುನ “ಪ್ರಭು, ತೂ ವಳ್ಳೊಜ್ಜಾಸ್ತೆ ಕಿಜ್ಜಾ ಕರಿ ಹಮೂನ ಮಾಲುಮ್ ಕೊಯ್ಚಿ ಅಮ್ ರ್ವಾವಾಪರ್ ಯೋ ಮಾರಗ್ ಹಮೂನ ಕಿಮ್ ಮಾಲುಮ್ ಪಡ್‌ಶೆ?” ಕರಿ ಬೋಲ್ಯೊ.

6 ಯೇಸುನೆ ಇನ, “ಮೇಸ್ ಮಾರಗ್‌ಬಿ, ಖ್ವಾಚಾಬಿ, ಜಾನ್‌ಬಿ ಹುಯಿರ್ರೋಸ್. ಮಾರೇಥಿ ಕೊಂತೆ ಕೋಣ್‌ಬಿ ಬಾಕನ ಆವಾನ ಕೋ ಹುವಾನಿ.

7 ತುಮೆ ಮನ ಖ್ವಾಚಮಾಬಿ ಮಾಲುಮ್ ಕರಿಲಿದಾಹೋತ್ತೊ † ಮಾರ ಬಾನಾಬಿ ಅಲ್ಟಿನಿತರ ಮಾಲುಮ್ ಕರಿಲಿದಾಹೋತ್, ಕತೋಬಿ ಹಂಕೇಥು ತುಮೆ ಬಾನ ಮಾಲುಮ್ ಕರಿರಾಖ್ಯಾಸ್, ಅಜ್ಜು ಇನ ದೇಖಿರಾಖ್ಯಾಸ್” ಕರಿ ಬೋಲ್ಯೊ.

8 ಫಿಲಿಪ್ಪನೆ ಯೇಸುನ, “ಪ್ರಭು, ಹಮೂನ ಬಾನ ವತಾಳ್; ಹಮೂನ ಎತ್ರೇಸ್ ಬಶ್” ಕರಿ ಬೋಲ್ಯೊ.

9 ಯೇಸುನೆ ಜವಾಬ್ ದೇತೊ ಹುಯಿನ್, “ಫಿಲಿಪ್ಪ, ಮೇ ಅತ್ರಾದನ್ ತುಮಾರ ಜೋಡೆ ರ್ವಾಯೊತೋಬಿ, ತುನೆ ಮನ ಮಾಲುಮ್ ಕರಿಲಿದೊಕೊಯ್ಚಿ ಶು? ಕೋಣ್ ಮನ ದೇಖ್ಚಿ, ಇವ್ಣೆ ಬಾನಾಬಿ ದೇಖಿರಾಖ್ಯಾಸ್. ಅಮ್ ರ್ವಾವಾಪರ್, ತೂ, “ಹಮೂನ ಬಾನ ವತಾಳ್” ಕರಿ ಪುಲ್ಲಾವಸ್ತೆ ಶನ?

10 “ಮೇ ಬಾಮ ಛೂ, ಅಜ್ಜು ಬಾ ಮಾರಾಮ ಛಾ ಕರಿ ತೂ ನಂಬಾಕೊಯ್ಚಿ ಶು? ಮೇ ತುಮೂನ ಬೋಲುಸ್ತೆ ವಾತೆ, ಮಾರೇಥಿ ಮೇಸ್ ಬೋಲ್ಯೊತೆ ಕಾಹೆ; ಬಾ ಮಾರ ಮಹಿ ರ್ವೇನ್, ಜಿವ್ಣುಕರೀನ್ ಇನು ಕಾಮ್ ಕರಾಸ್.

11 ಮೇ ಬಾಮ ಛೂ, ಅಜ್ಜು ಬಾ ಮಾರಾಮ ಛಾ ಕರಿ ಮೇ ಬೋಲುಸ್ತೆ ಆ ವಾತೇನ ನಂಬೊ. ನತರ್‌ಕಿ ಮೇ ಕರ್ರೊತೆ ಖ್ವಾರು ಅದ್ಭುತ್ ಕಾಮ್ ದೇಖಿನ್ ತೋಬಿ, ನಂಬೊ.

† 14:7 14:7 ಯೇಸುಸ್ ದೇವ್ನಿ ಸ್ವರೂಪ್

12 ಮೇ ತುಮೂನ ಖ್ವಾಚ ಬೋಲುಸ್, ಮನ ನಂಬವಾಳೊ ಮೇ ಕರಂತ್ ಕಾಮ್ನಖ್ವಾರು ಯೋಬಿ ಕರ್ಶೆ, ಎತ್ರೇಸ್ ಕಾಹೆತೆ ಇನೇಥಿ ಮಹಾನ್ ಕಾಮ್ನಖ್ವಾರು ಕರ್ಶೆ, ಶನಕತೊ ಮೇ ಬಾಕನ ವಳ್ಳೊಜ್ಜವುಸ್.

13 ಅಜ್ಜು ತುಮೆ ಮಾರ ನಾಮ್‌ಪರ್ ಶಾತ್ ಮಾಂಗಿಲಿದಾತೋ, ಮೇ ತುಮಾರಖ್ವಾಜೆ ಯೋ ಖ್ವಾರುಸ್ ಚಲ್ವೆಶ್, ಅನಖ್ವಾಜೆ ಛಿಯ್ಯಾಥಿ ಬಾನ ಮಹಿಮೆ ಉಶೆ.

14 ತುಮೆ ಮಾರ ನಾಮ್‌ಪರ್ ಶಾತ್ ಮಾಂಗಿಲಿದತೋಬಿ, ಮೇ ಇನ ಪೂರ ಕರಿಶ್.

ಪವಿತ್ರಾತ್ಮನಿ ಬಾರೇಮ ವಾಗ್ದಾನ

15 ತುಮೆ ಮನ ಪ್ಯಾರ್‌ಕರವಾಳ ರ್ಹಯಾತೊ, ಮಾರಿ ಹುಕುಮ್‌ನ ಪಾಡಿ ಭಾಲ್‌ಶು.

16 ತದೆ ಮೇ ಬಾಕನ ಬೋಲಿಲೀಶ್, ತದೆ ಯೋ ತುಮೂನ ಬಿಜೇಕ್‌ಜಣೊ ಮದತ್ ಕರವಾಳನ ತುಮಾರಿ ಜೋಡ್ಡ ರ್ಹವಾನ ಮೋಕಲ್‌ಶೆ. ಯೋ ಮದತ್ ಕರಾವಾಳೊ ಹರ್‌ಹಮೇಶ್ ತುಮಾರ ಜೋಡೆ ರ್ಹೆಶೆ.

17 ಯೋ ಮದತ್ ಕರಾವಾಳೊ‡ ಕೋಣ್‌ಕತೊ ಖ್ವಾಚೊ ಆತ್ಮಾಸ್. ಆ ಜಗತ್ ಇನ ದೇಖ್ಯಕೊಯ್ಚಿ ಪರ್‌ಖ್ಯುಬಿ ಕೊಯ್ಚಿ. ಇನಖ್ವಾಜೆ ತುಮೆ ಇನ ಮಾಲುಮ್ ಕರಿಲಿಶು. ಕತೋಬಿ ತುಮಾರಿಜೋಡ್ಡ ಜಿವ್‌ಶೆ ಅಜ್ಜು ತುಮಾರ ಮಹಿರಿಶೆ.

18 ಮೇ ತುಮೂನ ಅನಾದ್ರಿನಿತರ ಕೋ ಮ್ಹೇಲೀಶ್‌ನಿ; ಮೇ ತುಮಾರಕನ ಪಾಳ್ವೊ ಐಶ್.

19 ಬಿಜ್ಜು ಥೋಡ ದನ್ವ ಬಾದ್‌ಮ ಆ ಜಗತ್ ಮನ ದೇಕ್‌ಶೆ ಕೊಯ್ಚಿ, ಕತೋಬಿ ತುಮೆ ಮನ ದೇಕ್‌ಶು; ಮೇ ಜಿವ್‌ಸ್ತೆ ಇನಖ್ವಾಜೆ ತುಮೇಬಿ ಜಿವ್‌ಶು.

20 ಯೋ ದನ್ಮ ಮೇ ಮಾರ ಬಾಮಾಬಿ, ತುಮೆ ಮಾರಮಬಿ, ಇಮ್ಮುಸ್ ಮೇ ತುಮಾರಮಬಿ ಛೊತೆ ಮಾಲುಮ್ ಕರಿಲಿಶು.

21 “ಮಾರಿ ಹುಕುಮ್‌ನ ಮಾನಿನ್, ಇನೀನಿಘೋಣಿ ಚಾಲವಾಳೋಸ್ ಮನ ಪ್ಯಾರ್ ಕರಾವಾಳೊ ಹುಯಿರ್ರೋಸ್. ಕೋಣ್

‡ 14:17 14:17 ಅಪ್ಪಣಾಮ ಛಾತೆ ಪವಿತ್ರಾತ್ಮ

ಮನ ಪ್ಯಾರ್ ಕರಾಸ್ಕಿ ಮಾರೊ ಬಾ ಇನ ಪ್ಯಾರ್ ಕರ್ಶೆ; ಮೇಬಿ ಇನ ಪ್ಯಾರ್ ಕರೀಶ್ ಅಜ್ಜು ಮೇಸ್ ಇನ ದೆಖ್ಲೀಲೀಶ್” ಕರಿ ಬೋಲ್ಯೊ.

22 ತದೆ ಯೂದಾನೆ (ಆ ಇಸ್ಕರಿಯೋತ ಯೂದ ಕಾಹೆ) ಕತೋಬಿ “ಪ್ರಭು, ತೂ ಜಗತ್ತ್ ದೆಖ್ಲೀಶ್ ಕೊಂತೆ ತೂ ಹಮೂನ ಖಲಿ ದೆಖ್ಲೀಲುವಾನ ಕಿಮ್ ಉಶೆ?” ಕರಿ ಪುಲ್ಲಾಯೊ.

23 ಯೇಸುನೆ ಇನ, “ಕೋಣ್ ಮನ ಪ್ಯಾರ್ ಕರಾಸ್ಕಿ, ಇವ್ಣೆ ಮಾರಿ ವಾತೇನ ಪಾಡಿ ಚಾಲ್‌ಷೆ. ಮಾರೊ ಬಾ ಇನ ಪ್ಯಾರ್ ಕರ್ಶೆ, ಅಜ್ಜು ಮಾರೊ ಬಾಬಿ ಮೇ ಭೇಜ್ಲಣ ಇನಾಕನ ಐನ್, ಇನಜೋಡೆ ಜಿವ್‌ಶು.

24 ಮನ ಪ್ಯಾರ್‌ಕರಾಕೊಂತೆ ಇವ್ಣೆ ಮಾರಿ ವಾತೇನ ಪಾಡಿ ಚಾಲಾಕೊಯ್ಲಿ; ತುಮೆ ಖ್ವಮ್‌ಜುಕರಾತೆ ಮಾರಿ ವಾತೆ ಕಾಹೆ, ಮನ ಮೋಕ್‌ಲ್ಯೊತೆ ಬಾನಿಸ್ ವಾತೆ.

25 ಮೇ ತುಮಾರ ಜೋಡೆ ರ್ವವಾನಿಸ್ ವಖ್ತಮ್, ಮೇ ಆ ಖ್ವಾರು ತುಮೂನ ಬೋಲಿರಾಖ್ಲೊಸ್.

26 ಕತೋಬಿ ಯೋ ಮದತ್ ಕರವಾಳೊ, ಕತೊ ಮಾರ ನಾಮ್‌ಪರ್ ಬಾ ಮೋಕ್‌ಲ್‌ಶೇತೆ ಪವಿತ್ರಾತ್ಮಸ್ ತುಮೂನ ಖ್ವಾರೊಸ್ ಶಿಕಾಡ್‌ಶೆ ಅಜ್ಜು ಮೇ ಬೋಲ್ಯೊತೆ ಅಖ್ವಾಸ್ನ ತುಮಾರಿ ಯಾದ್‌ಲ್ಯಾವ್‌ಶೆ.

27 ಮೆ ಶಾಂತಿನ ತುಮಾರಮ ಮ್ಹೇಲಿನ್‌ಕ್ ವಳ್ಳೊಜ್ಜವುಸ್, ಮಾರಾಮ ಲ್ಲಾತೆ ಶಾಂತಿನ ತುಮೂನ ದೆವುಸ್; ಆ ಜಗತ್ ದೇಸ್ತೆ ಇಮ್ ಕಾಹೆ, ಮೇ ತುಮೂನ ದೆವ್‌ಸ್ತೆ, ತುಮಾರೊ ದಿಲ್ ಕಲಾವಾದೆ ನಕೊ, ಅಜ್ಜು ತುಮೆ ಡರೊ ನಕೊ.

28 ಮೇ ವಳ್ಳೊಜ್ಜವುಸ್, ಕತೋಬಿ ಪಾಲ್ಟೊಫರಿ ತುಮಾರಕನ ಐಶ್, ಕರಿ ಮೇ ಬೋಲ್ಯೊತೆ ವಾತೇನ ತುಮೆ ಖ್ವಮ್‌ಜಿರಾಖ್ಯಾಸ್, ತುಮೆ ಮನ ಪ್ಯಾರ್ ಕರಾವಾಳು ಹುಯಿರಾಹೊತ್ಲೊ, ಮೇ ಬಾಕನ ವಳ್ಳೊಜ್ಜವುಸ್ತೆ ಬಾರೇಮ ಖ್ವಿಶಿ ಕರ್ಯಾಹೋತ್; ಶನಕತೊ ಬಾ ಮಾರೇಢಿಬಿ ಮಹಾನ್ ಹುಯಿರಾಹೊತ್.

29 ಆ ಖ್ವಾರು ಚಾಲಾನ ಅಗಾಡಿಸ್, ಮೇ ತುಮೂನ ಹಂಕೇಸ್ ಆ ಖ್ವಾರು ಬೋಲಿರಾಖ್ಯೊಸ್. ತದೆ ಯೋ ಚಾಲಾನಿ ವಖ್ವತ್‌ಮ ತುಮೆ ನಂಬ್‌ಶು.

30 ಬಿಜು ಮೇ ತುಮಾರ ಜೋಡೆ ಜಾಖ್ವತ್ ವಾತೆ ಕೋ ಬೋಲೂನಿ, ಶನಕತೊ ಆ ಜಗತ್ತ್ ಅದಿಕಾರಿ ವಳ್ಕಾವಸ್. ಇನ ಮಾರಪರ್ ಖಿವಿಸ್ ಹಕ್ ಕೊಯ್ನಿ.

31 ತೋಬಿ ಮೇ ಬಾನ ಪ್ಯಾರ್ ಕರುಸ್ ಕರಿ ಅಜು ಆ ಜಗತ್ ಶಿಕಿಲೇವ್ಣು ಕರಿ, ಬಾನೆ ಮನ ದಿದೋತೆ ಹುಕುಮಾನಿತರಸ್ ಮೇ ಕರುಸ್.

“ಅವೊ, ಅಪ್ಪೆ ಹಜ್ಜಾಡ್ಲು ಜಯ್ತೆ.”

15

ಯೇಸುಸ್ ಖ್ವಾಚೊ ದ್ರಾಕ್ಷಿನೊ ವೇಲೊ

1 “ಮೇಸ್ ಖ್ವಾಚೊ ದ್ರಾಕ್ಷಿನೊ ವೇಲೊ, ಮಾರೊ ಬಾ ಬಾಗ್‌ನ ದೇಕ್-ಭಾಲ್ ಕರಾವಾಳೊ.

2 ಮಾರಾಮ ರ್ವ್ವೊನ್, ಪಂಡು ದೇಯಿಕೊಂತೆ ಹರೇಕ್ ಡಾಳಿನ ಯೋ ಕತ್ರಿನಾಖಸ್; ಅಜು ಪಂಡು ದೇಸ್ತೆ ಹರೇಕ್ ಡಾಳಿನ ಬಿಜುಬಿ ಜಾಖ್ವತ್ ಪಂಡು ದ್ಯವಾನಿಘೋಣಿ ಇನ ಛಾಟಿನ್ ಪಾಕ್‌ಕರಾಸ್.

3 ಮೇ ತುಮೂನ ಬೋಲ್ಯೊತೆ ವಚನ್‌ಥಿ ತುಮೆ ಅಗಾಡಿಸ್ ಪಾಕ್ ಹುಯಿರ್ದಾಸ್.

4 ತುಮೆ ಮಾರಾಮ ರ್ವ್ವೊನ್, ಮೇ ತುಮಾರಾಮ ರ್ವ್ವೊನ್. ಡಾಳಿಯೆ ವೇಲಾನ ಜೋಡೆ ನಾ ರ್ವ್ವೊಯುತೊ, ಇನುಯೋಸ್ ಪಂಡು ದ್ಯವಾನ ಕೋ ಹುವ್ವಾನಿಕಿ, ಇಮ್ಮುಸ್ ತುಮೆ ಮಾರಾಮ ನಾ ರ್ವ್ವೊಯುತೊ, ಫಲ್‌ದ್ಯವಾನ ಕೋ ಉಶೇನಿ.

5 ಮೇ ದ್ರಾಕ್ಷಿನೊ ವೇಲೊ, ಅಜು ತುಮೆ ಡಾಳಿಯೆ. ಏಕ್ ಜಣೊ ಮಾರಾಮ ಅಜು ಮೇ ಇನಾಮ ರ್ವ್ವೊಯೋತೊ, ಯೋಸ್ ಜಾಖ್ವತ್ ಪಂಡು ದಿಶೆ; ಕತೋಬಿ ತುಮೆ ಮನ ಮ್ಹೊಂದಿನ್ ಶಾಕ್ತಿ ಕರಾನ ಕೋ ಹುವಾನಿ.

6 ಕೋಣ್ ಮಾರಾಮ ಕೋ ರ್ಲೆಯ್ತೆಕಿ, ಯೋ ಭಾರ್ ಫೇಕ್ಟೆಗಯೂತೆ ಡಾಳಿನಿತರ ಛಾ, ಯೋ ಡಾಳಿ ಖುಕ್ತೆಜಾಸ್; ಯೋ ಡಾಳಿಯೇನ ಅದ್ತಿ ಎಕ್ಟು ಕರೀನ್, ಆಗ್‌ಮ ಫೇಕಿನಾಖಸ್, ಹಿಜ್ಜಾಯೋ ಬಳಿಜಾಸ್.

7 ತುಮೆ ಮಾರಾಮಬಿ ಮಾರಿ ವಚನ್ ತುಮಾರಾಮ ರ್ಲೆಯೇತೊ*, ಶಾತ್ ಮಾಗ್ಲಿದಾತೋಬಿ ಯೋ ತುಮೂನ ಮಳಾಶೆ.

8 ತುಮೆ ಜಾಖ್ತು ಪಂಡು ದಿಶುತೆ ಇನೇಥಿಸ್ ಮಾರ ಬಾನ ಮಹಿಮೆ ಉಶೆ; ಅಜ್ಜು ಅಮ್ ತುಮೆ ಮಾರ ಶಿಷ್ಯರ್‌ಲುಶು.

9 ಬಾನೆ ಮನ ಕಿಮ್ ಪ್ಯಾರ್ ಕರ್ರಿಯೇಕಿ ಇಮ್ಮಸ್, ಮೇ ತುಮೂನ ಪ್ಯಾರ್ ಕರುಸ್; ತುಮೆ ಮಾರಿ ಲಾಡ್ಡು ಮಳಿರ್ಲವೊ.

10 ಮೇ ಮಾರ ಬಾನಿ ಹುಕುಮ್‌ನ ಪಾಡಿ ಚಾಲಿನ್, ಇನಿ ಲಾಡ್ಡುಲೊತೆ ಇಮ್ಮಸ್, ತುಮೆ ಮಾರಿ ಹುಕುಮ್‌ನ ಪಾಡಿ ಚಾಲ್ಯಾತೊ, ಮಾರಿ ಲಾಡ್ಡು ಏಕ್ ಹುಯಿರ್ಲೊಶು.

11 ಮಾರಾಮ ಛಾತೆ ಖುಶಿ ತುಮಾರಮಾಬಿ ರ್ಲೇಣು ಕರಿ, ಅಜ್ಜು ತುಮಾರಿ ಖುಶಿ ಭರೈನ್ ಝಲಕೊಣು ಕರಿ ಮೇ ಆ ಖ್ವಾರು ತುಮೂನ ಬೋಲಿರಾಖೊಸ್.

12 ಮೇ ತುಮೂನ ಪ್ಯಾರ್ ಕರ್ರಿಯೇತೆ ಇಮ್ಮಸ್, ತುಮೇಬಿ ಏಕ್‌ಥಿ-ಏಕ್ ಪ್ಯಾರ್ ಕರ್ರು ಕರಿ ಬೋಲಾನುಸ್ ಮಾರಿ ಹುಕುಮ್.

13 ಇನೊ ಜಾನ್ನಾಸ್ ದೋಸ್ತ್ ಖ್ವಾರಾನಖ್ವಾಜೆ ದೇಸ್ತೆ, ಲಾಡ್‌ಥಿ ಮಹಾನ್ ಪ್ಯಾರ್ ಬಿಜ್ಜು ಕೆಹುಸ್ ಕೊಯ್ತಿ.

14 ಮೇ ತುಮೂನ ದಿದೋತೆ ಹುಕುಮ್‌ನಿಫೋಣಿ ತುಮೆ ಚಾಲ್ಯಾತೊ, ತುಮೆ ಮಾರ ದೋಸ್ತ್.

15 ಬಿಜ್ಜು ಖ್ವಾವ್ಣೆ ಮೇ ತುಮೂನ ಆಳ್ ಕರಿ ಬುಲಾವ್ ಕೊಯ್ತಿ, ಶನಕತೊ ಯಜಮಾನ್ ಶಾತ್ ಕರುಕರಸ್ ಕರಿ ಇನ್ ಆಳ್‌ನ ಮಾಲುಮ್ ಕೋ ರ್ಲೆಯ್ತೆ. ಅನಬದಲ್ ಮೇ ತುಮೂನ ದೋಸ್ತ್ ಕರಿ ಬುಲಾವುಸ್, ಶನಕತೊ ಬಾಧಿ ಮೇ ಶಾತ್ ಖ್ವಾಮ್‌ಜೊಕಿ ಖ್ವಾರಸ್ಸು ತುಮೂನ ಬೋಲಿರಾಖೊಸ್.

* 15:7 15:7 ಇನಿ ವಚನಿತರ ಚಾಲ್ತು

16 ತುಮೆ ಮನ ಚೂಣಿನ್ ಕಾಡಿರಾಖ್ಯಕೊಯ್ತೆ; ಮೇ ತುಮೂನ ಚೂಣಿನ್ ಕಾಡಿರಾಖ್ಯೊಸ್, ತುಮೆ ಜೈನ್, ಪಂಡು ದೇವ್ಣಕರಿ ಅಜ್ಜು ಯೋ ಪಂಡು ಕೆದೇಬಿ ದೈವಾನು ಹುಯಿರ್ದೇಣು ಕರಿ, ಮೇ ತುಮೂನ ನೇಮ್‌ಶೈರಾಖ್ಯೊಸ್. ಅನಖ್ವಾಜೆಸ್ ಮಾರ ನಾಮ್‌ಥಿ ತುಮೆ ಶಾತ್ ಮಾಂಗಿಲಿದಾತೋಬಿ ಬಾ ತುಮೂನ ಯೋ ದಿಶೆ.

17 ತುಮೆ ಏಕೆಥಿ-ಏಕ್ ಪ್ಯಾರ್ ಕರೈ ಕರಿ ಬೋಲಾನುಸ್ ಮಾರಿ ಹುಕುಮ್.

ಯೇಸುನೆ ರೈತಾಯೊತೆ

18 “ಆ ಜಗತ್ ತುಮೂನ ವಹೇರ್ ಕರೈತೊ, ಯೋ ಪಹಿಲೆ ಮನ ವಹೇರ್ ಕರೈ ಕರಿ ತುಮೆ ಯಾದ್ ಕರಿಲೆವೊ.

19 ತುಮೆ ಆ ಜಗತ್‌ವಾಳ ಹುಯಿರ್ದಾಹೋತ್ಪೊ†, ಆ ಜಗತ್‌ವಾಳು ತುಮೆ ಇವ್ಣ ಭಣಿವಾಳ ಕರಿ ಪ್ಯಾರ್ ಕರೈಹೊತ್. ಕತೋಬಿ ತುಮೆ ಜಗತ್ ಭಣಿವಾಳ ಕಾಹೆತೆ ಇನಖ್ವಾಜೆ‡, ಅಜ್ಜು ಮೇ ತುಮೂನ ಜಗತ್‌ಮಾಥು ಚೂಣಿನ್ ಕಾಡಿರಾಖ್ಯೊಸ್ತೆ ಇನಖ್ವಾಜೆ, ಆ ಜಗತ್ ತುಮಾರಪರ್ ವಹೇರ್ ಕರಾಸ್.

20 ಯಾದ್ ಕರಿಲೆವೊ ಆಳ್ ಯಜಮಾನ್‌ಥಿ ಮೋಟೊ ಕಾಹೆ’ ಕರಿ ಮೇ ಬೋಲ್ಯೊತೆ ವಾತೆ ಶಾತ್‌ಕತೊ ಇವ್ಣ ಮನ ಖ್ವತಾಯೊತೊ, ತುಮೂನಾಬಿ ಖ್ವತಾವ್‌ಶೆ; ಇವ್ಣ ಮಾರಿ ವಾತೇನ ಪಾಡಿ ಫಾಲ್ಯುತೊ, ತುಮಾರಿ ವಾತೆನಾಬಿ ಪಾಡಿ ಫಾಲ್‌ಷೆ.

21 ಕತೋಬಿ ಇವ್ಣ ಮನ ಮೋಕ್ಲಿರಾಖ್ಯೊತೆ ಇನ ಮಾಲುಮ್ ಕರೈಕೊಂತೆ ಇನಖ್ವಾಜೆ ಆ ಖ್ವಾರುಮಾರ ನಾಮ್‌ಥಿ ತುಮೂನ ಕರ್ಶೆ.

22 ಮೇ ಐನ್ ಆ ಜಗತ್ತ್ಲಿ ಅದ್ವಿವೊನಿ ಜೋಡೆ ವಾತೆ ನಾ ಬೋಲ್ಯೊಹೊತ್ಪೊ, ಇವ್ಣನ ಪಾಪಿ ದೋಷಿಕರಿ ಬೋಲಾಯುಹೊತ್ ಕೊಯ್ತೆ. ಕತೋಬಿ ಹಮ್ಗೆ ಮೇ ಐನ್ ವಾತೆ ಬೋಲಿರಾಖ್ಯೊಸ್ ಇನಖ್ವಾಜೆ ಇವ್ಣ ಪಾಪ್ಪ ಖಿವು ಭಾಣುಬಿ ಕೊಯ್ತೆ.

23 ಮಾರಪರ್ ವಹೇರ್ ಕರಾವಾಳು ಮಾರ ಬಾಪರ್‌ಬಿ ವಹೇರ್ ಕರಾವಾಳು ಹುಯಿರ್ದೊಸ್.

† 15:19 15:19 ಅಪ್ಪೆ ಸೊರ್ಗ ಲೋಕ್ತ ಹುಯಿರಾಸ್
‡ 15:19 15:19 ನಂಬವಾಳ
ಶಿಷ್ಯರ್ದುಬಿ ಇನಿ ಶಕತ್ ಛಾ

‡ 15:19 15:19 ನಂಬವಾಳ

24 ಏಕ್ ವಖ್ತು ಖ್ವಾರಕಾಮ್ ಮೇ ಇವ್ವಾಮ ನಾಕರೈಹೋತ್ತೊ, ಇವ್ವಾಪರ್ ಪಾಪ್ ಕೋ ರೈಯುಹೋತ್ತಿ, ಕತೋಬಿ ಹಮೈ ಇವೈ ದೇವಿರಾಖ್ಯೂಸ್, ತೋಬಿ ಮಾರಪರ್ಬಿ ಮಾರ ಬಾಪರ್ಬಿ ವಹೇರ್ ಕರಾಸ್.

25 ಇವೈ ಮನ ನೀಕೊಯ್ತೀಸ್ ವಹೇರ್ ಕರೈ' ಕರಿ ಇವ್ವಿ ಧರ್ಮಶಾಸ್ತ್ರಮ ಲೀಖೈರೈತ್ತೆ ವಾತೆ ಪೂರಹುವಾನಖ್ವಾಜೆ ಅಮ್ ಹುಯೊತೆ.

26 “ಬಾ ಕಂಥು ಆವ್ಶೇತೆ ಯೋ ಮದತ್ ಕರವಾಳೊ ಆತ್ಮ ಹುಯಿರೈಹೋಸ್. ಯೊ ದೇವ್ವು ಖ್ವಾಜನ ಬೋಲಸ್, ಯೋ ತುಮುನ ಮಾರಿ ಬಾರೇಮ ಸಾಕ್ಷಿ ಬೋಲ್ಶೆನಿ.

27 ತುಮೆ ಶುರುವಾತ್‌ಥೂಸ್ ಮಾರ ಜೋಡೆ ಥಾತೆ ಇನಖ್ವಾಜೆ, ತುಮೇಬಿ ಮನ ಸಾಕ್ಷಿ ಹುಯಿರಾಸ್.

16

1 ಆ ಖ್ವಾರಿ ವಾತೆ ಮಾರಿ ಬಾರೇಮ ಮೇ ತುಮುನ ಬೋಲೈತ್ತೆ ಶನಖ್ವಾಜೆ ಕತೊ ತುಮಾರಿ ವಿಶ್ವಾಸ್ ನಾ ಟುಟಿಪಡ್ತುಕರಿ.

2 ಇವೈ ತುಮೂನ ಸಬಾಮಂದಿರ್‌ಥು ಭಾರ್ ಕಾಡಿನಾಕ್‌ಶೆ; ಯೋ ಕೊಂತೆ ತುಮೂನ ಮಾರಿನಾಖವಾಳೊ ಇನೆ ದೇವ್ವ ಬಲಿದಿದೊಕರಿ ಸೋಜಾನ ಹಗಾಮ್ ಆವ್ಶೆ.

3 ಅದ್ವಿಖ್ವಾರು ಬಾನ ರೈವೊ, ಮನ ರೈವೊ ಮಾಲುಮ್ ಕರಿರಾಖ್ಯೂಕೊಯ್ತೆ ಇನಖ್ವಾಜೆ, ತುಮೂನ ಅಮ್ ಖ್ವಾರು ಕರ್ಶೆ.

4 ಕತೋಬಿ ಮೇ ತುಮೂನ ಆ ಖ್ವಾರು ಅನಖ್ವಾಜೆ ಬೋಲಿರಾಖ್ಯೂಸ್, ಶನಕತೊ ಆ ಖ್ವಾರು ಚಲಾನಿ ವಖ್ತುಮ್, ಮೇ ಪಹಿಲೆ ಬೋಲೈತ್ತೆ ವಾತೆ ತುಮೆ ಯಾದ್ ಕರಿಲಿಶು.

ಪವಿತ್ರಾತ್ಮನು ಕಾಮ್

“ಮೇ ತುಮಾರ ಜೋಡೆ ಥೋತೆ ಇನಖ್ವಾಜೆ ಅಗಾಡಿಸ್ ಆ ಖ್ವಾರು ಕೋ ಬೋಲೈನಿ.

5 ಕತೋಬಿ ಹಮ್ಮೆ, ಮೇ ಮನ ಮೋಕ್ಲೊತೆ ಇನಾಕನ ವಳ್ಳೊಜ್ಜವುಸ್, ತೋಬಿ ತೂ ಕಿಜ್ಜಾ ವಳ್ಳೊಜ್ಜಾಸ್? ಕರಿ ತುಮಾರಾಮ ಏಕ್‌ನೇಬಿ ಮನ ಪುಲ್ಲಾಯಕೊಯ್ತಿ.

6 ಹಮ್ಮೆ ಮೇ ತುಮೂನ ಆ ಖ್ಹಾರಿ ವಾತೆ ಬೋಲ್ಯೊತೆ ಇನಖ್ವಾಜೆ ತುಮಾರ ದಿಲ್ಮದುಖ್ ಭರ್ತ್ಯೊಸ್.

7 ಕತೋಬಿ ಮೇ ತುಮೂನ ಖ್ವಾಚ ಬೋಲುಕರುಸ್, ಮೇ ಜಾವಾನು ತುಮೂನ ಅಲ್ಫು ಹುಯಿರ್ಲ್ಯಾಸ್, ಶನಕತೊ ಮೇ ನಾ ಗಯೋತೊ, ಯೋ ಮದತ್ ಕರವಾಳೊ ತುಮಾರಕನ ಕೋ ಆವ್‌ಶೇನಿ. ಕತೋಬಿ ಮೇ ಗಯೋತೊ, ಇನ ತುಮಾರಕನ ಬೋಲಿ ಮೋಕ್ಲೇತ್*.

8 ಯೋ ಆವ್‌ಶೇತೆ ತದೆ ಪಾಪ್, ನೀತಿ ಅಜ್ಜು ನ್ಯಾವ್ ತೀರ್ಪ್‌ನ ಬಾರೇಮ ಜಗತ್ತ್ ಮಾಲುಮ್ ಕರಾವ್‌ಶೆ.

9 ಪಾಪ್ಪಿ ಬಾರೇಮಾಬಿ ಇವ್ಣೆ ಮನ ವಿಶ್ವಾಸ್ ಕರ್ಯ್‌ಕೊಯ್ತಿ.

10 ಮೇ ಬಾಕನ ಜೈನ್, ನೀತಿನಿ ಬಾರೇಮ ಅದ್ಮಿಖ್ವಾರನ ಖ್ವಾಪ್ಪೆ ಸಾಕ್ಷಿದಿಶ್, ಬಿಜು ಅನಪಾರ್ ಮನ ಘಣಿ ವಖ್ವತ್ ದೇಕ್‌ಶು ಕೊಯ್ತಿ.

11 ನ್ಯಾವ್‌ನಿ ಬಾರೇಮ ಆ ಜಗತ್ತ್ ಅದಿಪತಿನ ನ್ಯಾವ್‌ನಿ ತೀರ್ಪ್ ಹುಯಿಗಯ್ತಿ.

12 ಮೇ ತುಮೂನ ಬೋಲ್ಯುತೆ ವಾತೆ ಬಿಜೂಬಿ ಘಣಿ ಛಾ, ಕತೋಬಿ ಹಮ್ಮೆ ಇನ ರ್ಪೀಲಾನ ತುಮೂನ ಕೋ ಉಶೇನಿ.

13 ಕತೋಬಿ ಖ್ವಾಚೊ ಆತ್ಮ ಆವ್‌ಶೇತೆ ತದೆ, ಯೋ ತುಮೂನ ಖ್ಹಾರಿನ್ ಬಾರೇಮ ಖ್ವಾಚಾಮ ಚಲೈಲಿಜಾಷೆ. ಯೋ ಬೋಲ್‌ಶೇತೆ ಇನಿ ವಾತೆ ಕಾಹೆ, ಯೋ ಶಾತ್ ಖ್ವಮ್‌ಜಾಸ್ಕಿ ಯೋಸ್ ತುಮೂನ ಬೋಲ್‌ಶೆ; ಅಜ್ಜು ಖ್ವಾಪ್ಪೆ ಚಾಲ್‌ಶೇತೆ ಇನಿ ಬಾರೇಮ ತುಮೂನ ಬೋಲ್‌ಶೆ.

14 ಯೋ ಮೇ ಬೋಲುಸ್ತೆ ವಾತೆ ಲೀನ್, ತುಮೂನ ಬೋಲಿ ವತಾಳಸ್ತೆ ಇನಖ್ವಾಜೇಸ್ ಮನಾಸ್ ಮಹಿಮೆ ಕರಸ್.

15 ಬಾಕನ ಛಾತೆ ಅಖ್ವೊಸ್ ಮಾರುಸ್; ಇನಖ್ವಾಜೇಸ್ ಪವಿತ್ರಾತ್ಮ ಮೇ ಬೋಲುಸ್ತೆ ಇನಾಸ್ ಲೀನ್, ಯೋ ತುಮೂನ ಬೋಲ್‌ಶೆ ಕರಿ ಮೇ ಬೋಲ್ಯೊತೆ.”

* 16:7 16:7 ಬಾನಿ ಹುಕುಮ್‌ನ ಚಲಾವ್ಣು ಪಡ್ಕುಡು

ಖುಶಿ ಅಜು ದುಖ್

16 “ಥೋಡ ದನ್ನ ಬಾದ್‌ಮ ತುಮೆ ಮನ ದೇಕ್‌ಶು ಕೊಯ್ತಿ, ಕತೋಬಿ ಇನ ಬಾದ್‌ಮ ಥೋಡ ದನ್ ಕೇಡೆ ಮನ ದೇಕ್‌ಶು” ಕರಿ ಬೋಲ್ಯೊ.

17 ಅನ ಖ್ವಮ್‌ಜಿನ್, ಇನ ಶಿಷ್ಯರ್ಮ ಥೋಡಾನೆ, “ಅನಿ ಮತ್‌ಲಬ್ ಶಾತ್? ಥೋಡ ದನ್ನ ಬಾದ್‌ಮ, ತುಮೆ ಮನ ದೇಕ್‌ಶುಕೊಯ್ತಿ, ಕತೋಬಿ ಅನ ಬಾದ್‌ಮ ಥೋಡ ದನ್‌ಕೇಡೆ ಮನ ದೇಕ್‌ಶು ಕರಿ ಬೋಲಾಸ್ತಿ? ಅಜು, ‘ಶನಕತೊ, ಮೇ ಬಾಕನ ವಳ್ಕೊಜ್‌ವುಸ್ ಕರೀಬಿ ಬೋಲಾಸ್ತಿ?’” ಕರಿ ಇವ್ವ-ಇವ್ವ ಮಹಿ ವಾತೆ ಬೋಲಿಲಿದು.

18 ಅನೆ ಬೋಲ್ಯೊತೆ ‘ಥೋಡ ದನ್ನ ಬಾದ್‌ಮ’ ಕರಿ ಅನಿ ಮತ್‌ಲಬ್ ಶಾತ್? ಶಾತ್ ಬೋಲಸ್ತಿ ಹಮೂನ ಮಾಲುಮ್ ಕೊಯ್ತಿ!” ಕರಿ ಬೋಲಿಲಿದು.

19 ಯೇಸುನೆ ಇವ್ಣೆ ಇನ ಪುಲ್ಲಾವ್ಣು ಕರಿ ಲಾ ಕರಿ ಮಾಲುಮ್ ಕರಿಲೀನ್, ಇವ್ಣುನ, “ಥೋಡ ದನ್ನ ಬಾದ್‌ಮ ತುಮೆ ಮನ ದೇಕ್‌ಶು ಕೊಯ್ತಿ, ಕತೋಬಿ ಅನ ಬಾದ್‌ಮ ಥೋಡ ದನ್ನ ಕೇಡೆ ತುಮೆ ಮನ ದೇಕ್‌ಶು; ಆಸ್ತಿ ಶು ತುಮೆ ತುಮಾರ-ತುಮಾರ ಮಹಿ ಪುಲ್ಲಾವ್ ಕರಾಸ್ತೆ?

20 ಮೇ ತುಮೂನ ಖ್ವಾಚ ಬೋಲುಕರುಸ್, ತುಮೆ ರೊವ್‌ತಾಹುಯಿನ್, ಕುರ್‌ಲ್ವಾವ್‌ಶು, ಕತೋಬಿ ಜಗತ್‌ವಾಳು ಖ್ವಿಶೀಕರ್‌ಶೆ; ತುಮೂನ ದುಖ್ ಉಶೆ, ಕತೋಬಿ ತುಮಾರು ದುಖ್ ಜೈನ್, ಖ್ವಿಶಿ ಆವ್‌ಶೆ†.

21 ಏಕ್ ತಯೇಡ ಜಣಾನಿ ವಖ್ವತ್‌ಮ, ಇನಿ ಅಜಾನಿ ವಖ್ವತ್ ಏಗೈ ಕರಿ ದುಖ್ ಕರಾಸ್, ಕತೋಬಿ ಲಡ್ಕ ಪೈದಾ ಕರಾನ ಬಾದ್‌ಮ, ಜಗತ್‌ಮ ಏಕ್ ಲಡ್ಕ ಪೈದಾ ಹುಯಿನ್ ಆಯುತೊ, ಯೋ ಖ್ವಿಶಿಧಿ ಅಜಾನ ಬೈಕಿಝಾಸ್.

22 ಇಮ್ಮಸ್ ತುಮೂನಾಬಿ ಹಮ್ಮೆ ದುಖ್ ರ್ಹಯುತೋಬಿ, ಮೇ ತುಮೂನ ಪಾಲ್ಟೊ ದೇಖಿಶ್, ತದೆ ತುಮಾರು ದಿಲ್ ಖ್ವಿಶೀಧಿ

† 16:20 16:20 ಸೊರ್ಗನಿ ಖುಷಿ ಮಳಾಶೆ

ಭರೈಜಾಶೆ, ಅಜ್ಜು ಕಿನೇಥೀಬಿ ತುಮಾರಿ ಖ್ವಶಿನ ದೂರ್ ಕಾಡಾನ ಕೋ ಉಶೇನಿ.

23 ಯೋ ದನ್ಯ ತುಮೆ ಮನ ಶಾತ್ಪಿ ಕೋ ಪುಲ್ಲಾವಾಶುನಿ. ಮೇ ತುಮೂನ ಖ್ವಾಚ ಬೋಲುಕರುಸ್, ತುಮೆ ಮಾರ ನಾಮ್‌ಪರ್ ಶಾತ್ ಮಾಂಗಿಲಿದಾತೋಬಿ ಬಾ ತುಮೂನ ಯೋ ದಿಶೆ.

24 ತುಮೆ ಹಂಕೆತೋಡಿ ಮಾರ ನಾಮ್‌ಪರ್ ಶಾತ್ಪಿ ಮಾಂಗಿರಾಖ್ಯಕೊಯ್ವಿ; ಮಾಂಗಿಲೆವೊ ತುಮೂನ ಮಳಾಶೆ, ತದೆ ತುಮಾರಿ ಖ್ವಶಿ ಭರೈನ್ ಝಲಕಾಶೆ” ಕರಿ ಬೋಲ್ಯೊ.

ಜಗತ್‌ಪರ್ ಜೇತ್

25 ಮೇ ಆ ಖ್ವಾರು ಮತ್ಲಬ್‌ಥಿ ತುಮೂನ ಬೋಲಿರಾಖ್ಯೊಸ್. ಕತೋಬಿ ಬಿಜ್ಜು ಖ್ವಾಷ್ಟೆ ಮತ್ಲಬ್‌ನಿ ಖೇಣಿಥಿ ಕಾಹೆತಿ ಬಾನಿ ಬಾರೇಮ ನೇರ್‌ವಳಿಥಿ ತುಮಾರ ಜೋಡೆ ವಾತೆ ಬೋಲಾನಿ ವಖ್ವತ್ ಆವಾಶೆ.

26 ಯೋ ದನ್ಯ ಮಾರ ನಾಮ್‌ಪರ್ ಮಾಂಗಿಲಿಶು; ಮೇ ಬಾಕನ ತುಮಾರಖ್ವಾಜೆ ಮಾಂಗಿಲೀಶ್ ಕರಿ ಮೇ ತುಮೂನ ಬೋಲಿಶ್ ಕೊಯ್ವಿ.

27 ತುಮೆ ಮನ ಪ್ಯಾರ್‌ಕರೀನ್ ಮೇ ಬಾಕಂಥೊ ಆಯೋಕರಿ ವಿಶ್ವಾಸ್ ಕರಾತೆ ಇನಖ್ವಾಜೆ ಬಾಸ್ ತುಮೂನ ಪ್ಯಾರ್‌ಕರಾಸ್.

28 ಮೇ ಬಾಕಂಥೊ ಜಗತ್ ಆಯೊ; ಹಮ್ ಆ ಜಗತ್ ಮ್ಹಂದಿನ್, ಬಾಕನ ವಳ್ಳೊಜುವುಸ್” ಕರಿ ಬೋಲ್ಯೊ.

29 ತದೆ ಶಿಷ್ಯರಾನೆ ಇನ, “ಹಮ್ ತೂ ಮತಲಬ್‌ಥಿ ಕೋ ಬೋಲುಕರಾನೀತೆ ನೇರ್‌ವಳಿಥಿ ಬೋಲುಕರಾಸ್.

30 ತುನ ಖ್ವಾರುಸ್ ವಾತೆ ಮಾಲುಮ್ ಕರಿ, ಹಮೂನ ಮಾಲುಮ್. ಅಜ್ಜು ತುನ ಕೋಣ್‌ಬಿ ಪುಲ್ಲಾವಾನಿ ಜರೂರತ್ ಕೊಯ್ವಿ ಅನೇಥಿ ತೂ ದೇವ್‌ಕಂಥೊ ಆಯೊಹುಯೊ ಕರಿ ಹಮೆ ವಿಶ್ವಾಸ್ ಕರಿಯೇಸ್” ಕರಿ ಬೋಲ್ಯೊ.

31 ತದೆ ಯೇಸುನೆ ಇವ್ಣುನ, “ಹಮ್ ವಿಶ್ವಾಸ್ ಕರೋಸ್ಕಿಶು?

32 ಹಂದೇಖೊ, ವಖ್ವತ್ ಐರ್ಟ್ಲೀಸ್ ಹಂಕೇಸ್ ಯೋ ವಖ್ವತ್ ಐರ್ಟ್ಲೀಸ್, ತುಮಾರಾಮ ಏಕೇಕ್ ಜಣು, ಇವ್ಣಿ-ಇವ್ಣಿಝುಗೋಮ

ಭಿದ್‌ರೈಜಾಶು ಮನ ಏಕ್ಲನಾಸ್ ಮೈಂದಿದ ಕರಿತುಮೆ ನಕೊಸೋಚೊ ಕತೋಬಿ ಮಾರೊ ಬಾ ಮಾರ ಜೋಡೆ ಲ್ಹಾ.

33 ತುಮೆ ಮಾರಾಮ ರ್ವೀನ್, ತುಮೂನ ಶಾಂತಿ ಮಳ್‌ಣು ಕರಿ ಆ ಖ್ವಾರು ತುಮೂನ ಬೋಲಿರಾಖ್ಯೊಸ್. ಜಗತ್‌ಮ ತುಮೂನ ಖ್ವತಾಪ್ಪಿ ಲ್ಹಾ, ಕತೋಬಿ ಘಟ್ ರ್ವೊವೊ,ಶನಕತೊ ಮೇ ಜಗತ್ತ್ ಜೂತಿರಾಖ್ಯೊಸ್” ಕರಿಬೋಲ್ಯೊ.

17

ಯೇಸು ಇನ ಶಿಷ್ಯರ್‌ನಖ್ವಾಜೆ ಪ್ರಾರ್ಥನೆ ಕರ್ರ್ಚೊತೆ

1 ಯೇಸುನೆ ಆ ವಾತೆ ಬೋಲಾನ ಬಾದ್‌ಮ, ಆಕಾಶ್‌ಭಣಿ ದೇಖಿನ್, “ಬಾ ವಖ್ತತ್ ಏಗೈ; ತಾರ ಛಿಯ್ಯಾನ ಮಹಿಮೆ ಕರ್, ತದೆ ಛಿಯ್ಯೊತುನ ಮಹಿಮೆ ಕರಾನ ಉಶೆ.

2 ತುನೆ ಇನಖ್ವಾರ ಅದ್ವಿಪರ್ ಅದಿಕಾರ್ ದೀರಾಖ್ಯೊಸ್. ತುನೆ ಇನ ಕಿನಕಿನ ದೀರಾಖ್ಯೊಸ್ಕಿ, ಇವ್ಣ ಖ್ವಾರಾನ ಯೋ ಹಮೇಶಾನಿ ಜಿಂದ್‌ಗಿ ದೇವ್ಣುಕರಿ ಹುಯಿರರ್ವೊಸ್.

3 ಎಕ್ಲಸ್ ಖ್ವಾಚೊ ದೇವ್ ಹುಯಿರರ್ವೊತೆ ತುನಾಬಿ, ತುನೆ ಮೋಕ್‌ಲ್ಯೊತೆ ಯೇಸು ಕ್ರಿಸ್ತನ ಮಾಲುಮ್ ಕರಿ ಲೆವಾನೂಸ್ ಹರ್‌ಹಮೇಶಾನಿ ಜಿಂದ್‌ಗಿ.

4 ಕರನ್ನ್ ಕರಿ ತುನೆ ಮನ ದಿದೋತೆ ಕಾಮ್ನ ಪೂರ ಕರೀನ್, ಜಮೀನ್‌ಪರ್ ತುನ ಮಹಿಮೆ ಕರಿರಾಖ್ಯೊಸ್.

5 ಬಾ! ಹಮ್ಚೆ, ತೂ ತಾರ ಖ್ವಾಮ್ಚೆ ಮನ ಮಹಿಮೆ ಕರ್, ಜಗತ್ ಉಭ್ವಾನ ಅಗಾಡಿ ತಾರ ಜೋಡೆ ಮನ ಥೀತೆ ಯೋಸ್ ಮಹಿಮೆ ಮನ ದೇ.

6 ಆ ಜಗತ್‌ಮ ಖೆವ ಅದ್ವಿನ ಮನ ದಿರಾಖ್ಯೊಸ್ಕಿ, ಮೇ ತಾರ ನಾಮ್ನ ಮಾಲುಮ್ ಕರ್ಚೊಖ್ಯೊಸ್. ಇವ್ಣೆ ಮಾರುಸ್ ಹುಯಿರುಥು,ಅಜ್ಞು ತುನೇಸ್ ಇವ್ಣುನ ಮನ ದಿದೊ. ಇವ್ಣೆ ಮಾರಿ ವಚನ್ ಪಾಡಿನ್ ಚಾಲಿರಾಖ್ಯೊಸ್.

7 ತುನೆ ಮನ ದಿದೋತೆ ಖ್ವಾರುಸ್ ತಾರೆಥೀಸ್ ಆಯೂತೆ ಕರಿ ಹಮ್ಮೆ ಅವ್ಣೆ ಮಾಲುಮ್ ಕರಿರಾಖ್ಯುಸ್.

8 ತುನೆ ಮನ ದಿದೋತೆ ವಾತೆನ ಮೇ ಇವ್ವುನ ದೀರಾಖ್ಯೊಸ್; ಅವ್ಣೆ ಯೋ ವಾತೆನ ಮಾನಿಲಿದು ಅಜ್ಜು ಖ್ವಾಚಮಾಬಿ ಮೇ ತಾರಕಂಥೊ ಐರ್ಟ್ವೊಸ್ ಕರಿ ಮಾಲುಮ್ ಕರ್ಯ್ ಅಜ್ಜು ತುನೆ ಮನ ಮೋಕ್ಲೊಕ್ ಕರಿ ವಿಶ್ವಾಸ್ ಕರಸ್.

9 ಮೇ ಅವ್ಣೆ ಖ್ವಾಜೆ ಪ್ರಾರ್ಥನೆ ಕರುಸ್; ಜಗತ್‌ವಾಳಾನ ಖ್ವಾಜೆ ಕಾಹೆತೆ, ತುನೆ ಮನ ದೀರಾಖವಾಳನ ಖ್ವಾಜೆ. ಪ್ರಾರ್ಥನೆ ಕರುಸ್. ಶನಕತೊ, ಅವ್ಣೆ ತಾರು ಅದ್ಮಿ ಹುಯಿರ್ಟ್ವೊಸ್.

10 ಮಾರಕನ ಛಾತೆ ಖ್ವಾರು ತಾರುಸ್, ಅಜ್ಜು ತಾರಕನ ಛಾತೆ ಖ್ವಾರುಸ್ ಮಾರು; ಅನೇಥಿ ಮನ ಮಹಿಮೆ ಹುಯು.

11 ಅನಪಾರ್ ಮೇ ಜಗತ್‌ಮ ಕೋರ್ಟ್ವೊನಿ. ಇವ್ಣೆತೋಬಿ ಜಗತ್‌ಮ ರೆಪ್ಪೆಶೆ. ಮೇ ತಾರಾಕನ ಆವ್‌ಸ್. ಪರಿಶುದ್ ಹುಯಿರೋತೆ ಬಾ, ಅವ್ಣೆ ಏಕ್‌ಹುಯಿರಾತೆ ತಿಮ್ ಅವ್ಣೆಬಿ ಏಕ್‌ಹುಯಿರ್ಟ್ವಾವಾಡೆಕರಿ, ತುನೆ ಮನ ದಿದೋತೆ ತಾರ ನಾಮ್‌ಥಿ ಇವ್ವುನ ಜತನ್ ರಾಕ್.

12 ಮೇ ಅವ್ಣೆ ಜೋಡೆ ಥೋತೆ ತದೆ ತುನೆ ಮನ ದಿದೋತೆ, ತಾರ ನಾಮ್ನಿ ಶಕಥಿ ಅವ್ವುನ ಜತನ್ ರಾಖ್ಯೊ. ಧರ್ಮಶಾಸ್ತ್ರನಿ ವಾತೆ ಪೂರಹುವಾನಿಫೋಣಿ, ನಾಶನ ಖ್ವಾಜೆಸ್ ಕರಿ ಚೂಣಾಯೋತೆ ಯೋ ಏಕ್ ಅದ್ಮಿ ಮ್ಹಂದಿನ್, ಅವ್ಣಾಮ ಕೋಣ್‌ಬಿ ನಾಶ ಕೊಹುವಾನಿ.

13 ಅಜ್ಜು ಹಮ್ಮೆ ಮೇ ತಾರಕನ ವಳ್ಳಾವ್‌ಸ್, ಇನ ಖ್ವಾಜೆ ಅವ್ಣಾಮ ಮಾರಿ ಮ್ಹಿಶಿ ಭರ್‌ಪೂರ್ ಹುವಾನಿ ಫೋಣಿ, ಅನ ಜಗತ್ ರೆಪ್ಪೆವಾನಿ ವಖ್ವತ್‌ಮಾಸ್ ಆ ವಾತೆನ ಖ್ವಾರು ಬೋಲುಕರುಸ್.

14 ಮೇ ತಾರಿ ಸಂದೇಶ್ ಅವ್ವುನ ದೀರಾಖ್ಯೊಸ್, ಮೇ ಆ ಜಗತ್ತ್ ಮಳ್ಳೊಹುಯೊ ಕಾಹೆತೆ ಇಮ್ಮುಸ್, ಅವ್ಣೆಬಿ ಆ ಜಗತ್ತ್ ಮಳ್ಳೊಹುಯು ಕಾಹೆ, ಅನ ಖ್ವಾಜೆಸ್ ಆ ಜಗತ್ ಅವ್ವುನ ವಹೇರ್ ಕರಾಸ್.

15 ಅವ್ವುನ ಜಗತ್ತ್ ಹಾತ್‌ಮಾಥು ಕಾಡಿಲಿ ಜಾ ಕರಿ ಮೇ ತುನ ಬೋಲುಕೊಯ್ಚಿ ಕತೋಬಿ ಖರಾಬ್‌ಥಿ ಬಘಾಡಿನ್, ಜತನ್ ರಾಕ್ಚು ಕರಿ

ಮೇ ತುನ ಬೋಲಿಲೆವ್‌ಸ್

16 ಮೇ ಆ ಜಗತ್ತ್ ಮಳ್ಳೊಹುಯೊ ಕಾಹೆತೆ ಇಮ್ಮಸ್, ಅವ್ಲೇಬಿ ಆ ಜಗತ್ತ್ ಮಳ್ಳೊಹುಯು ಕಾಹೆ.

17 ತು ಅವ್ಣುನ ಖ್ವಾಙಾಧಿ ಸಮರ್ಪಣ್ ಕರಿಲೆ ತಾರಿ ವಚನ್ ಖ್ವಾಙು ಹುಯಿರ್ದೆಸ್.

18 ತುನೆ ಮನ ಆ ಜಗತ್‌ಮ ಮೋಕ್‌ಲೊತೆ ಇಮ್ಮಸ್, ಮೇಬಿ ಅವ್ಣುನ ಆ ಜಗತ್‌ಮ ಮೋಕ್ತಿರಾಖೊಸ್.

19 ಅವ್ಣುಜೆ ಮನಾಸ್ ಒಪ್‌ಶೈಲೇವ್ಸ್ ಇಮ್ಮಸ್ ಇವ್ಲೇಬಿ ಖ್ವಾಙಧೀಸ್ ಮನ ಒಪ್‌ಶಾವದೆ.

20 “ಮೆ ಖಲಿ ಅವ್ಣುಜೆಸ್ ಕಾಹೆ, ಕೋಣ್ ಅವ್ಣು ಸಂದೇಶ್‌ಧಿ ವಿಶ್ವಾಸ್ ಕರಾಸ್ತಿ ಇವ್ಣುಜೆಬಿ ಪ್ರಾರ್ಥನೆ ಕರುಸ್.

21 ಬಾ ತುನೆ ಮನ ಮೋಕ್‌ಲೊತೆ ಆ ಜಗತ್ ನಂಬಾನಖ್ವಾಜೆ, ತೂ ಮಾರಾಮ ಅಜು ಮೇ ತಾರಾಮ ಛೂತೆ ಇಮ್ಮಸ್ ಅವ್ಲೇಬಿ ಅಪ್ಪಾಮ ರ್ದೆವ್ಣುಕರಿ ಇವ್ಣುರು ಏಕ್ ಹುಯಿರ್ದೆಣು ಕರಿ, ಮೇ ಪ್ರಾರ್ಥನೆ ಕರುಸ್.

22 ಅಪ್ಲೆ ಏಕ್ ಹುಯಿರ್ದಾತೆ ಇಮ್ಮಸ್, ಅವ್ಲೇಬಿ ಏಕ್ ಹುಯಿರ್ದವಾದೆ ಕರಿ ತುನೆ ಮನ ದಿದೋತೆ ಯೋಸ್ ಮಹಿಮೆ ಮೇ ಅವ್ಣುನ ದೀರಾಖೊಸ್.

23 ಮೇ ಇವ್ಣಾಮ ರ್ದೆಶ್ ಅಜು ತೂ ಮಾರಾಮ ರ್ದೆಶ್ ಅನೇಧಿ ಇವ್ಣೆ ಅಮ್ಮಸ್ ಭರ್‌ಪೂರ್‌ಧಿ ಏಕ್ ಹುಯಿರ್ದೆಶಿ, ತದೆ ತುನೇಸ್ ಮನ ಮೋಕ್‌ಲೊತೆ ಕರಿ ಅಜು ತುನೆ ಮನ ಪ್ಯಾರ್ ಕರೊತೆ ಇಮ್ಮಸ್, ಅವ್ಣುನಾಬಿ ಪ್ಯಾರ್ ಕರಿರಾಖೊಸ್ ಕರಿ ಆ ಜಗತ್ತ್ ತದೆ ಮಾಲುಮ್ ಪಡ್‌ಶೆ.

24 “ಬಾ! ತುನೆ ಅವ್ಣುನ ಮನ ದಿದೊ, ಅಜು ಮೇ ಕಿಙ್ಗಾ ರ್ದೆವ್ಣುಕರಿ ಕಿಙ್ಗಾಸ್ ಅವ್ಲೇಬಿ ರ್ದೆವ್ಣುಕರಿ ಅಜು ಆ ಜಗತ್ತ್ ಉಭ್ವಾನ ಅಗಾಡಿಸ್, ತುನೆ ಮನ ಪ್ಯಾರ್ ಕರೀನ್, ಮನ ದಿದೋತೆ ಮಹಿಮೆನ ಅವ್ಣೆದೇಕ್ಳುಕರಿ ಮೇ ಆಖ್ ಕರುಸ್.

25 ಧರ್ಮಿ ಹುಯಿರ್ದೊತ್ತೆ ಬಾ! ಆ ಜಗತ್ ತುನ ಮಾಲುಮ್ ಕರಿರಾಖ್ಯೊಯ್ನಿ ಕತೋಬಿ ಮೇ ತುನ ಮಾಲುಮ್ ಕರಿರಾಖ್ಯೊಯ್ನಿ, ಅಜ್ಜು ತುನೆ ಮನಮೋಕ್ಲಿರಾಖ್ಯೊಯ್ನಿ ಕರಿ ಅವ್ವೆ ಮಾಲುಮ್ ಕರಿರಾಖ್ಯೊಯ್ನಿ.

26 ಮೇ ಅವ್ವುನ ತಾರ ನಾಮ್ ಮಾಲುಮ್ ಕರೈರಾಖ್ಯೊಯ್ನಿ, ಬಿಜ್ಜೂಬಿ ಇನ ಮಾಲುಮ್ ಕರವ್ನ್ ಕರೀಶ್, ತುನೆ ಮಾರಪರ್ ಖಿವಿ ಪ್ಯಾರ್ ವತಾಳೊಕಿ ಮೇಬಿ ಇವ್ವಾಮ ರ್ವೆವ್ವಕ್ಕರಿ ಪ್ರಾರ್ಥನೆ ಕರುಸ್” ಕರಿ ಬೋಲ್ಯೊ.

18

ಯೇಸುನ ಧರ್ಮಿ ಬಾರೇಮ

(ಮತ್ತಾಯ 26:47-56; ಮಾರ್ಕ 14:43-50; ಲೂಕ 22:47-53)

1 ಆ ಪ್ರಾರ್ಥನೆ ಕರಾನ ಬಾದ್‌ಮ, ಯೇಸು ಇನ ಶಿಷ್ಯರನ ಜೋಡೆ ಕೆದ್ರೋನ್ ವ್ಹೆಕ್ಕಾನ ಪಾರ್ ಚಲೆಗಯೊ. ಹಿಜ್ಜಾ ಏಕ್ ಭಾಗ್ ಥೂ, ಯೇಸುಬಿ ಇನ ಶಿಷ್ಯರ್ ಇನಾಮಹಿ ಗಯ.

2 ಯೇಸುನ ಧೋಕೊ ದಿದೋತೆ ಯೂದನಾಬಿ ಯೋ ಝಗೊ ಮಾಲುಮ್‌ಥು. ಶನಕತೊ ಯೇಸು ಘಣಿ ಹಲ್ಲ ಇನ ಶಿಷ್ಯರನ ಹಿಜ್ಜಾಸ್ ಮಳ್ಳೊಡೊ.

3 ತದೆ ಯೂದನೆ ಶಿಪಾಯ್ನಿ ಏಕ್ ಝೂಂಡ್‌ನ, ಮಹಾಯಾಜಕರ್ ಅಜ್ಜು ಫರಿಸಾಯರ್‌ನೆ ಮೋಕ್‌ಲ್ಯುತೆ ಮಂದಿರ್‌ನು ಧೋಡ ಕಾವ್ಲಿ ಕರಾವಾಳಾನ ಜೋಡ್‌ಬುಲೈಲಿನ್ ಆಗ್ನು ಥಿಟಂಬು ಅಜ್ಜು ಕಪ್ಪನ್‌ಅಖ್ವು ಧರಿಲಿನ್, ಬಾಗ್‌ನ ಮಹಿ ಆಯೊ.

4 ಇನಜೋಡೆ ಚಾಲ್‌ಶೇತೆ ಖ್ವಾರುಸ್ ಯೇಸುನ ಮಾಲುಮ್ ಥೂ, ಇನಖ್ವಾಜಿ ಯೋ ಖ್ವಾಮ್ಲೆ ಜೈನ್, “ತುಮೆ ಕಿನ ಥೂಂಡುಕರಾಸ್ತೆ?” ಕರಿ ಪುಲ್ಲಾಯೊ.

5 ಇವ್ವೆ “ನಝರೇತ್‌ನೊ ಯೇಸುಕಿಶು” ಕರಿ ಬೋಲ್ಯು.

ತದೆ ಯೇಸುನೆ, “ಮೇಸ್ ಯೋ” ಕರಿ ಜವಾಬ್ ದಿದು.

ಯೇಸುನ ಧೋಕೊ ದಿದೋತೆ ಯೂದಬಿ ಇವ್ವಿ ಜೋಡೆ ಹಿಜ್ಜಾಸ್ ಭೀರೈಯೋ.

6 ಯೇಸುನೆ ಇವ್ವುನ, “ಮೇಸ್ ಯೋ” ಕರಿ ಬೋಲ್ಯೊ ತದೆ ಇವ್ವೆ ಪೀರೆ ಖರ್ತ್ರಿನ್, ಜಮೀನ್‌ಪರ್ ಪಡಿಗಯು.

7 ಪಾಲ್ಟೊ ಯೇಸುನೆ ಇವ್ವುನ, “ತುಮೆ ಕಿನ ಥೂಂಡುಕರಾಸ್ತೆ?” ಕರಿ ಪುಲ್ಲಾಯೊ.

ಇವ್ವೆ “ನಜರೇತ್‌ನೊ ಯೇಸುನ” ಕರಿ ಬೋಲ್ಯೊ.

8 ತದೆ ಯೇಸುನೆ, “ಮೇಸ್ ಯೋ ಕರಿ ಅಗಾಡಿಸ್ ತುಮೂನ ಬೋಲ್ಯೊನಿ. ತುಮೆ ಮನಾಸ್ ಥೂಂಡುಕರ್ ಉಶೇತೊ, ಅವ್ವುನ ಜಾವಾನ ಮ್ಹೇಲೊ” ಕರಿ ಬೋಲ್ಯೊ.

9 ಇನಖ್ವಾಜೆ ಬೋಲ್ಯೊ, “ಬಾ, ತುನೆ ಮನ ದಿದೋತೆ ಇವ್ವಾಮ ಏಕ್‌ನಾಬಿ ಮೇ ಗುಮೈಲಿದೊಕೊಯ್ತಿ” ಕರಿ ಇನೆ ಬೋಲ್ಯೊಥೋತೆ ವಾತೆ ಅಮ್ ಪೂರಹುಯು.

10 ಸೀಮೋನ್ ಪೇತ್ರಕನ ಏಕ್ ತಲ್ವಾರ್ ಥೀ, ತದೆ ಇನೆ ತಲ್ವಾರ್‌ನ ಕಾಡೀನ್, ಗಲ್‌ಥಯಾಜಕ್‌ನ ಆಳ್‌ನ ಮಾರಿನ್, ಇನು ಖಾವೊ ಕಾನ್ನ ಕತ್ತಿನಾಖ್ಯೊ ಯೋ ಆಳ್‌ನು ನಾಮ್ ‘ಮಾಲ್ಕ್’ ಕರಿ.

11 ತದೆ ಯೇಸುನೆ ಪೇತ್ರನ, “ತಾರಿ ತಲ್ವಾರ್‌ನ ಕಷ್‌ಬಂದಾನಿ ಚಂಚಿಮ ಪಾಲ್ಟು ಫಾಲ್; ತೂ ಸೋಚಕೊಯ್ತಿಶು? ಮಾರ ಬಾನೆ ಮನ ದಿದೋತೆ ಕಟೋರಿಮ ಮೇ ನಾ ಪೀಣು ಕರಿ” ಬೋಲ್ಯೊ.

ಅನ್ನನ ಖ್ವಾವ್ವೆ ಯೇಸುನ ಲಾಯತೆ

12 ಅನಕೇಡೆಥು ರೋಮ್‌ನು ಶಿಪಾಯಿಖ್ವಾರುಬಿ ಹಜಾರ್ ಶಿಪಾಯಿನೊ ಮೋಟೊಬಿ ಅಜು ಯೆಹೂದ್ಯರ್‌ನ ಕಾಪ್ಲಿ ಕರಾವಾಳು ಯೇಸುನ ಧರೀನ್ ಭಾಂದ್ತು.

13 ಇವ್ವೆಪಹಿಲೆ ಅನ್ನಕನ ಬುಲೈಲಿಗಯು. ಆ ಅನ್ನ ಯೋ ವರಖ್ವಾಮ ಗಲ್‌ಥಯಾಜಕ್ ಹುಯಿರೈಯೋತೆ ಕಾಯಫಾನೊ ಮಾಮ.

14 ಆ ಕಾಯಫಾನೇಸ್, ‘ಏಕ್ ಅದ್ವಿ ತಮಾಮ್ ಅದ್ವಿನಖ್ವಾಜೆ ಮರ್‌ವಾನುಸ್ ಅಲ್ಫು’ ಕರಿ ಯೆಹೂದ್ಯರ್‌ನ ಬೋಲಿದಿದೋತೆ.

ಪೇತ್ರನೇ ಯೇಸುನ ಝಿಟ್ಟಾರ್‌ಯ್ಯೆತೆ
(ಮತ್ತಾಯ 26:69,70; ಮಾರ್ಕ 14:66-68; ಲೂಕ 22:55-57)

15 ಸೀಮೋನ್ ಪೇತ್ರ ಅಜ್ಜು ಶಿಷ್ಯರಾಮ ಬಿಜೇಕ್ ಜಣೊ ಯೇಸುನ ಪೀರೆ ಗಯೊ. ಯೋ ಬಿಜ್ಜೇಕ್ ಶಿಷ್ಯನ ಗಲ್‌ಡೊ ಯಾಜಕ್ ಅಟ್ಟಿಂತರ ಮಾಲುಮ್ ಥೂ. ಇನಖ್ವಾಜೆ ಯೋ ಶಿಷ್ಯನೆ ಯೇಸುನ ಜೋಡೆ ಮಹಾಯಾಜಕ್‌ನು ಘರ್‌ನ ಖ್ವಾಮ್ಣೇನಿ ಝುಗೋಮ ಗಯೊ.

16 ಕತೋಬಿ ಪೇತ್ರ ಭಾರ್ ಬಾಕಲ್‌ಕನ ಟಿವೈರ್ಟ್ವೊಥೊ. ಮಹಾಯಾಜಕ್‌ನ ಮಾಲುಮ್‌ಥೋತೆ ಬಿಜ್ಜೇಕ್ ಶಿಷ್ಯನೆ ಪಾಲ್ಟೊ ಭಾರ್‌ಬನ್, ಬಾಕಲ್‌ಕನ ಕಾವ್ಲಿ ಕರಾವಾಳಿನ ಜೋಡೆ ವಾತೆ ಬೋಲಿನ್, ಪೇತ್ರಾನ ಮಹಿ ಬುಲೈಲಿಗಯೊ.

17 ತದೆ ಬಾಕಲ್ ಕಾವ್ಲಿ ಕರಾವಾಳಿ ಆಳೆನೆ, “ತೂಬಿ ಯೋ ಅದ್ವಿನೊ ಶಿಷ್ಯರಾಮ ಏಕ್ ಜಣೊ ಕಾಹೆಕಿ ಶು?” ಕರಿ ಬೋಲಿ.

ತದೆ ಪೇತ್ರನೆ, “ಕಾಹೆ ಮೇ ಕಾಹೆ” ಕರಿ ಬೋಲ್ಯೊ.

18 ತದೆ ರಣ್ ಥೀತೆ ಇನಾಖ್ವಾಜೆ ಆಳೊಖ್ವಾರು ಅಜ್ಜು ಕಾವ್ಲಿ ಕರಾವಾಳು ಕೋಲ್‌ಖ್ವಾಥಿ ಆಗ್ ಕರೀನ್, ಭೀರಿನ್ ಶೇಕುಕರ್ತುಥು, ಪೇತ್ರಬಿ ಜೈನ್, ಇವ್ವಿ ಜೋಡೆ ಭೀರಿಗಯೊ.

ಗಲ್‌ಡೊ ಯಾಜಕ್‌ನೆ ಯೇಸುನ ಪುಲ್ಲಾಯೋತೆ
(ಮತ್ತಾಯ 26:59-66; ಮಾರ್ಕ 14:55-64; ಲೂಕ 22:66-71)

19 ಗಲ್‌ಥಯಾಜಕ್‌ನೆ ಯೇಸುನ ಇನ ಶಿಷ್ಯರಾನಿ ಬಾರೇಮ ಅಜ್ಜು ಇನೆ ಬೋಲಿವತಾಳ್ವೊತೆ ಬಾರೇಮ ಪುಲ್ಲಾಯೊ.

20 ತದೆ ಯೇಸುನೆ, “ಮೇ ಕದೇಬಿ ಜಗತ್ತ್ ಖ್ವಾಮ್ಣೆಸ್ ವಾತೆ ಬೋಲಿರಾಖ್ಯೊಸ್; ಯೆಹೂದ್ಯ ಅದ್ವಿಖ್ವಾರು ಎಕ್ಚು ಹುಯಿನ್ ಆವಸ್ತೆ ಸಬೆ ಭರಾವನು ಮಂದಿರ್‌ಮ ಅಜ್ಜು ಮೋಟಿ ಮಂದಿರ್‌ಮ ಮೇ ಕದೇಬಿ ಬೋಲಿವತಾಳ್‌ತೊ ಆಯೊ, ಮೇ ಲಪೀನ್ ಕದೇಬಿ ಶಾತ್ವಿ ಕೋ ಬೋಲಿರಾಖ್ಯೊನಿ.

21 ಅಮ್ ರಫ್ವಾಪರ್, ಮನ ಶನ ಪುಲ್ಲಾವಸ್ತೆ? ಮೇ ಶಶ್ವತ್ ಬೋಲಿರಾಖ್ಯೊಸ್ ಕರಿ ಇನ ಖ್ವಮ್‌ಜ್ಯಾತೆ ಅದ್ವಿನ ಪುಲ್ಲಾವೊ; ಮೇ ಬೋಲ್ಯೊತೆ ಇವ್ವುನ ಮಾಲುಮ್” ಕರಿ ಬೋಲ್ಯೊ.

22 ಯೇಸುನೆ ಆ ವಾತೆ ಬೋಲ್ಯೊತೆ ತದೆ, ಇನ ಖನ್ನೆ ಭೀರ್ಯ್‌ಧೂತೆ ಕಾವ್ಲಿ ಕರಾವಾಳಾಮ ಏಕ್‌ಜಣಾನೆ ಯೇಸುನ ಕಲ್ಪಪರ್ ಮಾರಿನ್, “ಮಹಾಯಾಜಕನ ಜೋಡೆ ಅಮ್ ವಾತೆ ಬೋಲಸ್ಚಿಶು? ತುನ ಕೆತ್ರೆ ದಮ್” ಕರಿ ಬೋಲ್ಯೊ.

23 ಯೇಸುನೆ ಇನ, “ಮೇ ಶಾತ್‌ತೋಬಿ ಗಲತ್ ಬೋಲ್ಯೊ ಉಶೇತೊ, ಯೋ ಗಲತ್‌ನಿ ಬಾರೇಮ ಸಾಕ್ಷಿ ದೇ; ಕತೋಬಿ ಮೇ ಬೋಲ್ಯೊತೆ ಬರಾಬರ್ ಉಶೇತೊ, ತೂ ಮನ ಶನ ಮಾರಸ್?” ಕರಿ ಬೋಲ್ಯೊ.

24 ತದೆ ಅನ್ನನೆ ಯೋ ಕಿಮ್ ಭಂದ್ಯೊಥೋಕಿ ಇಮ್ಮಸ್, ಗಲ್‌ಥೊಯಾಜಕ್ ಕಾಯಫಕನ ಇನ ಮೋಕ್‌ಲ್ಯೊ.

ಪೇತ್ರನೆ ಪಾಟ್ಲೊ ಯೇಸುನ ಝಿಟ್ಕಾರ್‌ಲ್ಯೊತೆ

(ಮತ್ತಾಯ 26:71-75; ಮಾರ್ಕ 14:69-72; ಲೂಕ 22:58-62)

25 ಸೀಮೋನ್ ಪೇತ್ರ ಬಿಜೂಬಿ ಇಮ್ಮಸ್ ಹಿಜ್ವಾ ಭೀರಿನ್, ಆಗ್ ಶೇಕುಕರ್‌ತೋಥೊ. ತದೆ ಹಿಜ್ವಾ ಧೂತೆ ಇವ್ಣೆ ಇನ, “ತೂಬಿ ಯೋ ಅದ್ವಿನೊ ಶಿಷ್ಯರಾಮ ಏಕ್‌ಜಣೊ ಕಾಹೆಕಿ ಶು?” ಕರಿ ಪುಲ್ಲಾಯು.

ಕತೋಬಿ ಪೇತ್ರನೆ, “ಕಾಹೆ, ಮೇ ಕಾಹೆ” ಕರಿ ಬೋಲ್ಯೊ.

26 ಗಲ್‌ಥೊಯಾಜಕ್‌ನೊ ಆಳಾಮ, ಪೇತ್ರನೆ ಕಾನ್ ಕತ್ರನಾಖ್ಯೊಥೋತೆ ಇನ ಖನ್ನೆವಾಳಮ ಏಕ್‌ಜಣಾನೆ, “ಮೇ ತುನ ಬಾಗ್‌ಮ ಇನಜೋಡೆ ದೇಖ್ಯೊನಿ?” ಕರಿ ಬೋಲ್ಯೊ.

27 ಪಾಟ್ಲೊ ಪೇತ್ರನೆ, “ಕಾಹೆ” ಕರಿ ಬೋಲ್ಯೊ. ತದ್‌ನು-ತದೇಸ್ ಮುರ್‌ಗೊ ಬಾಂಗ್ ದಿದೊ.

ಯೇಸುನ ಪಿಲಾತನ ಖ್ವಾಮ್ಚೆ ಲಾಯುತೆ

(ಮತ್ತಾಯ 27:1-2,11-14; ಮಾರ್ಕ 15:1-5; ಲೂಕ 23:1-5)

28 ಅನಕೇಡೆಡು ಇವ್ವೆ ಯೇಸುನ ಕಾಯಫನ ಘರ್ ಕಂಥು ರಾಜ್ಯಪಾಲ್‌ನು ಮಹೇಲ್‌ನ ಬುಲೈಲಿಗಯು. ಯೆಹೂದ್ಯರ್‌ವಾಳನೆ ಇವ್ವುನ ಮೈಲಾಪ್ ಹುಯಿನ್ ಪಸ್ಸನು ಖಾಣು ಖಾವಾನ ಅಡ್ಡಿಲುಶೆಕರಿ ಮಹಾಲ್‌ನ ಮಹಿ ಕೋ ಗಯೂನಿ.

29 ಇನಖ್ವಾಜೆ ಪಿಲಾತ ಭಾರ್ ಇವ್ವಾಕನ ಜೈನ್, “ಆ ಅದ್ಮಿಪರ್ ತುಮೆ ಶಾತ್ ಗಲತ್ ಲಾಗಡೋಸ್?” ಕರಿ ಇವ್ವ ಪುಲ್ಲಾಯು.

30 ತದೆ ಇವ್ವೆಬೊಲ್ಯು, “ಆ ಗಲತ್ ನಾಕರೈಹೋತ್ತೊ, ಹಮೆ ಅನ ತಾರಕನ ಶನ ಲಾಯಹೋತ್?” ಕರಿ ಜವಾಬ್ ದಿದು.

31 ಪಿಲಾತನೆ ಇವ್ವುನ, “ಇಮ್‌ಕತೊ, ತುಮೇಸ್ ಅನ ಲೀಜೈನ್, ತುಮಾರಿ ಧರ್ಮಶಾಸ್ತ್ರ ನಿಫೋಣಿ ತೀರ್ಪ್ ಕರೊ” ಕರಿ ಬೋಲ್ಯೊ.

ತದೆ ಯೆಹೂದ್ಯರ್‌ನೆ, “ಕಿನಾಬಿ ಮರಣ್ ದಂಡ್ ದೈವಾನಿ ಹಕ್ ಹಮೂನ ಕೊಯ್ತಿ” ಕರಿ ಫರೈನ್ ಬೋಲ್ಯು.

32 ಯೇಸುನೆ, ಮೇ ಕಿಮ್ಮಿ ಮೋತ್‌ಮ ಮರಿಶ್ ಕರಿ ಬೋಲ್ಯೊಡೋತೆ ವಾತೆ ಅಮ್ ಪೂರಹುಯಿಗಿ

33 ಅನಕೇಡೆಡು ಪಿಲಾತನೆ ಪಾಲ್ಟೊಫರಿ ಮಹೇಲ್‌ಮ ಜೈನ್, ಯೇಸುನ ಬುಲೈನ್, “ತೂ ಯೆಹೂದ್ಯರ್‌ನೊ ರಾಜಾಕಿ ಶು?” ಕರಿ ಇನ ಪುಲ್ಲಾಯೊ.

34 ಯೇಸುನೆ, “ಆ ತಾರೇಥಿ ತೂಸ್ ಪುಲ್ಲಾವ್ ಕರಾಸ್ಕಿ, ನತರ್‌ಕಿ ಮಾರಿ ಬಾರೇಮ ಬಿಜಾನೆ ತುನ ಬೋಲ್ಯುತೆ?” ಕರಿ ಬೋಲ್ಯೊ.

35 ತದೆ ಪಿಲಾತನೆ ಬೋಲ್ಯೊ, “ಮೇ ಯೆಹೂದ್ಯ ಕಿಶು? ತಾರು ಶೊಂತ್ ಅದ್ಮಿ ಅಜ್ಜು ಮಹಾಯಾಜಕರೈ ತುನ ಮಾರ ಹಾತ್‌ಮ ದೀರಾಖೊಸ್. ತುನೆ ಶಾತ್‌ಕರೈ?” ಕರಿ ಪುಲ್ಲಾಯೊ.

36 ಯೇಸುನೆ ಇನ, “ಮಾರಿ ರಾಜ್ ಆ ಜಗತ್‌ನು ಕಾಹೆ; ಮಾರಿ ರಾಜ್ಯ ಆ ಜಗತ್‌ನು ಹುಯಿರೈಹೋತ್ತೊ, ಮೇ ಯೆಹೂದ್ಯರ್‌ನ ಹಾತ್‌ಮ ಮಳ್ಳುನಾತೆ ಇಮ್ ಮಾರು ಸೇವಕ್‌ಖ್ವಾರು ಖ್ವಾರು ಲಡ್ಕುಹೋತ್, ಕತೋಬಿ ಮಾರಿ ರಾಜ್ ಹಜ್ಜಾನು ಕಾಹೆ!” ಕರಿ ಜವಾಬ್‌ದಿದೊ.

37 ತದೆ ಪಿಲಾತನೆ ಇನ ಬೋಲ್ಯೊ, “ಇಮ್‌ಕತೊ, ತೂ ರಾಜಾ ಕಿಶು?” ಕರಿ ಪುಲ್ಲಾಯೊ. ಯೇಸುನೆ, “ಮೇ ರಾಜ್ ಕರಿ ತೂಸ್

ಬೋಲುಕರಾಸ್. ಮೇ ಖ್ವಾಚಿನಿ ಬಾರೇಮ ಸಾಕ್ಷಿ ಬೋಲಾನಖ್ವಾಜೆ ಪೈದಾಹುಯಿನ್, ಆ ಜಗತ್‌ಮ ಐರಸ್ತೊಸ್. ಖ್ವಾಚಿ ಭಣಿವಾಳು ಮಾರಿ ವಾತೇನ ಖ್ವಮ್‌ಜಾಸ್” ಕರಿ ಜವಾಬ್ ದಿದೊ.

38 ತದೆ ಪಿಲಾತನೆ, “ಖ್ವಾಚಿಕತೊ ಶಾತ್?” ಕರಿ ಪುಲ್ಲಾಯೊ.

ಯೇಸುನ ಮರಣ್ ದಂಡ್ ದಿದೊತೆ
(ಮತ್ತಾಯ 27:15-31; ಮಾರ್ಕ 15:6-20; ಲೂಕ 23:13-25)

ಆ ಬೋಲಾನ ಬಾದ್‌ಮ ಪಿಲಾತ ಪಾಟ್ಲೊ ಯೆಹೂದ್ಯರಕನ ಬಹರ್ ಜೈನ್, “ಮನ ಅನಾಮ ಖೆವಿಸ್ ಗಲತ್ ದೆಖಫ್‌ಕರಾಕೊಯ್ನಿ.

39 ಕತೋಬಿ ಪಸ್ತ ಪೂಜಾನಿ ವಖ್ವತ್‌ಮ ಕೋಂಡಿ ಘಾಲಿರಾಖಾತೆ ಇವ್ಣಾಮ ಏಕ್‌ನ, ಮೇ ತುಮಾರಖ್ವಾಜೆ ಭಾರ್ ಮ್ಹೇಲಾನಿ ಆದತ್ ಛಾ. ಮೇ ಯೆಹೂದ್ಯರನ ರಾಜಾನ ತುಮಾರಖ್ವಾಜೆ ಭಾರ್ ಮ್ಹೇಲ್ನು ಕರಿ ತುಮಾರಿ ಆಖ್ಣಿ ಶು?” ಕರಿ ಪುಲ್ಲಾಯೊ.

40 ತದೆ ಇವ್ಣೆ, “ಅನ ನಕೊ! ಬರಬ್ಬನಾಸ್ ಮ್ಹೇಲಿದೆ!” ಕರಿ ಚಿಕ್ರಿನ್ ಬೋಲ್ಯು ಆ ಬರಬ್ಬ ಏಕ್ ಥಾಕು ಹುಯಿರಸ್ತೊಡೊ.

19

1 ತದೆ ಪಿಲಾತನೆ ಯೇಸುನ ಲೀಜೈನ್, ಕೊಳ್ಳೇಥಿ ಮರಾಯೊ.

2 ಅಜ್ಜು ಸಿಪಾಯಿಖ್ವಾರು ಕಾಟಾನ ಡಾಳೇಥಿ ಏಕ್ ಕಿರೀಟ್ ವಣಿನ್, ಯೇಸುನ ಮಾಥಪರ್ ಘಾಲೀನ್, ಲಾಲ್ ಝಗ್ಗಾನ ಇನ ಫೇರಾಯು.

3 ಅಜ್ಜು ಇನಾಕನ ಐನ್, “ಯೆಹೂದ್ಯರನ ರಾಜಾ! ತುನ ಖ್ವಲಾಮ್” ಕರಿ ಬೋಲಿನ್, ಇನ ಕಲ್ಲಪರ್ ಮಾರ್ಲ್ಯು.

4 ಅನ ಬಾದ್‌ಮ, ಪಿಲಾತನೆ ಪಾಟ್ಲೊ ಭಾರ್ ಜೈನ್, ಇವ್ಣುನ, “ಮನ ಇನಾಮ ಶನೀಶ್ ಗಲತ್ ಕೋ ದೆಖಾಯುನಿ ಕರಿ ತುಮೂನ ಮಾಲುಮ್ ಪಡಾನಿಫೋಣಿ, ಇನ ತುಮಾರ ಖ್ವಾಮ್ಣೆ ಬಹರ್ ಲ್ಯಾವುಸ್ ದೇಖೊ” ಕರಿ ಬೋಲ್ಯೊ.

5 ತದೆ ಯೇಸು ಬಹರ್ ಆಯೊ, ಇನ ಮಾಥಪರ್ ಕಾಟಾನಿ ಕಿರೀಟ್ ಘಾಲೇಥಿ ಅಜ್ಜು ಇನ ಲಾಲ್ ಝಗ್ಗೊ ಫೇರೈರಾಖ್ತು. ಪಿಲಾತನೆ, “ಹಂದೇಖೊ! ಹಜ್ಜಾ ಹುಯಿರೊ ಯೋ ಅದ್ತೆ!” ಕರಿ ಬೋಲ್ಯೊ.

6 ಮಹಾಯಾಜಕರ್ ಅಜ್ಜು ಮಂದಿರ್‌ನ ಕಾವ್ವಿ ಕರಾವಾಳನ ಯೇಸುನ ದೇಖಿನ್, “ಇನ ಶಿಲ್‌ಬೆಪರ್ ರಂಗಾವ್! ಇನ ಶಿಲ್‌ಬೆಪರ್ ರಂಗಾವ್!” ಕರಿ ಚಿಕ್ರಾಲಗ್ಗು.

ತದೆ ಪಿಲಾತನೆ ಇವ್ವನ, “ಹೋಣುಕತೊ ತುಮೇಸ್ ಅನ ಲೀಜೈನ್, ಶಿಲ್‌ಬೆಪರ್ ನಾಖೊ. ಮನ ಅನಾಮ ಖೆವಿಸ್ ಗಲತ್ ದೆಖಾಯು ಕೊಯ್ತಿ” ಕರಿ ಬೋಲ್ಯೊ.

7 ತದೆ ಯೆಹೂದ್ಯರನೆ, “ಹಮೂನ ಏಕ್ ಖಾನುಲ್ ಛಾ, ಯೋ ಕಾನೂಲ್‌ನಿಫೋಣಿ ಅನ ಮರಣ್ ದಂಡ್ ಹೋಣುಸಸ್ ಹೋಣು. ಶನಕತೊ ಅನೆ ಇನು ಯೋಸ್, ‘ಮೇ ದೇವ್‌ನೊ ಛಿಯೊ ಕರಿ ಬೋಲಿಲಿದೊ” ಕರಿ ಜವಾಬ್ ದಿದೊ.

8 ಪಿಲಾತನೆ ಆ ವಾತ್ ಖ್ವಮ್‌ಜಿನ್ ಬಿಜೂಬಿ ಜಾಖ್ತ್ ಡರಿಗಯೊ.

9 ಅಜ್ಜು ಪಾಘೊ ಮಹೇಲ್‌ಮ ಜೈನ್, ಯೇಸುನ “ತೂ ಕಿಜ್ಜಾಘೊ ಐರ್ದ್ಲೊಸ್ತೆ?” ಕರಿ ಪುಲ್ಲಾಯೊ.

ಕತೋಬಿ ಯೇಸುನೆ ಜವಾಬ್ ಕೋ ದಿದೋನಿ.

10 ಪಿಲಾತನೆ ಇನ, “ತೂ ಮಾರ ಜೋಡೆಬಿ ವಾತೆ ಕೋ ಬೋಲಾನಿ ಕಿಶು? ತುನ ಛೋಡಾವನಾಬಿ, ತುನ ಶಿಲ್‌ಬೆಪರ್ ನಖಾವಾನಾಬಿ ಮನ ಅದಿಕಾರ್ ಛಾ ಕರಿ ತುನ ಮಾಲುಮ್ ಕೊಯ್ತಿ ಕಿಶು?” ಕರಿ ಬೋಲ್ಯೊ.

11 ಯೇಸುನೆ ಜವಾಬ್ ದಿದೊ, “ದೇವ್ ತುನ ಮಾರಪರ್ ಅದಿಕಾರ್ ನಾ ದಿದೊಹೋತ್ಲೊ, ತುನ ಮಾರಪರ್ ಕೆವ್ವೀಸ್ ಅದಿಕಾರ್ ಕೋ ರ್ಡಯುಹೋತ್ಲಿ ಇನಖ್ವಾಜೇಸ್ ಮನ ತಾರ ಹಾತ್‌ಮ ದೀರಾಖೊಸ್ತೆ ಅದ್ವಿನ, ತಾರೆಫಿಬಿ ಘಣು ಪಾಪ್ ಛಾ” ಕರಿ ಬೋಲ್ಯೊ.

12 ಆ ವಾತೆನ ಖ್ವಮ್‌ಜಿನ್, ಪಿಲಾತ ಯೇಸುನ ಕಿಮ್‌ತೋಬಿ ಛೋಡಾವ್‌ಣು ಕರಿ ಕರ್ದೊ. ಕತೋಬಿ ಯೆಹೂದ್ಯರನೆ, “ತೂ ಅನ ಛೋಡಾಯೋತೆ, ತೂ ಕೈಸರ್‌ನೊ ದೋಸ್ತಿಕಾಹೆ ಕರಿ ಮತಲಬ್. ಖ್ವದ್‌ನ ರಾಜ್ ಕರಿಲ್ವವಾಳೊ ಕೈಸರ್‌ನೊ ದುಶ್‌ಮನ್ ಹುಯಿರ್ದೋಸ್!” ಕರಿ ಚಿಕ್ರಿನ್ ಬೋಲ್ಯೊ.

13 ಆ ವಾತೆನ ಖ್ವಮ್‌ಜಿನ್ ಪಿಲಾತನೆ ಯೇಸುನ ಭಾರ್‌ಬುಲೈನ್, ಬಂಡಾ ಭಿಟ್ಟಿರ್ದೊತೆ ರಚ್ಚೊಇಬ್ರಿಯ ವಾತೇಮ ಗಬ್ಬಥಾ ಕರಿ

ಬೋಲೈಲೇಸ್ತೆ ನಾಮ್ನು ಝಗೋಪರ್ ಜೈನ್, ನ್ಯಾವ್ನಿ ಖುಡ್‌ಶಿಪರ್ ಬೇಶಿಗಯೊ.

14 ತದೆ ಧೋಪಾರ್ ಹುಯಿಗಯುಧು ಅಜ್ಜು ಯೋ ದನ್ ಪಸ್ಸು ಪೂಜಾನ ಖ್ತವಾರಾನೊ ದನ್ ಹುಯಿರಸ್ತೋಧೊ. ಪಿಲಾತನೆ ಯೆಹೂದ್ಯರ್‌ನ, “ಹಂದೇಖೊ, ತುಮಾರೊ ರಾಜ್ಞಾನ!” ಕರಿ ಬೋಲೈಲ್ಯೊ.

15 ಇವ್ಣೆ “ಇನ ಮರೈನಾಕ್! ಇನ ಮರೈನಾಕ್! ಇನ ಶಿಲ್‌ಬೆಪರ್ ಠಂಗಾವ್!” ಕರಿ ಚಿಕ್‌ರೈಲ್ಯೊ ಅಜ್ಜು ಪಿಲಾತನೆ ಯೆಹೂದ್ಯರ್‌ನ, “ತುಮಾರ ರಾಜ್ಞಾನ ಶಿಲ್‌ಬೆಪರ್ ನಖಾವ್ಣು ಕಿಶು?” ಕರಿ ಬೋಲಾನಿ ವಖ್ಣೆತೆ ಮಹಾಯಾಜಕರೈ ಹಮೂನ ಕೈಸರ್ ಮ್ಹೇಲಿನ್ ಬಿಭೊ ರಾಜ್ಞ ಕೊಯ್ನಿ ಕರಿ ಜವಾಬ್ ದಿದು.

16 ತದೆ ಪಿಲಾತನೆ ಯೇಸುನ ಶಿಲ್‌ಬೆಪರ್ ಮರಾವನಖ್ವಾಜೆ ಇವ್ಣೆ ಹಾತ್‌ಮ ದಿನಾಖ್ಣೊ.

ಯೇಸುನ ಶಿಲುಬೆಪರ್ ಲಟ್ಕಾಯುತೆ

(ಮತ್ತಾಯ 27:32-44; ಮಾರ್ಕ 15:21-32; ಲೂಕ 23:26-43)

ಇವ್ಣೆ ಯೇಸುನ ಲೀಗಯು.

17 ಯೇಸುನೆ ಇನಿ ಶಿಲ್‌ಬೇನ ಪಾಡಿಲೀನ್, “ಖೋಪ್ಪಿನಿ ಝಗೊ” ಕರಿ ಝಗೋಕನ ಗಯೊ. ಇಬ್ರಿಯ ವಾತೇಮ ಆ ಝಗೋನಾ, ‘ಗೊಲ್ಲೊಥಾ’ ಕರಿ ಬೋಲಾಸ್.

18 ಹಿಜ್ಜಾ ಯೇಸುನ ಶಿಲ್‌ಬೆಪರ್ ನಾಖ್ಣು ಇನಜೋಡೆ ಬಿಜ್ಜು ಬೇ ಜ್ಞಾನ ಹೈಕಡ್ ಏಕ್‌ಜ್ಞಾನ, ಹೀಕಡ್ ಏಕ್‌ಜ್ಞಾನ, ಅಜ್ಜು ಯೇಸುನ ಇವ್ಣೆ ಇಚ್‌ಮ ಶಿಲ್‌ಬೆಪರ್ ನಾಖ್ಣು.

19 ಪಿಲಾತನೆ ಏಕ್ ಪಲ್ಲಾಪರ್, “ನಜರೇತ್‌ನೊ ಯೇಸು, ಯೆಹೂದ್ಯರ್‌ನೊ ರಾಜ್” ಕರಿ ಲೀಖೈನ್, ಶಿಲ್‌ಬೆಪರ್ ಮ್ಹೇಲಾಯೊ.

20 ಯೆಹೂದ್ಯರ್‌ನೆ ಯೇಸುನ ಶಿಲ್‌ಬೆಪರ್ ನಾಖ್ಣುತೆ ಝಗೊ ಖ್ತಯೇರ್ದ್ ಖನ್ನೆ ಥೂತೆ ಇನಖ್ವಾಜೆ ಯೆಹೂದ್ಯರ್‌ಮ ಘಣ ಅದ್ಮಿನೆ

ಯೋ ಪಲ್ಲಾಪರ್ ಲೀಖೈರೊಡ್ತೆ ಇನ ಪಡ್ಕು ಯೋ ಇಬ್ರಿಯ, ಲ್ಯಾಟಿನ್ ಅಜ್ಜು ಗ್ರೀಕ್‌ವಾತೇಮ ಲೀಖೈರೊಡ್ತು.

21 ತದೆ ಮಹಾಯಾಜಕರೈ ಪಿಲಾತನ ಅಮ್ ಬೋಲ್ಯಾ “ಯೆಹೂದ್ಯರ್‌ನೊ ರಾಜ್ ಕರಿ ನಕೊಲೀಖೊ, ಮೇಸ್ ಯೆಹೂದ್ಯರ್‌ನೊ ರಾಜ್ ಕರಿ ಬೋಲಿಲಿದೊ ಹುಯೊ’ ಕರಿ ಲೀಖಾವ್ಣು” ಕರಿ ಬೋಲ್ಯಾ.

22 ಕತೋಬಿ ಪಿಲಾತನೆ, “ಮೇ ಲೀಖೊಡ್ತೆ ಲೀಖೈಗಯು” ಕರಿ ಬೋಲ್ಯೊ.

23 ಯೇಸುನ ಶಿಲ್‌ಬೆಪರ್ ನಾಖಾನ ಬಾದ್ತ ಸಿಪಾಯಿಖ್ಹಾರು, ಇನ ಲುಂಗ್ಗಾನ ಚಾರ್ ಭಾಗ್ ಕರೀನ್, ಶಿಪಾಯಿಪಿಟ್ ಏಕೇಕ್ ವಾಟಪಾಡಲಿದು. ಕಾಹೆತೆ ಯೇಸುನೊ ಮಹಿನು ಝಗ್ಗಾನಾಬಿ ಕಾಡಿಲಿದು, ಯೋ ಝಗ್ಗೋನ ಶಿವಣ್ ಕೋಥೂನಿ ಅಜ್ಜು ಯೋ ಉಪ್ಪರ್‌ಡು ಹೇಟ್‌ತೋಡಿ ಲಾಂಬುಸ್ ವಣಿರಾಖ್ತು.

24 ಇನ ದೇಖಿನ್ ಇವ್ಣೆ “ಅಪ್ಪೆ ಅನ ನಾ ಫಾಡ್‌ಣು; ಚಿಟ್ಟಿ ನಾಖಿನ್, ಆ ಕಿನ ಆವಸ್ತಿ ದೇಖೆ” ಕರಿ ವಾತೆ ಬೋಲಿಲಿದು. ಇವ್ಣೆ ಅನೇಧಿ

‘ಮಾರ ಲುಂಗ್ಗಾನ ಇವ್ಣಾಮ ವಾಟ ಪಾಡಿಲಿದು,

ಮಾರ ಝಗ್ಗಾನಖ್ಹಾಜೆ ಚೀಟಿ ನಾಖ್ತು’ ಕರಿ ವಚನ್‌ಮ ಲೀಖೈರೊಡ್ತೆ ವಾತೆ ಚಾಲಿಗಿ. ಶಿಪಾಯಿಯೇನೆಬಿ ಆ ಖ್ಹಾರು ಕರೈತೆ.

25 ಯೇಸುನಿ ಶಿಲ್‌ಬೇನ ಖನ್ನೆ ಇನಿ ಆಯ, ಇನಿ ಆಯಾನಿ ಭೇನ್, ಕ್ಲೋಪಾನಿ ಬಾಯ್ಕೊ ಮರಿಯ, ಮಗ್ದಲನಿ ಮರಿಯ ಖ್ಹಾಪ್ಪೆ ಭೀಯ್ತೆ.

26 ಯೇಸುನೆ ಇನಿ ಆಯನಾಬಿ, ಇನ ಖನ್ನೆ ಭಿಯೊಥೋತೆ ಪ್ಯಾರ್‌ನ ಶಿಷ್ಯನ ದೇಖಿನ್, “ಆಯಾ, ಆಸ್ ತಾರೊ ಥಿಯ್ಕೊ” ಕರಿ ಬೋಲ್ಯೊ.

27 ಅನಕೇಡೆಡು ಯೋ ಶಿಷ್ಯನ, “ಆ ತಾರಿ ಆಯ” ಕರಿ ಬೋಲ್ಯೊ. ಯೋ ವಖ್ತುತ್‌ಥೂಸ್ ಯೋ ಶಿಷ್ಯನೆ ಮರಿಯನ ಇನ ಘರ್‌ಮಾಸ್ ರಾಖ್ತೊ.

ಯೇಸು ಜಾನ್ ಮ್ವೇಲ್ಯೋತೆ

(ಮತ್ತಾಯ 27:45-56; ಮಾರ್ಕ 15:33-41; ಲೂಕ 23:44-49)

28 ಆ ಖ್ವಾರು ಹುವಾನ ಬಾದ್‌ಮ, ಹಮ್ಪೆ ಖ್ವಾರುಸ್ ಖತಮ್ ಹುಯಿಗಯು ಕರಿ ಯೇಸುನೆ ಮಾಲುಮ್ ಕರಿಲೀನ್, ವಚನ್‌ಮಾನಿ ವಾತೆ ಚಾಲಾನಿಫೋಣಿ, “ಮನ ಲೋಖ್ತ್ ಲಾಗುಕರಾಸ್” ಕರಿ ಬೋಲ್ಯೊ.

29 ಹಿಜ್ವಾ ಖ್ವಿಖ್ವತು ದ್ರಾಕ್ಷಿನು ರಖ್ವನ್ ಏಕ್ ರಾಱ್‌ಮ ಭರಿ ಮ್ವೇಲಿರಾಖ್ವುಧು. ತದೆ ಗುಂಜ್‌ನ ಯೋ ರಖ್ವಮ್ ಡುಬೈನ್, ಹಿಸ್ಸೋಪ್ ಝಾಡಾನು ಲಠಾಕೇಡೆ ಅಟ್‌ಕೈನ್, ಉಪ್ಪರ್ ಪಾಡೀನ್, ಯೇಸುನ ಮ್ವೋಡಾನ ಲಗ್ಯಾಡ್ಯ.

30 ಯೇಸುನೆ ಯೋ ರಖ್ವನ್ ಪೀನ್, “ಖತಮ್ ಹುಯಿಗಯು!” ಕರಿ ಬೋಲಿನ್,
ಮುಡ್‌ಕ್ಯು ಝುಕ್ಟೈನ್, ಇನಿ ಆತ್ಮಾನ ದೀನಾಖ್ವೊ.

ಯೇಸುನ ಭಾಲೇಥಿ ಭೋಕ್ಯುತೆ

31 ಯೋ ದನ್ ಶುಕ್ರವಾರ್‌ನೊ ದನ್ ಹುಯಿರ್ಲ್ವುಧು. ಇನಖ್ವಾಜೆ ಯೆಹೂದ್ಯಾರ್‌ನ ಅದಿಕಾರಿಖ್ವಾರನೆ ಸಬ್ಬತ್ ದನ್ಮ ಮುರ್ದು ಶಿಲ್‌ಬೇಪರ್ ನಾ ರ್ವೇವ್ವುಕರಿ ಪಿಲಾತಕನ, ಶಿಲ್‌ಬೇಪರ್ ಛಾತೆ ಇವ್ವ ಗೋಡ ತೋಡೈನ್, ಹೇಟ್ ಉತಾರೈನಾಖನ ಹುಕುಮ್ ದೇ ಕರಿ ಬೋಲಿಲಿದು. ಶನಕತೊ ಯೋ ಸಬ್ಬತ್ ದನ್ ಘಣು ಪವಿತ್ರ ದನ್ ಹುಯಿರ್ಲ್ವುಧು.

32 ಇನಖ್ವಾಜೆ ಸಿಪಾಯಿಖ್ವಾರು ಐನ್, ಯೇಸುನ ಜೋಡೆ ಶಿಲ್‌ಬೇಪರ್ ಲಟ್‌ಕೈರ್‌ಲ್ವುಧೂತೆ ಇವ್ವ ಭೇನು ಗೋಡ ತೋಡಿನಾಖ್ವು.

33 ಕತೋಬಿ ಯೇಸುಕನ ಆವಾದಿನ್, ಯೋ ತದೇಸ್ ಮರಿಗಯೋತೆ ಇವ್ವೆ ದೇಖಿನ್, ಇನಗೋಡ ತೋಡ್ಯುಕೊಯ್ವಿ.

34 ತೋಬಿ ಶಿಪಾಯಿಮ ಏಕ್‌ಜಣಾನೆ ಇನು ಭಾಲೇಥಿ ಯೇಸುನಿ ಪಾಖ್ವೆಲಿಮ ಭೋಕ್ಯೊ, ಭೋಕ್‌ತಾಸ್‌ನ ಲ್ವೋಯಿಬಿ, ಪಾಣಿ ಬಹರ್ ರಂಭಾಯು.

35 ಅನ ದೇಖ್ವೋತೆ ಇನೇಸ್ ಸಾಕ್ಷಿ ಬೋಲಿರಾಖ್ವೊನ್, ಇನಿ ಸಾಕ್ಷಿ ಖ್ವಾಚ್‌ಸ್ ಶನಕತೊ ತುಮೇಬಿ ಅನ ವಿಶ್ವಾಸ್ ಕರ್ನ್ ಕರಿ ಇನೆ ಬೋಲಿರಾಖ್ವೊಸ್ತೆ. ಅಜ್ಜು ಯೋ ಬೋಲುಕರಾತೆ ಖ್ವಾಚ್‌ಸ್ ಕರಿ ಇನ ಮಾಲುಮ್ ಛಾ.

36 ಶನಕತೊ 'ಇನ ಹಡ್‌ಕ್ಯಾಮ ಏಕ್‌ಬಿ ಹಡ್‌ಕ್ಯ ತುಟ್‌ಶೆ ಕೊಯ್ತೆ' ಕರಿ ವಚನ್‌ಮ ಛಾತೆ ವಾತೆ ಪೂರಹುವಾನಖ್ವಾಜಿ ಅಮ್‌ಹುಯೂತೆ.

37 ಬಿಜ್ಜೇಕ್ ವಚನ್‌ಮ, "ಅದ್ವಿಖ್ವಾರು ಇವ್ಜೆ‌ಭಾಲೇ‌ಧಿ ಭೋಕ್ಯತೆ ಇನ ಠರ್‌ಖೈನ್ ದೇಕ್‌ಶೆ" ಕರೀಬಿ ಲಿಖ್ವಿರ್ವ್ವಸ್.

ಯೇಸುನ ಮಖ್ವಾಣ್ಣನಿ ಘವಿಮ ಘಾಲ್ಯುತೆ

(ಮತ್ತಾಯ 27:57-61; ಮಾರ್ಕ 15:42-47; ಲೂಕ 23:50-56)

38 ಅನ ಬಾದ್‌ಮ, ಯೆಹೂದ್ಯರ್‌ನ ಡರ್‌ಧಿ ಲಪೀನ್ ಯೇಸುನೊ ಶಿಷ್ಯ ಹುಯಿರ್ದೊಡೊತೆ, ಅರಿಮಥಾಯ ಗಾಮ್‌ನೊ ಯೋಸೇಫ್‌ನೆ, ಯೇಸುನ ಶರೀರ್‌ನ ಮನ ದೇಕರಿ ಪಿಲಾತನ ಬೋಲಿಲಿದೊ. ತದೆ ಪಿಲಾತನೆ ಯೇಸುನ ಶರೀರ್‌ನ ಪಳ್ಳಿಜಾ ಕರಿ ಇನ ಹುಕುಮ್ ದೇತಾಖ್ವತರ್, ಇನೆ ಯೋ ಶರೀರ್‌ನ ಪಳ್ಳಿನ್, ಗಯೊ.

39 ಪಹಿಲೆ ಏಕ್‌ಹಲ್ಲ ರಾತ್ರಿ ವಖ್ವತ್‌ಮ, ಯೇಸುಕನ ಆಯೊಥೋತೆ ನಿಕೊದೇಮನೆ ಕಮ್‌ಶಿಕಮ್ ಡೋಡಿಖ್ವ್ ಶೇರ್ ರಕ್ತಬೋಳ ಅಜ್ಜು ವಾನು ಜಡಿಬೂರಿ ಮಳಾಯುಹುಯು ಟುಕ್ಡಾವ್‌ನ ಲೀನ್, ಯೋಸೇಫ್‌ನ ಜೋಡೆ ಗಯೊ.

40 ಅವ್ಜೆ ಭೇ ಜಣಾನೆ ಯೇಸುನ ಶರೀರ್‌ನ ಪಳ್ಳಿ ಜೈನ್, ಯೆಹೂದ್ಯರ್‌ಮ ಗಾಡಾಸ್ತೆ ಇಮ್ಮಿ ತರೀಕಾಮ, ಇನಾಪರ್ ಯೋ ವಾನು ಜಡಿಬೂರಿನ ನಾಖಿನ್, ಘಣ ಮೋಲ್ನು ಗಾದಿನ ಲುಂಗ್ಡಾಧಿ ಇನ ಲಪೇಟ್ಟು.

41 ಯೇಸುನ ಶಿಲ್‌ಬೆಪರ್ ಲಟ್ಕಾಯುತೆ ಝಗೋಕನ ಏಕ್ ಭಾಗ್ ಥೂ, ಯೋ ಬಾಗ್‌ಮ ಏಕ್ ನವಿ ಘವಿಧೀ, ಯೋ ಘವಿಮ ತಪ್‌ತೋಡಿ ಕಿನೂಸ್ ಮುರ್ದು ಮ್ಹೇಲ್ಯುಥು ಕೊಯ್ತೆ.

42 ಯೋ ದನ್ ಯೆಹೂದ್ಯರ್‌ನ ಖ್ವಾರಾನೊ ದನ್ ಶುಕ್ರವಾರ್ ಹುಯಿರೊಡ್ಲೊಡೊತೆ ಇನಖ್ವಾಜೆ, ಯೋ ಘವಿ ಖನ್ನೆಸ್ ಥೀತೆ ಇನಾಟೀಕೆ ಯೇಸುನ ಮುರ್ದಾನ ಇನಾಮ ಮ್ಹೇಲ್ಯು.

20

ಖಾಲಿ ಘವಿ

(ಮತ್ತಾಯ 28:1-8; ಮಾರ್ಕ 16:1-8; ಲೂಕ 24:1-12)

1 ವಾರಾನ ಪಹಿಲದನ್ನೆ ಅಧಿರೊಣೆಸ್, ಬಿಜೂಬಿ ಅಂಧಾರು ರೊಪ್ಪಾನಿಸ್ ವಖ್ತಮ, ಮಗ್ದಲನಿ ಮರಿಯ ಘವಿಕನ ಐನ್, ಘವಿನ ಮೂಚಿರಾಖ್ಯೂಡೊತೆ ಬಂಡೊ ನಿಕ್‌ಳೆರೊಡ್ಲೊಡೊತೆ ದೇಖಿ.

2 ತದೆ ಇನೆ ಸೀಮೋನ್ ಪೇತ್ರ ಅಜು ಯೇಸುನೊ ಪ್ಯಾರೊನೊ ಬಿಜ್ಜೇಕ್ ಶಿಷ್ಯಕನ ಮಿಲೈಜೈನ್, ಇನೆ ಇವ್ವುನ, “ಪ್ರಭುನ ಮಖ್ವಾಣ್ಯನಿ ಘವಿನ ಮಹಿಥು ಪಳ್ಳೆಜೈನ್, ಕಿಜ್ವಾ ಮ್ಹೇಲಿರಾಖ್ಯೂಸ್ತಿ, ಹಮೂನ ಮಾಲುಮ್ ಕೊಯ್ಲಿ!” ಕರಿ ಬೋಲಿ.

3 ತದೆ ಪೇತ್ರ ಅಜು ಯೋ ಬಿಜ್ಜೇಕ್ ಶಿಷ್ಯ ಘವಿಕನ ಗಯ.

4 ಇವ್ವೆ ಭೇ ಜಣ ಮಿಲಾಯ, ಕತೋಬಿ ಯೋ ಬಿಜ್ಜೇಕ್ ಶಿಷ್ಯ ಪೇತ್ರಥೀಬಿ ಒಗ್ಗಿಸ್ ಮಿಲೈನ್, ಘವಿಕನ ಪಹಿಲೆ ಐನ್, ಪೋಚ್ಚೊ.

5 ಇನೆ ಝುಕಿನ್, ಲಪೇಟಿಡೊತೆ ಘಣ ಮೋಲ್ನು ಗಾದಿನು ಲುಂಗ್ಡು ಪಡ್ಕುಡೊತೆ ದೇಖ್ಚೊ, ಕತೋಬಿ ಮಹಿ ಕೋಗಯೋನಿ.

6 ಸೀಮೋನ್ ಪೇತ್ರನ ಪಿಲೆ ಐನ್, ಘವಿನ ಮಹಿ ಜೈನ್, ಯೋ ಘಣ ಮೋಲ್ನು ಗಾದಿನು ಲುಂಗ್ಡು ಪಡ್ಕುಡು.

7 ಅಜು ಯೇಸುನ ಮುಡ್‌ಕ್ಯಾನ್ ಭಾಂದ್ಯೂಡೊತೆ ಲುಂಗ್ಡು ಯೋ ಘಣ ಮೋಲ್ನು ಲುಂಗ್ಡಾನ ಜೋಡೆ ಪಡ್ಕುಡು ಕೊಯ್ಲಿತೆ, ಲಪ್‌ಟೈನ್ ಏಕಾಡಿ ಅಲಕ್ ಮ್ಹೇಲಿರಾಖ್ಯೂಡೊತೆ ದೇಖ್ಚೊ.

8 ಅನಕೇಡೆಥು ಘವಿಕನ ಪಹಿಲೆ ಐನ್, ಪೋಚ್ಚೊತೆ ಯೋ ಬಿಜ್ಜೇಕ್ ಶಿಷ್ಯಬಿ ಮಹಿ ಜೈನ್ ದೇಖಿನ್, ವಿಶ್ವಾಸ್ ಕರೊ.

9 ಯೇಸು ಮರ್ವಾನ ಬಾದಾಮ ಜಿವ್ವೊ ಹುಯಿನ್ ಉರಿ ಆವ್ವುಕರಿ ವಚನ್ಮ ಲೀಖ್ತಿರೊತ್ತೆ ವಾತೆ ಇವ್ವುನ ಬಿಜ್ಜೂಬಿ ಮಾಲುಮ್ ಕೋ ಥೂನಿ.

10 ಅನಕೇಡೆಥು ಯೋ ಶಿಷ್ಯರ್ ಪಾಲ್ತುಫರಿ ಘರೆ ಗಯು.

ಮಗ್ಗಲನಿ ಮರಿಯನ ಯೇಸು ದೆಖಾಯೊತೆ

(ಮತ್ತಾಯ 28:9,10; ಮಾರ್ಕ 16:9-11)

11 ಕತೋಬಿ ಮರಿಯ ಭಾರ್ ಘವಿಕನ ರೊವ್ತಿಹುಯಿನ್, ಭೀಯಿಥಿ. ಯೋ ರೊವ್ತಿ ಹುಯಿನಸ್ ಘವಿನ ಮಹಿ ಝುಕಿನ್, ದೇಖಿ.

12 ತದೆ ಯೇಸುನು ಮುರ್ದು ಮ್ವೇಲ್ಯುಥೂತೆ ಝುಗೋಮ, ಧೋಳು ಲುಂಗ್ಡು ಪೇರ್ಟಿರಾಮ್ಮುಥೂತೆ ಬೇ ದೇವ್‌ನು ದೂತರ್‌ನ ದೇಖಿ. ಇನಾಮ ಏಕ್ ಜಣೊ ಮುಡ್‌ಕ್ಯೂ ಥೂತೆ ಭಣಿ, ಅಜ್ಜು ಏಕ್ ಜಣೊ ಗೋಡಾಭಣಿ ಬೆರಾಥ.

13 ಯೋ ದೇವ್‌ನು ದೂತರ್ ಮರಿಯನ, “ಅಲಿ ಆಯಾ, ತೂ ಶನ ರೊವ್‌ಕರಾಸ್ತೆ?” ಕರಿ ಪುಲ್ಲಾಯ.

ತದೆ ಇನೆ, “ಮಾರೊ ಪ್ರಭುನು ಮುರ್ದಾನ ಇವ್ವೆ ಪಳ್ಳಿಚ್ಚಲಿಗಯು, ಅಜ್ಜು ಇನ ಕಿಜ್ಜಾ ಮ್ವೇಲಿರಾಮ್ಮುಸ್ ಕರಿ ಮನ ಮಾಲುಮ್ ಕೊಯ್ತಿ!” ಕರಿ ಜ್ಞಾವಾಬ್ ದಿದಿ.

14 ಅಮ್ ಬೋಲಾನ ಬಾದಾಮ, ಪೀರೆ ಫರೀನ್, ಹಿಜ್ಜಾ ಯೇಸು ಭೀರ್ಟೊಥೂತೆ ಇನೆ ದೇಖಿ; ಕತೋಬಿ ಯೋಸ್ ಯೇಸು ಕರಿ ಇನ ಮಾಲುಮ್ ಕೋ ಹುಯೂನಿ.

15 ಯೇಸುನೆ ಇನ, “ಅಲಿ ಆಯಾ, ತೂ ಶನ ರೊವ್‌ಕರಾಸ್ತೆ? ತೂ ಕಿನ ಥೂಂಡುಕರಾಸ್ತೆ?” ಕರಿ ಪುಲ್ಲಾಯೊ. ಹೈರೋತೆ ಬಾಗ್‌ನ ದೇಖಿಲ್ವಾಳೊಕಿ ಶುಕಿ ಕರಿ ಮರಿಯನೆ ಸೋಚಿನ,

ಇನ, “ಮಾಲಿಕ್, ತೂ ಇನ ಪಾಡಿಲೀನ್ ಜೈರೊ ಉಶೇತೊ, ಕಿಜ್ಜಾ ಮ್ವೇಲಿರಾಮ್ಮೋಸ್ ಕರಿ ಮನ ಬೋಲ್, ಮೇ ಇನ ಪಳ್ಳಿಚ್ಚವ್‌ಸ್” ಕರಿ ಬೋಲಿ.

16 ಯೇಸುನೆ ಇನ, “ಮರಿಯ” ಕರಿ ಬೋಲ್ಯೊ.

ತದೆ ಇನೆ ಯೇಸು ಭಣಿ ಫರೀನ್, ಇಬ್ರಿಯ ವಾತೇಮ, “ರಬ್ಬನಿ!” ಕರಿ ಬೋಲಿ. ರಬ್ಬನಿ ಕತೊ, ‘ಗುರು’ ಕರಿ ಮತ್‌ಲಬ್.

17 ಯೇಸುನೆ ಇನ, “ಮನ ಧರ್‌ನಕೊ, ಶನಕತೊ ಮೇ ಬಿಜ್ಜೂಬಿ ಬಾಕನ ಕೋ ಜೈರ್ದೊನಿ. ಕತೋಬಿ ತೂ ಮಾರ ಬೈಯೇಕನ ಜೈನ್, “ಮೇ ಮಾರೊ ಬಾ ಅಜ್ಜು ಇವ್ವೊ ಬಾ, ಮಾರೊ ದೇವ್ ಅಜ್ಜು ಇವ್ವೊ ದೇವ್ ಹುಯಿರ್ದೊತೆ ಇನಕನ ಪಾಲ್ಟೊ ವಳ್ಳೊಜ್ಜವುಸ್ ಕರಿ ಬೋಲ್” ಕರಿ ಬೋಲ್ಯೊ.

18 ತದೆ ಮಗ್ಗಲನಿ ಮರಿಯ ಶಿಷ್ಯರ್‌ಕನ ಜೈನ್, ಇನೆ ಪ್ರಭುನ ದೇವಿತೆ ಅಜ್ಜು ಯೇಸುನೆ ಇನ ಬೋಲ್ಯೊತೆ ಬಾರೇಮ ಇವ್ವುನ ಬೋಲಿ.

ಯೇಸು ಇನ ಶಿಷ್ಯರ್‌ನ ದೆಖಾಯೊತೆ

(ಮತ್ತಾಯ 28:16-20; ಮಾರ್ಕ್ 16:14-18; ಲೂಕ 24:36-49)

19 ಯೋಸ್ ದನ್ನೆಕತೊ, ವಾರಾನ ಪಹಿಲ ದನ್ನೆ ಖ್ವಾಂಜೆ, ಶಿಷ್ಯರ್ ಯೆಹೂದ್ಯರ್ ಅದಿಕಾರಿನ ಡರ್‌ಥಿ ಇವ್ವೆ ಥಾತೆ ಘರ್‌ನು ಬಾಕಲ್ ಮೂಚಿನ್, ಮಹಿ ಥಾ. ತದೆ ಯೇಸು ಐನ್, ಇವ್ವ ಇಫ್‌ಮ ಭೀರಿನ್, “ತುಮೂನ ಸಮಾಧಾನ್ ಹುವಾದೆ” ಕರಿ ಬೋಲ್ಯೊ.

20 ಆ ಬೋಲಾನ ಬಾದ್‌ಮ, ಇನ ಹಾತ್‌ನಾಬಿ, ಪಾಖ್ವೊಳಿನಾಬಿ ಇವ್ವುನ ವತಾಳ್ವೊ ಪ್ರಭುನ ದೇವ್‌ತೆ ಇನಖ್ವಾಜೆ ಶಿಷ್ಯರ್ ಖ್ವಾರು ಮ್ಹುಶೀಥಿ ಭರೈಗಯು.

21 ಯೇಸುನೆ ಇವ್ವುನ, “ತುಮೂನ ಸಮಾಧಾನ್ ಹುವಾದೆ. ಬಾನೆ ಮನ ಮೋಕ್‌ಲ್ಯೊತೆ ಇಮ್ಮಸ್, ಮೇಬಿ ತುಮೂನ ಮೋಕ್ಲಸ್” ಕರಿ ಬೋಲ್ಯೊ.

22 ಅಮ್ ಬೋಲಾನ ಬಾದ್‌ಮ, ಯೇಸುನೆ ಇವ್ವಾಪರ್ ಫೂಕಿನ್, “ಅಲ್ಲೇವೊ ಪವಿತ್ರಾತ್ಮನ.

23 ತುಮೆ ಕಿನು ಪಾಪ್ ಮಾರ್ಪ್ ಕರೋಸ್ಕಿ, ಇವ್ವು ಪಾಪ್ ಮಾರ್ಪ್ ಉಶೆ; ಅಜ್ಜು ತುಮೆ ಕಿನು ಪಾಪ್ ಮಾರ್ಪ್ ಕೋ ಕರೋನಿಕಿ, ಇವ್ವು ಪಾಪ್ ಮಾರ್ಪ್ ಕೋ ಉಶೇನಿ” ಕರಿ ಬೋಲ್ಯೊ.

ಯೇಸು ಅಜ್ಜು ತೋಮ

24 ಯೇಸು ಆಯೋತೆ ತದೆ, ಭಾರ ಶಿಷ್ಯರಾಮ ಏಕ್ ಹುಯಿರೊಡ್ಲೋತೆ ದಿದುಮಕರಿ ತೋಮ ಇವ್ವಿ ಜೋಡೆ ಕೊಠೋನಿ. 'ದಿದುಮ' ಕತೊ ಅವಳಿಜವಳಿ ಕರಿ.

25 ಇನಖ್ವಾಜೆ ಬಿಜ್ಜಾಖ್ವಾರ ಶಿಷ್ಯರಾನೆ, "ಹಮೆ ಪ್ರಭುನ ದೇಖ್ಲಿ!" ಕರಿ ಇನ ಬೋಲ್ಯೊ.

ಕತೋಬಿ ತೋಮನೆ, "ಮೇ ಇನ ಹಾತ್‌ಮ ಮೇಕೇಠಿ ಹುಯೂತೆ ಪೋಡಾನ ದೇಖಿನ್, ಯೋ ಮೇಕೆ ಮರೈತೆ ಝಗೋಮ ಮಾರಿ ಅಂಗ್‌ಳಿ ಘಾಲಿನ್, ಇನಿ ಪಾಖ್‌ಳಿಮ ಮಾರಹಾತೇಠಿ ಛಿಮಾಶೆ ತುಮಾರಿ ವಾತೇನ ನಂಬುಕೊಯ್ಲಿ" ಕರಿ ಬೋಲ್ಯೊ.

26 ಆಟ್ ದನ್ ಬಾದ್‌ಮ, ಇನ ಶಿಷ್ಯರ್ ಪಾಲ್ತು ಮಹಿ ಥಾತೆ ತದೆ, ತೋಮಾಬಿ ಇವ್ವಿ ಜೋಡೆ ಥೊ. ಬಾಕಲ್ ಮೂಚ್ಚಿರೊಡ್ಲೊ, ತದೆ ಯೇಸು ಐನ್, ಇವ್ವ ಇಚ್‌ಮ ಭೀರಿನ್, "ತುಮೂನ ಸಮಾಧಾನ್ ಹುವಾದೆ" ಕರಿ ಬೋಲ್ಯೊ.

27 ಅನಕೇಡೆಥು ಯೇಸುನೆ ತೋಮನ, "ತಾರಿ ಅಂಗ್‌ಳಿನ ಹಜ್ಜ ಮೈಲಿನ್, ಮಾರ ಹಾತ್‌ಲೀಮಿನ್ ದೇಕ್; ತಾರ ಹಾತ್‌ಖ್ವಾಮ್ಪೆ ಕರೀನ್, ಮಾರಿ ಪಾಖ್‌ಳಿಮ ಘಾಲ್, ವಿಶ್ವಾಸ್‌ಕೊಂತೆ ನಕೊ ರಡ್ಲೆ, ವಿಶ್ವಾಸ್ ಕರ್!" ಕರಿ ಬೋಲ್ಯೊ.

28 ತೋಮನೆ ಯೇಸುನ, "ಮಾರೊ ಪ್ರಭು, ಮಾರೊ ದೇವ್!" ಕರಿ ಜವಾಬ್ ದಿದೊ.

29 ಯೇಸುನೆ ಇನ, "ತೂ ಮನ ದೇಖ್ಲೊತೆ ಇನಖ್ವಾಜೆ ವಿಶ್ವಾಸ್ ಕರೊ; ಕತೋಬಿ ಮನ ದೇಖಾಕೊಯ್ಲಿತೆ ವಿಶ್ವಾಸ್ ಕರಾವಾಳುಸ್ ಖ್ವಾಚಮಾಬಿ ಧನ್ಯರ್" ಕರಿ ಬೋಲ್ಯೊ.

ಆ ಪುಸ್ತಕಾನು ಉದ್ದೇಶ್

30 ಯೇಸುನೆ ಬಿಜ್ಜೂಬಿ ಕೈಯೆಕ್ಕಿ ಅದ್ಭುತ್ ಕಾಮ್ನ ಖ್ವಾರು ಇನ ಶಿಷ್ಯರನ ಖ್ವಾಮ್ಪೆ ಕರೊವತ್ರ ಅಖ್ವಾಕಾಮ್ನ ಥೋಡುಬಿ ಅದ್ಭುತ್‌ಖ್ವಾರು ಆ ಪುಸ್ತಕ್‌ಮ ಕೋ ಲೀಖ್ಲಿರೊ.

31 ಕತೋಬಿ ಯೇಸುಸ್ ಕ್ರಿಸ್ತ ಕರೀಬಿ, ದೇವ್‌ನೊ ಛಿಯೊ ಕರೀಬಿ ತುಮೆ ನಂಬಿನ್, ಇನ ನಾಮ್‌ಥಿ ತುಮೂನ ಜಾನ್ ಮಳಾದೆ ಕರಿ ಅತ್ರಾಖ್ತರು ಲೀಖ್ಪಿರ್ಲ್ಲ್ಯಾಸ್.

21

ಯೇಸು ಖ್ವಾತ್ ಶಿಷ್ಯರ್‌ನ ದೆಖಾಯೆತೆ

1 ಅನ ಬಾದ್‌ಮ, ಯೇಸು ತಿಬೇರಿಯ ದರ್ಯಾಕ್‌ನ ಇನ ಶಿಷ್ಯರ್‌ನ ದೆಖಾಯೆ. ಯೋ ಅಮ್ ಫಾಲ್ಯುತೆ.

2 ಸೀಮೋನ್ ಪೇತ್ರಬಿ, ದಿದುಮಕರಿ ತೋಮಾಬಿ, ನತಾನಿಯೇಲ್ ಆ ಗಲಿಲಾಯನು ಕಾನಾ ಕರಿ ಗಾಮ್‌ವಾಳೊ, ಜೆಬೆದಾಯನ ಛಿಯ್ಯಾ ಅಜ್ಜು ಯೇಸುನ ಬಿಜ್ಜ ಬೇ ಶಿಷ್ಯರ್ ಥಾ.

3 ಸೀಮೋನ್ ಪೇತ್ರನೆ ಇವ್ಣುನ, “ಮೇ ಮಾಲ್ಲಾಲಾ ಖ್ವಾವಾನ ವಳ್ಳೊಜ್ಜವುನ್” ಕರಿ ಬೋಲ್ಯೊ.

ತದೆ ಇವ್ಣೆ “ಹಮೇಬಿ ತಾರ ಜೋಡೆ ಐಯೇಸ್” ಕರಿ ಇನ ಬೋಲ್ಯೊ ಇವ್ಣೆ ಜೈನ್, ಡೋಣ್ ಚಡ್ತ್ಯಾ ಕತೋಬಿ ಯೋ ರಾತ್ ಅಖ್ಣು ಏಕ್ ಮಾಲ್ಟುಬಿ ಮಳ್ಳುಕೊಯ್ನಿ.

4 ವ್ಹಾಣು ಹುವ್ವಾದೀನ್, ಯೇಸು ಕನಾರೆಕನ ಭಿಯೋಥೊ; ತೋಬಿ ಶಿಷ್ಯರ್‌ನ ಯೋ ಯೇಸು ಕರಿ ಮಾಲುಮ್ ಕೋ ಪಡ್ತುನಿ.

5 ತದೆ ಯೇಸುನೆ ಇವ್ಣುನ, “ದೋಸ್ತಿವೊ ತುಮೂನ ಮಾಲ್ಟು ಮಳ್ಳುಕಿ ಶು?” ಕರಿ ಪುಲ್ಲಾಯೊ.

ಇವ್ಣೆ “ಕೊಯ್ನಿ” ಕರಿ ಜವಾಬ್ ದಿದಾ.

6 ಯೇಸುನೆ ಇವ್ಣುನ, “ಡೋಣ್‌ನಿ ಖಾವಿ ಬಾಜುಮ ಜಾಳು ನಾಖ್ಯಾತೊ, ತುಮೂನ ಥೋಡು ಮಾಲ್ಲಾಲಾ ಮಳ್ಳಾಶೆ” ಕರಿ ಬೋಲ್ಯೊ. ಇವ್ಣೆ ಇಮ್ತಸ್ ಜಾಳು ನಾಕ್ತಾನ ಘಣು ಮಾಲ್ಲಾಲಾ ಮಳ್ಳುತೆ ಇನಖ್ವಾಜೆ, ಜಾಳಾನ ಪಾಲ್ಟು ಮಹಿ ಖೇಚಾನ ಕೋ ಹುಯೂನಿ.

7 ಯೇಸುನೊ ಪ್ಯಾರ್‌ನೊ ಶಿಷ್ಯನೆ ಪೇತ್ರನ, “ಯೋ ಪ್ರಭುಲಾ!” ಕರಿ ಬೋಲ್ಯೊ. ಸೀಮೋನ್ ಪೇತ್ರನೆ ಇನ ಖ್ವಮ್‌ಜಿನ್, ಮಾಲ್ಟು

ಖ್ವಾವಾನಖ್ವಾಜೆ ಪೇತ್ರನೆ ರೋಳ್‌ನಾನ ಕಾಡಿ ಮ್ಹೇಲಿರಾಖ್ಯೊಧೊ ಯೊ ಪಾಳ್ತು ಉಪ್ಪರ್‌ಲ್ಯು ಝಗ್ಗಾನ ಪೇರ್ಟ್ಲೀನ್ ದರ್ರ್ಯಾವ್‌ಮ ಕೂದಿ ಗಯೊ.

⁸ ದರ್ರ್ಯಾವ್‌ನಿ ಕನಾರಿ ದೂರ್ ಶಾತ್ಪಿ ಕೋ ಥೂನಿ, ಖಲಿ ಖ್ಹೋ ಮೀಟರ್ ದೂರ್ ಥೂತೆ ಇನಖ್ವಾಜೆ, ಬಿಜು ಶಿಷ್ಯರ್ ಮಾಲ್ತೊಲು ಭರೈರ್ದೊಡುತೆ ಯೋ ಜಾಳಾನ ಖೇಚ್‌ತು ಹುಯಿನ್, ಡೋಣ್‌ಮಾಸ್ ಆಯು.

⁹ ಇವ್ಣೆ ಡೋಣ್‌ಮಾಡು ಉತ್ರಿನ್, ಕನಾರೆ ಆವಾದಿನ್, ಕೋಲ್‌ಖ್ವಾನಿ ಆಗ್ ಅಜು ಇನಾಪರ್ ಮ್ಹೇಲಿರಾಖ್ಯೊಡುತೆ ಮಾಲ್ತೊಲಾ ಅಜು ಥೋಡು ರೋಟಾನಾಬಿ ದೇಖ್ತು.

¹⁰ ಯೇಸುನೆ ಇವ್ಣನ, “ತುಮೆ ಹಮ್ಮೆ ಧರ್ರ್ಯಾತೆ ಮಾಲ್ತಾವ್‌ಮ ಥೋಡು ಲ್ಯಾವೊ” ಕರಿ ಬೋಲ್ತು.

¹¹ ಸೀಮೋನ್ ಪೇತ್ರನೆ ಡೋಣ್ಣಾ ಮಹಿ ಜೈನ್, ಜಾಳಾನ ಕನಾರಿಕನ ಖೇಚಿ ಲಾಯೊ. ಯೋ ಏಕ್‌ಖ್ಹೊತೀನ್‌ಉಪ್ಪರ್ ಅಡೈವಿಖ್ಹೊಮೋಟಾ ಮಾಲ್ತಾಡಿ ಭರೈರ್ದೊಡು, ಎತ್ತುಬಲ್ಲ ಮಾಲ್ತೊಲು ರ್ದಯುತೋಬಿ ಜಾಳು ಘಟ್ಟುಕೊಯ್ತು.

¹² ಯೇಸುನೆ ಇವ್ಣನ “ಐನ್, ಖಾಣು ಖಾವೊ” ಕರಿ ಬೋಲ್ಯೊ. ಯೋ ಪ್ರಭುಸ್ ಶಿಷ್ಯರ್‌ನ ಮಾಲುಮ್ ಥೂತೆ ಇನಖ್ವಾಜೆ, “ತೂ ಕೋಣ್?” ಕರಿ ಇವ್ಣಾಮ ಕಿನೇಬಿ ಪುಲ್ಲಾವಾನಿ ಭಾಲ್ ಕೋ ಕರ್ರ್ಯನಿ.

¹³ ಯೇಸುನೆ ಐನ್, ರೋಟಾನ ಪಾಡೀನ್, ಇವ್ಣನ ದಿದೊ; ಇಮ್ಮಸ್ ಮಾಲ್ತಾನಾಬಿ ಪಾಡೀನ್ ದಿದೊ.

¹⁴ ಯೇಸು ಮರಿನ್, ಜಿವ್ಣೊಹುಯಿನ್ ಉಠಾನ ಬಾದ್‌ಮ ಇನ ಶಿಷ್ಯರ್ ದೆಖಾಯೊತೆ ಆ ತೀನ್ನೆ ಹಲ್ಲ.

ಯೇಸು ಅಜು ಪೇತ್ರ

¹⁵ ಇವ್ಣೆ ಖಾಣು ಖಾವಾನ ಬಾದ್‌ಮ, ಯೇಸು ಸೀಮೋನ್ ಪೇತ್ರನ, “ಯೋಹಾನ್ನ ಲಿಯೊ ಸೀಮೋನ್, ತೂ ಅವ್ಣೆಥೀಬಿ ಜಾಖ್ತುತ್ ಮನ ಪ್ಯಾರ್ ಕರಾಸ್ಕಿಶು?” ಕರಿ ಪುಲ್ಲಾಯೊ.

ಪೇತ್ರನೇ, “ಓಹೋಲಾ, ಪ್ರಭು, ಮೇ ತುನ ಪ್ಯಾರ್ ಕರುಸ್” ಕರಿ ಬೋಲ್ಯೊ.

ತದೆ ಯೇಸುನೆ ಇನ, “ಮಾರು ಮೇಂಡಾನ್ ಚೆಲ್ಕಾವ್ ಚರಾವ್” ಕರಿ ಬೋಲ್ಯೊ.

16 ಬೇನೆ ಹಲ್ಲ ಯೇಸುನೆ ಪೇತ್ರನ, “ಯೋಹಾನ್ ಛಿಯ್ಯಾ ಸೀಮೋನ್, ತೂ ಮನ ಪ್ಯಾರ್ ಕರಾಸ್ಕಿಶು?” ಕರಿ ಬೋಲ್ಯೊ.

ತದೆ ಇನೆ, “ಓಹೋಲಾ, ಪ್ರಭು ಮೇ ತುನ ಪ್ಯಾರ್ ಕರೂಸ್ಕರಿ ತುನಾಸ್ ಮಾಲುಮ್” ಕರಿ ಬೋಲ್ಯೊ.

ಯೇಸುನೆ ಇನ, “ಮಾರ ಮೇಂಡವಾನ್ ಖದರ್ ಕರ್” ಕರಿ ಬೋಲ್ಯೊ.

17 ತೀನ್ನೆಹಲ್ಲ ಯೇಸುನೆ, “ಯೋಹಾನ್ ಛಿಯ್ಯಾ ಸೀಮೋನ್, ತೂ ಮನ ಪ್ಯಾರ್ ಕರಾಸ್ಕಿಶು?” ಕರಿ ಪುಲ್ಲಾಯೊ.

ಯೇಸುನೆ ತೀನ್ನೆಹಲ್ಲ ಇನ, “ತೂ ಮನ ಪ್ಯಾರ್ ಕರಾಸ್ಕಿಶು?” ಕರಿ ಪುಲ್ಲಾವತಾನ, ಪೇತ್ರನ ದುಖ್ಹಾಯು. ತದೆ ಇನೆ, “ಪ್ರಭು, ತುನ ಖ್ವಾರುಸ್ ಮಾಲುಮ್; ಮೇ ತುನ ಪ್ಯಾರ್ ಕರುಸ್ ಕರೀಬಿ ತುನ ಮಾಲುಮ್!” ಕರಿ ಬೋಲ್ಯೊ.

ಯೇಸುನೆ ಇನ, “ಮಾರ ಮೇಂಡವಾನ್ ಖದರ್ಕರ್” ಕರಿ ಬೋಲ್ಯೊ.

18 ಮೇ ತುನ ಖ್ವಾಚ ಬೋಲುಕರುಸ್, ತೂ ಜಾನ್ಮಮಾನ್ ಥೋತೆ ತದೆ, ತಾರಿ ಕಂಬರ್ನ ಭಾಂದಿಲೀನ್, ತುನ ಕಿಜ್ಜಾ ಅಟ್ಟು ಲಾಗಸ್ಕಿ ಹಿಜ್ಜಾ ಜಾತೋಥೊ; ಕತೋಬಿ ತೂ ಬುಡೋ ಹುಯಿಚ್ಚೆತ್ತೆ ತದೆ ತಾರ ಹಾತ್ತ್ ಪಪ್ಪಾರೀಶ್, ಅಜ್ಜು ಬಿಜ್ಜೇಕ್ ಜಣೊ ತಾರಿ ಕಂಬರ್ನ ಭಾಂದೀನ್, ತುನ ಅಟ್ಟು ಲಾಗಕೊಂತೆ ಹೀಕಡ್ ತುನ ಲೀಜಾಶೆ” ಕರಿ ಬೋಲ್ಯೊ.

19 ದೇವ್ ಮಹಿಮೆ ಕರಾನಖ್ವಾಜೆ ಪೇತ್ರ ಕಿಮ್ಮು ಮೋತ್ ಮರ್ಶೆ ಕರಿ ಆ ವಾತೇಥಿ ಯೇಸುನೆ ಬೋಲ್ಯೊ. ಅಮ್ ಬೋಲಾನ ಬಾದ್‌ಮ, ಯೇಸುನೆ ಇನ, “ಮಾರ ಪೀಲೆ ಆವ್!” ಕರಿ ಬೋಲ್ಯೊ.

ಯೇಸು ಅಜ್ಜು ಬಿಬೇಕ್ ಶಿಷ್ಯ

20 ಪೇತ್ರ ಪೀಠೆ ಫರಿ ದೇಖಿನ್, ಯೇಸುನೊ ಪ್ಯಾರಾನೊ ಶಿಷ್ಯ ಇವ್ವ ಪೀಠೆ ವಳ್ಳಾವಾತೆ ದೇಖ್ಯೊರಾತ್ತ್ ಖಾಣು ಖಾವಾನಿ ವಖ್ವತ್‌ಮ ಯೇಸುನಿ ಛಾತಿಕನ ಝುಕಿನ್, “ಪ್ರಭು, ತುನ ಧೋಕೇಥಿ ಧರಿದಿಶೈತೆ ಕೋಣ್?” ಕರಿ ಪುಲ್ಲಾಯೋತೆ ಯೋಸ್ ಶಿಷ್ಯ.

21 ಯೋ ಶಿಷ್ಯನ ದೇಖಿನ್, ಪೇತ್ರನೆ ಯೇಸುನ, “ಪ್ರಭು ಅನಿ ಬಾರೇಮ ಶಾತ್?” ಕರಿ ಪುಲ್ಲಾಯೊ.

22 ಯೇಸುನೆ ಇನ, “ಮೇ ಆವಾತೋಡಿ, ಆ ಜಿವ್ತೊ ರ್ವೈವ್ವುಕರಿ ಮನ ಮನ್ ರ್ವಯೂತೊ, ಇನೇಥಿ ತುನ ಶಾತ್? ತೂ ಮಾರ ಪೀಠೆ ಆವ್” ಕರಿ ಜವಾಬ್ ದಿದೊ.

23 ಅನೇಥಿ ಯೋ ಶಿಷ್ಯ ಮರ್‌ಶೆಕೊಯ್ನಿ ಕರಿ ಬೋಲಾನಿ ವಾತೆ ಯೇಸುನ ಬೈಯೇವ್‌ಮ ಪೈಲಿಗಯು. ಯೋ ಮರ್‌ಶೆಕೊಯ್ನಿ ಕತೋಬಿ ಯೇಸುನೆ ಇನ ಬೋಲ್ಯೊಕೊಯ್ನಿ, “ಮೇ ಆವಾತೋಡಿ, ಯೋ ಜಿವ್ತೊ ರ್ವೈವ್ವುಕರಿ ಮನ ಮನ್ ರ್ವಯೂತೊ, ಇನೇಥಿ ತುನ ಶಾತ್?” ಕರೀಶ್ ಯೇಸುನೆ ಬೋಲ್ಯೊತೆ.

24 ಆ ಖ್ವಾರಿ ಬಾರೇಮ ಲೀಖಿನ್, ಅನಿ ಬಾರೇಮ ಸಾಕ್ಷಿ ಬೋಲವಾಳೊ ಶಿಷ್ಯ ಆಸ್. ಯೋ ಬೋಲ್ಯೊತೆ ಖ್ವಾಚ್‌ಸ್ ಕರಿ ಹಮೂನ ಮಾಲುಮ್.

ಖ್ವತಮ್

25 ಅತ್ರೇಸ್ ಕಾಹೆತೆ, ಯೇಸುನೆ ಕರ್ಯತೆ ಬಿಜೂಬಿ ಕೈಯೆಕ್ಕಿ ಛಾ. ಯೋ ಖ್ವಾರಾನ ಏಕೇಕ್ ಕರಿ ಲೀಖ್ಯೊತೋ, ಲೀಖಾವ್ವುತೆ ಪುಸ್ತಕ ಖ್ವಾರು ಹಿಡಿ ಜಗತ್ತಸ್ ಬಶ್ ಕೋ ಉಶೇನಿ ಕರಿ ಮೇ ಸೋಚುಸ್.

ದೇವಿ ಖಾಚಿ ವಚನ್

The New Testament in the Vaagri Booli language of India: ದೇವಿ ಖಾಚಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವಿ ಖಾಚಿ ವಚನ್ ವಿಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06